


Vinay Avasthi Sahib Bhuvan Vani Trust Donations



श्रीनिकुञ्जविहारिणे नमः।

# ब्रजविलास ।

श्रीब्रजवासीदासकृत.



यह ग्रन्थ अत्यन्तशुद्धतापूर्वक

टिप्पणी सहित,

खेमराज श्रीकृष्णदासने

बंबई

निज "श्रीवेङ्कटेश्वर" स्टीम प्रेसमें

मुद्रितकर प्रसिद्ध किया ।

कार्तिक संवत् १९६३, शके १८२८.

रजिस्टरी हक "श्रीवेङ्कटेश्वर" यंत्राध्यक्षने रक्खा है.



## प्रस्तावना ।



श्रीब्रजवासीदासजी महाराजका निर्माण करा यह “ ब्रजविलास ” ग्रंथ कृष्णचरित्रोंमें सबसे चढ बढकै है, कैसाही उदास क्यों न हो इस को हाथमें लेतेही उसकी उदासीका फिर पता कहाँ ? फिर तो प्रेम पूरित हो, अश्रुपातयुत नेत्रसे साक्षात् कृष्णस्वरूप दर्शनका अनुभव प्रत्यक्ष लेने लगता है । अतएव इस ग्रंथको अनेकस्थानोंमें अनेक यंत्रालयाधीशोंने छपा है और छापते जातेहैं. परंतु संवत् १९४६ में हमने प्राचीन २ और नवीन २ पुस्तकोंके आश्रयसे आयुर्वेदोद्धारक पं० दत्तरामचौबे व पं० कृष्णबिहारीशुक्लजीसे शोधन करा और जहाँ २ इसके कठिन पद हैं उनपर अंक देके नीचे टिप्पणी करदीनी हैं. ऐसा उत्तम छपा है कि, न कहीं छपा है न कहीं मिलनेका. जिनके पास यह पुस्तक होगी वो निस्संदेह इसको कबूल करैंगे. महाशयगण ! बहुतसे प्रतिपक्षियोंने इसकी नकल छापी परन्तु ( काचः काचो मणिर्मणिः ) वो बात कहाँ ? यद्यपि हमने एक बहुत बड़े अक्षरकी छापी है और एक उससे छोटी मध्यम अक्षरकी छापी है और अब देशाटन करने वालोंकी सुगमताके लिये यह छापी है. कारण यहहै कि, जो पहला बड़ा तथा फिर मध्यम टैपमें होनेके कारण प्रत्येक साधारणको कीमत देना अति कठिन था इसवास्ते परमसुवाच्य और ललित अक्षरोंमें यह छापकर उयार करी है. इसमें दो भेद हैं एकतो चिकने कागजपर और दूसरा रफ ( खुरदरा ) कागजपर छपा है और सबको सुगमहो इसवास्ते कीमत भी बहुत सस्ती करदीनी है. बहुत क्या लिखें जो कुछ है सो आपके हाथमें है. देखही रहे हैं प्रत्यक्षमें प्रमाणकी कुछ आवश्यकतानहीं है.


आपका कृपाकांक्षी—खेमराज श्रीकृष्णदास,

“ श्रीवेङ्कटेश्वर ” स्टीम्-यन्त्रालयाध्यक्ष—बंबई.



श्रीः ।

# अथ ब्रजविलासकी लीलाओंका सूचीपत्र.



सं०	नामलीला	पृष्ठांकः
-----	---------	-----------

## पूर्वार्द्धम् ।

१	मंगलाचरण ....	१
२	उपोद्घात ....	५
३	अथ कथाप्रसंगवर्णनम् ....	१३
४	कृष्णजन्मोत्सववर्णन ....	२३
५	कृष्णकीछठीवर्णन ....	२७
६	कुरताटोपीवर्णनलीला ....	२८
७	पूतनावध लीला ....	३१
८	कागासुरवध लीला ....	३४
९	शकटासुरवध लीला ....	३७
१०	तृणावर्तवध लीला ....	३८
११	अन्नप्राशन लीला ....	४०
१२	नामकरण लीला ....	४४
१३	वर्षगांठलीला ....	४७
१४	ब्राह्मण लीला ....	५०
१५	चंद्रप्रस्ताव लीला ....	५३
१६	पुरातन कथा लीला ....	५४
१७	कर्णछेदन लीला ....	५५
१८	माटीखान लीला ....	५७
१९	शालिग्राम लीला ....	५९
२०	अन्हवावन लीला ....	६०

सं०	नामलीला	पृष्ठांकः
२१	भोजनकरन लीला ....	६५
२२	पयलुडावन लीला ....	६६
२३	चौगानखेलन लीला ....	६७
२४	माखनचोरी लीला ....	६९
२५	दावरी बंधनलीला ....	८५
२६	आँखमिचौली लीला ....	९५
२७	वृन्दावनगमन लीला ....	९७
२८	वत्सासुरवध लीला ....	१०२
२९	धेनुदुहन लीला ....	१०४
३०	मीतीबोनेकी लीला ....	१०६
३१	बकासुरवध लीला ....	१०७
३२	चकईभौरा खेलन लीला ....	११२
३३	राधाजूकी प्रथम मिलन लीला ....	११३
३४	श्लोक-गीतगोविन्द ....	११६
३५	अघासुरवध लीला ....	१२३
३६	ब्रह्माके मोहकी लीला ....	१२६
३७	गोदोहन लीला ....	१३४
३८	धेनुकवध लीला ....	१४५
३९	कालीदमन लीला ....	१५१
४०	दानानलवर्णन लीला ....	१६९
४१	प्रलम्बासुरवध लीला ....	१७३
४२	पनिघट लीला ....	१७५
४३	चीरहरण लीला ....	१८८
४४	वृन्दावनवर्णन लीला ....	१९८
४५	द्विजपत्नी याचन लीला ....	२०४
४६	गोवर्द्धन लीला ....	२१२
४७	नन्दएकादशी वरुण लीला ....	२३५
४८	वैकुण्ठदर्शन लीला ....	२३९



सं०	नामलीला	पृष्ठांकः
४९	दानलीला	२४३
अथोत्तरार्द्धप्रारंभः।		
५०	गोपिनके प्रेमकी उत्तम अवस्था लीला	२७३
५१	स्नानविधि लीला	२९३
५२	वाटके मिलनेकी लीला	३१३
५३	सकेतके मिलनेकी लीला	३१८
५४	प्यारीके घरमिलनकी लीला	३२६
५५	गवैयाजघिरह लीला	३३३
५६	परस्पर अभिलाष लीला	३४१
५७	भृंगारभूषण वर्णन लीला	३४८
५८	नयनअलुराग लीला	३५५
५९	मुरली लीला	३५९
६०	रासलीला	३६९
६१	अन्तर्धान लीला	३८२
६२	महामंगलरास लीला	३९१
६३	मानचरित्र लीला	४००
६४	मध्यममान लीला	४१६
६५	शुद्धमान लीला	४२६
६६	हिण्डोरा वर्णन लीला	४३२
६७	फाल्गुनवर्णन लीला	४३५
६८	सुदर्शन शापमोचन लीला	४४८
६९	शंखचूडवध लीला	४५०
७०	वृषभासुरवधलीला	४५२
७१	केशीवध लीला	४५५
७२	व्योमासुरवधलीला	४५७
७३	अक्रूरआगमन लीला	४६५
७४	मथुरागमन लीला	४७३

सं०	नामलीला	पृष्ठांक.
७५	रजक वध लीला ....	४८४
७६	मल्लयुद्ध लीला ....	४९१
७७	कंसासुरवध लीला ....	४९५
७८	वासुदेव गृहउत्सव लीला ....	५०१
७९	कुचिजागृहप्रवेश लीला ....	५०३
८०	नंदविदा लीला ....	५०५
८१	ब्रजकी विरह लीला....	५१०
८२	श्रीकृष्णजीकी यज्ञोपवीत लीला ....	५३१
८३	उद्धवजीकी विदा लीला ....	५३३
८४	उद्धवजीकी ब्रजागमन लीला ...	५३०
८५	उद्धवजीकी मथुरागमन लीला ...	५६४

इति सूचीपत्र ।

पुस्तक मिलनेका ठिकाना-

खेमराज श्रीकृष्णदास,

“ श्रीविष्णुटेश्वर ” छापाखाना, खेतवाड़ी-बंबई.



श्रीः ।

श्रीनिकुञ्जविहारिणे नमः ।

## अथ ब्रजविलास ।

सोरठा-होत गुणनकी खान, जाके गुण उर गनतहीं ॥

द्रवो सु दयानिधान, बासुदेव भगवंत हरि ॥ १ ॥

मिटत तापत्रय फांसि, जासु नाम सुखसों कहत ॥

वन्दौं सो शुभराशि, नन्दसुवन सुन्दर सुखद ॥ २ ॥

अरुण कमल दलनैन, गोपवृन्द मंडन शुभग ॥

करहु सो मम उर ऐन, पीताम्बर वर वेणुधर ॥ ३ ॥

वन्दौं जगत आधार, कृष्णाग्रज बलदेवपद ॥

अभिमत फल दातार, नीलाम्बररेवतिरमण ॥ ४ ॥

श्रीगुरु कृपानिधान, वन्दौं पद महिमाथ धरि ॥

जासु वचन जलयान, नर चढ़ि भवसागर तरहि ॥ ५ ॥

वंदौं संत कृपाल, पद सरोजरज राखि शिर ॥

जग हितरत शुभमाल, जिन निजगुण हरि वशकरे ॥ ६ ॥

पुनि वंदौं ब्रजदेश, परमरम्य पावन परम ॥

महिमा जासु सुदेश, राधानाथ विहारथल ॥ ७ ॥

प्रथम कृष्णको तात मनाऊं । श्रीवसुदेव चरण शिरनाऊं ॥

बहुरि देवकी पद जलजाता । वंदन करौं कृष्णकी माता ॥

इन्ते और कौन बड़भागी । ब्रह्म धरयो नरतलु जिनलागी ॥

वंदौं नंद महरके चरणा । सहित यशोमति मंगल करणा ॥

१ अध्यात्म । अधिभूत । अधिदेव । २ समूह । ३ वांछित । ४ नौका ।

५ संसारसागर । ६ कमल ।



जिनकी महिमा भाग्य बढ़ाई । निगमांगम शिव शारद गार्ह ॥  
 वंदौ रोहिणि पद जलजाता । कृष्णाग्रज बलदेवकी माता ॥  
 कीरतियुत वृषभाल गोषवर । वंदौ चरण कमल रज शिरधर ॥  
 तात मात राधा रानीके । विभुवन ठाकुर ठाकुरानीके ॥  
 कृष्ण कमल हगकी कमलाके । कलुष विभंजन सब विमलाके ॥  
 वंदौ श्रीराधापद अम्बुज । जिनके ध्यान भिडत भव भैरुज ॥  
 होत कृष्ण सहजहि वश ताके । प्रेमसहित गुण गावत जाके ॥  
 वन्दौ सो वृषभाल दुलारी । कृष्ण प्राण जीवन धन प्यारी ॥  
 दोहा-राधाकृष्ण पदाम्बुजन, वन्दौ मंहि शिर टेक ॥

ब्रजविलास हित दौयतन, प्रगट कियेहैं एक ॥

सो०-वन्दौ युगल किशोर, रूपराशि आनंदधन ॥

दोऊ चंद चकोर, प्रीति रीति स्सबश सदा ॥

अपर गोष गोपी गोपाला । जिनके सँगा विचरहि नँदलाला ॥  
 गाय बच्छ बालक ब्रजवासी । जिनके सखा कृष्ण अविनासी ॥  
 और जात जो ब्रजहि निवासी । वंदौ सकल सुकृतकी रासी ॥  
 मथुरापुरी नारि नर नागर । गोकुलादि जो ग्राम उजागर ॥  
 श्रीयमुनासरि पर्व पुनीता । जासु दरश नहिं यमपुर भीता ॥  
 पर्वत वापी कूप तडाँगा । श्रीवृंदावनादि वन बागा ॥  
 खँग मृग जलचरजीव विभागा । वंदौ सकल सहित अनुरागा ॥  
 वंदौ गिरि गोवर्द्धन देवा । अपर देव तिन सम नहिं केवा ॥  
 सुरपति भेटि जाहि हरिपूजा । आनदेव तिन समको दूजा ॥  
 अति रमणीय रेत यमुना तट । उपवन अमित सुभग वंशीवट ॥  
 जहँ जहँ श्रीहरि धेनु चराई । सुन्दर श्यामल कुँवर कन्हवाई ॥  
 रास विलास जहां हरि कीन्हों । भक्तवच्छल भक्तन सुख दीन्हों ॥

दो०-जड़चेतन ब्रजदेशके, तूँण तरु मँहिरज जेत ॥

वंदौ कीट पतंग सब, पुनि पुनि प्रीति समेत ॥

१ वेद पुराण । २ पृथ्वी । ३ नावडी । ४ तलाव । ५ पखेरु । ६ इन्द्र ।  
 ७ तिनका । ८ पृथ्वी ।



सो०—ब्रजजनपद शिरराख, विनय करौं करजोरि पुनि ॥

मोमनको अभिलाष, पूरण करिये जानजन ॥

ब्रजविलास कछु कहौं बखानी । करन पुनीत जान निजवानी ॥  
 सो तबलों नहि उरमें आवै । जबलग तुम्हरी कृपा न पावै ॥  
 मैं मन बच क्रम तुम्हरी दासा । ताते पुरवहु मोरी आसा ॥  
 यद्यपि मति इतनी मोहि नहीं । करौं उक्ति कछु निज तेहि माहीं ॥  
 तहां एक मैं कियो विचारा । या विधि बल अपने उर धारा ॥  
 श्रीशुकदेव कही हरि लीला । सुनी परीक्षित सब गुणशीला ॥  
 सूरदास सोइ हरि रससागर । गाथो बहुविधि परम उजागर ॥  
 फैल रह्यो सो त्रिभुवन माहीं । गावत सुनत सुयश हरषाहीं ॥  
 विविध प्रकार चरित हरिकेरे । तामहि वरणे सूर घनेरे ॥  
 सो वह प्रीति सीति सुखदाई । मेरे मन अतिशय करि भाई ॥  
 सो तो कथा अभित विस्तारा । मोपै पायो जात न पारा ॥  
 तामें ब्रजविलास सुखदाई । सो कछु कहिहों कर चौपाई ॥  
 दो०—भाषाकी भाषा करौं, क्षमियो कवि अपराध ॥

जिहि तिहिं विधि हरि गाइये, कहत सकल श्रुतिसाध ॥

सो०—हरिपद प्रीति न होये, विन हरि गुण गाये सुने ॥

अवते छुटत न कोय, विना प्रीति हरिपद भये ॥

ताते मैं सन्तन शिरनाई । गावौं हरियश जन सुखदाई ॥  
 जो ब्रजमें हरि कियो विलासा । सो कछु कहिहों सहित हुलासा ॥  
 यामें इतनी + कथा बखानौं । ताकी सूचनका यह जानौं ॥  
 श्रीवसुदेव देवकी व्याही । चलयौ कंस पहुँचावन ताही ॥  
 तहां भई नभवाणी वाही । सुनिके कंस डण्यो पुनि ताही ॥  
 अठ्यों गर्भ होयगो याके । तेरी मृत्यु हाथ है ताके ॥  
 तब देवकी हतन विचार्यो । करि विनती वसुदेव उवाच्यो ॥

१ कविता । + यहांसे श्रीब्रजवासीदासजी ब्रजविलासकी कथाकी सूचना-  
 करतेहैं । २ आकाशवाणी ।



सब सुत ताहि देन को भाखे । नृप तब दुहुँन वन्दिमें राखे ॥  
 षट् बालक तिनके नृप मारे । पातक भये भूमिपर भारे ॥  
 दुखित गई सो हरिके पासा । हरि ताको जिमि दई दिलासा ॥  
 पुनि संकर्षण गर्भहि आये । तिनको बहुरि रोहिणी जाये ॥  
 सो सब कहिहौं मति अनुमाना । जैसी भांतन सुन्यो पुराना ॥  
 दो०—पुनि भगवान अनादि अज, ब्रह्म सच्चिदानन्द ॥

प्रगट भये वसुदेव गृह, निज इच्छा सुखकन्द ॥  
 सो०—तात मात सुखदैन, सुंदर रूप दिखायकै ॥

कियो परम उरचैन, दूर किये दुखद्वंद्व सब ॥  
 तात मात पुनि जिमि समझाये । लै गोकुल वसुदेव सिधाये ॥  
 यशुदा गोद राखि घनश्यामहि । कन्या तासु गये लै धामहि ॥  
 कंससुर सो कन्या पाई । सो जैसे आकाश सिधार्ह ॥  
 तासु वचन पुनि अति भयमाना । बालकहतन मंत्र तब ठाना ॥  
 बजे नन्दघर अन्द बधाये । ब्रज युवतिन मिल मंगल गाये ॥  
 भयो नन्दघर अति उत्साह । ब्रजवासिनको परम उछाह ॥  
 प्रीति सहित सो सब सुख गैहौ । जितनो निजमति को बल पैहौ ॥  
 बहुरि कंस प्रतना पठाई । सो जैसे हरिके ढिग आई ॥  
 ताहि मारि जननी गति दीन्ही । प्राण पान करि पार्वन कीन्ही ॥  
 कागासुर पुनि जाविधि आयो । ताको पुनि हरि मारि बहायो ॥  
 बहुन्यो शकट चरगते डान्यो । तृणावर्त्तको जाविधि मान्यो ॥  
 अन्न पराशनादि जे कर्मा । किये नन्द जिमि निजकुलधर्मा ॥

दो०—बालचरित्र पवित्र पुनि, जिमि कीने अभिराम ॥  
 जानुं पाणि चलि सुख दियो, तात मातको श्याम ॥

सो०—ब्रज जनके मनमोद, चले बहुरि पाँयन कलुक ॥  
 कीने बालविनोद, नन्द यशोमतिके अजिर ॥  
 गर्ग आय लक्षण पुनि भाषे । पुनि सब ब्रजवासी अभिलाषे ॥

१ माता । २ पवित्र । ३ घुटखन । ४ आंगन ।



पुनि बालनसँग खेलन लागे । बालखेल लीला अनुरागे ॥  
 विप्रपाक जैसे छुई लीनो । चन्दाहेतु बहुरि हठ कीनो ॥  
 कर्णछेदन लीला सुखदाई । कहिहौं सब आनन्द बधाई ॥  
 पुनि हरि खेलत माटी खाई । यशुमति लै सांटी उठिधाई ॥  
 माता आगे मुख जिमि बायो । ताही में त्रिभुवन दिखरायो ॥  
 शालग्राम मेलि सुख लीन्हों । नन्दहि पूजामें सुख दीन्हों ॥  
 अन्हवावनहित जिमि मचलाये । बहुत भांति यशुमति फुसलाये ॥  
 ग्वालन संग बहुरि अनुरागे । माखन चोरीके रस पागे ॥  
 बहुरों माता क्रोध उपायो । भक्तिहेतु दावरी बँधायो ॥  
 यमलाभर्जुन वृक्ष ढहाये । धनद सुतनके पाप नशाये ॥  
 पुनि वनगोचारन मन आन्यो । ग्वालन संग जान हठ टान्यो ॥

दो०—बहुरि जाय वनमें हन्यो, वत्सासुर नँदनन्द ॥

ग्वाल संग आनँद सहित, घर आये सुखकन्द ॥

सो०—सो करिकै विस्तार, प्रेम सहित सब वरणिहौं ॥

निज मतिके अनुसार, ब्रजवासी प्रभुके गुणन ॥

गोदोहन जैसे पुनि कीनो । तात मात ब्रजजन सुख दीनो ॥  
 मोती बये नन्दके धामें । सुर नर लखि चकृत भयेजामें ॥  
 बहुरि जाय वन नन्दकुमारा । बका असुरको वदन विदारा ॥  
 बहुरों बालचरित चित दीने । भौरा चकई खेलन लीने ॥  
 श्रीराधा सों प्रीति बढ़ाई । कीने चरित ललित सुखदाई ॥  
 अथा असुर मान्यो पुनि जाई । ग्वालन संग लाक वन खाई ॥  
 भयो मोह जिमि विधिके मनमें । बालक वत्स हरे तिन वनमें ॥  
 तिनको रूप आप प्रभु कीनो । ब्रजके वासिनको सुख दीनो ॥  
 सो सब कहिहौं कर विस्तारा । अर्धनाशन प्रभु चरित उदारा ॥  
 श्री वृषभानु लली पुनि आई । जैसे हरिसों गाय दुहाई ॥  
 कहिहौं सो रसकथा सुहाई । अति विचित्र जनमन सुखदाई ॥  
 बहुरो धेनुकको वधकीनो । विष जलते ग्वालन रसलीनो ॥

१ कर्णछेदन । २ कुबेर । ३ ब्रह्मा । ४ पाप ।



दो०—पुनि नाथ्यो काली उरग, जलमें पैठि मुरारि ॥

यमुनाजल निर्मल कियो, ब्रजते दियो निकारि ॥

सो०—कियो दावानल पान, राखिलिये ब्रज लोग सब ॥

जिनके कृपानिधान, सदा भक्ति संकटहरण ॥

बहुरि प्रलंब असुर ब्रज आयो । खेलतमें हरि ताहि नशायो ॥

पनघट यमुनातट पुनि जाई । गोपिनसों रसकियो कन्हवाई ॥

चीरहरण लीला पुनि कीनी । कहिहों सकल प्रेम रसभीनी ॥

पुनि वृन्दावनमें सुखशीला । ग्वालनसंग करी जो लीला ॥

वृन्दावनकी महत बढ़ाई । श्रीमुख श्रीबलजू सों गाई ॥

ऋषिपत्निनसों भोजन लीनो । भक्ति दान तिनको प्रभु दीनो ॥

पुनि श्रीगोवर्द्धन गिरिराई । ब्रज थापे सुरपतिहि मिटाई ॥

सुरपति क्रोध कियो यह जानी । वरप्यो प्रलय कालको पानी ॥

तब प्रभु गिरिकैरधरि ब्रज राख्यो । जै जै सब ब्रजवासिन भाख्यो ॥

सो सब अनुपम कथा सुहाई । कृष्ण कृपाते कहिहों गाई ॥

नन्दहि पकरि वरुणके दासा । जिमि लै गये वरुणके पासा ॥

लाये श्याम तहां ते जाई । ब्रजमें भइ आनन्द बधाई ॥

दोहा—बहुरों पुर वैकुण्ठजो, अति पुनीत निजधाम ॥

ब्रजवासिनको करि कृपा, दिखरायो वनश्याम ॥

सो०—सो सब कथा अनूप, अति विचित्र पावन परम ॥

कहिहों मति अनुरूप, सन्तजनन मन भावनी ॥

पुनि जो करी श्याम सुखशीला । अति अद्भुत ब्रजमें रसलीला ॥

श्रीराधा वृषभानु दुलारी । और सकल ब्रज गोप कुमारी ॥

तिन सों मिल श्रीकुंजविहारी । रस श्रृंगार लीला विस्तारी ॥

आनंदमयी सकल सुखकारी । गाय तरत भव सब नर नारी ॥

जिमि गोपिन हरिसों मन लायो । प्रेम पंथ दृढकरि दिखरायो ॥

गोरस लै निकसी ब्रजुनारी । जिमि दधि दान लिये वनवारी ॥

१ सर्प । २ माथुरद्विजनकील्ली । ३ गोवर्द्धन ।



भई प्रेम उन्मत्त गुवारी । लोक लाज तनु दशा विसारी ॥  
बहुरि चरित्र कुँवरि राधाके । परम पवित्र हरण बाधाके ॥  
जैसे मिली श्याम सों जाई । बहुरों जैसी प्रीति दुराई ॥  
पुनि संकेत चरित्र विविधवर । किये प्रिया प्रीतम अतिसुन्दर ॥  
गर्व विरह अभिलाष परस्पर । अति रहस्य लीला सुन्दरवर ॥  
कहिहों सकल कथा सुखदाई । भक्ति रसज्ञान के मन भाई ॥

दोहा-देखि मुँकुरमें लाडिली, पुनि जैसो निजरूप ॥

विवश भई सो गायहों, लीला परम अनूप ॥

सो०-पुनि नैनन अनुराग, अरु मुरलीकी प्रियकथा ॥

कहिहों सहित विभाग, प्रेम सुधारससों भरी ॥

बहुरों शरदरैनि अति पावन । श्रीवृन्दावन परम सुहावन ॥  
तहाँ श्याम बाँसुरी बजाई । घर घर ते ब्रज नारि बुलाई ॥  
कियो रास रस रसिक विहारी । भई प्रेम गवित तहँ नारी ॥  
अन्तर्ध्यान चरित तब कीनो । गैर्व गोपिकनको हरिलीनो ॥  
कियो महा मंगल पुनि रासा । बाढ्यो परमानन्द हुलासा ॥  
पुनि जलकौलि करी मनभावन । कहिहों चरित सकल अतिपावन ॥  
मान चरित लीला सुखदाई । करी बहुरि जिमि कुँवर कन्हवाई ॥  
विस्तर सहित कहों सो वरनी । भरी प्रेमरस आनंद करनी ॥  
बहुरों जाय हिंडोला झूले । भये सकल गोपिन अनुकूले ॥  
ऋतु वसंत फागुन जब आयो । कियो फाग रंग सब मन भायो ॥  
सो रसकथा सकल सुखदानी । अति समान सब कहों बखानी ॥  
पुनि विद्याधर शाप नशायो । अजगर तनु ते ताहि छुड़ायो ॥

दो०-शंखचूड मारयो बहुरि, अधम निशाचर नीच ॥

पुनि मारयो वृषभा असुर, हरि ब्रजवासिन बीच ॥

सो०-वध्यो बहुरि गोपाल, केशी व्योमा असुर जिमि ॥

दुष्टदलन नंदलाल, कहिहों चरित पुनीत सब ॥

१ भक्तिरसके जाननेवारे । २ दर्पण । ३ अभिमान । ४ जलविहार ।  
५ मानलीला । ६ सुदर्शनविद्याधर ।



कर्म धर्म नहिं नीति बखानी । केवल भक्ति प्रेम सुखदानी ॥  
 जानि कृष्णके चरित पुनीता । कहिहैं सुनिहैं सन्तसप्रीता ॥  
 बहुरि कहत दोऊ करजोरी । सुनियो विनय कृपा करि मोरी ॥  
 चूकपरी जो मोतन होई । सुजन सुधारि लीजिये सोई ॥  
 मैं नहिं कवि न सुजान कहाऊं । कृष्णविलास प्रीति करि गाऊं ॥  
 सो विचारके श्रवणन कीजै । काव्य दोष गुण मन नहिं दीजै ॥  
 ऐसे सबको विनय सुनाई । कृष्णचरित वरणों सुखदाई ॥  
 कृष्णचरित आनंदके रासा । मंगल करण हरण भववासा ॥

दो०—विघ्न विनाशन शुभ करण, हरणताप त्रयशूल ॥

चरित ललित नंदनन्दके, सकल सुखनके मूल ॥

सो०—चरण कमल उरधार, श्रीराधा नंदलालके ॥

सुन्दररस आगार, ब्रजविलास अब वरणिहौं ॥

सम्बत शुभ पुराण शत जानौ । तापर और नक्षत्रहि आनौ ॥  
 माघ सुभास पक्ष उजियारा । तिथि पंचमी सुभग शशिवारा ॥  
 श्रीवृत्तसन्त उत्सव दिन जानी । सकल विश्व मन आनंद दानी ॥  
 मनमें करि आनन्द हुलासा । ब्रजविलासको करौं प्रकासा ॥  
 वन्दौं प्रथम कमलपदनीके । श्रीवल्लभ आचारज जीके ॥  
 श्रीलक्ष्मण भट कुँवर उदारा । जन उद्धारन हित अवतारा ॥  
 माया व्याधि मिटाय अनेका । कियो प्रेम मारग दृढ़एका ॥  
 श्रीगोकुलवासि सुख उपजायो । कृष्ण नामको दान चलायो ॥  
 विरहानैलमें सुभग शरीरा । वाणी प्रेम सिन्धु गम्भीरा ॥  
 हरिप्राप्तिकी रीति बताई । विरह रूप करि प्रगट दिखाई ॥  
 विरह भन्यो जिनको सब नेमा । विरह रूप करि जिनको प्रेमा ॥  
 विरहै भरी भक्ति विस्तारी । ताते गोकुल गैल निहारी ॥

दोहा—द्रापरतनु धरि सुरनहित, कृष्ण संहारे दुष्ट ॥

श्रीवल्लभ वषु धरि कियो, प्रेमपथ कलिपुष्ट ॥

१ अठारह । २ सत्ताईस, अर्थात् १८२७ के संवत्में इस ग्रंथको बनायो है ।

३ चंद्रवार । ४ विरहरूप अग्नि ।



सो०—मन वच क्रमसों चित्त, श्रीवल्लभ चरणनलग्यो ॥

वही आश वहि वित्त, वहिसाधन वहि युक्तफल ॥

पुनि श्रीवल्लभ कुलहि मनाऊं । चरणकमल तिनके शिरनाऊं ॥  
 श्रीगोकुलमें जिनको धामा । विश्व विदित सुन्दर गुणग्रामा ॥  
 प्रेम भक्तिकी ज्योति विराजै । तेज प्रताप जगतपर राजै ॥  
 जिनके सदैव देखिये ऐसे । नन्द महारिके सुनियत जैसे ॥  
 तहां कृष्णकी नितनवलीला । बाल विनोद भरी सुख शीला ॥  
 तिनकी शरण जीव जो आवै । तौ दृढ भक्ति कृष्णकी पावै ॥  
 देत श्रवण मग अति सुखदाई । कृष्ण नाम रस सुधा पियाई ॥  
 भक्ति दानको परम उदारा । जगत विदित श्रीगोकुलद्वारा ॥  
 तामहें मंगल वंश मझारी । परम कृपालु दीन दुखहारी ॥  
 श्रीमोहनजी नाम गुसाई । सुन्दर श्याम श्यामकी नाई ॥  
 परम विशाल कमल दल लोचन । दया दृष्टि उरतारि विमोचन ॥  
 मधुर मनोहर शीतल वानी । प्रेम सुधारससों लपटानी ॥  
 दोहा—तिन तीरथपति भधि दियो, कृष्ण नाम मोहि दान ॥

दीन जानि राख्यो शरण, लगिके भेरेकान ॥

सो०—तिनके पद उर राख, ब्रजविलास वर्णन करौं ॥

मोमनको अभिलाष, पूरण करिहैं जानि जन ॥

वन्दतहों सब सूर सुजानै । जिन्हें सूर सभ सबकोउ मानै ॥  
 प्रेम रूप वाणी परकासा । प्रफुलित अम्बुज सुनि हरिदासा ॥  
 कृष्ण रूप बिन और न देख्यो । जगत विषय दृष्टनसम करि लेख्यो ॥  
 राखे नैन सदा करि ध्याना । दिव्य दृष्टि करि सुयश बखाना ॥  
 लीला श्याम जन्म भरगाई । रहस्यकेलि सब प्रगट जनार्ई ॥  
 वाणी भांति अनेक बखानी । कृष्ण प्रेम रस सों लपटानी ॥  
 चढे कठोर मोह वश जेऊ । होत प्रेम वश सुनिके तेऊ ॥  
 कीन्हों अति उपकार जगतको । मासगदयो चलाय भगतको ॥

१ धन । २ घर । ३ अमृत । ४ हृदयको दुःख । ५ मथुरापुरी वा प्रियाम-  
 राज । ६ सूर्य । ७ कमल ।



मोहिं बडाई करि नहि आवै । जिनको गायो सबकोड गावै ॥  
 चरण शीश धरि तिन्हें मनाऊं । यह अपराध क्षमा करि पाऊं ॥  
 मोते यह अति होत ठिठाई । करत विष्णु पदकी चौपाई ॥  
 सो मम दोष न उरमें धरिये । सफल मनोरथ मेरो करिये ॥

दोहा-अब सन्तनकी मण्डली, वन्दतहौं शिरनाय ॥

बिना कृपा जिनकी भये, हरि यश गाय न जाय ॥

सो०-करिहैं मोहि सहाय, गुणगाहक परहित करन ॥

तिनको सहज सुभाय, संतत संत कृपालुचित ॥

संत मण्डलीको शिर नाऊं । जिनकी कृपा विमल मति पाऊं ॥  
 जिनकी कृपा विघ्न सबनाशै । जिनकी कृपा कृष्ण गुणभाशै ॥  
 जिनकी प्रेम भक्ति फल पाई । जिनकी कृपा कुमति मिटिजाई ॥  
 जिनकी कृपा होय गुणनाना । जिनकी कृपा सर्व कल्याणा ॥  
 जिनकी कृपा मोहतम नाशै । जिनकी कृपा ज्ञान परकाशै ॥  
 जिनकी कृपा सकल सुखमूला । होहु सो सन्त मोहिं अनुकूला ॥  
 जय जय जय श्रीकुंज विहारी । नैदंनंदन वृषभानु दुलारी ॥  
 मंगल मूरति आनंद कारी । लीला ललित भक्त भयहारी ॥  
 रूपनिधान प्रेम की रासी । श्रीवृन्दावन धाम निवासी ॥  
 अखिल नाम गुण सुखके धामा । पूरण काम श्याम अह श्यामा ॥  
 युगल किशोर ध्यान उर धरिकै । सुभग कमल पद वन्दन करिकै ॥  
 ब्रजविलास रस परम हुलासा । गावतहै ब्रजबासी दासा ॥

अथ कथाप्रसङ्गवर्णनम् ॥

दोहा-तत्त्व नाम पद परम गुरु, पुरुषोत्तम जगदीश ॥

कृष्ण कमल लोचन सुखद, सकल देव मणि शीश ॥

सो०-वन्दौं नन्दकिशोर, वृन्दावनवासी सदा ॥

श्रीराधा चितचोर, आनंद घन भवभयहरण ॥



कहों कथा सुन्दर सुखदेनी । अर्घहरणी वैकुण्ठ निशेनी ॥  
 कृष्णचरण पंकज रति देनी । जन पावन करती जिमिवेनी ॥  
 श्रीकलिन्दैतनया तट पावन । बसत मधुपुरी परम सुहावन ॥  
 जाकी महिमा सुर मुनि गावैं । तीनिलोक पर वेद बतावैं ॥  
 दरशन ते नर पावन होई । कृष्ण कृपा बिन सुलभ न सोई ॥  
 उग्रसेन तहँ बसै नरेशा । नीतिनिपुण सह धर्म सुवेशा ॥  
 ताको सुवन कंस अतिपापी । असुर बुद्धि भो विश्व संतापी ॥  
 कियो ताँत गहि बन्दीशाला । आपन भयो कंस भूपाला ॥  
 तार्त अनुज तहँ देवक नामा । सुता + तालु देवकी ललामा ॥  
 दई कंस वसुदेवहि ताही । लोक वेदकी रीति विवाही ॥  
 दायज दियो अनेक विधाना । हय गज रथ पट भूषण नाना ॥  
 दासी दास बहुत सँग दीनो । दान मान परिपूरण कीनो ॥

दोहा-तब चढ़ाइ रथ देवकी, आप भयो रथवान ॥

पहुँचावन अति हेतुसों, चलयो सहित अभिमान ॥

सो०-तेहि क्षण गिरा विशाल, होत भई आकाशते ॥

होय कंस को काल, देवकिके सुत आठवें ॥

कंसासुर मुनि वचन अकाशा । भयो चकित मन मिट्यो हुलाशा ॥  
 शत्रु समान देवकी मानी । रथते उतारि पन्यो अभिमानी ॥  
 खँड़ निकालि हाथमें लीन्हों । यह विचार अपने मन कीन्हों ॥  
 अब हीं याहि मारि दुख मेटों । पुनि कलेश करहेको भेटों ॥  
 केश पकरि देवकि गहि लीन्ही । नहिं कछु कानि बहिनकी कीन्ही ॥  
 तब वसुदेव दीन है कहहीं । तिय वध नहीं भूप यश लहहीं ॥  
 बहुरो यह पुनि स्वर्सा तिहारी । राजन कीजै काज विचारी ॥  
 सुन वसुदेव भई नभ बानी । तुमहुं सुनी कछु नाहिं छिपानी ॥  
 ताते उग्र शोच किन करिये । पाछे काहेको दुख भरिये ॥  
 वृक्ष फलै जो विषफल आगे । ताहि बने पहिलेही त्यागे ॥

१पाप । २त्रिवेणी । ३यमुना । ४राज । ५पुन । ६पिता । ७कैदखाना । ८पिताको  
 छोटीभाई । + पुत्री (बेटी) । ९ आकाशवाणी । १० तरवार । ११ बहिन ।



जो नहिं हतौं भाज यह बाला । मिटै न उरसों शोच विशाला ॥  
कन्या और व्याहि तोहिं देहों । याहि मारि उर शोच नशैंहों ॥

दोहा—मुनिजन गुरुजन संगजे, तिन्हहि कछो तिहिकाल ॥

वृथा होत है यज्ञफल, यह न उचित महिपाल ॥

सो०—यहै तुम्हारे मान, आनकदुन्दुभि देवकी ॥

इन्हें न हतिये जान, वेद विरोध न कीजिये ॥

पुनि वसुदेव कछो करजोरी । राजन् सुनिय विनय कछु मोरी ॥

वृथा, देवकीको जनि मारो । याको सुतहै शत्रु तुम्हारो ॥

सब सुत याके हमसों लीजै । जीवदान याको प्रभु दीजै ॥

यह वाचा हम तुमसों भाखैं । चन्द्र सूर साखी दै राखैं ॥

भली बात यह सब दिन जानी । भौवी विवश कंसहू मानी ॥

हारि कीनो चाहैं सो होई । ताहि मिटावन हार न कोई ॥

तिन्हें सहित नृप घर फिरि आये । करि अगोट दोऊ रखवाये ॥

प्रथम पुत्र जब देवकी जायो । लै वसुदेव कंस पहुँ आयो ॥

बालक देखि कंस हँसि दीनो । इन तौ कछु अपराध न कीनो ॥

अठवों गर्भ शत्रु है मेरो । सो दीजो तुम मोहिं सबेरो ॥

यह कहि अपनो पाप क्षमायो । तब वसुदेव हर्षको पायो ॥

ऐसे बाल फेरि जब दीनो । तब वसुदेव गमन हँस कीनो ॥

दोहा—तब ऋषि नारद कंस पहुँ, लिये हस्ततल वीण ॥

गुण गावत गोविन्दके, आये परम प्रवीण ॥

सो०—उख्यो देखिकै कंस, शीशनाइ पद वन्दिकै ॥

बैठाये परशंस, शुभ आसन ऋषि नारदाहि ॥

समाचार जो कछु है आये । सो सब ऋषिको कंस सुनाये ॥

सुनि नृप वचन विहँसि ऋषि बोले । तुम कतरहत शत्रुसों भोले ॥

जाके भय तुम अति भय मानो । अठवों कौन सु तुम कछु जानो ॥



जो वह प्रथमहि आयो होई । दैवचरित्र जान कछु कोई ॥  
आठलकीर खैचि दिखराई । गिनतीमें सब आठों आई ॥  
बह समझाय गये ऋषि ज्ञानी । कंसासुर उर अति भयमानी ॥  
तेहि क्षण बालक फेरि मँगायो । लै वसुदेव तुरतही आयो ॥  
लियो मृदगहि करमे ताही । पटकत भयो शिलापर वाही ॥  
याही विधि षट् बालक मारे । मात पिता अति भये दुखारे ॥  
कहत अहो श्रीपति असुरारी । तुम बिन कासों करहि पुकारी ॥  
यह सन्ताप मिटै कब भारी । बेगि लेहु प्रभु सुरति हमारी ॥  
केहि विधि नाथ राखिये प्राना । करत कंस निरवश निदाना ॥  
दोहा-विपति विनाशन दुख दमन, जन रंजन सुरराय ॥

अब हमको कोऊ नहीं, तुम बिन और सहाय ॥

सो०-विनती प्रभुहि सुनाय, मनमहँ दम्पति दुखित अति ॥

होत न प्रकट जनाय, कंस असुरके त्रासते ॥

भई भूमि जब अधिक दुखारी । बढ्यो पाप असुरनको भारी ॥  
सहि न सकी तब गोतनुधारी । शिव विरंचि पै जाय पुकारी ॥  
सकल सुरनमिलि कियो विचारा । हयते नहि उतरै भुविभारा ॥  
धिनय करिय चलि श्रीपति पाहीं । कृपा करें तब सब दुख जाहीं ॥  
भूमि सहित सुर सकल सिधारे । क्षीर सिंधु तट जाइ पुकारे ॥  
जहँ श्रीपति श्रीसहित निवासी । पुरुषोत्तम अविगति अविनासी ॥  
धेनु अग्र करि विनय सुनाई । जय जय जय त्रिभुवनके साई ॥  
जय सुखकन्द खंत हितकारी । जय जगवन्द्य भूमि भयहारी ॥  
जय जय असुर समूहनिकन्दन । जय जय भक्तनके उर चंदन ॥  
जय जय जय प्रणतारतमोचन । दैत्य दलन सुर शोच विमोचन ॥  
जय जय जय प्रभु अंतर्ग्याप्री । सुन्निय विनय सचराचर स्वामी ॥  
करिये प्रभु सो वेग उपाई । हरिये नाथ भूमि गरुवाई ॥  
दोहा-हरिय मनुजतनु दनुजहति, करियधराणि उद्धार ॥

१ हाथमें । २ छः बालक । ३ पृथ्वी । ४ ब्रह्मा । ५ भगवान् । ६ पृथ्वी ।

७ बोझ । ८ मनुष्यदेह ।



परशत पदपंकज मिटाहि, सकल भूमि अब भार॥  
सो०—पाहि पाहि भगवंत, शरणागत वत्सल हरे ॥

क्षमा करहु अब कंत, दीन दुखित जन जानि हरि ॥  
दीन वचन जब धेनु पुकारी । भई गिरानभ मंगलकारी ॥  
जाहु सकल सुर वर भय त्यागी । धरिहौं नरतनु तुम हित लागी ॥  
प्रथम जन्म देवकी वसुदेवो । मोसन मांगलियो करि सेवा ॥  
तुमसम पुत्र हमारे होई । मैं तिनको वर दीनो सोई ॥  
तैसे नन्द यशोदा जानौ । दूध पियावन उनहिन मानौ ॥  
गर्भ देवकीके अवतरिहौं । बालचरित गोकुलमें करिहौं ॥  
तुमहूं गोप वेष ब्रज होऊं । मम संग सुख पावो सब कोऊ ॥  
यह कहि सुरनैविदा हरि कीन्हो । आयसुयोग शक्ति कहैं दीन्हो ॥  
सप्तम गर्भ देवकी केरा । तहां शेष मम अंश बसेरा ॥  
सो आर्कषणकै क्षण माहीं । राखो गर्भ रोहिणी पाहीं ॥  
शक्ति जबहि हरि आयसु पायो । तत्क्षण ताहि वहाँ पहुँचायो ॥  
हरि चरित्र कछु जान न कोई । जो कछु करन चाहैं सो होई ॥  
दोहा—तब कृपालु जनके सुखद, अविगति कमलाकन्त ॥

निज आगम देवकी उदर, दिय जनाय भगवन्त ॥  
सो०—तनु द्युति बढी अपार, परम प्रकाशित भवन सब॥  
आनन मुकुर निहार, अति प्रसन्न मन देवकी ॥

निजमुख मुकुर देवकी देख्यो । शरद चन्द्र पूरण सम लेख्यो ॥  
मिथ्योतिमिर भ्रम अति सुखपायो । जान्यो कंस कालि हरि आयो ॥  
प्रभु आगमन जानकर देवा । आये सकल जनावन सेवा ॥  
नैभते गर्भ स्तुति सब करहीं । जय जय जय जय जय उच्चरहीं ॥  
जय ब्रह्मा शिव सेव्य सदाई । जय वेदान्त वेद सुरसाई ॥  
जय तीरथ पद भवनिधि वोहित । प्रणतपाल जय दीननके हित ॥

१ आकाशवाणी । २ देवताओंको । ३ योगमाया । ४ खींचकर । ५ दर्पण ।  
६ अंधकार-भ्रम । ७ आकाशमें ठाढ़कर ।



जय संकल्प सत्य गुणधामा । जय मन वालित पूरण कामा ॥  
जय गो द्विजहित नरतलु धारी । जय सन्तन पतिगति अपहारी ॥  
जय कुपालु आनन्द वरूथी । वन्दत चरण सकल सुर यूथा ॥  
जय पुरुषारथ अमित अनूपा । महापुरुष सचराचर भूपा ॥  
जय अंहीश नित नव गुण गावैं । तदपि नाथ गुण अन्त न पावैं ॥  
जो मुनिजन मन ध्यान न आवैं । भक्ताधीन वेद यश गावैं ॥  
दोहा-अलख अरूप अनीह अज, प्रभु अद्वैत अनादि ॥

गर्भवास सो देवकी, कौतुकनिधि सर्वादि ॥

सो०-किनहुँ न पायो भैव, शेष महेश गणेश विधि ॥

नमो नमो तिहि देव, परम विचित्र चरित्र शुभ ॥

करि विनती सुरसैदन सिंधारे । परमानंद मगन मन भारे ॥  
तब देवकिपति पास बखाने । कोमल वचन प्रेमते साने ॥  
हो पिय सो उपाय कछु कीजै । अबकै यह बालक रखलीजै ॥  
बुधि बल छल पिय कीजै सोई । जामें कुलको नाश न होई ॥  
मैं मन वच अबकै यह जाना । हूँ मम उदर देव भगवाना ॥  
कहा करौं कछु यत्न न पाऊं । कौन भांति यह गर्भ दुराऊं ॥  
सत्य धर्म बरु जाय तौ जाऊ । पति यहि सुतहित करिय उपाऊ ॥  
कर्म धर्म सब हरि हित भाखैं । सो हरितजि कहूँ धर्महिं राखैं ॥  
सुनहु पिया अस को हितकारी । जो यह बालक लेहि उबारी ॥  
शिर ऊपर बैठे रखवारे । पाँयन पड़े निगडैं अति भारे ॥  
कंस असुर अपवंश विनाशन । केहि विधिसों उबरे तियतासन ॥  
ऐसो को समरथ जग पाई । जो इहि अवसर होय सहाई ॥  
दो०-षट् बालक वध सुरतिकारि, दम्पाति दुखित विचार ॥

अति आकुल भय कंसके, दृगंन चली बहि धार ॥

सो०-करुणासिन्धु दयाल, तात मात अति दुखितलखि ॥

प्रगट भये तिहि काल, दुखमोचन लोचन सुखद ॥

१ समूह । २ शेष । ३ अपनेर स्थानको । ४ बेड़ी । ५ नेत्रनते । ६ नाशकर्ता ।



योग शक्ति हरि आयसु पाई । प्रगटी नन्द भवन सो जाई ॥  
 ताके प्रकटतही नरनारी । भये नीदवश देह विसारी ॥  
 भादों कारी निशि अति पावन । आठैं बुध रोहिणी सुहावन ॥  
 अखिललोकपति जन सुखदायक । आये जन्म लियो सुरनायक ॥  
 शीशमुकुट कल कुण्डल कानन । शरदमयंक सरस शुभ आनन ॥  
 चारु चरण पंकजदल लोचन । चितवन सुखद तापत्रय मोचन ॥  
 कुटिल अलक भ्रमेचकताई । जन मन हरण परम सुखदाई ॥  
 पीतवसनतनु श्यामतमाला । उरश्रीवत्स चारु मणिमाला ॥  
 भुजा विशाल मनोहर चारी । शंख चक्र गद अम्बुज धारी ॥  
 अंग अंग सब भूषण नीके । परम विचित्र भावतेजीके ॥  
 चरणसरोज उदित नख जोती । कमल दलन राखे जलु मोती ॥  
 परम प्रताप शुभग शिशुवेषा । अद्भुत रूप देवकी देखा ॥  
 दो०—देखि अमितछवि चकितभाति, पति ढिगलिये बुलाय ॥

दम्पति परमानन्द मन, परे हर्ष सुत पाय ॥

सो०—भरे प्रेम जल नयन, अति सनेह आकुल शिथिल ॥  
 बोलें गद्गद बैन, जोरि पाँणि विनती करत ॥

प्रभु किहि विधि तुम गुणन बखानो । तुम मायावश तुमहि न जानो ॥  
 सहस्रानन जाके गुण गावैं । नेति नेति जेहि निगम बतावैं ॥  
 जाकी भ्रूविलास अनवासा । अखिललोक उपजै अहनासा ॥  
 जो स्वरूप मुनि ध्यान लगावैं । कृपा करहु तब दर्शन पावैं ॥  
 जो सबतेपर अज अविनाशी । सो किमि कहिय उदर लज्जवासी ॥  
 परम विचित्र चरित्र तुम्हारे । मोहतहैं प्रभु मनहि हमारे ॥  
 तात मातके वचन सुहाये । सने प्रेम वश प्रभु मन भाये ॥  
 बोले तात मात सुखदानी । मधुर मनोहर अद्भुतबानी ॥  
 सुनहु मात मैं तुमहि सुबाज । प्रथम जन्मकी कथा बताज ॥  
 तुम यांच्यो मोहिकर तप भारे । तुम सज्जन सुत होय हमारे ॥

१ शरदकाचंद्र । २ श्रेष्ठ । ३ कमल । ४ श्यामताई । ५ कमल । ६ हाव ।

७ शेष । ८ वेद ।



जनहित विरद मोर श्रुति गायो । सो कैसे करि जात लजायो ॥  
ताते मैं वर तुमको दीन्हों । सो हम आय सत्य अब कीन्हों ॥

दो०—शिव ब्रह्मा सनकादिमुनि, ध्यानसक्त नहिंपाय ॥

सो मैं तुम्हरे प्रेम वश, दियो दरश निज आय ॥

सो०—कौतुकनिधि सुरराय, करत चरित मुनि मनहरण ॥

महा मोह उरझाय, दियो बहुरि पितु मात मन ॥

करहु तात अब वेग उपाई । हमहि कंस ते लेहु बचाई ॥

गोकुल हमहि देहु पहुँचाई । तहां यशोदा कन्या जाई ॥

मोहि राखि कै यशुदा पासा । कन्या लै आवहु अनयासा ॥

सो कन्या लै कंसहि दीजै । तात हमारो नाम न लीजै ॥

ऐसहि मात पिता समझाई । भये तुरत शिशु यदुकुलराई ॥

देखि चरित मुनि प्रभुकी वाता । विस्मय हर्ष विवश पितुमाता ॥

सुत उठाय उरसों लपटायो । प्रेम विवश लोचन जल छायो ॥

कहति देवकी पति मुनि लीजै । गमन वेग गोकुलको कीजै ॥

जबल गि सुनहि न वह हत्यारो । मन वच क्रम नृप को न पत्यारो ॥

वनै नाथ उर धीरजधारे । नाहिन इतने भाग्य हमारे ॥

जो यह सुख नयनन पुट पीजै । ऐसे सुतको यश मुनि लीजै ॥

दरशन सुखित दुखित महतारी । शोचत विकल कंस भयभारी ॥

दो०—अति अंधियारी अर्द्ध निशि, भट घेरे चहुँओर ॥

कौन भाँति जैहें दई, पाँय निगँड अति घोर ॥

सो०—वरषत अति जल जोर, धन गरजत चमकत चपल ॥

बीच यमुन अति घोर, पार कवन विधि पाइ हैं ॥

कहा करौं अब काहि पुकारौं । कौन भाँति धीरज उर धारौं ॥

कंस सरोष तबहिं किन मारी । विनती करि पति वृथा उबारी ॥

ऐसो सुत बिछुरत महतारी । कौन भाँति जीवै दुखभारी ॥

कृपा समुद्र भक्त सुखदानी । सुनत मातुकी आरतबानी ॥



कृपाकरी सब भ्रम भय दारे । जिरे निगड पाँचनते भारे ॥  
 तब वसुदेव हर्ष तिहि ठाहीं । लक्ष धेनु मनसी मन माहीं ॥  
 पुत्र गोदलै तुरत सिधाये । द्वार कपाट खुले सबपाये ॥  
 रखवारे सब सोवत देखे । संपदि चले उर हर्ष विशेषे ॥  
 तबहीं मधवा वृष्टि निवारी । मन्द समीर भई श्रमहारी ॥  
 हरिमुख चन्द्रप्रभा तम नाशै । क्षण क्षण तँडित पंथ परकाशै ॥  
 प्रभु पर शेष छांह फनछाई । आगे सिंह दहाइत जाई ॥  
 सो वसुदेव न जानत भेवा । पहुँचे जाय-यमुनतट देवा ॥

दो०—सरितँ देखि गम्भीर अति, मनमें शोच विचार ॥

गोकुलके सम्मुख धँस्यो, प्रभु प्रताप उरधार ॥

सो०—यमुनापति पहिचानि, मन अनंद हुलस्यो हियो ॥

परसन हित पदपानि, अति प्रवाह ऊँचो उठयो ॥

गुल्फं जँध कँटिलों जल आयो । तब हरिको कछु ऊँध उठायो ॥  
 ज्यों ज्यों वसुदेव सुतहि उठावै । त्यों त्यों जल ऊपरको आवै ॥  
 नाक प्रयन्त नीर जब आयो । तब हरिपद ऊँधको लटकायो ॥  
 परशि नीर हुंकारहि दीनो । तुरतहि भयो गुल्फते हीनो ॥  
 भयो पार लैकै धनर्योमहि । गये वसुदेव नन्दके धामहि ॥  
 तहां सकल जन सोवत पाये । सुत लै यशुमति पास सिधाये ॥  
 कन्या तहां पुनीत निहारी । लई उठाय राखि दैत्यारी ॥  
 फिरि फिरि सुतको वदन निहारी । चले तुरत भय कंस विचारी ॥  
 जो सम्पति निगमोगम गाई । योगी जनन जानि नहि पाई ॥  
 सनकादिक सरवस विजि<sup>१</sup> प्राणा । शंकर जासु धरतहैं ध्याना ॥  
 शारद नारदादि यश गावैं । सहस्र बदनहू पार न पावैं ॥  
 अहो विलोकहु भाग्य बड़ाई । स्नेह सोवत यशुमति माई ॥  
 दोहा—वहां देवकी प्रेम वश, अति व्याकुल अकुलात ॥

१ किवार । २ जलदी । ३ इन्द्र । ४ वर्षा । ५ पवन । ६ वीजुरी । ७ मारग ।  
 ८ यमुना । ९ टिहुना । १० पीडरी । ११ कमर । १२ उपर । १३ नीचको ।  
 १४ भगवान् । १५ वेद-पुराण । १६ ब्रह्मा । १७ शेष ।



बालक अरु वसुदेव कहँ, पठै बहुत पछितात ॥

सो०—बैठत उठत अधीर, व्याकुल सोई सेंजपर ॥

पोंछत नयनन नीर, बोलि सकत नहिं कंस भय ॥

मनमन सुरै मनाय सनमानै । मत यह भेद दई कोउ जानै ॥  
 रखवारे कहँ जान न जाहीं । मत कोउ दुष्ट मिलै मग माहीं ॥  
 याते अधिक शोच मोहिं भारी । क्यों दुरिहै शशिसुख उजियारी ॥  
 मग महुँ यमुना अति गम्भीरा । केहि विधि पहुँचैगे वहितीरा ॥  
 गोकुल पहुँचे धौं मग माहीं । भई बेर पति आयो नाहीं ॥  
 यहि विधि शोच विवश अकुलाई । इकक्षण कल्प समान विहाई ॥  
 पहुँचे वसुदेव तिहि क्षण जाई । बूझत उठी पुत्र कुशलाई ॥  
 केहि विधि पुत्र राखि पति आये । समाचार वसुदेव सुनाये ॥  
 कन्या दई देवकी जबहीं । द्वार कपाट गये लगि तबहीं ॥  
 बेड़ी हैगई पग ततकाला । कन्यारोय उठी तिहि काला ॥  
 चहुं दिशि जागि परे रखवारे । तुरत कंस पहुँ जाय पुकारे ॥  
 सुनतहि उठि अति आतुर धायो । लीन्हें खड्गें तहां चलि आयो ॥

दोहा—कन्या लै तब देवकी, आगे राखी आय ॥

दीन वचन आधीनहै, कंसहि कही सुनाय ॥

सो०—अहो भ्रात यह दान, तुम हम कहँ अब दीजिये ॥

है कन्या जिय जान, याते भय तुमको नहीं ॥

सुनत कंस भैगिनी की बानी । मृत्यु त्रासते शठ रिसमानी ॥  
 यामें कछु होय छल कोई । कोजानै विधनार्गति गोई ॥  
 यह विचार कन्या गहिलीनी । पटकनकी मनसा तिहि कीनी ॥  
 करते छूटिगई आकाशा । दिव्यरूप तहँ कियो प्रकाशा ॥  
 बोलति भई गंगनते बानी । अरे मन्दमति अधम अज्ञानी ॥  
 ममहत्या तैं लई वृथाहीं । तेरो रिपु प्रगल्हो ब्रजमाहीं ॥

१ अपने इष्टदेवकी मनाय । २ कृष्णको चंद्रसमान मुख । ३ किवार । ४ तरवार ।

५ बहिन । ६ विघाता । ७ आकाश । ८ वैरी ।



सर्प ग्रसित जिमि दादुर होई । माखी खान चहत शठ सोई ॥  
 तैसे तू चह मारन मोहीं । आयो काल निकट शठ तोहीं ॥  
 ऐसे कहिकै स्वर्ग सिधारी । कंसहि शोच भयो सुनि भारी ॥  
 पन्यो देवकी चरणनमाहीं । मैं मारे तुवपुत्र वृथाहीं ॥  
 क्षमा करौ भरे अपराधा । है विधिकी गति अलख अगाधा ॥  
 वसुदेवहुसन क्षमा कराई । निर्गुणदिये पगते कटवाई ॥

दोहा-गयो शोच व्याकुल सदन, परयो सेजपर जाय ॥

जागतही बीती निशाँ, नौदपरी नहिं ताय ॥

सो०-हरिके चरित अचूष, असुर विमोहन सुर सुखद ॥

नर न परत भवकूप, सहज प्रेम गावहिं सुनहिं ॥

यशुदा जब सोवतते जागी । सुत मुख देखतही अनुरागी ॥  
 पुलक अंग उर आनंद भारी । देखि रही मुखशोशि उजियारी ॥  
 गद्गद कण्ठ न कछु कहि आयो । हर्षवन्त है नन्द बुलायो ॥  
 आवहु कन्त पुत्र मुख देखो । बड़ो भाग्य अपनो करि लेखो ॥  
 भये प्रसन्न आजु सब देवा । सफल भई सबहिनकी सेवा ॥  
 सुनत नन्द प्रिय तिर्यकी वानी । प्रेम मग्न तनुदशा भुलानी ॥  
 हर्षित है उठि आतुर धायो । यशुमति सुतको वदन दिखायो ॥  
 देखत मुख उर सुख भयो जैसो । कहि न सकहि श्रुति शारद तैसो ॥  
 कहा कहौ तिहि क्षणकी शोभा । मनहुं महा छवितरुके गोभा ॥  
 आनंद मगन नन्द मनमाहीं । जानत नहिं हमको केहि अहीं ॥  
 रोय उठे तब नन्दके लाला । जानि परे सब ग्वालिन ग्वाला ॥  
 जित तितते हर्षित उठ धाये । मनहुं रंक धन लूटन आये ॥

दोहा-देहिं बधाई नन्दकी, परैं यशोदा पाव ॥

कहैं पियारे लालको, नेक हमहिं दिखराव ॥

सो०-अति हर्षित नंदराय, कह्यो वजावनसोहिलो ॥

१ मेढक । २ वेडी । ३ घर । ४ रात्रि । ५ मुखचंद्र । ६ यशोदाकी । ७ स-  
 रस्वती । ८ प्रसन्न । ९ दरिद्री । १० जन्मबधाई ।



नारि उठीं सब गाय, लाग्यो बजन बधावनो ॥  
छं०-सुरसिद्धमुनिन्दापरम अनन्दासुनिगोकुलहरि आये ॥  
दुन्दुभी बजावत मंगल गावत तियन सहित उठि धाये ॥  
विद्याधर किन्नर सुधर कण्ठवर करत गान सनुपाये ॥  
गरजत तिहिकाला मधुररसाला धनगति जनन जनाये ॥  
बाजत करताला बरषन माला सुरतरुसुमन सुहाये ॥  
सब करैं किलोलैं हर्षित बोलैं जय जय जय सुखपाये ॥  
नभ महँ ध्वनि होई सुन सब कोई भये सबन मन भाये ॥  
संतन हितकारी असुर संहारी आवत क्षिति सुखछाये ॥  
शिव ब्रह्मादिक मुनि सनकादिक परम प्रफुल्लित गाता ॥  
गुणिगण सब गावैं प्रभुहि सुनावैं आनंद उर न समाता ॥  
भएमन चीते सब भय बीते प्रगटे दनुजनिपाता ॥  
अतिमनमें हषैं पुनि पुनि वषैं सुमन जो सुरतरु जाता ॥  
सुरतियमनमाहीं निरखि सिहाहीं यशुमतिके बड़ भागा ॥  
इनसमहमनाहीं पुण्यनमाहीं कहैं सहित अनुरागा ॥  
योगी जेहि ध्यावैं ध्यान न पावैं करि करि योग विरागा ॥  
जो वेद न जानै नेति बखानै सो सुतहै उरलागा ॥

दोहा-भरे परम आनन्द सुर, उपजावत अनुराग ॥

बार बार वर्णन करैं, नन्द यशोमति भाग ॥

सो०-रहे सदैव सुर भूल, गोकुलको उत्सव निरखि ॥

जन्मे मंगल मूल, ब्रजवासी हर्षित सबै ॥

ब्रजवासिन सबहिन सुनि पायो । नन्दमहरघर ढोटा जायो ॥  
परमानन्द लोग सब धाये । नन्दराय तब विप्र बुलाये ॥  
काढ़ि लग्न ग्रह योग सुधायो । अति विचित्र सब द्विजन सुनायो ॥

१ नगरे-धौसा । २ देवांगनासहित । ३ कल्पवृक्षके पुष्प । ४ पृथ्वीमें । ५ दैत्य  
केमारनवारे । ६ पुष्प । ७ कल्पवृक्ष । ८ देवांगना । ९ स्वर्गमें-घर ।



करत वेद ध्वनि अति सुखपाई । देहिं नन्दको सकल बधाई ॥  
 तब स्नान महारि उठि कीन्हो । भाल तिलक चन्दन लैलीन्हो ॥  
 जाति कर्म करि पितर पुजाये । भूषण वसन द्विजन पहिराये ॥  
 गैया लक्षं सर्वत्ससुहाई । बाढी दूध नवीन मँगवाई ॥  
 सब विधि सकल अलंकृत कीनी । करि संकल्प द्विजनको दीनी ॥  
 बुदित विप्र सब देई अशीसा । चिरजीवहु सुत कोटि बरीसा ॥  
 हँसि हँसि बहुरि महारि नँदराई । हितकुटुम्ब सब निकट बुलाई ॥  
 बहु सुगंधि मथि तिलक बनाये । भूषण वसन विविध पहिराये ॥  
 हुत्ते जु कुलमें वृद्ध जिठेरे । हित सां पाँच परे सब करे ॥  
 दोहा-वंदी मागर्थ सुत गण, भरे भवन बहु आय ॥

लैलैनाम बुलाय सब, परि तोषे नँदराय ॥

सो०-मन वांछित सबलेहि, जो जाके भावै मनहि ॥

नन्द भरे रस देहि, किये अयाँचीसाचकानि ॥

सुनि सुनि धाई ब्रजकी नारी । लेकर कमलन कंचन थारी ॥  
 मंगल साज साज सब लीन्हें । सहजभ्रंगार सुभगतनु कीन्हें ॥  
 चारु चौरतनु दृगं कजरारे । भाल तिलक कुच शिथिल सँवारे ॥  
 भांग सिंदूर तरोना कानन । रोरी रंग किये कछु आनन ॥  
 अँगिया अंगकसे छबिछाजै । विविध भांति उर हार विराजै ॥  
 अति आनन्द मगन मनफूलीं । अंचल उडत सँभारन भूलीं ॥  
 निज निज मेल मिलीं सब गावैं । विहरत नन्द धामको आवैं ॥  
 इक भीतर इक आंगन माहीं । इक द्वारे मँग पावत नाहीं ॥  
 सबको यशुमति निकट बुलावैं । सुख उधार सुतको दिखरावैं ॥  
 देहि अशीश परो शिशुपायन । जीवहु जबलग नभ तारागन ॥  
 पूरण काम भयो ब्रजसारो । धन्य यशोदा भाग्य तिहारो ॥

१ नांदीश्राद्धकरा । २ एकलाख । ३ बछरासहित । ४ शृंगारी । ५ ब्राह्मणनको ।  
 ६ बूढेबड़े । ७ जोप्रसंगके अनुसारबोलैं । ८ भाट । ९ पौराणिक । १० प्रसन्न-  
 करे । ११ भिखारीनको धनाढ्य करिदिये । १२ सुवर्णकी । १३ उत्तम । १४ वस्त्र ।  
 १५ नेत्र । १६ मस्तक । १७ मार्ग । १८ कृष्णको । १९ आकाश ।



धन्यसो कोखि जहां सुत राख्यो । पुण्य तिहारो जात न भाख्यो ॥

दोहा-धन्य दिवस धनि राति यह, धन्य लग्न तिथिवार ॥

जहँ जायो ऐसो सुवन, थिरथाप्यो परिवार ॥

सो०-पुनि पुनि शीश नवाय, देहिं अशीश मनाय सुर ॥

जियहु सुवन नंदराय, रूप अचल कुलकी युनी ॥

परमानंद नंद अलुरागे । चित्र विचित्र वस्त्र बहु मांगे ॥

सारी सुरंग कसबके लहँगे । अति चटकीले मोल न मँहंगे ॥

सिंगरी वधू बोल पहिराई । जो जैसी जाके मनभाई ॥

देहिं अशीश मुदित ब्रजनारी । फूलीं कमल कलीसी न्यारी ॥

एक रहंसि निजनिज गृह जाहीं । इक डुलसी आवैं गृह माहीं ॥

एक कहैं एकनसों धाई । हौं यह बात भली सुनि आई ॥

महारि यशोदा ढोटा जायो । नंदद्वार सखि वजत वधायो ॥

चलो वेग सखि देखिये सोई । विधना चाहतहीहै जोई ॥

इक नाचैं इक ढोल बजावैं । एक नन्दको गारीगावैं ॥

एक साथिये द्वार बनावैं । एकै बंदनवार बँधावैं ॥

ध्वज पताक तोरण छविछाई । घर घर होत अनंद वधाई ॥

पुनि पुनि सुमन देव वर्षावैं । फूलनसों सब गोकुल छावैं ॥

दोहा-ध्वज पताक तोरण कलश, बंदनवार दुवार ॥

गोपनके घर घर बँधे, तोरण मंगलचार ॥

सो०-नंदसदनसविचार, वरणिसकैं सो कौन कवि ॥

लियो जहाँ अवतार, छविसागर त्रिभुवन धनी ॥

गवाल वृंद सब सुनि उठि धाये । बाल वृंद सब निकट बुलाये ॥

वसि बदन धातुं चित्र सब कीन्हें । गुंजा भूषित भूषण लीन्हें ॥

यद्यपि अरु भूषण तनु माहीं । तद्यपि अहिरन गुंज सुहाहीं ॥

एक कहैं एकन समझाई । आज वनाहिं कोऊ नहिं जाई ॥

गैश लेपन सहित बनावो । चित्र विचित्र वेगि लै आवो ॥

१ पुत्रा २ प्रसन्नहै । ३ पुष्पा ४ नंदके घरको । ५ खरिया । ६ मनसिलपेवरी आदि ।



पूत नन्दके घर है जायो । भयो सबनके मनको भायो ॥  
 कितनो गहर करत बिन काजा । वेगि चलो सब सहित समाजा ॥  
 दधि माखनके माट भराये । कछु इक हरदी रंग मिलाये ॥  
 लिये शीशपर केतिक गावें । केतिक ताल मृदंग बजावें ॥  
 मिल मिल निज निज यूथन माहीं । नंद सदन निरखत सब जाहीं ॥  
 देखि नन्द अति आनंद पावें । हँसि हँसि सबको निकट बुलावें ॥  
 छुइ छुइ चरण भेंट धरिआगे । देहिं बधाई अति अनुरागे ॥

दोहा-नाचत गावत मगन मन, भई सदन अति भीर ॥

मनु आये उत्साह सब, धरि धरि गोप शरीर ॥

सो०-देहधरे+आनन्द, मनहुं नंद तिन मधि लसैं ॥

जन्मे आनंदकन्द, कहि न सकहिं सुखसहसमुख ॥

इक नाचत इक गावत ठाढे । इक कूदत अति आनंद बाढे ॥  
 छिरकत एक दूध दधि डोलैं । एक कुलाहल करत कलोलैं ॥  
 मचो नंद घर दधिको कौदौ । बरसत दूध दही जनु भादौ ॥  
 एक धाय एकन पै जाहीं । एकै मिलत डारि गलवाहीं ॥  
 एक एकके पायँन परहीं । इकदधि दूर्वाक्षत शिरधरहीं ॥  
 अति उछाह सबके मन माहीं । राजा राव गनत कछु नाहीं ॥  
 गोकुल मध्य देखिये जितहीं । करत गोप कौतूहल तितहीं ॥  
 एकै लूटि नंदको लेहीं । एकै एकनको धन देहीं ॥  
 एकन हित करि नंद बुलावैं । पट भूषण तिनको पहिरावैं ॥  
 एक कहैं हम तब कछु लेहैं । जब लालन मुख देखनदेहैं ॥  
 एक जो एकन ते कछु लेहीं । ते निशंक एकन को देहीं ॥  
 अति आनंद मगन पशुपालक । नाचत तरुण वृद्ध अरु बालक ॥

दोहा-गोकुलको आनंद सब, कापै वण्यो जाय ॥

जहां परम आनंद मय, लियो जन्म हरि आय ॥

१ अत्रे । २ घर । ३ कीच । ४ चावल । ५ ग्वारिया । ६ ज्वान । ७ बूढे ।  
 + मानो यावत् गोपहैं सोई उत्साहरूपहै और नंदराय नहीं हैं मानो देहधारणकरे  
 मूर्तिमान उनमें उत्साहहै ।



सो०—नितनव होत विलास, हरि मुकुन्दके जन्मते ॥

ब्रज संपदा सुपास, सुर भूलहि कौतुक निरखि ॥  
जबते जन्म लियो हरि आई । मुख संपति ब्रज घर घर छाई ॥  
सब उदार सब परमप्रवीना । सब सुंदर सब रोग विहीना ॥  
मुदित जहाँ तहँ सब ब्रजवासी । सब यशुमति सुत प्रेम उपासी ॥  
नंद सदन वण्यों किमिजाही । शर्त सुरेश लखि विश्रमजाही ॥  
अति प्रकाश मन्दिरके माहीं । फैलिरही हरि छवि की छाहीं ॥  
ग्वाल गाय गोपन की भीरा । कहूँ दधि कहूँ माखन कहूँ क्षीरा ॥  
भूमि बाग बन गौरि रमणीया । खग मृग सर सरिताँ कर्मनीया ॥  
विटपवेलि सब सहित फूल फल दिशा प्रकाशित निर्मल जल थल ॥  
सुरभी सुर सुरभी सम तूला । भयो सकल ब्रज मंगल मूला ॥  
विभव भेद यह कोउ न जाने । आदिहिते हम ऐसे माने ॥  
कृष्णजन्म आनंद बधाई । सुर पुर नाग तिहूँ पुर भाई ॥  
ब्रज वासिन गण अधिक उछाहूँ । करि नहिँ सकहिँ सहससुख काहूँ ॥

दोहा—ब्रजको सुख को कहिसकै, सुखमा बढी अपार ॥

सुखनिधान भगवान जहँ, लियो मनुज अवतार ॥

सो०—प्रकटे गोकुलचंद, संत कुमुद वन मोदकर ॥

तम कुल असुर निकंद, ब्रज जन चारु चकोरहित ॥  
नित नव भीर नंदके द्वारे । याचक जन सब होंय सुखारे ॥  
गाँव गाँवते सुनि सुनि आवैं । मन भायो सब कोउ पावैं ॥  
पाँचदिवस इहिविधि सुख पायो । छठयाँ दिवस छठीको आयो ॥  
मन्दिर सकल सुवास लिपायो । जहाँ तहाँ चित्रित करवायो ॥  
वीथी चारु सुगंधि सिंचाई । द्वारन वंदनवार बँधाई ॥  
जानि कुटुम्ब मित्र हित जेते । नंदराय न्योते सब तेते ॥  
ठौर ठौर बहु व्यंजन होई । भोजन कहँ आये सब कोई ॥

१ देवता । २ सौइन्द्र । ३ पर्वत । ४ पखेरु । ५ सरोवर । ६ नदी ।  
७ सुंदर । ८ वृक्ष । ९ रोहिणिआदि करे रसोई ।



गोष बधू सब बनि बनि आवैं । लालन को पहिरावन ल्यावैं ॥  
 ज रिकत कुरता भूषण टोपी । रत्न समेत प्रेम रँग ओपी ॥  
 रोरा अक्षत पान मिठाई । धरि धरि कंचन थारिन लाई ॥  
 गावहि मंगल कोकिल बानी । नंद भवन आवहि हर्षानी ॥  
 करि आदर यशुदा बैठावैं । देखि श्याम वन सब सुखपावैं ॥

दोहा-वृषभानादिक गोपवर, ब्रजवासी समुदाय ॥

आये सब नंदराय गृह, भूषण वसन बनाय ॥

सो०-अति आदर करि नंद, शुभ आसन दीने सबन ॥

सबके मन आनंद, वज्रत दुंदुभी नचतनट ॥

कहूं ग्वाल गावतहैं हेरी । कहूं खिलावत गाय घनेरी ॥  
 वंश प्रशंसा भाट सुनावैं । कितहूं ढाढी ढाढिनि गावैं ॥  
 देहि गोपगण तिनको दाना । भूषण वसन धेनु मणि नाना ॥  
 परजा सकल खिलौना ल्यावैं । अति अद्भुत कापै कहि आवैं ॥  
 धरहि नंदके आगे आनी । राखहि सब अतिशय सुखमानी ॥  
 तिनहीं देहि निछावरि हरिकी । कोमल श्यामल सुन्दर बरकी ॥  
 विश्वकर्मा पलना गढ़िलायो । स्तनजटित शुभरंग सुहायो ॥  
 लालन हितसों नंद रखायो । विश्वकर्मा सब वांछित पायो ॥  
 ऐसे दिवस यामयुग आयो । तब सब गोपन नंद जिमायो ॥  
 छिरकि सुगंध पान कर दीन्हों । तब सब गोपन भोजन कीन्हों ॥  
 मंगलमय रजनी जब आई । गाय उठीं सब नारि सुहाई ॥

अथ कुरता टोपी वर्णनम् ॥

दोहा-कुरता टोपी पीतरँग, लालनको पहिराय ॥

लै उछंगै पूजन छठी, बैठी हर्षित माय ॥

सो०-करि कुलको व्यवहार, करी आरती श्यामकी ॥

करति निछावरि नार, तन मन धन शशिमुख निरखि ॥

नेग जोग सब नेगिन पायो । दियो सबनि यशुदा मन भायो ॥

१ मंगलकी रात्रि । २ गोद । ३ चंद्रमुख ।



प्रातहि उठि लालन अन्हवायो । सुदिन शोधि पलना पहुड़ायो ॥  
 निरखि निरखि यशुदा बलिजाई । अरुण चरण कर कोमलताई ॥  
 ब्रजवासी जीवन नंदलाला । मालु सुकृत फल मदन गोपाला ॥  
 नितनव मंगल होहि सुहाये । मंगलनिधि जवते हरि आये ॥  
 नंद + सुकृत वर्षाऋतु सोई । यशुमति सुकृत अकाश बनोई ॥  
 तहँ धनश्याम श्याम तनु उनये । मंदहँसन दामिनिद्युति जुनये ॥  
 गर्जन मंद मधुर किलकारी । ब्रजजन मोरन आनंद कारी ॥  
 दादुर गुणगण गावहि दासा । परम प्रीति मन परम हुलासा ॥  
 पलना पचरँग मणि छबिछाई । इन्द्र धनुष उपमा तिनपाई ॥  
 गज मुक्तनकी लर लटकाई । सोई आनो वगपाति सुहाई ॥  
 ब्रज घर घर सुख संपति छाई । सोई मनहुँ भूमि हरिआई ॥

दोहा-वर्षत परमानंद जल, नंद सदन जगमाहि ॥

ध्यान भूमि दृग सरित मग जनउर सिंधुसमाहि ॥

सो०-पूरण होत सुनाहि, यद्यां निशि वासर भरत ॥

बढ़त लहरि पुलकाहि, हरि मुख शशिराका निरखि ॥

कंसहि वहां नंद निशि नाहीं । अति श्रिता व्याकुल मन माहीं ॥  
 बैठयो निकसि सभा उठि प्राता । मंत्री बोलि कहहि सब वाता ॥  
 मेरो रिपु प्रगट्यो ब्रजमाहीं । कौन भाति पहिचानो ताहीं ॥  
 जाते जाय वेगि वह मारो । ऐसी तुम कछु मंत्र विचारो ॥  
 दिन दिन बड़ो होय अबसोई । कोजानै फिरि कैसी होई ॥  
 बोल्यो एक असुर सुनु राजा । क्यों डरपत इतनेके काजा ॥  
 मोपै एक मंत्र सुनिलीजै । धर्म काज कछु होन न दीजै ॥  
 जप तप होम होन नहि पावै । विघ्न साधुन असुर सतावै ॥  
 जो यह देव होयगो कोऊ । सहिनहि सकै प्रकट है सोऊ ॥  
 तब तेहि असुर जाय संहारै । याविधि शत्रु तुम्हारो मारै ॥

+ या चौपाईमें नंदाय और वर्षाकी ऐक्यताकरिके दिखाई है जैसे नंदको सुकृत सोई वर्षाऋतु और यशुदाको सुकृत आकाश ताँवें श्यामसुंदर सामरी घटा उठी ताँवें कृष्णकी मंदहँसन सोई बीजुरी किलकारीरूप गरजन ब्रजवासी-रूप मोर आदि जानने ।



Vinay Avasthi Sahib Bhuvan Vani Trust Donations

बोले एक बात यह नीकी । और सुनो हमारे जीकी ॥  
देश देशको असुर पठावो । बालक मासकके जे पावो ॥

दोहा-तिन सबहिनको वधकरै, वचन न पावै कोय ॥

इनहीं में वह होयगो, मान्यो जैहै सोय ॥

सो०-कह्यो कंस हर्षाय, कहे मंत्र दोऊ भले ॥

पठवहु असुर निकाय, जायकरै कारजसँभरि ॥

याविधि असुर विदा बहु कीन्हों । बाल वधनकी आयसु दीन्हों ॥

कह्यो जाय ब्रज वेगहि कोई । तहँके बालक मारै सोई ॥

कह्यो पूतना आयसुपाऊं । तो यह कारज मैं करिल्याऊं ॥

सकल घोष शिशु जाय नशाऊं । जो कहिये तौ जीवत दयाऊं ॥

क्षणमें रूप मोहिनी धारौं । वशीकरण पड़ि सब परदारौं ॥

धिसि कंकाल उरजेन लाऊं । ब्रजवासिनके बाल पियाऊं ॥

तौ पूतना नाम कहवाऊं । जो नृपको कारज करि आऊं ॥

कुरत कंस तेहि आयसु दीन्हों । सुनतहि वचन गमन तिन कीन्हों ॥

तादिन नंद जकुहुँरी आयो । राज अंश कछु नृप कहँ ल्यायो ॥

नृप दरवार ताहि पहुँचायो । समाचार वसुदेवको पायो ॥

छोड़ि बंदिता नृपने राखे । हते मित्र सुनिके अभिलाखे ॥

मिलनगये तिनको नँदराई । उठि वसुदेव मिले हर्षाई ॥

दोहा-कुशल प्रीति करि परस्पर, बारम्बारसंप्रति ॥

बैठारे नंदराय ढिग, करिकै आदर रीति ॥

सो०-तब बोले नंदराय, सुनिय दैव भावी प्रवल ॥

तासों कछु न बसाय, जगत भ्रमत जाके विवश ॥

लुप्त अति कष्ट कंसते पायो । सुनि सुनि भयो बहुत पछतायो ॥

आजु देखिकै चरण तिहार । भये हमारे नैन सुखारे ॥

तब वसुदेव कही मृदुवानी । अहो नन्द तुम सत्यवखानी ॥

१ महीनाभरक । २ समूह । ३ मानकी । ४ ब्रजके बालक । ५ आज्ञा ।

६ मथुरा । ७ राजाको कर । ८ कैदखानेते ।



कर्मरेख नहिं जात मिटाई । विधि की गति कछु जात न पाई ॥  
सुन्यो नंद सुत भयो लुम्हारे । तब ते अति सुख भयो हमारे ॥  
तुमको जैरा आय निर्यैराई । बड़ी बैस विधि भयो सहाई ॥  
तब नंद हलधर जन्म सुनायो । प्रथमहिं तिन्हें रोहिणी जायो ॥  
तिनको उत्सव प्रगट न कीनों । कंस त्रास अपने उरलीनों ॥  
सुनि वसुदेव बहुत सुख पायो । तब ऐसे कहि वचन सुनायो ॥  
सुनहु नंद तुम नीके जानौ । कंस नृपति कृत नाहिं छिपानौ ॥  
ताते अब वे दोऊ बालक । अपने मानि करौ प्रतिपालक ॥  
अब तुम वेगि गोकुलहि जाहू । बालक हित पतियाहु न काहू ॥

अथ पूतनावधलीला ॥

दोहा—जित तित भेजे कंसके, करत असुर अनरीति ॥

प्रजा लोगके बालकन, ताते है अति भीति ॥

सो०—गई पूतना आज, ब्रजके बालक घातिनी ॥

करि है कछू अकाज, वेग धाम सुधि लीजिये ॥

सुनि वसुदेव वचन नंदराई । भये बिदां तुरतै भय पाई ॥  
निकसत शकुन अशुभ मग पायो । ताते अधिक शोच उर छायो ॥  
क्षिप्र चले कछु सुधि तनु नाहीं । बालककी चिन्ता मनमाहीं ॥  
इहां पूतना ब्रजमें आई । रूप मोहनी प्रगट बनाई ॥  
गरल बांटी कुच सों लपटायो । ऊपर शुभग शृंगार बनायो ॥  
अतिही कषट छवीली सोहै । जो देखै ताको मन मोहै ॥  
इत उतहै नंद धामहिं आई । देखि रूप यशुदा मन भाई ॥  
देखि रही मुख सुन्दरताई । कै यह नर कै सुंरकी जाई ॥  
काकौ वधू कौनकी बेटी । अबलौ ब्रजमें कबहुं न भेटी ॥  
बिन पहिचाने आदर कीन्हो । बैठनको शुभ आसन दीन्हो ॥  
अहो महारि पालागन मेरो । हौं आई सुत देखन तेरो ॥  
हरिपलनापर मन मुसुकाई । यशुमति कछु गृहकाज सिधायी ॥

१ विधाता । २ बुढापा । ३ नगीच । ४ उमर । ५ श्रीकृष्णजीको । ६ भय ।  
७ घरकी । ८ जल्दी । ९ जहर । १० देवताकी बेटी है ।



दोहा-तवाहिं राक्षसी दुष्टमति, पलनाके ठिग जाय ॥

निरखि बदन मुख चूमिकै, लीन्ह उछंग उठाय ॥

सो०-दियो कमल मुख माहिं, विषलपटयो अस्तन तुरत ॥

पकर दुहूं कर माहिं, लगे करन पर्यपान हरि ॥

पय सँग प्राण खिचे जब बाके । है गये अंग शिथिल सब ताके ॥

तब सो लगी छुड़ावन बालक । सो क्यों छुटै दुष्ट कुलबालक ॥

पय सँग प्राण खींचि हरि लीन्हा । पटै स्वर्ग जैननी गति दीन्हा ॥

परी मृतक है असुर सुनारी । योजनलों निजतनु विस्तारी ॥

यशुमति धाय देखि गुहरायो । पलना पर बालक नहि पायो ॥

बाहि बाहि करि ब्रज जन धाये । व्याकुल विपुल नन्द गृह आये ॥

अति व्याकुल यशुमति महतारी । दूढहिं श्यामहि रोवत भारी ॥

हरि ताकी छाती लपटाने । करत चरित जो अचरजसाने ॥

दूढत दूढत उर पर पाये । लै उठाय माता उर लाये ॥

दुख सुख ताको कछो न जाई । जिमि मणि गई भुवंगन पाई ॥

सुखित भई सब ब्रजकी वाला । कहति बच्यो अति नन्दको लाला ॥

नन्द यशोमति भाग्य बड़ेरी । सुतकी करवर ढरी करेरी ॥

दोहा-आई अद्भुत रूप धरि, अति विपरीत कुमारि ॥

कपट हेतु नहिं सहिसक्यो, तेहि मान्यो करतारि ॥

सो०-कहत यशोमति माय, पुनि पुनि सबके पांयपरि ॥

उबन्यो आजु कन्हाय, तुम पंचनके पुण्यते ॥

बड़ो कष्ट यह सुतने पायो । आजु विधाता बहुत बचायो ॥

कोउ कह भाग्यवन्त नंदराई । कुलके देवन करी सहाई ॥

कोउ कह नेक मोहिं सुत देरी । देखहुं मुख में पुनि तू लेरी ॥

कोउ मुख चूमि बलैया लेई । लै उछंग पुनि यशुदहि देई ॥

१ गोद । २ आँच । ३ दूध । ४ माता । ५ मरी । ६ चारकोशमें देह फैलाये । ७ सर्प । ८ भगवान् ।



बच्चो कान्ह सब ब्रज सुधिपाई । घर घर बजी अनंद बधाई ॥  
तबहि नंद गोकुलमें आयो । देखि पूतनहिं अति भय पायो ॥  
जो वसुदेव कही ही बानी । सो सब मनमें सांची जानी ॥  
तहँ सब ब्रजवासी छुरि आये । समाचार सब प्रकट सुनाये ॥  
तब सुखपाय गये नंद धामहिं । देख्यो जाय सुवन घनश्यामहिं ॥  
वदनविलोकि हर्षि उरलाये । बहुत दानदे देव मनाये ॥  
तब ब्रजवासी सकल बुलाये । अंग पूतनाके कटवाये ॥  
बाहर एक ठौर सब कीन्हें । अग्नि लगाय फूँकि सब दीन्हें ॥

दोहा—आति सुगंध ता अंगमें, कीन्ही अग्नि प्रकाश ॥

हरि स्पर्श प्रतापते, ब्रज सब भयो सुवाश ॥

सो०—रहे अचम्भो पाय, ब्रजवासी चकित सबै ॥

चरण कमल चित लाय, नंदसुवनमहिमा सुनत ॥

हरि रोये माताकी कनियां । दूध पियायो तब नंदरनियां ॥  
पुनि पलना पौढाय हुलावै । हुलावै दुलराय मल्हावै ॥  
लालनके हित नांद बुलावै । मधुरे सुर जोई सोई गावै ॥  
रेलालनको आव निदरिया । तोहिं बुलावत श्याम सुंदरिया ॥  
जो करि कपट लालको आवै । तौ अबकीलौं विधि विनशावै ॥  
अहो देवता या कुलकेरे । मैं पूजिहौं कमलपद तेरे ॥  
वेगि बडो करदे यह बालक । ब्रज जन प्राण पूतना बालक ॥  
दुतियाके शंशि लौं शिंछुं बाढै । आँवा लौ अरि उर नितडाढै ॥  
सोवै मेरो बाल कन्हआई । माता मुखकी बलि बलि जाई ॥  
सोवत देखि मौन गहि रहई । जागत देखि बहुरि कछु कहई ॥  
अँग फरकाय अल्प मुसुकाने । ता छविकी उपमा को जाने ॥  
बार बार शिशु वदन निहारैं । यशुमति अपनो भाग्य विचारैं ॥

दोहा—हुलरावत गावत मधुर, हरिके बाल विनोद ॥

१ श्यामसुंदरपुत्र । २ मुखदेख । ३ द्वितीयाकेचंद्रसमान । ४ बालक ।

५ मंदमुसकाए ।



जो सुख सुर मुनिको अगम, सो सुख लेत यशोद ॥

सो०-कबहुं लेत उछंग, उर लगाय चूमत सुखहि ॥

निरखि मनोहर अंग, कबहुं झुलावत पालने ॥

दर्शनको नित सुर मुनि आवैं । बाल विनोद निरखि सुख पावैं ॥

कहैं परस्पर सुर नर नारी । हरिके अद्भुत चरित निहारी ॥

अलेख अगोचर अज अविनोसी । पुरुष पुरातन विश्व निवासी ॥

जाको भेद न शिव मुनि जानैं । ब्रह्मा पढि पढि वेद बखानैं ॥

सो हलरावत नंदकी घरणी । पूरण भई पुरातन करणी ॥

मन अभिलाष बढावत भारी । हुलसत हँसत देत किलकारी ॥

वर्षि प्रसून हर्षि मनमाहीं । धन्य २ कहि ब्रज घर जाहीं ॥

नित नव कौतुक होहिं अकासा । ब्रजवासिनमन अमित हुलासा ॥

यशुदा नवनित लाड लडावैं । निरखि २ ब्रज जन सुख पावैं ॥

नित नव मंगल नंदके धामा । नित नव रूप श्याम अभिरामा ॥

भक्तवल्लभ भक्तन हितकारी । भक्तन हित नाना तनुधारी ॥

भजत संत यह हृदय विचारी । जन ब्रजवासी हैं बलिहारी ॥

दोहा-जब हरि मारी पूतना, मुनि डरप्यो नृप कंस ॥

प्रगट भयो ब्रज शत्रु मम, यह जानी निःशंस ॥

सो०-बसो तासु उरमाहि, ताही क्षणते अचल हरि ॥

भूलत इक छिन नाहि, शत्रु भाव लाग्यो भजन ॥

अथ कागासुरवध लीला ॥

कागासुर नृप निकट बुलायो । ताहि मतो सब कहि समुझायो ॥

आवहु वेगि नंदसुत मारी । करियहु कारज बुद्धि विचारी ॥

आयसु धरि शिर गर्व बढायो । काग रूप तिहि असुर बनायो ॥

वेगवन्त उठि गोकुल आयो । प्रेरितकाल अवधि नियरायो ॥

बैठ्यो नंद धामपर आई । पलना पौढे बाल कन्हाई ॥

१ जो देखे मेन आवे । २ कहि वे मेन आवे । ३ अजन्मा । ४ जाको नाश न होय । ५ प्राचीन पुरुष । ६ विश्वमे रहने वारो । ७ फूल ।



ताको आवतही हरि जान्यो । कागन होय असुर पहिचान्यो ॥  
 यशुदा हरिको सोवत जानी । कछु गृह कारजमें लपटानी ॥  
 तबहिं असुर पलनापर आयो । चाहत हरिको चांच चलायो ॥  
 कंठ पकरि हरि करसों लीन्हो । चांच मरोरि फेंकि तिहिं दीन्हो ॥  
 पन्यो जाय नृपपास उतान्यो । यह ब्रजवासी काहु न जान्यो ॥  
 तुरत कंस तिहि बूझन धायो । बीते याम बोल तब आयो ॥  
 सुनहु कंस वह बाल न होई । है अवतार महाबल कोई ॥

दोहा—एक हाथसों पकरि मोहिं, फेंकि दियो तुम पास ॥

है है तुम्हरो काल वह, मैं कीन्हो विश्वास ॥

सो०—अति डरप्यो मँहिपाल, कागासुरके वचन सुनि ॥

बढ़िसो गयो विशाल, जम्यो जु उरमें शौच तरु ॥

सभा मध्य सब असुर सुनाई । बार बार शिरधुनि पछिताई ॥  
 ब्रजमें उपज्यो भरो काला । ताको अवहीं ते यह हाला ॥  
 दनुज सुता पूतना पठाई । ताको इकक्षण मॉझ नशाई ॥  
 कागासुरके ऐसे हाला । सोतो दिन दिन होत विशाला ॥  
 है कोउ वीर जु ताहि नशावै । मम कारज करि आप बचावै ॥

अथ शकटासुरवध लीला ॥

ऐसो कौन कहां मैं जासों । अबकै जाय भिरै जो तासों ॥  
 असुरनको ये नृपति सुनायो । शकटासुर मन गर्वबढायो ॥  
 उठि कै पान नृपति सों मांगे । कहा काम यह मेरे आगे ॥  
 तब प्रताप तेहि पलमें मारौं । कहौ तौ सब ब्रजको संहारौं ॥  
 कंस हर्ष तेहि वीरा दीन्हो । शूर सराहि बिदा तेहि कीन्हो ॥  
 यहां श्याम पलना पर खेलैं । करगहि पद अँगुठा मुख भेलैं ॥  
 अपने मन यह करत विचारा । इह मम\*पद संतन आधार ॥

१ कंसकेपास । २ पहर । ३ कंसराज । ४ शोकरूपवृक्ष कागासुरकी वाणी  
 सुनके अत्यंत बढ़गयो । + सबऋषि मुनि शिव ब्रह्मादि अपने हृदयमें धारण-  
 कर आनंदलेयहैं सो भगवानने विचारा कि, नैंदूतो मुखमें लेकर देखों भरेचरणमें  
 ऐसो कहा बडोस्वादहै ।



Vinay Avasthi Sahib Bhuvan Vani Trust Donations

दोहा-ये पदपंकज राखि उर, निरखत शम्भु सुजान ॥

इनको रस मन मधुप करि, करत निरंतर पान ॥

सो०-पुनि इनपदको ध्यान, करत ब्रह्मसनकादिमुनि ॥

लक्ष्मी अति सुखमान, उरते क्षण दारत नहीं ॥

इन पदपंकज रस अनुरागा । मगन सकल सुरनर मुनि नागा ॥  
 ऐसो धौं का रस इन माहीं । सोतो मोहिं विदित कछु नाहीं ॥  
 मोको यह रस दुर्लभ भारी । देखौं धौं मैं ताहि विचारी ॥  
 ताते पद अँगुठा मुख मेलैं । लैलै स्वाद मगन रस खेलैं ॥  
 ताअन्तर शकटासुर आयो । पवनरूप काहु न लखि पायो ॥  
 भारे शकट नन्द घर केरे । पलनाके ढिग हते घनेरे ॥  
 तिनमें सो शैठ आय समान्यो । नन्दसुवन तबहीं यह जान्यो ॥  
 ताको हरि इक लात चलाई । गिन्यो शकट तब अति हहराई ॥  
 दनुज निधन काहु नहिं जान्यो । गिन्यो शकट यह सबहिन मान्यो ॥  
 सुनत शब्द सब व्याकुल धाये । नन्द आदि सब जुरि तहँ आये ॥  
 यशुमति दौरि श्यामको लयऊ । सबके मन अति विस्मय भयऊ ॥  
 कारण कहा कहैं नर नारी । गिन्यो शकट आपुहिते भारी ॥

दोहा-पलनाढिग खेलत हुते, कछुक गोपके बाल ॥

तिनन कह्यो डान्यो शकट, पलनाते नंदलाल ॥

सो०-सोनहिं करी प्रतीति, काहु बालनकी कही ॥

यह तौ कछु विपरीति, भई कुशल अति श्यामकी ॥

यशुमति अति मन मन पछिताई । भये आज कुलदेव सहाई ॥  
 बार बार उरसों सुत लाई । निरखि नन्द पुनि पुनि बलि जाई ॥  
 भरे निधनी के धन छैया । लगै मोहिं तेरि रोग बलैया ॥  
 ऐसे बहु विधि लाड लढाये । पर्यं पियाय पलना पौढाये ॥  
 मन्द मन्द करठोंकि सुनावैं । कछु इक मधुरमधुर सुर गावैं ॥

१ छकडा । २ दुष्ट । ३ छिपगयो । ४ कुण्ण । ५ शकटासुरदैत्यको मरण । ६ दूध ।



सोवत श्याम शुभग सुंदर वर । चौंकि चौंकि शिशु दशा प्रगटकर ।  
लिये मातु छतियां लपटाई । जलु फणि मैणि उर माँझ दुराई ॥  
प्रात निरखि मुख आनँद कीनो । चूमि वदन सुत को पय दीनो ॥  
कोमल घाम अजिरँ जब आयो । तब सुत पलना पर पौढायो ॥  
आप मथन दधि भवन सिधारी । नंदहि सुतके ढिग बैठारी ॥  
निरखि नन्द सुत आनँद भारी । कमल वदन छवि रहे निहारी ॥  
चुटकी दैदै सुतहिं खिलवैं । निरखि निरखि मुख अति सुखपावैं

दोहा—किलकिउठेलखितात मुख, कँरपददग अतुराय ॥

झपट झटकि उलटे परे, सुखनिधि त्रिभुवनराय ॥

सो०—सौ छवि कहिय न जाय, निरखि नन्द ढेरत महारि ॥

आप न सकत उठाय, अति कोमल मम सकुचमन ॥

नंदहि ढेरत सुनि नँदरानी । तजी सुरत दधि मथन मथानी ॥  
जाने महारि गिरे सुखदाई । ताते अति आतुर उठिधाई ॥  
नंदहि देखि हँसतिहैं पासा । तब धीरज धरि कियो हुलासा ॥  
उलटि पय्यो सुत देख्यो आई । उठि न सकत करसेजलगाई ॥  
सोछवि निरखि मातु सुखपायो । तुरत मुदित उलटाय उठायो ॥  
उर लगाय मुख चुम्बन लागी । कहत आज मैं भई सभागी ॥  
पेटकँरियन हरि उलटन लागे । डेढ मासके भये सभागे ॥  
चिरजीवहु मम कुँवर कन्हआई । आज करो मैं अनँद बधाई ॥  
नँदरानी ब्रज नारि बुलाई । यह सुनि सब आनँद कर धाई ॥  
हरिको निरखि परम सुख पायो । हरषित सबहिन मंगल गायो ॥  
बाँटी घर घर पान मिठाई । नन्दसुवन ब्रजजन सुखदाई ॥  
धनि धनि ब्रजकी बालसभागी । हरिके बालचरित अनुरागी ॥

दोहा—जननी अति आनँद भारी, निरखत श्यामलगात ॥

जैसे निधनी पाय धन, मुदित रहत दिन रात ॥

१ श्रेष्ठ । २ बालचरित्र । ३ सर्पकीमणि । ४ आंगन । ५ हाथ पाँय आँख ।

६ पेटकेबल । ७ दरिद्री ।



Vinay Avasthi Sahib Bhuvan Vani Trust Donations

सो०-धनि धनि ब्रजकोवास, धन्य यशोदा धन्यनंद ॥

धनि ब्रजवासी दास, जिनको मन पारस मगन ॥

अथ तृणावर्तवधलीला ॥

धनि धनि ब्रजकी भूमि सुहाई । बाल चरित लीला सुखदाई ॥  
 यशुदा भाग्य न जात बखाने । त्रिभुवन पतिको सुतकर माने ॥  
 हरिको गोदलिये पैयप्यावै । विविध भांति करि लाड़ लड़ावै ॥  
 कबहुं हरि मुखसों सुखलावै । कबहुं हर्षित कंठ लगावै ॥  
 मोनिधनीको धन सुतनान्हा । खेलत हँसत रहौ नित कान्हा ॥  
 कबधौं मधुर वचन कछु कैहैं । कब जननी कहि मोहिं बुलैहैं ॥  
 कब नन्दहि कहि बाबा बोलैं । खेलत इत उत आँगन डोलैं ॥  
 कबधौं तनक तनक कछुखैहैं । अपने करले मुख में नैहैं ॥  
 कब विधि यह अभिलाष पुरावै । मनहीं मन कुलदेव मनावै ॥  
 किलकत हरि जननीकी कनियां । करत चरित्र मातुसुख दनियां ॥  
 तृणावर्त हरि आवत जाना । पठयो कंस सहित अभिमाना ॥  
 भयो गरुव जननी भरपायो । सहि न सकी तब भुव बैठायो ॥

दोहा-आपलगी गृहकाज कछु, राखि अजिरँ गोपाल ॥

अति प्रचंड बौडर उठ्यो, गोकुलपुर तिहकाल ॥

सो०-बातचक्रैमिस आय, तृणावर्त पापी असुर ॥

हरिको लियो उठाय, अन्धधुंध गोकुल कियो ॥

हरिको लैकै गयो अकाशा । धूरि धुन्ध गोकुल चहुँपासा ॥  
 जहां तहां नर नारि छिपाने । प्रलय काल सम करि सव माने ॥  
 यशुमति दौरि अजिरमें आई । तहाँ न पायो कुँवर कन्हाई ॥  
 नन्द नन्द करि शोर लगायो । तेरो सुत अंधवायु उड़ायो ॥  
 दौरौ वेगि गुहार लगावो । ब्रजवासिनको टेरि बुलावो ॥  
 अति व्याकुल होजत नैदरानी । जित तित फिरत भुवन बिलखानी ॥

१ दूध । २ विधाता । ३ भारी । ४ आँगन । ५ भभूरेके रूप ।



Vinay Avasthi Sahib Bhuvan Vani Trust Donations

तृणावर्तको हरि यों कीन्हो । ग्रीव लिपट तिहि नीचे लीन्हो ॥  
कठिन शिला पर ताहि गिरायो । ताके ऊपर आपुन आयो ॥  
चूर चूर करि ताके गाता । कीन्हो भुक्ति मुक्तिके दाता ॥  
धूँरि धुन्ध सब तुरत विनाशी । खोजत हरिहि विकल ब्रजवासी ॥  
ब्रजवनितन उपवनमें पाये । लिये उठाय कण्ठ लपटाये ॥  
अति आतुर यशुमति पै लाई । द्वैगड घर घर अनंद बधाई ॥

दोहा—लिये धायकै मायने, छतियां रही लगाय ॥

नन्द निरखि मुख पायके, मनसी बहुतिक गाय ॥

सो०—बार बार ब्रजनारि, देहि वसन भूषण मगन ॥

जित तित कहैं विचारि, नयो जन्म हरिको भयो ॥

उबरे श्याम महारि बड़भागी । देखहु धौं कहु चोट न लागी ॥  
रोग लेउँ बलि जाउँ कन्हाई । हरिहैं ब्रजके जीवन माई ॥  
भली न प्रकृति यशोदा तेरी । इकलो हरिको छाड़त हैरी ॥  
घरको काज इनहुँ ते प्यारो । बैरौ अजहूँ सुरति सँभारी ॥  
बहुत बच्योरी आज कन्हाई । भयो पुरबलो पुण्य सहाई ॥  
यशुमति सब सों कहत लजानी । अब मैं स्निख तिहारी मानी ॥  
मोहि कहा हो यह सुखमाई । मैं तो रंक परी निधिपाई ॥  
अब मैं अपना लालचितैहों । एकौ क्षण काहूँ न पर्यैहों ॥  
ऐसे कहि सब सों नँदरानी । कीन्ही बिदा सकल सन्मानी ॥  
यशुमति हरिको गोद खिलावै । देखि देखि मुख नयन सिरावै ॥  
अति कोमल श्यामल तनु देखी । बार बार पछितात विशेषी ॥  
कैसे बच्यो जाउँ बलिहारी । तृणावर्तकी बात निवारी ॥

दोहा—नाजानी किहि पुण्यते, को करिलेत सहाय ॥

कियो काम सब पूतना, तृणावर्त यह आय ॥

सो०—मातु दुखित जियजानि, कृपासिन्धु वत्सलभगत ॥

बालचरित सुखदानि, करन लगे सुन्दर परम ॥

१ दानकरी । २ बावरी । ३ दरिद्री ।



खेलत मातु उछंग कन्हार्ह । करत बाललीला सुखदाई ॥  
जननी बेसर लटकत देखी । चितवतताहि बिसारि निमेषी ॥  
ताहि गहनको पाँणि चलायो । तब जननी कछु वदन उचायो ॥  
नहि पहुँचे तब अति उकताई । सो छबि निरखि मातु बलि जाई ॥  
जननी वदन निकट करि लीन्हों । तब हरि हुलसि किल किहँसि दीन्हों ॥  
बिहँसत चमकि परीं दुइदतियाँ । जनु युग बिज्जु बीजकी पतियाँ ॥  
प्रमुदित निरखि यशोदा फूली । प्रेम मगन तनुकी सुधि भूली ॥  
बाहरते तब नंद बुलाये । परमानन्द सहित उठि धाये ॥  
हो पति सफल करो दृगँ आई । देखहु सुत मुख दतुलि सुहाई ॥  
हर्षित हरिहि गोद नँद लीन्हो । निरखि तात मुख हरि हँसि दीन्हो ॥  
देखत वदन नयन सियराते । दूध दांत किधौ छबिके दाते ॥  
अहो महारि बड़ भाग्य तुम्हारे । सफल फले मनकाज हमारे ॥  
दोहा-कछु दिन घट षट मासकें, भये श्याम सुखदान ॥

अन्न पराशनके दिवस, बूझहु विप्र विहान ॥

सो०-सुनि पुलके नँदराय, भये पराशन योग हरि ॥

प्रेमरह्यो उरछाय, सो सुख कापै जाय कहि ॥

अथ अन्नप्राशनलीला ॥

प्रातकाल उठि विप्र बुलायो । राशि वृद्धि शुभ दिवस धरायो ॥  
यशुमति सो दिन आछो पायो । सखिन बोलि शुभगान करायो ॥  
युवतिमहरिको गारी गावैं । और महरको नाम सुनावैं ॥  
मणि कंचनको थार मँगायो । भाँति भाँतिके वासन आयो ॥  
नन्दबरनि ब्रजवधु बुलाई । जे सब अपनी जाति सुहाई ॥  
कोउ जिवनार कोउपकवाना । षड्सँके बहु करत विधाना ॥  
बहु प्रकारके व्यंजन ठाने । जिनके स्वाद न जायँ बखाने ॥  
अति उज्ज्वल कोमल शुभनीके । कियो विविध विधि मनहुँ अमीके ॥

१ हाथ । २ नेत्र । ३ छःमहीना । ४ नँदराय । ५ मीठे-खारे-चरपरेआदि ।

६ अमृतके ।



यशुमति नन्दहिबोलि कह्यो तब । बोलो महर जाति अपनी सब ॥  
आय गये नैद सकल महर घर । लयाये बोलि सबन आदरकर ॥  
बैठारे सब आनि अथाई । भीतर गये आप नैदराई ॥  
यशुमति हरिको उबटि न्दवाये । सुन्दरपट भूषण पहिराये ॥

दोहा—तनु झंगुली शिर चौतनी, कर चूरा दुहुँ पाँय ॥

बार बार मुख निरखिकै, यशुमतिलेतिबलाय ॥

सो०—लै बैठे नैदराय, जानि शुभवरी गोद हरि ॥

लीने सदन बुलाय, गोप सकल आनँद भरे ॥

बैठे सकल गोपगण आई । अति आनन्द मगन नैदराई ॥  
कनकथार भरि खीर धराई । मिश्री घृत मधु डारि मिलाई ॥  
लगेनन्द हरि मुख जुठरावन । गोप बधू लागीं सब गावन ॥  
आंगन बाजी विविध बधाई । शंख निशान भेरि सहनाई ॥  
षट्सके व्यंजनहैं जेते । हरिके अधर छुवाये तेते ॥  
तनक अधर जल पोंछि सुहाये । हरिको यशुमति पै पहुँचाये ॥  
हर्षवन्त युवती सनुपायो । लैलै मुख चुंबति उरलायो ॥  
विप्रन बोलि दक्षिणा दीन्ही । नाना वस्तु निछाँवरि कीन्ही ॥  
गोपन संग महारि नैदराई । बैठे पनवारे पर जाई ॥  
अति रुचि सबहिन भोजन कीनो । बीरा बहुरि सबनको दीनो ॥  
गोपवधू सब महारि जिमाई । दैकै पान सुगंधि सिँचाई ॥  
इहि विधि सुख बिलसैं ब्रजवासी । निरखैं श्याम शुभग शुभराशी ॥  
दोहा—सुर सिहाहिं ललचाहिं मुनि, लखि ब्रजजनके भाग ॥

धन्य धन्य कहि सुमनझरि, करहिं सहित अनुराग ॥

सो०—नितनव मंगलचार, नितनवलीला श्यामकी ॥

को कवि वरणै पार, शेष न पावैं पार जिहिं ॥

नेति नेति जिनको श्रुति गावैं । तिनको ब्रज जन गोद खिलावैं ॥  
जो सुख नंद भवनके माहीं । तीनि लोक महँ सो कहूँ नाहीं ॥

१ गोपसमुदाय । २ सोनेकोथार । ३ सहत । ४ वेद ।



नित्य नयो सुख यशुमति पावैं । नये नये नित लाड़ लड़ावैं ॥  
 नयन ओट हरि करत न कैसे । जुगवत रहै फणिकैमणि जैसे ॥  
 निंदति निमिष होत पल ओटा । निरखतही सुखपावति ढोटा ॥  
 तनक कपोल अधर अरुणारे । तनक तनक कचैं धूंधर वारे ॥  
 कुटिल भुकुटि की रेख सुहाई । मसिँविन्दुक तापर सुखदाई ॥  
 नयन नासिका भाल विशाला । कलबल बोलन परमरसाला ॥  
 अल्प दशन चिबुँ कंदर ग्रीवा । तनुघन श्याम मृदुल छवि सींवा ॥  
 मातु निरखि नयनन सुखपावैं । प्रेम विवश मति गति बिसरावैं ॥  
 निरखिरूप यशुमति अनुरागै । कहत कहूँ मम दीठि न लागै ॥  
 तब अँचरातर लेत छिपाई । डारत बार लोन अरु राई ॥

दोहा—कबहुँ झुलावति पालने, कबहुँ खिलावति गोद ॥

कबहुँ सुवावति पलँगपर, यशुदासहित विनोद ॥

सो०—नित प्रति ब्रजकी बाभ, आवैं यशुमतिके सदन ॥

मुदित निरखि घनश्याम, लैलै गोद खिलावहीं ॥

इहि विधि विहरत बाल कन्हारी कछु दिनमें संतन सुखदाई ॥  
 लागे चलन घुटुह्वनि आँगन । लगे मातु सों भाखन माँगन ॥  
 खेलत मणिमय आँगन माहीं । देखि रहत लखि निज परछाहीं ॥  
 कबहुँ तात कहि पकरन धावैं । जानु पाँणि विचरत छवि पावैं ॥  
 कबहुँ किलकि तात मुख पेखें । कबहुँ हँसि जननी तन देखें ॥  
 कबहुँ बुलाय लेत नँदराई । कबहुँ जननि ठिग आवत धाई ॥  
 कबहुँ किलकि अनत उठि भाजैं । गिरत परत घुटुवन छवि छाजैं ॥  
 कबहुँ कि जात जहाँ बलभाई । खेलत गोप बाल समुदाई ॥  
 कबहुँ कहत कछु खंडित वाता । सुनत होत सुख पूरण गाता ॥  
 कहन चहत कछु प्रगट न आवैं । भाखन माँगत सैन बतावैं ॥  
 मात समझ मथनीते लेई । कछु खवाय कछु करै धर देई ॥

१ देखतरहै । २ सर्पमणिको । ३ निमिराजाको । ४ बार । ५ श्यामविन्दु ।  
 ६ छोटेछोटेदांत । ७ ठोड़ी । ८ नजर । ९ घोटू । १०-११ हाथ ।



खेलत खात कान्ह मणि अँगना । इत उत करत घुटुरुवन रिंगना ॥

दोहा-करचूरा पगपैजनी, तनु रंजित रजपीत ॥

उर हरि नख कैटि किंकिणी, मुखमंडित नवनीत ॥

सो०-होत चकित चितवाय, बजत पैजनी शब्दसुनि ॥

सुर सुनि रहत लभाय, बालदशाके चरित लखि ॥

खेलत आँगन बाल गोविन्दा । तात मात उर करत अनन्दा ॥

चलत पाणि पदकी परछाहीं । प्रति बिम्बतमणि आँगन माहीं ॥

मनहुँ शुभग छवि महितटपाई । जल भाजन जल लेत भराई ॥

किधौं जानि पद कोमलतासन । धरि धरि देत कमलके आसन ॥

निरखि शुभग शोभा सुखदनियाँ । लिये हरषि सादर नैदकनियाँ ॥

नीलजलजतनु सुन्दरश्यामा । शुभग अंग सब छविके धामा ॥

अरुण तरुण नख ज्योति सुहाई । कोमल कमल चरण सुखदाई ॥

रुनु रुनु पैजनि पाँयन बाजै । मनसिजयंत्र सुनत सुरलाजै ॥

कटि किंकिणी जाटित खनकारी । पीत झँगुलिया सुभग सर्वौरी ॥

कर कमलनि चूरा छविछाजै । रुचिर बाहु भूषण अतिराजै ॥

कटुला हार जो अंग सुहाए । बिच बिच पदिक प्रवाल पुहाए ॥

चारु चिबुक द्युति वरणि न जाई । गोलकपोल परम छवि छाई ॥

दो०-अरुण अर्धरमाधिदर्शन द्युति, प्रकट हैंसनमें होति ॥

मानहु सुन्दरता सदन, रूप रत्नकी ज्योति ॥

सो०-मधुर तोतरे बैन, श्रवण सुखद सुनि मन हरण ॥

सुनत होत चित चैन, समुझत कछुक बनै नहीं ॥

नाशा सुभग कमल दल लोचन । भौल विशाल तिलक गोरोचन ॥

भुकुटि निकटम सिबिन्दुकलाग्यो । मनो अलि शावकसोयन जाग्यो ॥

लाल चौतनी शीश सुहाई । विविध रंग मणि गण लटकाई ॥

बाल दशाके कँचघुंघरारे । छिटकिरहे कछु वूमधुमारे ॥

१ बधनखा ( वाघके नख ) २ कमरमे कोंधनी । ३ माखन । ४ देखत ।  
५ नीलकमल । ६ कामदेवकेयंत्र । ७ लाल । ८ होठ । ९ दांत । १० सुंदरता-  
कोषर । ११ मस्तक । १२ श्यामबिंदु । १३ भौंराको बाल । १४ लटुरियाँ (जुल्फ)



मंजुल तारन की चपलाई । बाल दशा की ललित सुहाई ॥  
 चन्द्रबदनसुख सदन कन्हई । निरखिनन्द आनंद अधिकाई ॥  
 वदन चूमि उर सों लपटायो । सोसुख कापै जात बतायो ॥  
 ब्रज युवती सबचितवत ठाहीं । मनहुँ चित्रपुतरी लिखि काहीं ॥  
 प्रेम मगन नैद सुवन निहारैं । गृह कारजकी सुरति विसारैं ॥  
 ब्रज युवती हरि सों मन लावैं । नन्द सुवन सबके मन भावैं ॥  
 ब्रजवासी प्रभु सबके नायक । प्रेम विवश जनके सुखदायक ॥  
 बालचरितलखि सुरसुख पावैं । योग दशा सनकादि भुलावैं ॥

दोहा-करत बाललीला ललित, परमपुनीत उदार ॥

सुन्दर श्याम सुजान हरि, सन्तनके आधार ॥

सो०-कापै वरण्यो जाय, बालचरित नंदलालको ॥

कल्पन सकहि न गाय, शेषकोटि शारद सहस ॥

अथ नामकरण लीला ॥

इकादिन श्रीवसुदेव विज्ञानी । पठये बोलि गर्गमुनि ज्ञानी ॥  
 करि पूजा विधिवत बैठायो । युग पद कमल शीशतवनायो ॥  
 बहुरि कह्यो मुनिये ऋषिराई । जबते भयो कंस दुखदाई ॥  
 तबते गोकुल नन्द अवांसा । जाय रोहिणी कियो निवासा ॥  
 जाके गर्भ जन्म सुतलीन्हों । कंस त्रासते प्रगट न कीन्हो ॥  
 नाम करण ताको अवताई । भयो नाहिं तुम विना गुसाई ॥  
 करिकै कृपा तहां प्रभु जइये । ताको नाम राखिकै अइये ॥  
 मुनि वसुदेव वचन सुखपायो । हर्ष सहित मुनि गोकुल आयो ॥  
 नन्दराय ऋषि आगम जान्यो । अपनो बड़ो भाग्य करि मान्यो ॥  
 चरण धोय चरणोदक लीन्हों । अर्घासन अतिहित करि दीन्हों ॥  
 बड़ी कृपा कीन्ही ऋषिराजू । मोक्षम धन्य आन नाहिं आजू ॥  
 अति पुनीत भोजन बनवायो । विविध भौंति ऋषिराय जिमायो ॥  
 दोहा-बहुरि महारि ऋषि रायसों, कह्यो जोरि कर दोय ॥

१ दोनोंचरणोंमें । २ नन्दरायकेघरमें । ३ गर्गाचार्यको । ४ पवित्र । ५ दोनोंहाथ ।



किहि कारज प्रभु आगमन, कहौ कृपा करि सोय ॥

सो०—तब बोले ऋषिराज, पठयोहै वसुदेव मोहिं ॥

नामकरणके काज, सुभग रोहिणी सुर्वनको ॥

सुनत नन्द अति भये सुखारे । लै आये कनियां दोउ वारे ॥  
 मुनि चरणनमेले दोउ भाई । दई अशीस मुदित ऋषिराई ॥  
 हरिकी छवि अति आनंदकारी । देखि रहे मुनि पलक विसारी ॥  
 प्रथम नन्द बलहाथ दिखायो । जन्म दिवस मुनि पास सुनायो ॥  
 देखि गर्ग उठि कियो विचारा । है यह शिशु सब जगत अधारा ॥  
 अतिशुभ लक्षण बलको धामा । धन्यो नाम तिनको बलरामा ॥  
 बहुरि नन्द चरणन शिरनायो । कह्योकि ऋषिमम भागन आयो ॥  
 तुम सर्वज्ञ अहो मुनिनाथा । देखिये यह बालकको हाथा ॥  
 मुनिवर देखत चिह्न भुलान्यो । प्रेममगन सब तनुपुलकान्यो ॥  
 पुनि पुनि हरिको बदन निहारी । बोल्यो मुनिवर सुरत सँभारी ॥  
 धन्य नन्द धनि महारि यशोदा । धनि धनि धन्य खिलावत गोदा ॥  
 सुनहु नन्द मैं सत्य बखानों । इनको तुम सुत करि मतजानों ॥

दोहा—रूपरेख जाके नहीं, अलख अनादि अनूप ॥

सोभक्तनहित अवतन्यो, निज इच्छा अनुरूप ॥

सोरठा—इनते बड़ो न कोय, येकर्ता सब जगतके ॥

जोये करें सो होय, तुम सों हम सांची कहें ॥

इनके नाम अभिते जगमाहीं । तदपि कहौं मैं कछु तुम पाहीं ॥  
 इन कबहूँ वसुदेवके धामा । लियो जन्म सुन्दर वर श्यामा ॥  
 ताते वासुदेव इक नामा । सो सुमिरत पावहिं नर कामा ॥  
 कहिहैं कृष्ण बहुरि जगमाहीं । जाके सुमिरत पाप नशाहीं ॥  
 अरु ये जैसे कर्मनि करिहैं । तैसे नाम जगत विस्तरिहैं ॥  
 दुष्ट दैलन सन्तन सुखदाई । भूमिभार हरिहैं दोउ भाई ॥

१ रोहिणीकेपुत्रको । २ दाऊजीको । ३ बालक । ४ कृष्णको । ५ अनेक ।

६ दुष्टनकोमारनवारो ।



तुम कबहुं तपकरि यह माँगा । तुमहिं खिलावैं अति अनुरागा ॥  
ताते सुत करि तुम इनपायो । मतजानौ इनको निर्ज जायो ॥  
ये अति सुखदायक ब्रजकेरे । करिहैं अति आनन्द घनेरे ॥  
सुनि ऋषिसुख हरि यश सुखराशी । आनंदे सब ब्रजके वाशी ॥  
सुनत नन्द यशुमति सुखपायो । सुनि चरणनको शीशनवायो ॥  
बहुत भेंटलै आगे राखी । स्तुति बहुत भांति सों भाखी ॥

दोहा—विदा भये ऋषिराज तब, नन्दभाग्य बड़ भाखि  
चले मधुपुरीको हरषि, हरि मूरति उरराखि ॥

सो०—कह्यो हर्षि ऋषिराय, सब वृत्तान्त वसुदेवको ॥  
सुनत बहुत सुखपाय, ऋषिहि पूजि कीन्हें विदा ॥

यशुमति समुझि गर्गकी वानी । आपुनि अति बड़भागिन जानी ॥  
हरिको लै उरसों लपटायो । प्रमुदित स्तनपान करायो ॥  
श्यामश्याम मुख निरखत मोदा । मातु रोहिणी और यशोदा ॥  
रखैंकि रखैंकि हरि बैठत गोदा । भावत हरिके बाल विनोदा ॥  
हरिको गोदलिये दुलरावैं । पुनि पुनि तुतरे बोल बुलावैं ॥  
कबहुँक गावत दैकर तारी । कबहुँ सिखावत चलन मुरारी ॥  
तनक तनक भुज टेक उठावैं । क्रम क्रम ठाढ़े होत सिखावैं ॥  
पुनि गहि भुज पद द्रैक चलावैं । लखरातलखि मन सुख पावैं ॥  
मनहीं मन यों विधिहि मनावैं । कबधौं अपने पांयन धावैं ॥  
कबहुँक छोंड देत अँगनैया । खेलत मुदित तहां दोउ भैया ॥  
गौरश्याम बलराम कन्हैया । संगहि संग फिरत दोउ भैया ॥  
जिमि बछराके पाले गैया । ब्रजवासी जनलेत बलैया ॥

दोहा—धवल धूरि धूसरिततनु, बाल विभूषण अंग ॥  
अंजन रंजित दृगं चपल, निरखत लजत अनंग ॥

सो०—विहरत आनंदकन्द, मणि मय आंगन नन्दके ॥



यदुकुल कैरव चन्द, दहन दनुज कुल वन अनल॥

कबहुं ठाढ़ि होति गहि मैया । कबहुं डोलत चलत कन्हैया ॥  
कुलही चित्र विचित्र अंगुलिया । दमकि उठत डैललित दँतुलिया ॥  
मुनि मन हरणमंजुमसि बिदा । सुखद चारु लोचन अरविदा ॥  
कलबल वचन तोतरे बोलैं । गहिमणि खंभ डगत डगडोलैं ॥  
निरखत झुक झांकत प्रतिबिम्बै । देत परम सुख पितु अरु अम्बै ॥  
मथति जहां दधि नैदकी रानी । होतखरे तहूँ टेकिमथानी ॥  
मात तनिकदधि देति खवाई । लेत प्रीति सों सो सुखदाई ॥  
क्षीर समुद्र जासु रजधानी । तनकदही सों तिन रुचि मानी ॥  
तनिकसो बदन तनिकसी दँतियां । तनिकसों अधर तनिकसी बतियां ॥  
तनकबदन दधि तनक कपोलन । तनक हँसन मन हरन अमोलन ॥  
तनक तनक कर तनकै माखन । तनक अंगुरिया तनकै चाखन ॥  
तनक तनक भुज चरण सुहाये । तनक स्वरूप मनोज लजाये ॥

दोहा—तनक विलोकन जासुकी, सकल भुवन विस्तार॥

तनक सुने यश होतहै, तनक सिन्धु संसार ॥

सो—तनकरहत नहिं पाप, तनक नाम जाके लिये ॥

मिटत सकल भवताप, तनक कृपा जापै करहिं

अथ बरसगांठलीला ॥

बरसगांठ लालनकी आई । द्विधट मासके भये कन्हवाई ॥  
फूली फिरत यशोमति माई । घरघर ते सब बधू बुलाई ॥  
प्रमुदित मंगल गान करायो । आनंद उमंगे तूर बजायो ॥  
आँगन सकल सुगंधि लिपायो । रचिरचि मोतिन चौक पुरायो ॥  
फूले फिरत नन्द सुख भारी । लिये गोपगण सकल हँकारी ॥  
द्वारन बन्दनवार बँधाये । ध्वजपताक रचि विविध बनाये ॥  
पान फूल फल डार रसाला । हरदि दूब दाधि अक्षत माला ॥

१ यदुकुल कमोदनीको प्रकाशितकरनवारेचंद्र । २ दैत्यकुलवनरूपके नाशकरवेको अग्निरूप । ३ माता । ४ कामदेव । ५ संसारकेश । ६ वर्षादिनके ।



मंगल द्रव्य सकल मँगवाई । बहुमेवा बहुभांति मिठाई ॥  
 यशुमति कीन्ह उवाटि अन्हवाये । अंग पोंछि भूषण पहिराये ॥  
 टोपी जरकस पीत झंगुलिया । दमकत डैडै चार दंतुलिया ॥  
 कटुला कंठ बघनखानीको । किये भाल केसरको टीको ॥  
 लटकत ललित ललाट लटूरी । वरणि न जाय वदन छबिरूरी ॥

दोहा-नयन आँज भुकुटी निकट, कियो मातुमसिबिन्द ॥

करि शृंगार हरि सुख निरखि, चूम्यो सुख अरविन्द  
 सो०-लिये गोद सुखकन्द, नन्द बोलि यशुमति कह्यो ॥

बोलहु भूसुर वृन्द, लग्न घरी आवत चली ॥

काहेको अब गहँरु लगावत । विप्र वेगि काहे न बुलावत ॥  
 नन्द क्षिप्र वर विप्र बुलाये । पदपँखारि आसन बैठाये ॥  
 लै उछंग लालन नँदराई । बैठे हर्षि चौकपर जाई ॥  
 वेद मंत्र विधि सहित पढावत । बरसगांठि सुख सहित जुड़ावत ॥  
 ब्रजनारी सब बनिबनि आवैं । मंगल तिलक श्यामको लावैं ॥  
 गावत मंगल कोकिल बैनी । हरि दर्शन प्यासी मृगनैनी ॥  
 तिलक सबनि मोहनके दीन्हों । देखि देखि सुख अति लुखलीन्हों ॥  
 विप्रन बहुत दक्षिणा पाई । बाँटी सबको पान मिठाई ॥  
 धनमणि चीर निछावरि कीन्है । बार बार नेगिनको दीन्है ॥  
 तब सासी पचरंग मँगई । हर्षित महारि वधुन पहिराई ॥  
 देत अशीश सकल अतिमोदा । लेत यशोमति भरि भरि गोदा ॥  
 नित नव गोकुल होत बधाई । सदा श्याम जनके सुखदाई ॥

दोहा-धन्य यशोमति धन्य नँद, धन २ बालविनोद ॥

धन्य सुमन जिन जननके, रहत सुधारस ओद ॥

सो०-धानि धानि ब्रजकी बाल, कहि २ सुर वर्षहि सुमन ॥

धन्य धन्य नँदलाल, दैत्यदलन सज्जन सुखद ॥

कान्ह चलत पद द्वै द्वै धरनी । होत मुदितलखिनँदकी धरनी ॥

१ कारीबिंदी (भोमटकना वा डिठोना) । २ देर । ३ जल्दी । ४ चरणघोष । ५ गोद ।



करत हुती अभिलाषा जोई । निरखत अपने नयनन सोई ॥  
 रुलुकु रुलुकु नूपुर पग बाजै । डगमगात डोलत छविछाजै ॥  
 बैठ जात पुनि उठत तुरतहीं । देहरिलों चलिजात फुरतहीं ॥  
 धाम अवधि राखत अटकाई । गिरि २ परत नाधि नहिं जाई ॥  
 कीन्हीं तीन पैड जिन बसुंधा । देहरिताहि नँधावत यशुदा ॥  
 पकरि पाणि क्रम क्रम उतरावै । लखि सुर सुनि मन विस्मयपावै ॥  
 कोटिन अंड रचै पल माहीं । पलमें बहुरि मिटावै ताहीं ॥  
 ताहि खिलावत यशुमति ग्वारी । नाना विधि सुख करि २ भारी ॥  
 कबहुं दै करतारि नचावै । कबहुं मधुर २ सुर गावै ॥  
 देखि श्याम जननीके ताँई । आपुन गावत तारि बजाई ॥  
 पग नूपुर कटि किंकिणि कूजै । लखि छवि मन अभिलाषहि पूजै ॥

दोहा-शोभित कहुला कंठकल, उरहरिनैख छविराश ॥

मनहुँ श्याम घनमें कियो, नवशशिविमल प्रकाश ॥

सो-जननि कहत बलिजाउँ, नचहु लेहु नवनीत सद ॥

धरत रुनक सुन पाउँ, त्रिभुवनपाति नवनीत हित ॥

बोलन लगे श्याम कलवानी । कलुकतोतरी कलुक सयानी ॥  
 नंदहि तात यशोदा भैया । बलसों दाऊ कहत कन्हैया ॥  
 प्रातहि उठि मांगत दोउ भैया । माखन रोटी देरी भैया ॥  
 अँचरागहें न मानत वाता । अति आतुर दुर्नकत दोउ भ्राता ॥  
 सुनि २ मधुर वचन सुख पावैं । ताते जननी गहँरु लगावैं ॥  
 जननि मध्य सन्मुख संकर्षण । पाछे ठाढ़े सुभग श्यामतन ॥  
 मनौ सरस्वति सँग युगपक्षी । राजहंस अरु मोर विपक्षी ॥  
 कवैरी गही श्याम विश्रलाई । मुक्ता माँग गही बल भाई ॥  
 मनहुँदुहुन निज २ भखँ लीनो । जननी सों झगरो पह कीनों ॥  
 नंददेखि हँसि २ गएलोटी । यशुमति मुदित कर्मकी मोटी ॥

१ पृथ्वी । २ श्रेष्ठ । ३ नाहरको नख । ४ रुदन । ५ देरी । ६ चुटिया  
 ( वेणी ) । ७ भक्षण ।



कतहौ औरि करत गहि चोटी । यहै बात मोहन तेरी खोटी ॥  
जो चाहौ सो लेउ दोउ भैया । करहु कलेवा मैं बलि जैया ॥

दोहा-दियो कलेऊ मात उठि, माखन रांटी हाथ ॥

खात खवावत बालकन, सकल विश्वके नाथ ॥

सो०-जेहि ध्यावैं योगीश, सनकसनंदन आदि मुनि ॥

कौतुकनिधि जगदीश, करत चरित संतन सुखद ॥

अथ ब्राह्मणलीला ॥

चलत लाल पैजनि के चायन । पुनि २ हर्षित लखि २ पायन ॥

विविध ग्वाल बालन सँगलीने । डगमगात डोलत रँगभीने ॥

कबहुं दौरि द्वार लौं जाहीं । कबहुं भजि आवैं घर माहीं ॥

ब्राह्मण एक नन्दके आयो । महाभाग्य हरिभक्त सुहायो ॥

गोपनको सो पूज्य कहायो । पुत्रजन्म सुनिके उठि धायो ॥

यशुमति देखि अनन्द बढायो । आदर करि भीतर बैठायो ॥

पाँय धोय जल शशि चढायो । पाँक करनको भवन लिपायो ॥

अहो विप्र विनती सुनि लीजै । जो भावै सो भोजन कीजै ॥

धेलु बुहाय दूधलै आई । पांढे रुचि करि खीर बनाई ॥

घृत मिष्ठान्न खीर मिश्रितकर । कृष्ण भोग हित धार परसिधर ॥

वेद मंत्र पढिकै हरि ध्यायो । नयन मूँदिकै ध्यान लगायो ॥

नयन उधारि विप्र जब देख्यो । श्यामहि आगे जँवत पेर्यो ॥

दोहा-अहो यशोदा आपने, सुतकृत देखौ आय ॥

सिद्धपाँक सब आयकै, डान्यो कान्ह जुठाय ॥

सो०-महारि जोरि युगपान, विनय करी द्विजराजसन ॥

बालक अति अज्ञान, बहुरि पाक विधि कीजिये ॥

बहुरि दूध मिष्ठान्न मँगायो । ब्राह्मण फिरकर पाक बनायो ॥

जबहीं ध्यान धन्यो मन लाई । तबहीं लागे खान कन्हाई ॥

१ भगरो । २ सोईकरवेंको । ३ पुत्रकेकौतुक । ४ करीकारईसोई ।

५ दोनोंहाथ । ६ ब्राह्मण ।



ऐसेहि विप्र न जेवन पावै । बार बार हरि छूछू आवै ॥  
 तब यशुमति हरि सों रिसि अहं । कतहि अचकरी करत कन्हाई ॥  
 मैं इच्छाकरि विप्र जिमाऊं । बार २ भोजन बनवाऊं ॥  
 यह अपने ठाकुरहि जिमावै । ताको तू गोपाल खिझावै ॥  
 भैया सुहि जनि दोष लगावै । बार बार यह मोहि बुलावै ॥  
 नयन मूँदि कर जोरि मनावै । बहुत भौंति कर विनय सुनावै ॥  
 लैलै नाम कहत प्रभु ऐसे । खीर खांड यह भोग लगैये ॥  
 तब मैं रहि नसकौं उठि धाऊं । याको दीनो भोजन पाऊं ॥  
 प्रेम सहित जब मोहि बुलावै । तब नहि रहत मोहि बनि आवै ॥  
 सुनत गूढ मृदुहरिके बयना । खुलिये विप्र हृदयके नयना ॥

दोहा—धनि धनि गोकुल नंदधनि, धन्य यशोदा माय॥

धनि ब्रजवासी धन्य ब्रज, जहाँ प्रगटे हरि आय॥

सो०—सफलजन्म प्रभु आज, प्रकटभयो सब सुकृतफल॥

दीनबन्धु ब्रजराज, दियो दरश मोहि कृपाकरि ॥

बार बार कहि नंदके आँगन । लोटत द्विज आनंद मगनमन ॥  
 मैं अपराध कियो विन जाने । कोजाने किहि भेष समाने ॥  
 भक्तहेतु वश रहत सदाई । यहै नाथ तुम्हरी बड्याई ॥  
 जेजे शरण तुम्हारी आये । तेते भये पुनीत सुहाये ॥  
 पतित उधारन यश विस्तारा । अघ जारन इकनाम तुम्हारा ॥  
 देह धरत गो द्विज हित लागी । पायो दरश भयो बडभागी ॥  
 हितकी चितकी मानन हारे । सबके जियकी जाननहारे ॥  
 शरण २ प्रभु शरण तुम्हारी । दीनदयालु कृपालु मुरारी ॥  
 हँसत श्याम यशुमति ढिग ठाढ़े । प्रेम-मगन मन आनंद बाढ़े ॥  
 निजेजन जानि कृपा अतिकीनी । प्रेम भक्ति हरिताको दीनी ॥  
 प्रेम मगन द्विज बारहि वारा । कहि जै जै जै नन्दकुमारा ॥

१ छिपेभये । २ वचन । ३ दीन ।



पुनि २ पुलकत देत अशशि । विदा भयो घरको द्विज ईशा ॥

दोहा-देख चरित यशुमति चकित, परी विप्रके पांय ॥

दिये रत्न बहु दक्षिणा, चले हर्ष द्विजराय ॥

सो०-यशुमति लिये उठाय, गोद खिलावत कान्हको ॥

चितै वदन बलिजाय, आनंद निधि सुखको सदन ॥

अथ चंद्रप्रस्तावलीला ॥

शोभा मेरे हरिपै सोहै । मैं बलि बलि पटतरको कोहै ॥

मेरो श्याम मनोहर जीवन । विहँसि श्याम लागे पयपीवन ॥

ठाढी अँजिर यशोदा रानी । गोदी लिये श्याम सुखदानी ॥

उदयभयो शशि शरद सुहावन । लागी सुतको मात दिखावन ॥

देखहु श्याम चन्द्र यह आवत । अति शीतल दृग ताप नशावत ॥

चितै रहे हरि इकटक ताही । करते निकट बुलावत वाही ॥

मैया यह मीठो कैखारौ । देखत लगत मोहि अति प्यारौ ॥

देहि मँगाय निकट मैं लैहौ । लागी भूख चन्द्र मैं खैहौ ॥

देहि वेग मैं बहुत भुखानौ । मांगतही मांगत विरुझानौ ॥

यशुमति हँसत करत पछतायो । काहे को मैं चन्द्र दिखायो ॥

रोवत है हरि विनहीं जाने । अवधौ कैसे करिके माने ॥

विविध भांति कर हरिहि भुलावै । आन बतावै आन दिखावै ॥

दोहा-कहत यशोदा कौन विधि, समझाऊँ अब कान्ह ॥

भूलि दिखायो चन्द्र मैं, ताहि कहत हरिखान ॥

सो०-अनहोनी क्यों होय, तात सुनी यह बात कहुं ॥

याहि खात नहिं कोय, चन्द्रखिलौना जगतको ॥

यहै देत नित माखन मोको । क्षण क्षण तात देत सो तोको ॥

जो तुम श्यामचन्द्रको खैहौ । बहुरो फिर माखन कहँ पैहौ ॥

देखत रहौ खिलौना चन्दा । हठ नहिं कीजै बालगोविन्दा ॥



मधु मेवा पकवान मिठाई । जो भावै सो लेहु कन्हाई ॥  
 पालागों हठ अधिक न कीजै । मैबलि रिसही रिस तनु छाँजै ॥  
 खसि २ कान्ह परत कनियाँते । देशशि कहत नंदरनियाँते ॥  
 यशुमति कहति कहा धौं कीजै । मांगत चन्द्र कहाँते दीजै ॥  
 तब यशुमति इक जलपुटलीनो । करमें लै तिहि ऊँचो कीनो ॥  
 ऐसे कहि श्यामहि बहकावै । आव चन्द्र तोहि लाल बुलावै ॥  
 याहीमें तूतैलु धरि आवै । तोहि देखि लालन मुखपावै ॥  
 हाथ लिये तोहि खेलत रहिहै । नेक नहीं धरणी पर धरिहै ॥  
 जलपुट आनि धरणि परराख्यो । गहि आन्यौ शशि जननी भाख्यो ॥

दोहा-लेहु लाल यह चन्द्र मैं, लीनो निकट बुलाय ॥

रोवे इतनेके लिये, तेरी श्याम बलाय ॥

सो०-देखहु श्याम निहारि, या भोजनमें निकट शशि ॥

करी इती तुम आरि, जा कारण सुन्दरसुवन ॥

ताहि देखि मुसिक्याय मनोहर । बार बार डारत दोऊ कर ॥  
 चन्द्रापकरत जलके माहीं । आवत कछु हाथमें नाहीं ॥  
 तब जलपुटके नीचे देखै । तहां चन्द्र प्रतिबिंब न पेखै ॥  
 देखत हैंसी सकल ब्रजनारी । मगन वाल छवि लखि महतारी ॥  
 तबहिं श्याम कछु हैंसि सुसकानें । बहुरो मातासों विरुझानें ॥  
 ल्यों गो री मा चन्दा ल्यों गो । वाही अपने हाथ गहौंगो ॥  
 यह तौ कलमलात जलमाहीं । मेरे करमें आवत नाहीं ॥  
 बाहर निकट देखियत वाही । कहौ तौ मैं गहिल्यावों ताही ॥  
 कहति यशोमति सुनहु कन्हाई । तब मुख लखि सज्जुचत उडराई ॥  
 तुम तिहि पकरन चहत गुपाला । ताते शशि भजि गयो पताला ॥  
 अब तुमते शशि डरपत भारी । कहत अहो हरि शरण तुम्हारी ॥  
 विरुझाने सोये दैतारी । लिय लगाय छतियां महतारी ॥

१ चन्द्र । २ शरीर । ३ वर्तन । ४ छाया । ५ विधु ।



दोहा-लैपौढ़ाये सेजपर, हरिको यशुमतिमाय ॥  
 अति विरुझाने आज हरि, यह कहि २ पछताय ॥  
 सो०-करसों ठोकि सुनाय, मधुरेसुर गावत कछुक ॥  
 उठि बैठे अतुराय, चढ़पटाय हरि चौंकिकै ॥

अथ पुरातन कथालीला ॥

पौढो लाल कहत महतारी । कहाँ कथा इक श्रवणन प्यारी ॥  
 हषे यह सुनि मन वनवारी । पौढ़ि गये हँसि देत हुँकारी ॥  
 नगर एक रमणीय सुहावन । नाम अवध अति सुंदर पावन ॥  
 बड़े महल तहँ अगम अटारी । सुंदर विशद चारु गच द्वारी ॥  
 बहुत गली पुर बीच सुहाई । रहैं सदा सब सुगंधि सिँचाई ॥  
 भांति भांति बहु हाट वजारू । अति भृंगार जलु विश्व भृंगारू ॥  
 तहां नृपति दशरथ रजधानी । तिनके नारि तीन पटरानी ॥  
 कौशल्या कैकयी सुमित्रा । तिन जन्मे सुत चार पवित्रा ॥  
 राम भरत लक्ष्मण रिपुहन्ता । चारों अति सुन्दर गुणवन्ता ॥  
 तिनमें राम एक व्रतधारी । अतिसुन्दर जनके हितकारी ॥  
 विश्वामित्र एक ऋषिराई । तिनहि सतावें निशिचर आई ॥  
 तिन नृप सों द्वै सुत लै माँगे । अपनी रक्षाके हित लागे ॥

दोहा-राम लषण ऋषि लैगये, दनुज हते तिनजाय ॥

ऋषिदीनी विद्या बहुत, तिनको अति सुख पाय ॥

सो०-तहां जनक इकभूप, धनुषयज्ञ ताने रच्यो ॥

कन्यातासु अनूप, जुरे तहां भूपति अमित ॥

ऋषि लैगये कुँवर तहँ दोऊ । जनकराय सन्माने सोऊ ॥  
 धनुष तोरि भूपन सुखमारी । राम विवाही जनककुमारी ॥  
 चारहुँ कुँवर व्याह तहँ आये । भये अवध पुर अनैद वधाये ॥  
 रामहि देन लगे नृपराजू । सज्यो सकल अभिषेक समाजू ॥

१ उज्ज्वल । २ राक्षस । ३ बला-अबला ।



ताही समय कैकयी रानी । चेरीकी मतिखाँ बौरानी ॥  
वचन मांगि राजा साँ लीनो । वनको वास राम को दीनो ॥  
सुनि पितु वचन धरत हितकारी । नारी सहित भये वनचारी ॥  
तिन्हें चलत भ्राता संगलापयो । उनके जात पिता तनुत्यागो ॥  
चित्रकूट गये भरत मिलनजब । दैपद पाँवर कृपा करी तब ॥  
युवती हेतु कपट मृग मारा । राजिव लोचन राम उदारा ॥  
रावण हरण कियो तब नारी । सुनतश्याम घन नाँद विसारी ॥  
चौंकि कह्यो लक्ष्मण धनुदेहू । देख भयो यशुदहि सन्देहू ॥

अथ कण्ठेदनलीला ॥

छं०—सन्देह जननीमनभयो हरि चौंकधौं काहे परचो  
कहुँदीठ खेलतमें लगी धौं स्वप्नमें कान्हर डरचो ॥  
बहु भाँति देव मनाय पटि २ मंत्र दोष निवारही ॥  
लैपियति पानी वारि पुनि २ राइ लोन उतारही ॥  
दोहा—साँझहिते विरुझाय हरि, करी चन्द्रहित आरि ॥  
झिझकिउठयो धौं ताहि ते, रह्यो सुरत उरधारि ॥  
सो०—बडभागी नँदनारि, भाहिमा वेद न कहिसकैं ॥  
हरिको वदन निहारि, विसरावत त्रय ताप दुख ॥

प्रात नन्द उठि हरिपै आये । मुखछवि देखनको अतुराये ॥  
निशि के द्रुं नयन अति आरत । हरुवै करि मुखते पटारत ॥  
स्वच्छ सेजते वदन प्रकाश्यो । द्रुंतिमिर नयननिको नाश्यो ॥  
मनहुँ मथनपै निधि उडराई । फेणु फोरि कै दई दिखाई ॥  
धाये ब्रज जन चतुर चकोरा । इकटकरहे वदन शशि ओरा ॥  
फूली कुमुदनिसी महतारी । कहत उठहु सुतमें बलिहारी ॥  
माखन रोटी अरु मधु मेवा । जो भावै सो करहु कलेवा ॥  
सद माखन मिसरी तब आनी । कछु खवाय धोयो मुखपानी ॥

१ खडाऊं । २ रात ।



देखि बदन छवि महिर सिहानी । कहति नन्दसों यशुमति रानी ॥  
 कमछेदन अब हरिका कीजै । कुंडल सहित देख सुखलीजै ॥  
 बोलि विप्र शुभ दिवस गनायो । जाति कुटुंब सब न्योत बुलायो ॥  
 कुलव्योहार कियो सब साजा । विविध भांति बहु वाजन बाजा ॥  
 छंद-बाजी बधाई विविध आंगन नारि मंगल गावहीं ॥  
 सुर निरखितहोंइ सुमननिवर्ष गोकुल छावहीं ॥  
 करिप्रथम मुंडन श्यामको पुनि कर्ण वेधन विधलई ॥  
 धरिकै सुपारी पान ऊपर बहुरि गुरु भेली दई ॥  
 हंसत सुरगण सहित विधि हरि मात उर अति धुकधुकी ॥  
 अतिहि कोमल श्रवण वेधत सकत नहिं सन्मुख तकी ॥  
 भरि सीं करोचन देत श्रवणनि निकट करि अतिचातुरी ॥  
 द्वैदुर मंगाये कनक के कह कहौं छेदन आतुरी ॥  
 देख रोवत जननि लीन्हे विहँसि तबहीं झुकि अली ॥  
 हंसत नंद सब युवति गावत झमकि भीतर लेचली ॥  
 कहति सुरवनिता परस्पर धन्य धन ब्रजभामिनी ॥  
 नहिंनइनकी किकरी सम हम सकल सुरकामिनी ॥  
 दोहा-करति निछावरि ब्रजवधू, धन माणि भूषण खीर ॥  
 सकल अशीशत नंदसुत, जहँ तहँ याचक भीर ॥  
 सो०-पहिरावत नंदराय, ब्रज युवतिन भूषण वसन ॥  
 आनंद उर न समाय, मनहुँ उमंग चहुँ दिश चल्यो ॥  
 मितही नवमुद मंगल ताके । मंगल मूरति हरि सुत जाके ॥  
 जेहि विधि तात मात सुखपावैं । सुखनिधान सोइ चरित उपावैं ॥  
 जाको भेद वेद नहिं पावैं । नंद भवनसो कान छिदावैं ॥  
 निज भक्तन हित नरतनु धारी । करत बाललीला सुखकारी ॥  
 हरि अपने रंगनि कछु गावैं । नंद भवन भूषण मनभावैं ॥



तनक तनक चरणनखों नाचै । मन २ रीझ विविध विधिराचै ॥  
मन्द मन्द पग नूपुर बाजै । बाल विभूषण अंग विराजै ॥  
कबहुं भुज उठाय गुरावै । धौरी धूमरि गाय बुलावै ॥  
कबहुं माखनलै सुख नाचै । कबहुं खंभ प्रति बीच खवावै ॥  
माखन मांग दुहुं करलेई । एक भाग प्रतिविबहिं देई ॥  
तासों कहत लेत क्यों नाहीं । डारदेत काहे महिमाहीं ॥  
दुर देखत यशुमति महतारी । उर आनंद करति अतिभारी ॥

दोहा—हरषि जननि मुख चूमकै, लीनो गोद उठाय ॥

परमानंदरस मगन मन, सो सुख किमि कहि जाय ॥

सो०—कौतुक निधि भगवान, करत चरित नित २ नये ॥

सुन्दर श्याम सुजान, ब्रजवासिनके प्रेमवश ॥

अथ माटीखानलीला ॥

खेलत श्याम धामके द्वारे । सोहत ब्रजलरिका संगवारे ॥  
अति अज्ञान सबनिमति भोरी । सबकी प्रीति श्याम सँग जोरी ॥  
एक वैस सब परम सुहाये । करत बाललीला सुखपाये ॥  
गावत हैंसत देत किलकारी । लखि २ सुख पावत महतारी ॥  
निरखि रूपसब ब्रजजन मोहै । कोटि काम नहिं पटतरसोहै ॥  
तनु पुलकित अति गद्गदवानी । निरखि मनहिं मन महारि सिहानी ॥  
तबहिं श्यामघन माटी खाई । यशुमति देखि सांठि लै धाई ॥  
पकरी भुजा श्यामकी जाई । कहति कहा यह करत कन्हाई ॥  
उगलहुवैगि वदन ते माटी । नाहीं तौ मारतिहौं सांठी ॥  
सबदिन झूठवतहै सबग्वालन । मोसों अब कहा कहिहौ लालन ॥  
तब मोहन कीनी लँगैराई । कहति किमैं माटी नहिं खाई ॥  
झूठहि मोको लोग लगावै । माटी मोको नेकनभावै ॥

दोहा—झूठ कहत तोसों सबै, माटी मोहिं न सुहाय ॥

नहिं माने जो मात तू, दिखराऊं मुँह बाय ॥

१ हाथ । २ धूर्तता ।



Vinay Avasthi Sahib Bhuvan Vani Trust Donations

सो०-दीनो मुखहि उधारि, नयन मूँदि माता निकट॥

देखि चकित नँदनारि, तनुकी सुरत रही नहीं॥

दिखरायो त्रिभुवन मुखमाहीं । नभ शशि रवि तारा इकठाहीं ॥  
 सुर सागर सरिता गिरि कानन । सुर सुरनायक शिव चतुरानन ॥  
 सकल लोक लों लुथ यम काला । महि मंडल सब अग जग जाला ॥  
 देखि चरित यशुमति अकुलानी । करते सांठि गिरति नहिजानी ॥  
 वधन मूँदि तब हर्ग हरि खोले । डरसमेत माता सों बोले ॥  
 मैया मैं माटी नहि खाई । यशुमति चकित रही अरगाई ॥  
 कहत नंद सों यशुदरानी । हरिकी कथा नजात बखानी ॥  
 माटीके मिसकरि मुखबायो । तीन लोक तामहिं दिखरायो ॥  
 स्वर्ग पताल धरणि वन बागा । सुर नर असुर विपुल खर्ग नागौ ॥  
 अपरसृष्टिकहि जाति सुनाहीं । देखो सकल बदनके माहीं ॥  
 मोको परत सांच सबजानी । जो कछु कही गर्ग ऋषिवानी ॥  
 चकित नंद सुनि अचरजवानी । मन मन करत विचार विनानी ॥

दोहा-नन्द कहत सुनि बावरी, हरि अति कोमल गात॥

अचरज तेरी बातको, पुनि पाछे पछतात ॥

सो०-अचरज तेरी बात, को जानै देख्यो कहा ॥

कुशल रहौ दोउ भ्रात, राम श्याम खेलत हँसत॥

कहति श्याम सों यशुमति मैया । मैं तेरी बलिहारि कन्हैया ॥  
 मैं अजान रिस् बीच न जानी । वृथा श्याम तुम पर रिस् सानी ॥  
 जरहु हाथ जिन सांठि उठाई । बरहु आंखि जिन दीठ दिखाई ॥  
 मधु मेवा दधि माखन मैठी । खात लाल तुम काहे माटी ॥  
 सिंगरोड़ दूध पियो तुमन्यारे । बलको वांट न देहु पियारे ॥  
 कहत नंद सों यशुमति मैया । दुहौ लाल की ठाडी मैया ॥

१ आँखें । २ पक्षी । ३ हाथी । ४ महिला ।



कजरीको पय पियो गुपाला । जो तेरि चोटी बहै विशाला ॥  
 सब लरकनमें तो तनु माही । वेग वैश बल श्री अधिकाही ॥  
 मात वचन सुनिके अनुरागे । ज्यों त्यों करि पय पीवन लागे ॥  
 खिन पीवत खिन २ कचटोवै । देखि २ मुखहँसति यशोवै ॥  
 मैया कब बाढैगी चोटी । यह तौ है अवही लौं छोटी ॥  
 तूजो कहतहि बललौं हैहै । छोडत गुहत गोडलौं जैहै ॥

दोहा—कितीबार भइ पर्यपियत, चोटी बडी न होहि ॥

कहि कहि झूठी बात नित, दूध पियावत मोहि ॥

सो०—सुनि सुनि भोरी बात, सुन्दर श्याम सुजानकी ॥

यशुमति मन न अघात, हँसि लीने उरलाय हरि ॥

भोरहिं महर यमुनतट धाये । दरशन करि अतिही सुख पाये ॥

अथ शालिग्रामलीला ॥

करि स्नान नन्द घर आये । पूजा हित यमुनाजल लाये ॥  
 तुलसीदल अरु कमल पुनीता । प्रभु निमित्त आने अति प्रीता ॥  
 पाँय धोय प्रभु मन्दिर आये । करी दण्डवत प्रेम बढाये ॥  
 स्थल लीप पात्र सब धोये । पूजाके सब साज सँजोये ॥  
 छाप तिलक सब अंग सँवारे । प्रभु पूजाविधि करन सँवारे ॥  
 कुँवरकान्ह खेलत ते आये । देखत पूजाविधि चितलाये ॥  
 विधिवत देव नन्द अन्हवाये । चन्दन तुलसी फूल चढाये ॥  
 भूषण वसन अलंकृत कीन्हें । धूप दीप अतिहित कर दीन्हें ॥  
 पट अन्तर दै भोग लगायो । आरति चरणनि शीश नवायो ॥  
 तबहीं श्याम बिहँसि उठि बोले । कहत तात साँ वचन अमोले ॥  
 बाबा तुम जो भोग लगायो । सोतो देव कछू नहिं खायो ॥  
 सुनि हरि वचन श्रवण सुखदाई । चितैरहे मुख हँसि नैदराई ॥



Vinay Avasthi Sahib Bhuvan Vag Trust Donations

दोहा-कहत नंद सुख पायक, या नहि कहिये तात ॥

देवनको कर जोरिये, कुशल रहो जिहिगात ॥

स०-हंसत श्याम सुखदानि, नंद स्वरूप न जानहीं ॥

रह्योतिनहिं सुत मानि, करत ब्रह्मलीलासगुण ॥

देखत जननि तहां दुरि ठाढी । मगन प्रेमरस आनंद बाढी ॥

बैठे नंद समाधि लगाई । तब यह लीला रची कन्हवाई ॥

शालग्राम मेलि मुख माहीं । बैठि रहे हरि बोलत नाहीं ॥

ध्यान विसर्जन करि नंद जागे । शालग्राम न देखे आगे ॥

खोजत चकित चित्त नंदराई । इष्टदेव किन लिये चुराई ॥

इतउत खोजत पावत नाहीं । भयो बडो अचरज मनमाहीं ॥

बिहंसत हरिके मुखमें जाने । देखत महारि महर सुसकाने ॥

सुनहु तात जननी बलिजाई । उगिलहु शालग्राम कन्हवाई ॥

मुखते तबहिं काढि ब्रजनाथा । दियो देवता नंदके हाथा ॥

हरिके चरित कहत नहिं आवैं । बालविनोद मोद उपजावैं ॥

लखिलखि मात पिता पुलकाहीं । देखि देखि सुर सिद्ध भुलाहीं ॥

धन्य धन्य सब ब्रजके वासी । बिहरत जहाँ ब्रह्म अविनाशी ॥

दोहा-परते पर परब्रह्म जो, निर्गुण अलख अनूप ॥

सो ब्रज भक्तन प्रेम वश, विहरत बालक रूप ॥

सो०-प्रेम मगन पितु मातु, निशि दिन जात न जानहीं ॥

क्योंहूं मन न अघात, सुनत वचन देखत दरश ॥

अथ अन्हवावनलीला ॥

यशुमति श्यामहिं कह्यो न्हवावन । सुनतहि मचलि परे मनभावन ॥

उबटनलै आगे गहि बाहीं । लोटिगये हरि मानत नाहीं ॥

तब यशुमति बहुभांति दुलारे । मैं बलि उठहु न्हवाऊं प्यारे ॥

उबटन पाछे धन्यो चुराई । फुसलावत सुत श्याम कन्हवाई ॥

मैं बलि ऐसी औरि न कीजै । जो चाहौ सो मोपै लीजै ॥

कहत लाल रोवै दुख पावै । ऐसो को जो तोहिं खिझावै ॥

१ छिपी । २ छोड़कै । ३ रात्रि । ४ राति ।



अतिरिसते मैं बलि तनु छोजे । सुन्दर कौमल अंग पसीजै ॥  
 बरजतही बरजत बिरुझाने । करिकारि क्रोध मनहिं अकुलाने ॥  
 धरत धरत धरणी पर लोटे । गहि माताके चीर निझोटे ॥  
 गहि गहि अँगके भूषण तोरैं । दधि माखनके भाजन फोरैं ॥  
 धन्यो तम दल जननी पासै । मानत नाहिं ताहि लैखि त्रासै ॥  
 मेहरि बांह धरिकै तब आने । जवहीं तेल उबटने साने ॥

दोहा—तब हुचती करि मातुको, गिरत परत गये भाज ॥

नेक निकट लागैं नहीं, मनमोहन ब्रजराज ॥

सो०—तब पुचकारे मात, साम भेद कहि कहि वचन ॥

मैं बलि आवहु तात, नहिं आवहु तो जानिहौ ॥

तुम मेरी रिसको हरि जानौ । मोको नीकी विधि पहिचानौ ॥  
 जोनहि आवहु मदनगोपाला । आज तुम्हें तौ बांधौ लाला ॥  
 तबहिं नन्द उतते चलि आये । कहत हरिहि किन अतिहि खिजाये ॥  
 लै कनियाँ उरसों लपटाये । बदन चूमि यशुमति पहुँ ल्याये ॥  
 कत खिजवत मोहनहिं अयानी । लै हियलाय लिये नंदरानी ॥  
 क्योंहुँ यत्न करिकै जब पायो । तब उबटन हरिके अँग लायो ॥  
 पुनि तातो जल न्हात समायो । दियो न्हावय वदन शशि धायो ॥  
 सरस बसन लैकै तनु पोछयो । बहुरो बदन सरोज अँगोछयो ॥  
 अंजन दोऊ दृगें भरि दीनों । भूपर चारु चखोडा कीनों ॥  
 सब अँगके भूषण मैंगवाये । क्रम क्रम लालनको पहिराये ॥  
 ऐसी रिस नहिं कीजै कान्हा । अब कछु खाउ जाउँ बलि नान्हा ॥  
 तब तुतरात कछो कोहेरी । जो मोको भावै सो देरी ॥

दोहा—कहत जननि या वचन पर, मैया बलि बलि जाय ॥

जोइ जोइ भावे लालको, सोइ सोइ ल्यावे माय ॥

सो०—किये अमितपकवान, मैं अपने सुतके लिये ॥

सो सब कहौं बखान, जो भावे सो लीजिये ॥

१ देखिकै । २ नंदराय । ३ धमकायकर । ४ मुखचंद्र । ५ नेत्र ।



Vipay Avasthi Sahib Bhuyan Yahi Trust Donations

सदमाखन अरु दहा सजायो । तुम्हरे हित पय आँट जमायो ॥  
 खोवा औट्यो मधुर मलाई । तापर मिश्री पीसि मिलाई ॥  
 अरुदाधिको अति सरस सवाँरी । तामहि सोंठि मिरच रुचि कारी ॥  
 खीर बरा करिके दधि बोरे । मानहुँ चंद्र अमी मधु खोरे ॥  
 खुरमा और जलेबी बोरी । जेहि जेवत रुचि होत न थोरी ॥  
 अरु लड्डुआ बहुभाति सँवारे । जेसुख भेलहु कोमल प्यारे ॥  
 अरु गूझा बहु पूरिन पूरे । अति सुवास उज्ज्वल अति रूरे ॥  
 पापर घेवर घीउ चभोरे । मिश्री से तल ऊपर बोरे ॥  
 सुन्दर मालपुआ मधु साने । तम तुरत करि रोहिणि आने ॥  
 अतिहीं सुन्दर सरस अँदरसे । घृत दधि मधु मिलि स्वादन सरसे ॥  
 सरस सवाँरी दाल मसूरी । अरु क्रीन्हो सीरा वन पूरी ॥  
 पूरी सुनिके हिय हरि हरषे । तब जेवन पर मन करि करषे ॥

दोहा-सुनत यशोदा तुरतही, ले आई हरषाय ॥

बलदाऊको टेरिके, लीन्हें नन्द बुलाय ॥

सो०-षटरसके परकार, जे वरणे यशुदा प्रथम ॥

परसि धरे सब थार, जेवत हरि बलवीर दोउ ॥

जेवत एक थार दोउ बीरा । हरषि श्याम रुचि राख्यो सीरा ॥  
 तब शीतल जल लियो मँगाई । भरि झारी यशुमति लैआई ॥  
 जल अँचवावत नैन जुँडाने । दोऊ हर्षि हर्षि मुसकाने ॥  
 तब जननी हँसि झुरू भराये । तनक तनक कछु मुख पखराये ॥  
 रुचि रुचि उजरे पान खवाये । अतिही अधर अरुण हैआये ॥  
 ठाढे तहाँ सकल ब्रजदासा । लागिरहे जूठनि की आशा ॥  
 तनक तनक कछु मोहन खायो । उबन्यो सो ब्रजदासन पायो ॥  
 सखावृन्द प्रिय द्वार पुकारे । खेलन आवहु कान्ह पियारे ॥  
 तृषित दरश रस चातकदासा । हरिय वरषि नवघन छवि पासा ॥  
 विनय वचन सुनि हर्ष कृपाला । चले मनोहर चाल रसाला ॥

१ अमृत । २ मूँदे । ३ प्यारेसखानके समूह ।



Vinay Avasthi Sahib Bhuvan Vani Trust Donations

लघु लघु ललित चरण फरलाला । कमलनेन उर बाहु विशाला ॥  
चन्द्र बदन तनु छवि घनश्यामा । अंग अंग भूषण अभिरामा ॥  
दोहा-निरखत छवि नंदलालकी, थकित सकल सुरवृंद ॥

निहचल चखन चकोरजनु, तकत शब्दको चन्द ॥

सो०-अति आनन्द उमंग, मिले सखनको जाय हरि ॥

ब्रीडित कौटि अनंग, क्रीडत बालक वृन्द सब ॥

खेलत दूरि गये कहूँ कान्हा । सखन संग धावतहैं नान्हा ॥  
बहुत अबेरभई घनश्यामहि । खेलत ते आये नहि धामहि ॥  
नंदहि तात मातु मोहि कानन । योंहीं सुनत सुहात जु आनन ॥  
मन अवसरै करत सहतारी । पलक ओट रहि सकत न न्यारी ॥  
देखत द्वार गलीमें ठाढी । सुतसुख दरश लालसा बाढी ॥  
तत्क्षण दूरि खेलनते आये । दूरि मातु लै कण्ठ लगाये ॥  
खेलन दूरि जातकिन कान्हा । मैं बलि तुम अवहीं अति नान्हा ॥  
आज एक बन हाऊ आयो । तुम नहि जानत मैं सुनि पायो ॥  
इक लरिका भजि आयो तबहीं । सो वह मौसों कहिगयो अवहीं ॥  
वहतो पकरि लेतहैं तिनको । लरिका करि जानतहैं जिनको ॥  
चलहु भाजि चलिये निज धामहि । यह सुनि ढेर लिये बलरामहि ॥  
कनियाँ करि लै आई धामहि । बडभागिनि यशुमति सुत श्यामहि ॥

दोहा-रूपरेख जाकि नहीं, विधिहर अन्त न पाय ॥

हाऊ सों डरपाय तिहि, यशुमति राखत स्वाय ॥

सो०-भाव वश्य भगवान, भावइ करिके पाइये ॥

भक्तनैक सुखदान, तिहि तैसे जैसे भजे ॥

ब्रज वीथिन खेलत मनमोहन । हलधर सुबल सुदामा मोहन ॥  
और गोप बालक बहुवारि । एक वयस सब हरिके प्यारे ॥  
बाल विनोद मोदमन दीने । नानारंग करत रस भीने ॥

१ छोटे छोटे । २ मेत्र । ३ लजित । ४ कामदेव । ५ फिकर । ६ गोदमेव-  
ठार । ७ ब्रह्मा-शिव । ८ ब्रजक्री गली । ९ एकहीअवस्थाके ।



तारी हाथ मार सब भाज । धावत धरत होड कर बाजै ॥  
 बरजत बलि हरि तूमति दौरे । लगिहैं चोट गोड किहुं तोरे ॥  
 तब हरि कह्यो दौरि मैं जानौं । मेरो रात बहुत बलवानों ॥  
 है श्रीदामा जोड हमारी । तासों मारि भजों मैं तारी ॥  
 बोलि उठ्यो तबहीं श्रीदामा । तारी मारि भजौ तुम श्यामा ॥  
 तबहीं श्याम भजे दैतवारी । धन्यो जाय श्रीदाम हैकारी ॥  
 तबहरि कह्यो वदौं नहिं तोहीं । ठाढो भयो छियो तब मोहीं ॥  
 ऐसे कहि हरि ताहि रिसाने । कहत सखा सब श्याम खिझाने ॥  
 तबतो कह्यो दौर मैं जानौं । हारे श्याम बुरो अब मादौं ॥

दोहा-बोलि उठे बलराम तब, इनके माय न बाप ॥

हारि जीति जाने नहीं, लरकन लावत पाप ॥

सो०-ये हैं तनुके श्याम, झूठहिं झगरत सखन संग ॥

रूठि चले हरि धाम, लखि उदास पूछति जननि ॥

मैं बलि क्यों उदास हरि आयो । कौन मेरो लाल खिझायो ॥  
 मैया म्वहिं दाऊ दुख दीन्हों । मोसों कहत मोलको लीन्हों ॥  
 कहाकरौं या रिसके मारे । मैं नहिं खेलन जात दुआरे ॥  
 पुनि पुनि कहत कौन तेरी माता । को तेरो तात कौन तेरो भ्राता ॥  
 गोरे नन्द यशोदा गोरी । तुम तो कारे आये चोरी ॥  
 मोसों कहत देवकी जाये । ले वसुदेव यहां निशि आये ॥  
 मोल कछु वसुदेवहिं दीन्हो । ताके पलटे तुमको लीन्हो ॥  
 ऐसे कहि कहि मोहिं खिझावै । अरु सब लरकन यहै सिखावै ॥  
 मोहीं को तू मारन धावै । दाउहि कबहुं न खीज डरावै ॥  
 रोष सहित मुनि बतियां भोरी । बढत मातु उर प्रीति नथोरी ॥  
 सुनहु श्याम बलराम चवाई । झूठहिं तोहिं खिझावत जाई ॥  
 मोहिं गोधनकी सोह कन्हैया । मेरो सुत तू मैं तेरि मैया ॥

दोहा-पाछे ठाढे सुनत सब, नन्द श्यामकी बात ॥

१ पाँप । २ मैया । ३ पिता । ४ रात ।



लीन्हें गोद उठाय हंसि, सुन्दर श्यामलगात ॥  
सो०-बलको धरियो नंद, सुनि मनहर्षे श्याम तब ॥  
लीला नटवर चन्द, करत चरित जनमन हरन ॥

अथ भोजनकरनलीला ॥

भोजनके समये नैदराई । करे सुरति बलराम कन्हवाई ॥  
कह्यो बुलाय लेहु दोउ भैया । मोसँग जेवै आय कन्हैया ॥  
खेलत बहुत घर भई आजा । उनविन भोजन कौन काजा ॥  
यशुमति सुनत चली अलुराई । ब्रज घर घर ढेरत दोउ भाई ॥  
कहत बोल लेहु कोऊ श्यामहि । खेलत हैं धौं काके धामहि ॥  
जैवन सिद्ध सिरात धरोई । उनविन नंद न जैवत सोई ॥  
ऐसे जननीके सुनि बैना । आये खेलत ते सुखदैना ॥  
चलहु तात भैया बलि जाई । जैवन को बैठे नैदराई ॥  
परस्यो थार धन्यो + मग हरति । मैं तबहीं सों तुमको ढेरति ॥  
दौरि चलहु आगे गोपाला । छाँडि देहु गति मन्दमराला ॥  
चलहु वेगि दौरौ दोउ भाई । सो राजा जो आगे जाई ॥  
जो जैहै पहिले बलि भाई । तोहँसिहैं तोहि ग्वाल कन्हवाई ॥  
दोहा-आये दौरै श्याम तब, तुरतहि पाँय पखार ॥

बैठे जैवन नंदके, सँग दोऊ सुकुमार ॥

सो०-कछु डारत कछु खात, कछु लपटानो पाणि दुहुँ ॥

शुभगसांवेरे गात, बालकेलि रस वश खरे ॥

बडोकौर खेलत मुख भीतर । आय गई तब मिरचि दर्शन तर ॥  
तीक्ष्ण लगी नयन भरि आये । रोवत बाहरको उठि धाये ॥  
रोहिणि फूँकिदेत मुख माहीं । लिय लगाय उरसों गहि बाहीं ॥  
मधुर ग्रास लैतात निहारे । लै बैठे कुसलाय अँकोर ॥  
जैवत कान्ह नंदकी कनिया । छवि निरखत ठाही नैदरनिया ॥

१ भोजन कन्यो करायो । + वाट । २ हंसकीसी मंदवाल । ३ दोउभैया ।  
४ पाँयधोय । ५ दाँतनके नीचे । ६ मोठोकौर ।



बेसनके व्यंजन विधि नाना । बराबरी बहु शाक विधाना ॥  
 मूंग ठरहरी हींग लगाई । दाल चनाकी पीत सुहाई ॥  
 राज भोगको भात पसायो । उज्ज्वल कोमल सुगंध सुहायो ॥  
 बेसन मिली कनककी रोटी । सदृष्ट बारी पतरी छोटी ॥  
 आंव आदि बहुभाति सँधाने । दोउ भैया जँवत रुचि माने ॥  
 मिश्री दधि ओदन मिश्रित कर । लेत श्याम सुन्दर अपने कर ॥  
 आपुन खात नंद मुख नावै । सोछवि कहत कौनपे आवै ॥

दोहा-भोजन कर अचमन कियो, लैझारी नँदराय ॥

अपने करसों श्यामको, दीनो वदन धुवाय ॥

सो०-को करि सकै बखान, भाग्य यशोमति नंदके ॥

ब्रह्म रह्यो रुचिमान, बाल रूप जिनके सदन ॥

अथ पयछुड़ावन लीला ॥

बैठे श्याम मातकी कनियां । पियत दूध सुन्दर सुखदनियां ॥  
 बार बार यशुमति समुझावे । हरिसों स्तन पान छुडावे ॥  
 कहति श्याम तू भयो सयानो । मेरो कह्यो लाल अब मानो ॥  
 दूध पियत देखत लरिका सब । हैसत तोहि नहि लाज लगत अब ॥  
 जैहैंदांत विगारि सब तेरे । अजहूं छाडि कह्यो करि मेरे ॥  
 सुनत वचन मुसकाय कन्हाई । अचरितरमुख लियो छिपाई ॥  
 आये तबहीं सखा बुलावन । मात कह्यो खेलहु मनभावन ॥  
 यह सुनि हँस उठे बनवारी । मांगतदे चौगान कहाँरी ॥  
 मथनीके पाछे कहि दीन्हों । हर्षित श्याम तहांते लीन्हों ॥  
 लै चौगान बढाकर आगे । चले सखन देखत अनुरागे ॥  
 कहत सखनसों हरि हरषाई । खेलहु गे किहिं ठोहर भाई ॥  
 खेलत बनिहै घोष निकासु । हरषि चले सब सहित हुलासु ॥

दोहा-कान्हर हलधर वीर दोउ, भये भुजा वरँ जोर ॥

१ भात । २ गोद । ३ अंचल । ४ आनंद । ५ गेद । ६ बराबर एक ओर  
 श्रीकृष्ण और दाऊजी और सुबल सखा एक ओर ।



श्रीदामा अरु सुवल मिलि, जुरे सखा इकठोर ॥  
सो०-और सखनके वृन्द, बांढि लिये जुरि जोटे जुट ॥  
अति आनंद नंदनन्द, दियो बटा ढरकाय महि ॥

अथ चौगानखेलनलीला ॥

हरि अपनी बातन लैजाहीं । एक एक सन पावत नाहीं ॥  
इतते उत उतते इत धरें । बटा मारि चौगाननि फेरें ॥  
दौरत हँसत खसत उठि मारें । आप आपनी जीत विचारें ॥  
जम्हो खेल अति मगन कन्हार्इ । देखत सुर सुनि रहे लुभाई ॥  
जीतत सखा श्याम जब जाने । करो खेल कछु तब मचलाने ॥  
कहत सखा सब सुनहु गोपाला । रुगँटैयांको कौन खियाला ॥  
श्रीदामासां हौं तुम हारे । झूठी सोहैं खाउ ललारे ॥  
खेलतमें को काको सैयां । कहा भयो जो नंदगुसैयां ॥  
ताते तुम गर्वित मन महियां । तनक वसत हम तुम्हरी छहियां ॥  
अति अधिकारै जनावत ताते । तुम्हरे अधिक गाय कछुजाते ॥  
अब नहिं खेलहिं संग तुम्हारे । भये सखा सब रिस करि न्यारे ॥  
खेल्यो चाहत त्रिभुवन राई । दियो दांव तब पीठ चढ़ाई ॥

दोहा-जाके गुणगण अगँमअति, निर्गम न पावत और ॥

सो प्रभु खेलत ग्वाल संग, बँधे प्रेमकी डोर ॥

सो०-खेलत भई अबेर, जननी ढेरत श्यामको ॥

आवहु धाम सवैर, सांझ समय नहिं खेलिये ॥

सांझ भई घर आवहु प्यारे । बहुरि खेलियो होत सबारे ॥  
आपुहि जाय बांढ गहि आने । सुभग श्याम तनु रज लपटाने ॥  
बोलि लिये यशुमति बलरामहिं । लै आई दोऊ सुत धामहिं ॥  
धूरि झारि तातो जल ल्याई । तेल परशि दीन्हे अन्हवाई ॥  
सरस बसन तनु पोंछि सँवारे । लै गोदी भीतर पशु धारे ॥

१ समूह । २ जोडी । ३ मेंद । ४ हकरोमटी । ५ मालिक । ६ मालिक-  
पन्यो । ७ वेद । ८ पुराण ।



करहु बियारु कहु दोउ भाई । पुनि तुमको राखौ पौढ़ाई ॥  
 सीरा पूरी सरस सँवारी । और धरी मेवा बहु न्यारी ॥  
 दीन्हीं परसि कनककी थारी । बलमोहन दोउ करत बियारी ॥  
 मिश्री मिलै दूध ओढ़ाई । लै आई तब रोहिणि भाई ॥  
 प्रेमसहित दोउ जननि जिमावत । देखि देखि छवि नयन जुडावत ॥  
 खात खात मोहन अलखाने । वारहि वार श्याम जमुहाने ॥  
 आरससों कर कौर उठावत । नैनन नौद झमकि झुकि आवत ॥

दोहा-उठहु लाल तब मातु कहि, धोये मुख अरविन्द ॥

पौढ़ाये लै सेजपर, बल अरु बाल गोविन्द ॥

सो०-सोये बाल सुहुंद, दोउ भैया मुख सेजपर ॥

जननी अति आनन्द, शोचत गुण गोपालके ॥

माखन मोहनको प्रियलगी । भुखो छिन न रहत जब जागै ॥  
 तगहि बढौ जो गहरु लगावै । नहि मानै जो इन्द्र मनावै ॥  
 मैं इहि जानत बात श्यामकी । हृगमोखे नयन त खानकी ॥  
 लै मथनी दधि धन्यो बिलाई । जबलगि लालन उठाहि न सोई ॥  
 ओरभयो जगह नैननयन । संग सखा ठाढे जगबंदन ॥  
 सुखी पैयहित बच्छ प्रियाये । पंछो तरु तजि बहुदिशि भाये ॥  
 चन्द्र मालन उदयन छुतिन शोभति नैननयन । रवि कारण प्रकाश ॥  
 कुलुविनि सजुखी वारिज फुलाहुंजत मधुष लता लगि झले ॥  
 दरशन देहु सुदित नर नारी । ब्रजवासि प्रभु जन सुखकारी ॥  
 सुनि जननीके वचन रसाला । खोलै हृगंजीव विशाला ॥  
 हँसत उठे संतन सुखदाई । सुखछवि देखि मातु बलिजाई ॥  
 हरि कहु करहु कलेझ प्यारे । मैं माखन मधि धरेउँ सँवारे ॥

दोहा-रोटी अरु माखनतनक, देरीना मोहि हाथ ॥

लै आई जननी तुरत, कहु मेवा धरि साथ ॥

१ सोनेकीधार । २ मुखकमल । ३ बलराम । ४ दूध । ५ तारे । ६ रात्रि ।  
 ७ सूर्य । ८ कमल । ९ कमल । १० भौरा । ११ नेत्रकमल ।



सो०—करत कलेऊ श्याम, माखन रोटी मानि रुचि ॥

त्रिभुवनपाति सुखधाम, चार पदारथ हाथ जेहि ॥

अथ माखनचोरी लीला ॥

मैयारी मैहिं माखन भावै । और कछू अति रुचि नहिं आवै ॥  
मधु मेवा पकवान मिठाई । सो मोको नैकहु न सुहाई ॥  
ब्रजयुवती इक पाछे ठाढी । हरिके वचन सुनत प्रतिवाढी ॥  
मन मन कहत कनहुँ अपने घर । माखन खात लखौ सुंदर वर ॥  
बैठे जाय मथनियां पाहीं । अपने कैरनि काढिके खाहीं ॥  
मैं बह देखहुं कहूँ छिपाई । कैसे भोवर जाहिं कन्हाई ॥  
हरि अन्तर्यामी सब जानें । ग्वालनि मनकी प्रीति पिछानें ॥  
गये श्याम ता ग्वालनिके घर । ठाढे भये जाय द्वारे पर ॥  
इत उत देखत कोऊ नाहीं । तब पैठे ताके घर माहीं ॥  
हरिको आवत ग्वालनि जान्यो । परममुदित अतिही सुख मान्यो ॥  
रही दबकि दुरि डीठि लगाई । हरिवैठे मथनी ढिग जाई ॥  
देखी माखन भरी कमोरी । खान लगे करि अति मतिभोरी ॥

दोहा—चितै रहे मणि खम्भमें, हरि अपनी प्रति छाहीं ॥

जानि दूसरो ग्वाल तिहि, प्रभु सकुचे मनमाहीं ॥

सो०—तासों करत सयान, कहत लेहु आधो तुमहुं ॥

हम तुम एक समान, भलों बन्यो है संग अव ॥

प्रथम आज मैं चोरी आयो । तुमको देखि बहुत सुख पायो ॥  
अब तुम मेरे संग नित आवो । यह काहूको मतिहि जनावो ॥  
सुनि सुनि हरिके सुखकी बानी । उमंगि हँसी ब्रज युवति सयानी ॥  
श्याम चौकि सुख तासु निहारी । भाजि चले ब्रज खोरि मुरारी ॥  
अति आनंद ग्वालिन मनमाहीं । पूछत सखी परस्पर ताहीं ॥  
पायो आज परो किछु तैरी । कहा तोहि अति आनंद हैरी ॥  
गद्गद कंठ पुलक तनुतेरो । सो किन कहै कहा सुख हेरो ॥

१ प्रीति । २ अपने हाथ । ३ घुसे । ४ दृष्टि । ५ प्रतिबिंब ।



करहु बियारु कछु दोउ भाई । पुनि तुमको राखौ पौढ़ाई ॥  
 सीरा पूरी सरस सँवारी । और धरी मेवा बहु न्यारी ॥  
 दीन्हीं परसि कनककी थारी । बलमोहन दोउ करत बियारी ॥  
 मिश्री मिले दूध औढ़ाई । लै आई तब रोहिणि माई ॥  
 प्रेमसहित दोउ जननि जिमावत । देखि देखि छवि नयन जुडावत ॥  
 खात खात मोहन अलसाने । बारहि बार श्याम जमुहाने ॥  
 आरससों कर कौर उठावत । नैनन नौद झमकि झुकि आवत ॥

दोहा-उठहु लाल तब मातु कहि, धोये मुख अरविन्द ॥

पौढ़ाये लै सेजपर, बल अरु बाल गोविन्द ॥

सो०-सोये बाल सुकुंद, दोउ भैया सुख सेजपर ॥

जननी अति आनन्द, शोचत गुण गोपालके ॥

माखन मोहनको प्रियलागै । भूखो छिन न रहत जब जागै ॥  
 तगहि बढी जो गहर लगावै । नहि मानै जो इन्द्र मनावै ॥  
 मैं इहि जानत बात श्यामकी । हृगमोये नयनत खानकी ॥  
 लै मथनी दधि धन्यो चिलोई । जबलगि लालन उठहि न सोई ॥  
 मोरभयो जगहु नैननवन । संग सखा ठाढे जगद्वन्द ॥  
 सुनभी पैयहित बच्छ पियाये । पंछी तरु तजि चहुँदिशि धाये ॥  
 अन्ध मालिन उठगण सुतिन शो । निराशनिबट रवि किराण प्रकाशो ॥  
 कुसुदिनि सकुची बारिज फूलागुंजत प्रहृष लता लगि झूले ॥  
 दरशन देहु सुदित नर नारी । ब्रजवासी प्रभु जन सुखकारी ॥  
 सुनि जननीके वचन रसाला । खोलै हृगमोजीव विशाला ॥  
 हँसत उठे संतन सुखदाई । सुखछवि देखि मातु बलिजाई ॥  
 हार कछु करहु कलेझ प्यारे । मैं माखन मधि धरउँ सँवारे ॥

दोहा-रोटी अरु माखनतनक, देरीना मोहि हाथ ॥

लै आई जननी तुरत, कछु मेवा धरि साथ ॥

१ सोनेकीधार । २ मुखकमल । ३ बलाप । ४ दूध । ५ तारे । ६ रात्रि ।  
 ७ सूर्य । ८ कमादनी । ९ कमल । १० भौरा । ११ नेत्रकमल ।



सो०—करत कलंक श्याम, माखन रोटी मानि रुचि ॥

त्रिभुवनपति सुखधाम, चार पदारथ हाथ जेहि ॥

अथ माखनचोरी लीला ॥

मैयारी कहि माखन भावै । और कछु अति रुचि नहि आवै ॥  
 मधु मेवा पकवान मिठाई । सो मोको नेकहु न सुहाई ॥  
 ब्रजयुवती इक पाछे ठाढी । हरिके वचन सुनत रतिबाढी ॥  
 मन मन कहत कवहुँ अपने घर । माखन खात लखौ सुंदर वर ॥  
 बैठे जाय मथनियां पाहीं । अपने कैरनि काढिके खाहीं ॥  
 में बरु देखहुं कहूँ छिपाई । कैसे भोगर जाहि कन्हाई ॥  
 हरि अन्तर्यामी सब जानें । ग्वालनि मनकी प्रीति पिछानें ॥  
 गये श्याम ता ग्वालनिके घर । ठाढे भये जाय द्वारे पर ॥  
 इत उत देखत कोऊ नाहीं । तब पैठे ताके घर माहीं ॥  
 हरिको आवत ग्वालनि जान्यो । परमभुदित अतिही सुख मान्यो ॥  
 रही वचकि दुरि डीठि लगाई । हरिवैठे मथनी ढिग जाई ॥  
 देखी माखन भरी कमोरी । खान लगे करि अति मतिभोरी ॥

दोहा—चितै रहे मणि खम्भमें, हरि अपनी प्रति छाँहें ॥

जानि दूसरी ग्वाल तिहि, प्रभु सकुचे मनमाहें ॥

सो०—तासों करत सयान, कहत लेहु आधो तुमहुँ ॥

हम तुम एक समान, भलो बन्यो है संग अब ॥

प्रथम आज मैं चोरी आयो । तुमको देखि बहुत सुख पायो ॥  
 अब तुम मेरे सँग नित आवो । यह काहूको मतिहि जनावो ॥  
 सुनि सुनि हरिके सुखकी बानी । उमँगि हँसी ब्रज युवति सयानी ॥  
 श्याम चौंकि मुख तासु निहारी । भाजि चले ब्रज खोरि मुरारी ॥  
 अति आनंद ग्वालिन मनमाहीं । पूछत सखी परस्पर ताहीं ॥  
 पायो आज परो कछु तैरी । कहा तोहि अति आनंद हैरी ॥  
 गद्गद कंठ पुलक तहुतेरो । सो किन कहै कहा सुख हेरो ॥

१ प्रीति । २ अपने हाथ । ३ घुसे । ४ दृष्ट । ५ प्रतिबिंब ।



तनु न्यारो जिय एक हमारो । हमैं तुम्हें कछु भेद न न्यारो ॥  
 सुनहु सखी मैं तोहि बताऊं । जो सुख भयो सो तोहि सुनाऊं ॥  
 यशुमति सुत सुन्दर सुनु गोरी । आयो आजु हमारे चोरी ॥  
 खम्भ निकट मथनीको माखन । लियो निकासि लग्यो सो चाखन ॥  
 भैंदुरि भीतर देखन लागी । वा मोहन छवि पर अनुरागी ॥  
 दोहा-देखि खम्भ प्रतिबिंबको, मन कछु सकुचे श्याम ॥

अर्द्ध भाग तेहि देन कहि, प्रगट करो जिन नाम ॥

सो०-तब न रह्यो मोहि धीर, हँसी मनोहर वचन सुनि ॥

कहा कहीं तुम वीर, मन हरि लीन्हों सांवरै ॥

मोहिदेखि तब गयो पराई । सखि सो छवि कछु वरणि नजाई ॥  
 सुनिहरि चरित सखी अनुरागी । अति सुख पाय प्रेम रस पागी ॥  
 कहतकि मैं देखन नहि पायो । सोइ अभिलाष जासु उर छायो ॥  
 हरि अन्तर्यामी सब जानैं । सबके मनकी रुचि पहिचानैं ॥  
 इहिविधि माखन प्रथम चुरायो । कीन्हों ग्वालिनिको मनभायो ॥  
 भक्त बल्लल संतन सुखकारी । पुनि मनमहँ यह बात विचारी ॥  
 अब सब ब्रज घर माखन खाऊं । माखन चोर नाम कहवाऊं ॥  
 बालरूप मोहिं यशुमति जानैं । ग्वालनि प्रेम भक्ति करि मानैं ॥  
 भिन्नभाव करि ग्वाल बखानैं । प्रीति रीति सब मोसों मानैं ॥  
 इनहींके हित गोकुल आयो । करों सबनके मनको भायो ॥  
 यह विचार हरि निज उर ठाना । भक्ति कृपाँ अम्बुधि भगवाना ॥  
 बाल सखा सब निकट बुलाई । तिनसों हँसि हँसि कहत कन्हाई ॥

दोहा-माखन खइये चोरिकै, सब ब्रज घर घर जाय ॥

कीजे बाल विहारयाँ, मेरे मन यह आय ॥

सो०-सुनि हरषे सब ग्वाल, देत पररूपर तारि सब ॥

भली कही नँदलाल, तुम विन यह बुधिको करे  
 चले सखन लै माखन चोरी । एक वयस सबहिन मति भोरी ॥

१ छिपीमई । २ भाजगयो । ३ आनंद । ४ भक्ति और कृपाके समुद्र ।



देख्यो झांकि झरोखा ओरी । मथति एक ग्वाल्लिनि दधि गोरी ॥  
 धरयो मठा मथनीमें जानो । ऊपर माखनहै लपटानो ॥  
 ग्वाल्लिनि गई कमोरी मांगन । पाई घात तबहिं सुन्दर वन ॥  
 सखन समेत ताहि घर आये । दधिमाखन सबहिन मिलि खाये ॥  
 छूली मटुकी छांड़ि सिधाये । हँसत हँसत सब बाहर आये ॥  
 आयगई द्वारे सोइ बाला । घरसां निकसत देखे ग्वाला ॥  
 माखन कर मुखदधि लपटानो । ग्वाल्लिनि यह कछु भेद न जानो ॥  
 देखिरही हँसि मुखकी शोभा । निरखि रूप लाग्यो मन लोभा ॥  
 चर्यकि गये हरि सखन समेता । तवहीं ग्वाल्लिनि गई निकेता ॥  
 देखी जाय मथनियां खाली । चकित विलोकत इत उत ग्वाली ॥  
 मन हरि लीन्हों मदन गोपाला । जान्यो ग्वाल्लिनि हरिकें ख्याला ॥

दोहा-घर घर प्रगटी बात यह, सखावृन्द ले साथ ॥

चोरी माखन खातहैं, नन्दसुवन ब्रजनाथ ॥

सो०-सबके मन अभिलाष, चोरी पकरन पाइये ॥

धरियो माखन राख, यहै ध्यान सबके हिये ॥

कहत परस्पर ग्वाल्लि सयानी । सब मोहनके रूप लुभानी ॥  
 माखन खान देहु गोपालहि । मत बरजो कोउ श्याम तमालहि ॥  
 तुम जानत हरि कछु न जाने । वे मोहनहैं परम सयाने ॥  
 कोउ कहत पकर जो पाऊं । तो अपने गहि कंठ लगाऊं ॥  
 एक कहत जो मेरे आवैं । तौ माखन हम हरिहि खवावैं ॥  
 कहत एक जो मैं गहिपाऊं । तौ हरिको बहु नाच नचाऊं ॥  
 कोउ कहत जो हरिको पैये । तौ गहि यशुमतिपै लै जैये ॥  
 इक कह आजु हमारे आये । द्वारहिते मोहि देखि पैराये ॥  
 इहि विधि प्रेम मगन सब बाला । सबके हृदय ध्यान नैदलाला ॥  
 निशि बैसर नहिं नेक विसारैं । मिलिये कारण बुद्धि विचारैं ॥  
 गये श्याम सूते ग्वाल्लिनि घर । सखा सब ठाढे द्वारे पर ॥

१ भाजगए । २ सखासमूह । ३ भाजगए । ४ दिन रात ।



देख्यो भीतर जाय कन्हई । दधि अरु माखन धन्यो मलाई ॥

दोहा—सदमाखन देख्यो धन्यो, हरषे श्यामसुजान ॥

सखा बुलाये सैनदे, लै लै लागे खान ॥

सो०—इत उत चितवत जात, कछु संशय मनमें किये ॥

बाँटत दधि अरु खात, उठि उठि झांकत द्वारतन ॥

देखतसो ग्वालनि अंतरकरि । मगनभई अति उर आनंद भरि ॥

लौन्ही बोलि सखी ढिग वाली । तिन्हें दिखावत हरि सुखरासी ॥

देखि सखी शोभा अति बाढ़ी । उठि अवलोकि ओटकै ठाढ़ी ॥

किहिविधिसों दधि लेत कन्हई । सखन देत अरु आपन खाई ॥

बदन समीप पाणि अति राजै । माखन सहित महाछवि लाजै ॥

लै उपहार जलजं मलुजाई । मिलत चन्द्रसों बैर विहाई ॥

गिरि गिरि परत बदनते ऊपर । दुइ दधिमुतके बुन्द सुभगतर ॥

मनौ प्रलय जल आगम हरषत । इन्दुसुधाके कणका वरषत ॥

सुखछवि देखि थकित ब्रजनारी । कहत न बनै रही उरधारी ॥

बालविनोद मोद मन फूली । भई शिथिल सबतनु दुधि भूली ॥

वरजनको स्फुरत न वाली । रही विचारि विचारि सयानी ॥

गये ठगोरी लाय कन्हई । रहीं ठगीसी सब सुखपाई ॥

दोहा—विश्व भरण पोषण करण, कल्पतरोवर नाम ॥

सो प्रभु दधिचोरी करत, प्रेम विवश सुखधाम ॥

सो०—नित उठि करत विहार, ब्रजमें घर घर साँवरो ॥

ब्रजजन प्राणअधार, माखन चोरी व्याजकरि ॥

श्याम एक ग्वालनि घर आये । चोरी करत पकरि तिन पाये ॥

कहत करी तुम बहुत ढिठाई । अबतौ वात परेहौ आई ॥

निशिवासर मोहि बहुत खिझायो । दधि माखन सब जेरो खायो ॥

दौड भुज पकरि कह्यो कित जेहौ । दधि माखन दे छूटन पैहौ ॥

१ हाथ । २ कमल । ३ माखन । ४ मानोचंद्रअमृतकीबुंद वर्षेहै । ५ माखनचोरीके पिसकरके ।



ताके सुखतन चितै कन्हार्इ । बोले वचन मधुर मुसुकाई ॥  
तेरीसों मैं छुयो न राई । सखा खाय सब गये पराई ॥  
चारु चितौनि चित्त उरझानो । उरते रोष जात नहि जानो ॥  
सुनत मनोहर हरिकी बतियां । लिये लगाय ग्वालिनी छतियां ॥  
बैठो श्याम जाउँ बलिहारी । मैं लाऊं दधि खाउ विहारी ॥  
हरिको लेन चली दधि गोरी । हरिहँसि निकसि गये ब्रजखोरी ॥  
रही ठगीसी ग्वालिनि भोरी । मन लैगयो साँवरो चोरी ॥  
हरिगये और ग्वालिनीके वर । देख्यो जाय न कोऊ भीतर ॥

दोहा-माखन काठि निशंक है, लागे खान कन्हाय ॥

ग्वालिनि आवत जानिघर, तब उठि रहे छिपाय ॥

सो०-ग्वालिनि घरमें आय, मथनी ढिग ठाढ़ी भई ॥

भाजन रीतो पाय, चकित विलोकति चहुं दिशि ॥

अबाहि गई आई इन पावन । आयो माखन कौन चुरावन ॥  
भीतर गई तहां हरि पाये । पकरी भुजा भये मन भाये ॥  
तब हरि कहि निज नाम लजाये । नयनसरोज कलुक भरि आये ॥  
देखि बदन छवि आनंदहीके । दीन्हें जान भावते जीके ॥  
भयो ग्वालिन परमहुलासा । कहन चली यशुमतिके पासा ॥  
जो तुम सुनहु यशोमति माई । हँसिहो सुनि हरिकी लरिकाई ॥  
आजगये हरि मो घर चोरी । देखी माखन भरी कमोरी ॥  
मैं गइ आत अचानक जवहीं । रहे छिपाय सकुचिके तबहीं ॥  
जब मैं कहाँ भवनमें कोरी । तब मोहि कहि निज नाम निहोरी ॥  
लगे लेन लोचन भरि आंसू । तब मैं कानन तोरी सांसू ॥  
सुनत श्याम सब रोहिणि कनियां । सकुचत हँसत मंद मुसुकनियां ॥  
ग्वालिनिहँसि हरितन डरपायो । माखनचोर पकरि मैं पायो ॥

दोहा-करौ नौयकी दामरी, बांधो अपने धाम ॥

लाय लिये उर रोहिणी, बांधि सकै को श्याम ॥



सो०-यशुमति उर आनन्द, बालचारित सुनिश्यामके ॥

कहत सुनो नैदनन्द, ऐसो काम न करहु सुत ॥

पुनि इक गृह गए नन्ददुलारे । देखि फिरे तहँ ग्वाल दुआरे ॥  
तब हरि ऐसी बुद्धि उपाई । फाँदि परे पिछवारे जाई ॥  
सूनो भवन कहूँ कोउ नाही । मानहु इनको राज सदाहीं ॥  
भाँडे मूँदत धरत उतारत । दधि भरु माखन दूध निहारत ॥  
रैनिजमायो गोरस पायो । लगे खान मनु आप जमायो ॥  
आहट सुनि युवती घर आई । झलकत देखे कुँवर कन्हाई ॥  
अँधियारे घर श्याम गये दुरि । दधि मटुकी ढिग बैठि रहे सुरि ॥  
सकल जीव उर अंतरवासी । तहां कछुक चेटक परकासी ॥  
ग्वालनि हरिको इत उत हरे । पावत नाही धाम अँधेरे ॥  
कहति अबहि देख्यो नैदनंदन । कितहि गयो पछतात मनहि मन ॥  
पारिगये दीर्घ ओट मथनीके । सुन्दर श्याम प्राण मथनीके ॥  
तबहीं ग्वालनि भुजगहि लीन्हों । कहत तुम्हें अब तो मैं चिन्हो ॥

दोहा-कहौ कहा चाहत फिरत, धाम अँधेरे माहि ॥

बूझे बदन दुरावते, सूधे चितवत नाहि ॥

सो०-दधि मथनीमें हाथ, अबका उतर बनाइ हौ ॥

सखा नहीं कोउ साथ, कहिये अब कैसी बनै ॥

मैं जान्यो यह घरहै मेरो । ता धोखे इत हैगयो फेरो ॥  
दृष्टिपरी चींटी दधि माहीं । काठनि लग्यो तिन्हें इहि ठाहीं ॥  
सुनि मृदुवचन ग्वाल मुखकानी । तुमहौ रतिनागर हम जानी ॥  
उरलगाय मुख चुंबन कीन्हो । विधिहि मनाय विदा करि दीन्हो ॥  
हरि दरशन बिन क्षण न सुहाई । उरहन मिस यशुमतिपहँ आई ॥  
सुनहुमहरि निजसुतकी करणी । करत अचगरी जात न वरणी ॥  
नितप्रति करत दूधदधि हानी । कहँलगि करैं कान नैदरानी ॥

१ एकघरमें । २ रातकोजन्म्यो । ३ छिपगए । ४ दृष्टि । ५ दुबको हो । ६ नम्र ।



मैं अपने मन्दिर अँधियारे । माखन धन्यो दुराय सँवारे ॥  
सोई दूँटि लियो हरि जाई । अति निशंक नहि नेक डराई ॥  
बूझे उत्तर तुरत बनावै । चींठी काढनको करनावै ॥  
सुनि ग्वालिनिके वचन सयानी । हँसिकै बोध कियो नँदरानी ॥  
यशुमति कहत श्यामसों प्यारे । परघर काहे जात लहारे ॥

दोहा-मम लोचन आगे सदा, खेलहु सखन बुलाय ॥

तुम्हरे बाल विनोद लखि, मेरोहियो सिराय ॥

सो०-मोपै लीजै श्याम, दधि माखन मेवा मधुर ॥

सब कलु तेरे धाम, परघर जाय बलाय तुव ॥

माखन मांग्यो कुँवरकन्हाई । मुदित मातु तुरतहि लै आई ॥  
लगी खवावन हिय हरषानी । श्याम कह्यो खँहों निज पानी ॥  
दियो हाथ धरि भरिकै दोना । चले खात खेलत हरि लोना ॥  
सखन संग खेलत बनमाली । यमुना जाति सखी इक ग्वाली ॥  
आपचलै ताके घर माहीं । पूछत बात कौनहै काहीं ॥  
लँखे तहां शिशु दोय अयाने । भीर देखते रोय डराने ॥  
इत उत देख्यो गोरस नाहीं । ऊंचे धन्यो सिकहरन माहीं ॥  
तब मनमोहन रच्यो उपाई । आनि तहां ऊखल औंधाई ॥  
तापर एक सखा बैठारी । ताके कंध चढे बनवारी ॥  
ऐसी विधि करि गोरस पायो । दधि माखन सबही मिलिखायो ॥  
दूध डारि बछरू सब छोरे । दिये निकासि बनाहिंकी ओरे ॥  
मँही छिरक लरकन डरपाई । चले अग्रकरि सखा कन्हाई ॥

दोहा-ग्वालिन आवत देखिकै, सखागये सब दौरि ॥

फँसि भीतर मोहन परै, रोंकि लई तिन पौरि ॥

सो०-रोष भरी मुख बात, प्रेम भरयो अन्तरहियो ॥

कहत महरके तात, जात कहां दधि चोर अब ॥

१ छिपाय । २ मेरी आखिनके आगे । ३ अपने हाथन । ४ देखे । ५ दोबा-  
लक । ६ छीकेपर । ७ दूधकी छोटोदेके ।



तब हरि ताके सुखतन देखी । कीन्हें उरनख वात विशेषी ॥  
 अति रिस ग्वालनि मन उपजाई । दोउ भुज पकरि महरिपै लाई ॥  
 मानौ महारि कह्यो तुम मेरो । अति उत्पात करत सुत तेरो ॥  
 राख्यो गोरस छिके चढाई । ग्वाल कन्ध चढि लिये कन्हाई ॥  
 माखन खाय दूध ढरकायो । मही छिरक बालकन रुवायो ॥  
 और कहत सकुचतहौं बाता । कहा दिखाऊं तुमको गाता ॥  
 हैं गुण बड़े भ्यामके माई । इहां सकुचि लरिका है जाई ॥  
 बरजत क्यों नहिं सुतहि अनेरो । कहा अहो नितप्रतिको झेरो ॥  
 जो कछु राखै दूरि दुराई । तहीं तहीं ते लेत सुराई ॥  
 तापर देत बछरुवन छोरी । वन वन फिरत वही चहुँ ओरी ॥  
 चोरी अधिक चतुर वनचारी । सुनहु महारि हम इनते हारी ॥  
 कहँलगि इनके गुणन बखानों । तुम इनको सूखो मति जानों ॥

दाहा-सुनत ग्वालनीके वचन, यशुमति हरि तन देखि ॥

भये सकुच युत मुख निरखि, कोमल ललित विशेखि

सो०-कहत लगावत लोग, झूठहि सब मेरे सुतहि ॥

कब भये चोरी योग, पांच वरषके तनिकसे ॥

इहिमिलि देखनको सब आवैं । चोरी मेरे सुतहि लगावैं ॥  
 ऐसो तो मेरो न अन्याई । अतिही बालक कुँवर कन्हाई ॥  
 छीके बँधे भवन अति ऊंचे । तहँ इनकी कैसे भुज पहुँचे ॥  
 कौन वेग इतना है आयो । तेरो गोरस कैसे खायो ॥  
 हाथ नचावत आवत दौरी । जीभन करहि समुझिकै बौरी ॥  
 घरही माखन भरी कमोरी । कबहूँ लेत न अँगुरिन वारी ॥  
 इतनी सुनत निरखि घनश्यामैं । विहँसि चलीग्वालनि निज धामैं ॥  
 हरिसों कहति महारि समुझाई । मैं बलि कहूँ जिन जाहु कन्हाई ॥  
 तुम्हरे कारण पटरस नाना । करि करि राखौं विविध विधाना ॥  
 इतो उपाय करत कितजाई । परघर दधि माखनहि लगाई ॥



ब्रजकी बाढ़ी ग्वालि गँवारी । हाट बाँट दधिबेचनहारी ॥  
नहिंकछु लाज नकान विचारैं । बोलत वचन कटुक मुहँ फारैं ॥

दोहा-झूठो दोष लगायके, नित उठ आवत प्रात ॥  
सन्मुख वादति शंक तजि, विकट बनावत बात ॥

सो०-नौलख दुहियत गाय, दूध दही तेरे बनो ॥

तूकित चोरी जाय, बुरो मानिहैं नन्दसुनि ॥

हरिमाखन चोरी रस गीधे । कैसे रहैं प्रेमके बीधे ॥  
एक ग्वालि घर माँझ अँधेरे । अति श्यामल तनु परत नहेरे ॥  
कछुकधरो गोरस तहँ पायो । प्रथम सुरुचिकर भोगलगायो ॥  
कियो प्रगट दीपक गृह ग्वाली । तहँ देखे भीतर वनमाली ॥  
भुजा चार धरि दरश दिखायो । ग्वालिनिलखि अति अचरजपायो ॥  
देखि माखनके बूंद सुहाये । सुभग श्याम उर अति छविछाये ॥  
मानहु यमुना जलके माहीं । देखि परत उडगँण परछाहीं ॥  
इहि छवि निरखि रही छकि ग्वाली । बहुरो भये द्विभुज वनमाली ॥  
देखि चरित हरषी ब्रजबाला । चकित विलोकति हर्ष विशाला ॥  
मन मन कहति कहाँ देख्यो । यह जाग्रतके स्वप्न विशेष्यो ॥  
प्रेम मगन तनुकी सुधि भूली । गद्गद कंठ रोमावलि फूली ॥  
मन हरि लीनो रूप दिखाई । चले वहाते कुँवर कन्हाई ॥

दोहा-देखि श्यामके चरित तब, ब्रजनारी सुख पाय ॥

होहिं हमारे पुरुष हरि, माँगहि विधिहि मनाय ॥

सो०-घर घर करत बिलास, नाना भेष दिखाय हरि ॥

ब्रज जन परमहुलास, देखि चरित गोपालके ॥  
देखी श्याम ग्वालि इक ठाढ़ी । गोरस मथति प्रात छबिवाढ़ी ॥  
डोलत तनु उघन्यो शिर अंचल । वेणी चलत पीठपर चंचल ॥  
यौवन मदमाती इठिलानी । करषत रज्जु दुहुँ करन मधानी ॥  
इत उत अंग मोर झक झोरी । गोरे अंग दिननकी थोरी ॥

१ बजारमें । २ जोटो । ३ प्रेमपगे । ४ तारागण । ५ विधाता ।



मही उरोजन अँगिया गाढी । मनहुँ काम सौंचे भरि काढी ॥  
 रीझि रहे लखि नन्ददुलारे । लागे खेलन तासु दुआरे ॥  
 फिरि चितई ग्वालनि द्वारेतन । परिगये दृष्टि श्याम सुन्दर घन ॥  
 बोलि लिये हरेवे सुने घर । लिय लगाय उरसां सुन्दर बर ॥  
 उमँग अंग अँगिया उर दरकी । तिहि अवसर सुधि रही न घरकी ॥  
 तबहीं सुन्दर श्याम सुजाना । भये बरस द्वादश अनुमाना ॥  
 सो छबि देखि छकी ब्रजनारी । बहुरि भये शिशुरूप निहारी ॥  
 हरिके कौतुक अति सुखदाई । देखि रही मति गति विसराई ॥

दोहा-माखन लै तब श्याम मुख, धरत आपने पान ॥

अति आनंद उमँग उर, बिसरी ग्वालि सुजान ॥

सो०-रसिक शिरोमणि श्याम, माखन खाय रिझायतिय ॥

आये अपने धाम, छविसागर नागर नवल ॥

मन हरि लीन्हों कुँवर कन्हाई । बिन देखे क्षण रह्यो न जाई ॥  
 उरहनके मिस ग्वालिसयानी । आई देखन हरि सुखदानी ॥  
 सुनहु महारि सुतके गुण जैसे । कहा कहाँ कहि जात न तैसे ॥  
 माखन खाय मही ढरकायो । चोली फारि अबहिं भजि आयो ॥  
 गोरस हानि सही लै माई । अब कैसे सहिजात खुटाई ॥  
 बीचाहिं बोलि उठे वनवारी । झूठहिं मोहिं लगावत ग्वारी ॥  
 खेलत ते मोहिं लियो बुलाई । दौड भुज भरि लीनो उरलाई ॥  
 मेरे कर अपने उर धारी । आपुनहीं चोली पुनि फारी ॥  
 माखन आपाहिं मोहिं खवायो । मैं कब दही मही ढरकायो ॥  
 अति भोरी सुनि हरिकी बानी । यशुमति ग्वालिन सों रिसियानी ॥  
 जानति हूं जु कटाक्ष तिहारौ । अति भोरो सुत मेरो बारौ ॥  
 दैद दगा बुलावति ताही । सोइ सोइ करत जो भावत जाही ॥

दोहा-बोलि बोलि निज निज भवन, भेंटति भरि भरि अंक ॥

मोरे भोरे बालको, ग्वालनि निलज निशंक ॥

१ धोरेधोरे । २ बारहवर्षके । ३ बालकरूप । ४ चरित्र । ५ बावरीसी :



सो०-तापर उरनखलाय, फिरत दिखावति लाजतजि ॥

कान्हहि दोष लगाय, आपुन अति भोरी भई ॥

नित उठि उरहन लै उठि धावैं । बिना भीतही चित्र बनवैं ॥  
मिस करि करि भेरे गृह आई । रहत श्याम तनु दीर्घ लगाई ॥  
भेरो पाँच वर्षको कान्हा । अजहुँ रोष पय माँगत नान्हा ॥  
कहैं तू यौवनकी मदमाती । हरिके संग फिरत अठिछाती ॥  
ग्वालिनि सुनत यशोमति बैना । मनहारि लीन्हो राजिव नैना ॥  
आवत रोष प्रीति मनमाहीं । उत्तर देत बनत कछु नाहीं ॥  
कछुअ न उत्तर कहि रिसियाई । चली भवन उर राखि कन्हाई ॥  
यशुमति यहै सिखावति श्यामहिं । कितहो जात पराये धामहिं ॥  
ये सब गोरसकी मदमाती । फिरत ढीठ ग्वालिनि इतराती ॥  
नित उठि उरहन देत बिहोने । मुख सँभारि नाँह बात बखाने ॥  
रुचि उपजै तुम्हरे मन जोई । मौपे माँगिलेहु किन सोई ॥  
कहिकहि मधुर वचन निज ताता । मुख उपजावत मेरे गाता ॥

दोहा-अपनेहि आँगन खेलिये, सखन सहित दोउभाय ॥

मोहिं सुख दीजै आपने, बालविनोद दिखाय ॥

सो०-सुन्दर धन ब्रजनाथ, कोटि काम शोभा हरण ॥

गोप बाललै साथ, करत बाललीला ललित ॥

मथुरा जात लखी इक ग्वाली । चरँचि लई ताको बनमाली ॥  
बैठि रहे ताके पिछवारे । सखा संगलै नंददुलारे ॥  
कहति परोसिन सों समझाई । सुनि लीन्हों सो कुँवर कन्हाई ॥  
बँचन जाति सखी हों दहियो । तौलौ मेरे घर तन चाहियो ॥  
सद माखन द्रैमाट धरोई । सौंपि जाति हों तोको सोई ॥  
डरतो और कछू ब्रज नाहीं । नंदसुवन सखि आय न जाहीं ॥  
योंकहि चली ग्वालिनी जबहीं । सखन सहित हरि पैठे तबहीं ॥

१ छातीमें नहु मारिके । २ बिनाभीतके चित्र बननो असंभवहै ऐसेही मेरे  
लालने तेरी छातीमें नहु मारा सो असंभवहै । ३ टिकिटिकी लगाय देखे है ।  
४ कमलनेत्र । ५ प्रातःकाल । ६ जानलीनी । ७ घुसे ।



कछु ग्वालनकी आहट पाई । सोपुनि फेरि घरहि फिरि आई ॥  
 देखि सखा सब चले पराई । पकरे ग्वालनि धाय कन्हाई ॥  
 औरन जानि जान मैं दीन्हें । तुम कित जात अचकरी कीन्हें ॥  
 बाँह पकरि लै चली लिवाई । कहत यशोमति देखहु आई ॥  
 उरहन देत सदा रिसमानों । अब अपना सुत आय पिछानो ॥

दोहा-वहै उरहनो नित्यको, सत्य करनके काज ॥

मैं गहिल्याई श्यामको, बाँह पकरिकै आज ॥

सो०-हरि बैठे निज धाम, खेलत जननीके निकट ॥

कौतुक निधि धनश्याम, करत चरित संतन सुखद ॥

यशुमति सुनि ग्वालनिकी बानी । देखन चली सुतहि अकुलानी ॥  
 गये तहां है सुता पराई । देखि यशोमति अतिरिसियाई ॥  
 मेरे आँखिन मतिहिय नाहीं । दखने देखि पहिचानत नाहीं ॥  
 देखहुरी याकी गति माई । या कन्याको कहत कन्हाई ॥  
 तैं जो मेरे सुतको नामा । सूखी करि पायो है श्यामा ॥  
 तूगहि बाँह कौन को ल्याई । खेलत मेरे धाम कन्हाई ॥  
 रही बाल हरिको मुख चाँही । समुझि समुझि मनमें पछिताही ॥  
 बाँह पकरि मैं घरतें ल्याई । कीन्हें कैसे चरित कन्हाई ॥  
 जात बनैना कछु कहि आई । रही ग्वालनिगमिनी सकुचाई ॥  
 महरि कहत चलि जाहि इहाँतें । मैं जानत सब तुम्हरी बातें ॥  
 हरिक चरित कहा कोउ जाने । ग्वालनि तन दुरि दुरि सुखकानें ॥  
 हरितें हारि चली गृह ग्वाली । बुधि करि जीतें श्याम तमाली ॥

दोहा-बहुरि गये इक ग्वालिवर, मनमोहन धनश्याम ॥

सखन सहित हरषित भये, सूनी पायो धाम ॥

सो०-सब घर लियो ढँडोरि, भाखन खायो चोरि हरि ॥

भाजन डारे फोरि, गोरस दियो लुठाय महि ॥

१ पराईवेटी । २ तेरी हियेकी आँखि नहीं रही । ३ देखत ।



सोवति लरिकन चुटकि जगाये । महीछिरकि डरपाय रुवावे ॥  
 बड़ो माट इक धीको पोखो । बहुत दिननको चिकनो चोखो ॥  
 सोऊ फोरि कियो बहु टूका । चले हँसत सब मिलिदूका ॥  
 आइ गई ग्वालनि तिहि काला । निकसत धरिपाये नँदलाला ॥  
 देख्यो घर बासन सब फोरे । रोवत बाल मही साँ बोरे ॥  
 दोऊ भुज गाढेही लीन्हे । जाय महारि ढिग ठाढे कीन्हे ॥  
 कहति सरोष यशोमति आगे । अब पति रहिहै या ब्रजत्यागे ॥  
 ऐसे हाल किये गृह भरे । सुनो महारि लक्षण सुत केरे ॥  
 माखन खाय दही ढरकायो । मही छिरकि बालकन रुवायो ॥  
 बासन फोरि धरे सब घरके । उपज्यो पूत सपूत महारिके ॥  
 धीको माट युगनको राख्यो । सोऊ फोरि टूक करि नाख्यो ॥  
 चलौ दिखाऊं घरको हाला । राखहुबांधि आपनो लाला ॥

दोहा-जननी खोजति कान्हको, करत फिरत उत्पात ॥

नित उठि उरहन सहतिहौं, तू नाहिं मानत तात ॥

सौ०-बड़े बापके पूत, चोर नाम प्रगट्यो जगत ॥

उपज्यो पूत सपूत, नाम धरावत तातको ॥

जननीके खोजत हरि रोये । भरि आये नैननिके कोये ॥  
 झूठहिं मोहिं लगावत धररी । मेरे ख्याल परी हैं सिगरी ॥  
 यशुमति रोवति देखि कन्हवाई । वदन पोंछि लीनो उरलाई ॥  
 कहति सबै युवतिन यह भावै । नितही नित उठि भोरहि आवै ॥  
 मेरे बरिहि दोष लगावै । झूठहि उरहन मोहिं सुनावै ॥  
 कबहि गयो तेरे दरवाजे । दूध दही माखनके काजे ॥  
 धन माती इतराती डोलैं । सकुचति नाहिं लँभारि न बोलैं ॥  
 मेरो कान्ह तनक साँ माई । ताहि रुवावत झूठ लगाई ॥  
 कब हरि तेरो माखन लीनो । मेरे बहुत दई को दीनो ॥  
 कहा भयो घर गयो तिहारे । छियो तनकदधि बालकवारे ॥

१ नोचकर । २ दही । ३ यशोदाके । ४ मेरेवालकको । ५ भगवानकोदीना ।



ग्वालिन सुनि यशुमतिकी बानी । कहति महरि तुम उलटि रिसानी ॥  
नित उठि होय जासुकी हानी । सो क्योंकहे आन नैबरानी ॥

दोहा—तुम कछु लावत औरही, लेहु आपनो गाउँ ॥

जहां बसे नहिं पति रहै, तजनि कह्यो सो ठाउँ

सो०—पूतहि देत पठाय, भडहाई घर घर करन ॥

उरहन देत रिसाय, कोबसिहै ऐसे नगर ॥

सखा भीरलै पैठत धाई । आपखाइ तो सहिये माई ॥

जो कछु गोरस घरमें पावै । कछु डारे कछु सखन लुटावै ॥

कहैं लों सहैं नित्यकी हानी । कबलों करैं नंदकी कानी ॥

इक दिन मेरे मन्दिर आयो । मोको देखत बदन बिरायो ॥

जब मैं सन्मुख पकरन धाई । तबके गुण कहा कहाँ सुनाई ॥

भाजि रह्यौ दुरि देखत जाई । मैं पौढी अपने गृह आई ॥

हरैं हरैं आये शिरहाने । चोटी पाटी बांधि पराने ॥

सुनि मैया याके गुण मोसों । ये सब झूठ कहतिहैं तोसों ॥

खेलतते मोहिं लियो बुलाई । मोपै दधिकी चींटी कढाई ॥

टहल करों मैं याके घरकी । यह सोवै पति संग निःधरकी ॥

सुनत वचन यशुमति मुसुकानी । ग्वालिनिहैंसि मुख मोरिलजानी ॥

सुनहु महरि सुतके गुणकाने । सलुझहु हैं भोरे कै स्थाने ॥

दोहा—करत फिरत उत्पात अति, सब ब्रज घर घर जाय

नित उठि खेलत फागसी, गरियावतनलजाय ॥

सो०—बाहर तरुण किशोर, बोलत वचन विचित्र घर

इहां होत शिशु भोर, तुम अचरज मानतनहीं ॥

योंकहिगई ग्वालिनी धामहि । यशुमति पुनि पुनि सिखवत श्यामहि ॥

घर गोरस जिनजाहु पराये । तार्तरिसात उरहनो लाये ॥

लघु दीर्घता कछु नहिं जानै । झगरो आय झूठ तबठानै ॥

१ लाज । २ ठौर । ३ भाजगए । ४ गारी देवेमें नेकलाज नहींकरे ।

५ बालक । ६ नन्दबाबा ।



नौ लख धेनु दूध की तेरे । और बहुत बन धरें अनरे ॥  
तू कत माखन खात चुराई । छांड़ि देहु अब यह लरिकाई ॥  
यांकहि जननी कंठ लगायो । सुन्दर श्याम हर्ष तब पायो ॥  
खेलन गये बहुरि नैदलाला । किये जाय पुनि सोई ख्याला ॥  
अपर ग्वालि उरहनलै आई । आई यशुमति पै रिसयाई ॥  
तेरो सुत मम माखन खायो । सखनसहित अबहीं भजिआयो ॥  
मैंगड़ यमुन भरनको पानी । दुपहर दिवस सून घरजानी ॥  
गयो भवनमें खोल किवाँरी । छीकन ते दधि लियो उतारी ॥  
खाय लुटाय बहाय परानै । वारक द्वैवरजौ नहि मानै ॥

दोहा—कीन्हों अतिही लाडलों, लाड लडाय बहूत ॥

अबहीं ते ये ढँग करत, जायो नोखो पूत ॥

सो०—सुनि ग्वालिनिके बैन, कहत यशोमति कान्हसों ॥

सिखयो मानत नैन, लै सँठिया डाटाति भई ॥

माखन खात पराये घरको । मेरे रहत जहाँ तहँ ढरको ॥  
नितप्रति मथियत सहस्रप्रधानी । तेरे कौन वस्तुकी हानी ॥  
कितने अहिर जियत घरमेरे । बँचत खात मेही बहुतेरे ॥  
पूत कहावत नन्द महरिको । चोरी करत उधारत फरको ॥  
मैया मैं नहि माखन खायो । मेरे वदन सखन लपटायो ॥  
भाजन ऊँचे छीकन चढायो । समुझ देखि मैं कैसे पायो ॥  
मैं ये नान्हें हाथ पसारी । किहि विधि माखन लियों उतारी ॥  
मुख दधि पोंछत कहत कन्हआई । दोना पाछे पीठि दुराई ॥  
डारि सांठि यशुमति मुसुकानी । गहि उर लाय लिये सुखदानी ॥  
बाल विनोद मोद मन मोह्यो । निरखत वदन त्रास युत सोह्यो ॥  
भक्ताधीन वेद यश गावै । सोहरि भक्ति प्रताप दिखावै ॥  
यशुमतिको मुख निरखि अगाधा । बिसरी शिव मुनि ब्रह्म समाधा ॥  
दोहा—धन ब्रजवासी धन्य ब्रज, धनि धनि ब्रजकी गाय ॥

१ हजार । २ दही ।



जिनको माखन चोरि हरि, नित उठि घर घर खाय ॥  
 सो०—रहे सकल सुरभूल, ब्रजविलास हरिको निरखि ॥

हरषहिं वरषहिं फूल, धन्य धन्य ब्रज धन्य कहि ॥  
 आई कहत और इक ग्वाली । सुनहु यशोमति सुतकीचाली ॥  
 भाज गये मम भाजन फोरी । माखन खाय मही महि ठोरी ॥  
 हाँक देत पैठत घरमाहीं । काहु विधि कर मानत नाहीं ॥  
 सखा संग कीन्हें इक ठोरी । नाचत फिरत साँकरी खोरी ॥  
 वाट घाट कोउ चलन न पावै । गारी दैदै सबन बुलावै ॥  
 गोरख हानि करत है सिंगरौ । कहँलगि कीजै नित उठि झगरौ ॥  
 घरघर करत फिरत सुतचोरी । ऐसीविधि बसिहै ब्रजकोरी ॥  
 सुनत गोपिका की रिसवानी । कहत श्याम सों नंद किरानी ॥  
 तू नहिं मोहिं डरात मुरारी । बकत बकत तोसों पचिहारी ॥  
 षटरस भरे धरे घरमाहीं । सो तू खात पियत क्यों नाहीं ॥  
 परघर चोरी को नितजाई । देत उरहनो ग्वालि सदाई ॥  
 मोको कृपण कहत सब आई । तेरे घर ढोटहु न अवाई ॥

दोहा—सुनि सुनि लाजनि मरति मैं, तू नहिं मानत बात ॥

अब तोहिं राखों बांधिकै, जानी तेरी बात ॥

सो०—सुनिरी ग्वालिनिबात, कहे देत अब तोहिंमैं ॥

जवहीं पावहु घात, मेरी सौं यहिमारियौ ॥

अबते मोको बहुत खिजाई । साँटिन मारि करौ पहुनाई ॥  
 अजहूँ मानि कछौ करि मेरौ । तू घरघर मति फिरै अनेरौ ॥  
 जननी रिस लखि श्याम डराने । अब नहिं जैहों धाम बिराने ॥  
 यों कहि निकरि गये हरिद्वारे । खेलत सखन संग गलियारे ॥  
 तबहीं ग्वालि और इक आई । सो यशुमतिसों कहत सुनाई ॥  
 नंदमहरिसुत भलौ पढ़ायौ । ब्रजघर बीथिनि सोर मचायौ ॥  
 मारि भजत काहुके लरिका । खोलतहैं काहुको फरका ॥



काहूको दधि माखन खाई । काहूके घर करत भँडाई ॥  
 गारी देत सकुच नहिं मानै । गैल चलत हठ झगरी ठानै ॥  
 कह कह हरिके गुणनि बतैयै । तोसों उरहन देत लजैयै ॥  
 कछु दोना सों पढिकर आई । जोइ भावत सोइ करत कन्हाई ॥  
 पीताम्बर ओढत शिरनाई । अंचल दै दै मुरि सुसुकाई ॥

दोहा-तेरीसों तोसों कहति, मैं सकुचाति यह बात ॥  
 तेरो मुख हरि लखतिही, सकुचि तनिक है जात ॥  
 सो०-नेक दिखावहु आँखि, नहिं अबतै यह ढँग भले ॥  
 कब लगि कहियै राखि, करत अचकरी श्याम अति ॥

अथ दावरीबन्धनलीला ॥

यशुमति सुनि हरिके गुणगाथा । रिस करि उठी सँटिलै हाथा ॥  
 कहति जो बेसी रिसमे पाऊं । तो हरिकी गति तुमहिं दिखाऊं ॥  
 कैसे हाल करौ हरि केरे । लागे ताँत आज है मेरे ॥  
 छाँडों नहीं आज बिन मारे । भये श्याम अब बहुत दुलारे ॥  
 इहि अन्तर आई इक गोपी । बाँह गहे हरिकी मुख कोपी ॥  
 भलो महारि सूयो सुत जायो । चोली हार खोलि दिखरायो ॥  
 किन नहिं सुतको लाड लडायो । कौने नहीं कठिन करि जायो ॥  
 तेरो कछुक अधिकारी माई । बरजत नाहिन नेक कन्हाई ॥  
 यशुमति हरिको भुज गहि लीन्हो ॥ कहति बहुरि अपनो ढँग कीन्हो ॥  
 हरुवै सँटिया ड़ैक लगाई । आज बाँधि भेटौं लँगराई ॥  
 गहे भुजा सुतकी बिततानी । इत उत रजु खोजत नँदरानी ॥  
 हरि जननी उर कोष निहारी । मनमन बिहँसत कौतुककारी ॥

दोहा-आग्नि प्रेरि त्रिभुवनधनी, दियो क्षीर उफनाय ॥  
 यशुमति लखि तजि हरि भुजा, लगी सँभारन जाय ॥  
 सो०-इहि विधि भुजा लुटाय, दधि भाजन फोरन लगे ॥  
 माखन सुँह लपटाय, गोरस दियो लुटाय सब ॥

१ पिता । २ रस्सी ।



रिसमेरिस औरै उपजाई । जानि जननि अभिलाष कन्हआई ॥  
 देखि यशोमति अतिरिसि पागी । पकरि श्यामको बांधन लागी ॥  
 गर्व जानि नहिं दाम समाई । सब रज्जु द्वै आंगुरि घटि जाई ॥  
 पुनि पुनि यशुमति औरै मँगावै । हरिके तनु सब ओछी आवै ॥  
 देखि यशोमति अति रिसबाढी । मन पछितात ग्वालिनी ठाढी ॥  
 देखि सखी यशुमति बौरानी । हरिको बांधन चहत सयानी ॥  
 हरिको त्रिभुवनपति नहिं जाने । जिनते सकल कलेश नशाने ॥  
 अखिल ब्रह्मांड उदरमें जाके । बांधति महिर उदर रज्जु ताके ॥  
 ब्रह्मा शिव सनकादिक ज्ञानी । इनहुं जिनकी गति नहिं जानी ॥  
 जलथल जिनकी ज्योति समानी । कही गर्ग सब प्रकट बखानी ॥  
 सुखमें त्रिभुवन दियो दिखाई । ताहूपर परतीति न आई ॥  
 तिनहिं देख बांधति नैदरानी । अचरज कथा न जाति बखानी ॥

दोहा-आप बँधावत प्रेम वश, भक्तन छोरत फंद ॥

वदत वेद वाणी विदित, भक्त वल्ल नंदनंद ॥

सो०-जननिहिं अति रिस जान, यमला अर्जुन सुरतिकारि ॥

दीनबंधु भगवान, जनहित गये बँधाय प्रभु ॥

जननीके मनकी हैचि जानी । आप बँधायो शारंगपानी ॥  
 कहत यशोमति लै करडोरी । बांधों तोहिं सकैको छोरी ॥  
 लै लै रज्जु अखलसां जोरै । हरि लाखि बदन नैन जल डोरै ॥  
 यह सुनि ब्रजयुवती उठि धाई । देखि श्यामको सब मुसुकाई ॥  
 कहति इन्हें कोऊ मत छोरो । बहुरि श्याम अब माखन चोरो ॥  
 अखल बांधि यशोमति डोरी । मारनको सँठिया करतोरी ॥  
 सांटी देखि ग्वालि पछितानी । विकल भई मन अति अकुलानी ॥  
 कहति यशोमतिसां सब गोपी । ऐसी कहा पूत पै कोपी ॥  
 कहा भयो जो बालक पाहीं । ठरक गई मथनी महि माहीं ॥  
 घर घर गोकुल दई दिवारी । तू बांधत हरिकी भुजकारी ॥

१ बावरी हैगईहै । २ पैरमेरस्सी । ३ इच्छा ।



ऐसी तोहि वृद्धियत नाही । गोरस लागि बांधत सुतवाही ॥  
चूक परी हमते इहि भोरें । उरहन दियो बकस करजोरें ॥

दोहा-बार बार जोवत वदन, हुचकिन रोवत श्याम ॥

वज्रहुते तेरो हियो, कठिन अहो नंद वाम ॥

सो०-कित रिस करति अचेत, छोर उदरते दाँवरी ॥

डार कठिन करबेत, लोचन भरि भरि लेत हरि ॥

जाहु चली अपने अपने घर । तुमहि सबै मिल हीठकियो वर ॥

बन्धन छोरनको अब आई । मोको मतिबरजो कोउ माई ॥

मोहि आपने बाया कीसों । अब न पत्याउँ श्यामको वीसों ॥

देखि चुकी मैं इनके ख्याला । उपजे बडे नंदके लाला ॥

मैं देवन हित पय औटायो । कोरी मटुकी दही जमायो ॥

जावन दियो न पूजन पायो । सो सब फोरि भूमि ढरकायो ॥

तिहि घर देव पितर कहु काके । भयो कान्हसां सुत घर जाके ॥

कहत एक सुन यशुमति बौरी । दधि कारण सुत बांधत दौरी ॥

तैं यह सीख कौनपै लीन्ही । इतनी रिस बालकपै कीन्ही ॥

जो अतिही अचकरो कन्हाई । तऊ कोखको जायो माई ॥

नेक देखि धौं हरिहि निहारी । कैसे डरत लकुटि उरभारी ॥

शोभित सजल सांवरे लोचन । नीरजदल अति ओस भरेजन ॥

दोहा-नमित वदन सूखत अधर, कलुकसकुचमें रोस ॥

सांझ होत जिमि बात वश, शोभित पंकज कोस ॥

सो०-निरखि नयन सुख देत, हरिपै सर्वसवारिये ॥

प्रकटे नंदनिकेत, को जानै किहि पुण्य वश ॥

एक कहति जो आयसु पाऊं । तौ भाखन निज घरते लाऊं ॥

जिहि कारण कीनी रिस हरिते । अजहुँ न डारत सँटिया करते ॥

देखि डरात तोहि हरिकैसे । सकुचत जलजशीत भय जैसे ॥

१ हाथजोरे । २ वीसो विश्वे नहीं पत्याउँ । ३ देवतोंकेलिये । ४ जैसे कमल-  
के पत्रनपर ओसकी बूंद । ५ जैसे सायंकालमें पवनकेमारो कमल नवि जायहै ।



वेगि छोरि बंधनपट त्यागी । ले लगाय उर श्याम सभागी ॥  
 कहन लगीं अब बढि बढि बानी । माखन मोहिं देतिहैं आनी ॥  
 मानों मेरे घर कछु नाहीं । तब नहिं उरहन देत लजाहीं ॥  
 ठोठा भरो तुमहिं बँधायो । उरहन दै दै मूड़ पिरायो ॥  
 रिसहीमें मोको गँहि दीनो । सबको ज्ञान जानि मैं लीनो ॥  
 बोली अपर एक ब्रजनारी । देखहु यशुमति सुतहि निहारी ॥  
 मुख छवि कोटि चन्द्र बलिहारी । यहहैं साह कि चोर विहारी ॥  
 नाहिन तरुण किशोर कन्हई । कितहिं करत इनसों रिस माई ॥  
 कहा भयो जो उरहन आने । बालक हरि अबहीं कहा जाने ॥  
 दोहा-श्रमित भ्रमितजो त्रासते, चपल सजलैदृश कोर ॥  
 मनहुं मीन वंसी विधे, करत सलिल झकझोर ॥  
 सो०-लैउठाय उरधारि, छोरि उदरते दांवरी ॥

प्राण दीजिये वारि, मोहन मदन गोपाल पर ॥  
 तेरो कठिन हियो है माई । कहत एक ग्वालनि समुझाई ॥  
 ऐसो माखन दधि बहि जाई । बांधे कमलनयन जेहिलाई ॥  
 जो मूरति शिवध्यान लगावैं । सपनेहुं सुर नहिं देखन पावैं ॥  
 निगमनहुं खोजत नहिं पाई । सोतैं दे करतार नचाई ॥  
 याही ते तू गर्व भुलाई । घर बैठे तेरे निधि आई ॥  
 काहूको सुत रोवत देषी । लेत धाय उरलाय विशेषी ॥  
 अब यह कित सीखी चतुराई । निजसुतसों इतनी कठिनाई ॥  
 कहत एक देखहु नँदनारी । कबके उखल बँधे सुरारी ॥  
 गयो क्षुधाते मुख कुम्हिलाई । अति कोमल तनु श्याम कन्हलाई ॥  
 भई बेर बीते युगं यामा । हरिके निकट आय गो घामा ॥  
 तू लागी गृहकारज माहीं । है निर्दयी दया कछु नाहीं ॥  
 घरको काज इनहुंते प्यारो । यशुमति नेक न हृदय विचारो ॥

१ प्रकार मोको दीनो । २ दूसरी । ३ जैसे वंसी लोहेकी बनी मच्छीपकने-  
 केकाटेमें फँसकर जलप्रवृत्ति तलफे है ऐसे श्रम और त्रासते सजल चपल  
 कृष्णकेनेत्रकोर प्रतीतहोयहैं । ४ दोप्रहर ।



दोहा-जलजलोलं लोचन सजल, भये त्रास ते दीन॥

चितवत तेरे बदन तन, मन मोहन आधीन ॥

सो०-केतिक गोरस हान, जाको तौरत कान तु ॥

वारि दीजिये प्राण, रोम रोम पर श्यामके ॥

हरिको देखि सखा इक धायो । तिन हलधरसों जाय सुनायो ॥

अहो राम तुम्हरो लखु भैया । बांध्यो आज यशोदा भैया ॥

काहूके लरिकहि हरि मान्यो । यशुमति पै तिन जाय पुकान्यो ॥

तबत हरिहि बांधि बैठायो । छोड़ति नाहिन सबहि छुड़ायो ॥

सो हम तुमहि जनावन आये । हलधर सुनत तुरत उठिधाये ॥

माता डरतहु अतिहि ब्रसाये । हरिहि देखि लोचन भरि आये ॥

कहत भले दोउ भुजा बांधये । ऊखलसों बांधे हरि पाये ॥

मैं बरजे कह बार कन्हाई । अजहूं छोड़ि देहु लँगराई ॥

दोउ कर जोरि कहतरी भैया । काहेको बांध्यो मेरो भैया ॥

श्यामहि छोड़ि बांध बरमोहीं । और कहा कहिये अब तोहीं ॥

मेरो प्राण अधार कन्हाई । ताकी भुज मोहि बंधी दिखाई ॥

कौन काज गोरस धन धामा । जिहि कारण बांध्यो घनश्यामा ॥

दोहा-छुवत और जो तनु कोऊ, आज देखतो सोय ॥

तू जननी कछु बश नहीं, जो कछु करे सो होय ॥

सो०-तेरे बश हरि आहिं, को जानै किहि पुण्यते ॥

तू पहिचानत नाहिं, गोरस हित बांधत हरिहि ॥

सुनहु बात हलधर तुम मेरी । करन देहु सेवा इनकेरी ॥

माखन खात परायो जाई । प्रगटत चोरी नाम कन्हाई ॥

तुमहीं कहो कभी किहि केरी । नवनिधिकी मेरे घर ढेरी ॥

हैं हारी बरजत दिनराता । मानत नाहिन मेरी बाता ॥

कहा करौं हरि अतिहि खिझाई । भयो बहुतही ठीठ कन्हाई ॥

मेरी कह्यो तनक नहिं मानै । नित उठि टेक आपनी ठानै ॥

१ कमल । २ चंचल । ३ दाऊजीसों ।



भोर होत उरहन लै आवै । ब्रज युवतिनते मोहिं लजावै ॥  
जहँ तहँ धूम मचावत जाई । घरनहि रहते क्षणक कन्हाई ॥  
तुमहँ दोष देत हौ मोहीं । कान्हरते प्यारो दधितोहीं ॥  
तोहिं तजि और कहो किहि मैया । औरको मेरो मान रखैया ॥  
तेरी साँ जननी सुन मोहीं । उरहन देत झूठ सबतोहीं ॥  
है सब ब्रजको श्याम पियारो । श्याम सकल ब्रजको रखवारो ॥

दोहा-दधि माखन पय कान्हको, कान्हाकी सबगाय ॥

मोहँको बल कान्हको, तू नहि जानत माय ॥

सो०-बलदाऊकी बात, सुनि हँसिकै यशुमति कह्यो ॥

तुम यकमति दोउ भ्रात, जानत मैं तुम्हरे चरित ॥

हरिहि देखि हलधर मुसकाने । यह तुम गति तुम बिनको जाने  
को तुम छोरन बांधन हारा । तुम छोरत बांधत संसारा ॥  
कारन करन करत मनमाने । अति हित यशुमति हाथ बिकाने ॥  
असुर सँहारन जन दुखमोचन । कमलार्पति राजीव विलोचन ॥  
भक्तनके वश रहत सदाई । ताहीते कछुओ न बसाई ॥  
हरि यमलार्जुन तरुतन हेरे । मनमें कहत दास ये भरे ॥  
अबहीं आजु इन्हें उद्धारौ । दुसह शाप मुनिवर को टारौ ॥  
इनहीके हित भुजा बँधाई । परसि बिटैप अव देहुँ गिराई ॥  
दारुण दुख इनको सब टारौ । इहि मिलिकारि बंधन निरवारौ ॥  
भक्त बछल हरि दीनदयाला । करुणासिन्धु अगाध कृपाला ॥  
भक्ताधीन वेद यश गावैं । पावन पतितनाम कहवावैं ॥  
भक्तहेतु नाना तनुधारी । करत चरित भक्तन सुखकारी ॥

दोहा-ब्रजवासी प्रभु भक्ति हित, आप बँधायो दाम ॥

ताही दिन ते प्रकटहै, दामोदर सो नाम ॥

सो०-नंद नंदन घनश्याम, जन रंजन भंजन विपति ॥

भेटत जिनको नाम, पाप शाप त्रय ताप दुख ॥

१ एकबुद्धि । २ लक्ष्मीपति । ३ कमलनेत्र । ४ नारद । ५ वृक्ष ।



यशुदा बाहेर छांड़ि कन्हार्ई । लगी मथन दधि भीतर जाई ॥  
 कहत वचन रसरिस लपटाने । खात फिरत दधि धाम बिराने ॥  
 पटरस छांड़ि आपने धामा । चोरी प्रकट करतहैं श्यामा ॥  
 मारि भजत ब्रजलरिकन जाई । जहां तहां ब्रज धूम मचाई ॥  
 रहौ तुमहु हलधर चुपसाधी । इनकी मेटन देहु उपाधी ॥  
 ऊखलसों बांधे वनवारी । कहत यशोमति सां ब्रजनारी ॥  
 कान्हहुँ ते तोहिं माखन प्यारो । अरी देखि तरसत हरिवारो ॥  
 डारिदेहि मथनी नैदरानी । हैहै हरिकी भुजा पिरानी ॥  
 दूध दही हरिपै सब वारौ । मोहन जीवन प्राण हमारो ॥  
 हरुये बोलि उठी नैदरानी । जाहु सबै तुम युवति सयानी ॥  
 मैं खीझत लरिकहि गुण काजे । तुम कित झुरत दई बिनकाजे ॥  
 लरिकहि त्रास दिखावत रहिये । अबहींते अवगुणनहिं चाहिये ॥

दोहा—युवति चलीं बिरुझाय सब, कहत यशोदहिं पोच ॥

मूरखसों कहिये कहा, करत प्रेम वश शोच ॥

सो—कहा करैं बलि जाउँ, कहत चलीं सब श्यामसों ॥

धरत यशोदहिनाउँ, अति कठोर मानत नहीं ॥

तबहिं श्यामसुंदर यह ठानी । युवती धाम गई सब जानी ॥  
 गृहकारज जननी अटकायो । आप यमलभर्जुन पहुँ आयो ॥  
 परसत पात उठे झहराई । परे शब्द आघात सुहाई ॥  
 उखरे मूल सहित अरराई । दिये धरणि दोउ तरुन गिराई ॥  
 भये चकित सब ब्रजके बासी । रहे सकुचि तनु सुधि बुधि नासी ॥  
 कोई भूमि कोई तकत अकासा । रहे घडीइक लौ जकि वासा ॥  
 याही अन्तर युगल कुमार । प्रगटे धनदत्तनय सुकुमारा ॥  
 नारद शाप पाय दोउ भाई । भये हुते ब्रजमें तरुआई ॥  
 हरिके परशत निजगति पाई । भये पुनीत मिठी जडताई ॥  
 तिन्हें कृपालु अनुग्रह कीन्हो । चारि भुजाकरि दरशन दीन्हों ॥

१ बाहुबुखआई होयगी । २ खिसयानी हैकै । ३ दोबालक । कुबेरकेपुत्र ।



देखि दृश अति पुलक शरीर । परे चरण दोउ बंधु अधीर ॥  
 बारबार पदरज शिरधारी । जोरि पाणि स्तुति अनुसारी ॥  
 छं०—अनुसारि प्रस्तुति युगल प्रेमानंद मगनसन्मुखखरे ॥  
 जै जै भगत हित सगुण सुंदर देह धरि ध्यावत हरे ॥  
 जो रूप निगमन नेति गायो बुद्धि मन वाणी परे ॥  
 सो धन्य गोकुल आय प्रगटे धन्य यशुमति उरपरे ॥  
 धनि धन्य ब्रज धन गोप गोपी गाय दधि माखनमही ॥  
 धन्य गोविंद बाल लीला करत माखन चोरही ॥  
 धनि धनि उरहनेदित नित उठिधन्य अनखबठावही ॥  
 धन्य जननी बाँधि राखति जाहि वेद न पावही ॥  
 धन्य सो तरुजासुकोरजु श्याम भुजन बंधाइयौ ॥  
 धन्य सो तृण जासु ऊखल धनि सुजन गठि लाइयौ ॥  
 धन्य ऋषि धनि शाय दीन्हो अति अनुग्रहसो कियो ॥  
 जासु शिव ब्रह्मादि दुर्लभ नाथ तुम दरशन दियो ॥  
 अब कृपा करि देहु वर प्रभु चरण पंकज मति रहै ॥  
 जहां जन्महि कर्म वरा तहँ एक तुम्हरी रति रहै ॥  
 दीनबन्धु कृपालु सुन्दर श्याम श्रीब्रज नाथजू ॥  
 राखिये निज शरण अब प्रभु करिय हमहि सनाथजू ॥  
 दोहा—बार बार पदनाथ शिर, विनती प्रसुहि सुनाय ॥  
 प्रेम मगन निरखत वदन, हर्ष सहित दोउ भाय ॥  
 सो०—साधु साधु कहि नाम, भक्ति दान तिनको दियो  
 विदाकिये धनश्याम, हर्षिगये निज पुर युगल ॥  
 वृक्ष शब्द सुनि यशुमति धाई । देखे अँजिर न कुँवर कन्हाई ॥  
 परे विटप महि लाखि अकुलानी । श्याम दवे तइतर यह जानी ॥  
 आरत महरि पुकारन लागी । बाँधे हरिम परमअभागी ॥  
 सुनत शीर ब्रज जन उठि धाये । नन्द द्वार सब आतुर आये ॥

१ रस्सी । २ चरणकमल । ३ अलकापुरी । ४ आंगन ।



Vinay Avasthi Sahib Bhuvan Vani Trust Donations

देखि गिरे तरु मनहि डराने । दूँढत श्यामहि अतिहि सकाने ॥  
 बारबार सब करहि विचारा । गिरे कौन विधि चिटप अपारा ॥  
 देख दुहुँतर बीच कन्हई । रहे वसित ऊखल लपटाई ॥  
 धाय लिये भुज छोरि उठाई । ब्रज युवतिन उर लीन्हे लाई ॥  
 कहत सबै नन्दहि बडभागी । बचे श्याम कहूँ चोट न लागी ॥  
 कबहूँ बांधत मारत कबहूँ । देत दोष यशुमतिको सबहूँ ॥  
 नयननीर भरि दौरि यशोदा । लियो लगाय कठ भरि गोदा ॥  
 जरहु सोरिख जिन तुमको बाँध्यो । जरहु हाथ जिन जेवरि साँध्यो ॥  
 दोहा-नन्द मोहि कहिहैं कहा, देखत तरुवर आय ॥

कुशल रहौ अब भ्रात दोउ, मैं लैमरहुँ बलाय ॥  
 सौ०-श्याम रहे लपटाय, अति सभौत उर मातुके ॥

बार बार बलि जाय, यशुमति मन पछितात अति ॥  
 ब्रज युवती लै लै उर लावैं । निरखि वदन तनमन सुख पावैं ॥  
 मुख चूमत यह कहि पछिताहीं । कैसे बचे अगम तरु माहीं ॥  
 बड़ी आयु हरिकी है माई । जहां तहां विधि होत सहाई ॥  
 प्रथम पूतना मारन आई । पय पीवत वह तहां नशई ॥  
 तुंगावर्त लै गयो उड़ाई । आपहि गिन्यो शिलापर आई ॥  
 कागासुर आवत नहि जान्यो । सुनो कहति जिय लेत परान्यो ॥  
 शकटासुर पलना ढिग आयो । कोजान तिहि कमहि गिरायो ॥  
 कौन कौन करवर विधि टारी । ऊखलसों बाँधे महतारी ॥  
 तहँतेउ उबन्यो आजु कन्हई । ऊपर वृक्ष परे भरवाई ॥  
 सबहिन पेलि करत मनभाई । पुण्य नन्दके बच्चे कन्हई ॥  
 भुजपर बन्दन चिह्न निहारी । कहत यशोमति सों ब्रजनारी ॥  
 ये गुण यशुमति अहाँहि तिहारि । सकुची महारि निरखि हरि प्यारे ॥  
 दोहा-तबहि नन्द आये घरहि, दोउ तरु गिरे निहारि ॥  
 श्याम चपल बाँधे सुने, देत महारिको गारि ॥

१ मैयाकी छातीतै । २ दृढवृक्ष ।



सो०—बाँधतिहै बिन काज, मेरे हरि बारे सुताहि ॥

कुशल करी विधि आज, शोचत नँद लाखि तरुवरन ॥

तबहिं तात कहि धाय कन्हाई । लिये नंद कनियाँ सुखपाई ॥  
चूमि बदन उरसों लपटाये । प्रेम पुलकि लोचन भरि आये ॥  
मेरे लाल मैं तुम पर वारी । काहेको बांधे महतारी ॥  
कैसे गिरे वृक्ष अति भारी । चली नाहिं कहुँ तनक बयारी ॥  
बार बार शोचत नँदराई । पृथत तैं कछु लख्यो कन्हाई ॥  
श्याम कही मैं कछु न जानों । ऊखल ढिग मैं रखाँ छिपानों ॥  
कहत नन्द हरि बदन निहारी । बड़ी आज विधि करवर टारी ॥  
बहुत दान हरि हाथ दिवायो । द्विज चरणन लैलै सुत नायो ॥  
देहिं अशीश विप्र सुखमानी । भये प्रसन्न नन्द सुनि वानी ॥  
तबहीं श्याम जननि पहुँ आये । हर्षि यशोमति कण्ठ लगाये ॥  
भूखो भयो आज मेरो बारो । काको मुखधौं प्रात निहारो ॥  
लाई उरहन ग्वालनि भिनहीं । यह सब कियो पसारो तिनहीं ॥

दो०—पहिले रोहिणि सों कह्यो, तुरत करो जिवनार ॥

ग्वाल बाल सब बोलिकै, बैठे नन्दकुमार ॥

सो०—वेगि लाउरी मात, भूख लगी मोको बहुत ॥

आज न खायों प्रात, सुनत वचन यशुभति हँसी ॥

रोहिणि चितै रही यशुमति तन । शिर धुनि २ पछिताति मनहिंमन ॥  
परसहु हरिहि विलम्बन लावहु । भूखे हरि किन वेगि जिमावहु ॥  
बहु व्यंजन बहु भांति रसोई । कहँ लगि वरणि कहै कवि कोई ॥  
परसत जाति यशोमति मैया । जँवत श्याम सखा बल भैया ॥  
जो जो व्यंजन यशुमति राखे । तनक तनक मोहन सब चाखे ॥  
श्याम कही अब मात अघानो । अब मोको शीतल जल आनो ॥  
अँचवन करि अँचये दोउ भैया । अति सुख पायो लखि दोउ भैया ॥  
सहित सुगंधि पान कर लीन्हे । बाँटि सकल ग्वालनको दीन्हे ॥

१ देख्यो । २ पेटभगयो ।



खात खात दोऊ अलसाने । मुख जँभात जननी पहिचाने ॥  
जल अँचवाय कमल मुख धोये । बाँह पकरि पलका पँढाये ॥  
सोवत राम श्याम दोउ भैया । हँसे पाँय पलोठति मैया ॥

दोहा-सोये श्याम सुजान हरि, सुखसों बीती रात ॥

बहुरि कलेऊके लिये, जननि जगाये प्रात ॥

सो०-दियो कलेऊ प्रात, माखन प्यारे श्यामको ॥

मुदित निरखि दिन रात, यशुमति हरिके चरितको ॥

अथ वृन्दावनगमनलीला ॥

महर महरि यह मनहिं विचारी । गोकुल होत उपद्रव भारी ॥  
जब ते जन्म भयो हरि केरो । नितहि होत उतपात घनेरो ॥  
आकस्मात् गिरे तरु भारी । बच्चो बढेनके पुण्य मुरारी ॥  
ताते अब तजिये यह गाऊं । बसिये चलि कहूँ उत्तम ठाऊं ॥  
नन्दराय तब गोप बुलाये । सम्राचार ये सबनि सुनाये ॥  
सबहिनके मनमें यह आई । बसिये अनत कहूँ अब जाई ॥  
नितहि उपाधि नई जिहि ठाहीं । बसियो भलो तहाँको नाहीं ॥  
नंद कही मैं मनहिं विचारी । है इकठाउँ बहुत सुखकारी ॥  
वृन्दावन गोवर्द्धन पासा । तहाँ सबको सब भाँति सुवासा ॥  
तहाँ गोपगण सब सुखपैहैं । वनमें गोधन वृन्द चरैहैं ॥  
यह विचार सबके मनभायो । चलिबैको शुभ दिवस धरायो ॥  
वृन्दावन सब चले गुवाला । पाँच वर्षके मदन गोपाला ॥

दोहा-शकट सौज सब साजिकै, गोधन दिये हँकाया ॥

चले गोप गोपी हरषि, वृन्दावन समुदाय ॥

सो०-निरखि अनूपमठाम, शकट दिये सब छोरिकै ॥

सबके मन बस श्याम, बसे सकल वृन्दा विपिन ॥

बसे सकल वृन्दावन माहीं । अति आनंद गोप मनमाहीं ॥  
गाय बत्स सबही सुखपायो । चरत निकट लृण हरित सुहायो ॥

१ धीरेधीरे । २ विनाकारण । ३ छकडा । ४ परमअद्भुत ।



हलधर धेनु चरावन जाहीं । मन मोहन लखि मनहि सिहाहीं ॥  
प्रात चले सब गाय चरावन । जननी सों बोले मनभावन ॥  
मैं हूँ गाय चरावन जैहों । बड़ो भयो अब नाहि डरैहों ॥  
संग सखा अरु हलधर भैया । इनके संग चरैहों गैया ॥  
बालन संग यमुन तट माहीं । खेलहिगे सब वटकी छाहीं ॥  
अपनी रुचि मनके फल खैहों । तेरी सों यमुना नहि न्हेहों ॥  
ऐसी अबहि कहौ जिनवारे । देखहु अपनी भांति ललारे ॥  
तनक पायँ चलिहौ किहि भांती । गैयन आवत हैहै राती ॥  
प्रात जात गैयन लै चारन । आवत सांझ लखौ सब ग्वालन ॥  
तुम्हरो कमल वदन मुरझैहै । रंगत धाम मांझ दुखपैहै ॥

दोहा-तेरी सों मोहि धाम नहि, लागत भूख न नेक ॥

कह्यो कान्ह मानत नहीं, करै आपनी टेक ॥

सो०-चले चरावन गाय, ग्वाल बाल बलदेव वन ॥

हेरी ढेर सुनाय, गोधन कारि आगे लिये ॥

हेरी ढेर सुनत लरिकनकी । गये दौरि हरि अति रुचि मनकी ॥  
इतउत यशुमति जबहि निहारी । दृष्टि न परे थ्याम बनवारी ॥  
बनतन जान्यो जात कन्हाई । टेरति यशुमति पीछे धाई ॥  
जात चले गैयन सँग धावत । बलदाऊ को ढेर बुलावत ॥  
पीछे जननी आवत जानी । फेरि फेरि चितवत भय मानी ॥  
हलधर आवत देखि कन्हाई । ठाढे किये सखा समुदाई ॥  
पहुँची जननि भये सब ठाढे । रिस करि दोउ भुज पकरे गाढे ॥  
बल कह जान देहु सँग मेरे । बनते ऐहै आज सबेरे ॥  
कह्यो यशोमति बलहि निहारी । देखत रहियो मैं बलिहारी ॥  
भ्राता सँग गये बनहि कन्हाई । यशुमति यहै कहत घर आई ॥  
देखो हरि कैसो ढँग लीन्हों । अपनी टेक पन्यो सोइ कीन्हों ॥  
आज जाय देखहु बनमाहीं । कहां परोस धन्यो तिहि ठाहीं ॥

१ वंशीवट । २ डोलत ।



दोहा-माखन रोटी और जल, शीतल छाक बनाय ॥

दई वेगही ग्वाल सँग, यशुमति वनहिं पठाय ॥

सो०-चिन्तामणि सुर भेक, पंच सुधारस कल्पतरु ॥

अनुदिन जाके एक, खात छाक सो ग्वाल सँग ॥

वृन्दावन खेलत नंदलाला । भयो हिये आनन्द विशाला ॥  
जहँ जहँ ग्वाल गाय सँग जाहीं । तहँ तहँ आप फिरत वनमाहीं ॥  
बलदाऊ साँ कहत कन्हई । नितल्यावहु मोहि संग लिवाई ॥  
आज मरुं करि आवन पायो । जननी तुम्हरे कहे पठायो ॥  
काल्हि कौनिविधि करि वन ऐहौं । यशुमति पै आवन नहिं पैहौं ॥  
सोवत बोलि लीजियो मोकों । सोहैं नंदबधाकी तोकों ॥  
पुनि पुनि विनय करत सुखदाई । बलसाँ सखन समेत सुनाई ॥  
संध्या समय निकट जब आई । घर कहँ चलौ कह्यो बल भाई ॥  
गैयन धेरि करी यकठौरी । चले सदैव सब गावत गौरी ॥  
आवत वनते धेनु चराई । ग्वालन मध्य श्याम सुखदाई ॥  
जिहि जिहि भांति ग्वाल मुख भाखैं । सुनि सुनि मनमोहन उर राखैं ॥  
नान्हैं सुर पुनि आपुनि गावैं । तारी देत हैंसत सुख पावैं ॥

दोहा-मोर मुकुट वनमाल उर, पीताम्बर फहराय ॥

गोपदरज छवि वदन पर, आवत गाय चराय ॥

सो०-छुटौं अलक छविदेत, जलज वदन पर मधुप जनु ॥

आवत सखन समेत, नंदसुवन व्रज प्राण धनु ॥

देखत नन्द यशोदा ठाढ़े । रोहिणि अरु व्रज जन सुख वाढ़े ॥  
गायन संग श्याम जब आये । लैबलाय जननी उर लाये ॥  
आज गयो हरि गाय चरावन । मैं बलि जाउँ तनकसे पाँवन ॥  
मो कारण कछु वनते लाये । तुमको मिलि मैं अति सुखपाये ॥  
आचर साँ सब अँग अँग झारे । वदन पोंछि मुख चूमि दुलारे ॥  
खाड कछुक जो भावै मोहन । देरी माखन रोटी सोहन ॥

१ घाको । २ मंदस्वरसों । ३ कमलमुखपरजानों । ४ भौरा ।



दिये जिमाय तुरत दोउ मैया । अति आनन्द मगन मन मैया ॥  
 कहत वननिसों श्रीव्रजनाथा । प्रात नितहि जैहों बलसाथा ॥  
 मैं अपनी अब गाय चरैहों । तेरे कहे घरहि नहि रैहों ॥  
 ग्वाल बाल गायनके माहीं । नेकहु डर लागत मोहिं नाहीं ॥  
 आज न सोवां नन्द दुहाई । रहिहों जागत कहत कन्हाई ॥  
 सब मिलि गाय चरावन जाहीं । मैं क्यों रहों बैठि घर माहीं ॥

दोहा-सोय रहौ अब श्याम तुम, जननि कहै चुचकारि ॥

प्रात जान कहिहों तुम्हें, वनको मैं बलिहारि ॥

सो०-ज्यों त्यों राखे स्वाय, प्रात देन वन जान कहि ॥

जननी दावत पांय, भ्रमित जानि वन गमनके ॥

बहुते दुख हरि सोय गयोहै । ज्यों त्यों करि मन बोध लयोहै ॥  
 सांझहि ते लाग्यो इहि बातें । जान कहत वन उठि पुनि प्रातें ॥  
 यह तो संग लागि बलरामहि । गये लिवाय आज वन श्यामहि ॥  
 अब तो सोयरह्यो करियेसे । प्रात विचार करै धौ कैसे ॥  
 कहत नंद बलके सँगजाई । इत उत आवन दे फिरि धाई ॥  
 भोर भयो यशुमति कहप्यारे । जागहु मोहन नन्ददुलारे ॥  
 बीतीनिशि रवि किरण प्रकाशी । शशि मलीन उडगण द्युतिनाशी ॥  
 सुनहु शब्द बोलत खगमाला । खोलहु अंजुजनयन विशाला ॥  
 सुनत श्याम जननीकी बानी । जागि उठे सन्तन सुखदानी ॥  
 लाई तुरत कलेऊ मैया । माखन रोटी खान कन्हैया ॥  
 टेरत ग्वाल सखा सबद्वारे । आये तबके होत सकारे ॥  
 खेलहु ब्रज भीतरही प्यारे । दूरकहूं मतिजाहु ललारे ॥

दोहा-टेरि उठे बलराम तब, आवहु धाय कन्हाय ॥

जात ग्वाल वनको सबै, चेलहु चरावन गाय ॥

सो०-श्याम जोरि दोउ हाथ, जननी सों हाहाकरत ॥

जैहों ग्वालन साथ, गोचारन वृन्दा विपिन ॥

१ धकेभए । २ रात । ३ चंद्र । ४ तारागण । ५ कमलनयन ।



देखत मोहि दाऊरी मैया । जैहौ बनहि चरावन गैया ॥  
बन फल तोरि देत मोहिजाई । आपुन बेरत गैयन धाई ॥  
जैहौ अरु ग्वालन संगनाहीं । मोहि खिझावत वे बनमाहीं ॥  
मैं अपने दाऊ संग रहौ । देखत वृन्दावन सुख पैहौ ॥  
आगे दै लावत मगमाहीं । तू क्यों जान देत मोहि नाहीं ॥  
लीन्हो यशुमति बलहि बुलाई । सुनहु लाल हरिके गुण आई ॥  
कहत यशोमति सां बल भैया । जान देहु मोसंग कन्हैया ॥  
अपने ढिग ते नेकु न टारौ । जियपरतीत नेकनहि धारौ ॥  
तू काहे डरपति मन माहीं । जान देत हरिको क्यों नाहीं ॥  
हँसी महरि सुनि बलकी बानी । जाहु लियाय कहत नँदरानी ॥  
मैं बलिहारी तुम्हरे मुखकी । तुमहूँ कहत श्यामके रुखकी ॥  
अति आनंद भयो हरिधाये । दोऊ संग खरकमें आये ॥

दोहा-धाय धाय भेंटत सखन, उर अति हर्ष बढ़ाय ॥  
पठयो मैया मोहिं बन, चलहि चरावन गाय ॥  
सो०-कहत सखा सुख पाय, चलहु श्याम देखौ बनहि ॥  
बनमाला पहिराय, करत चित्रं वन धातु तन ॥

चले बनहि सब गाय चरावन । सखा संग सोहत मनभावन ॥  
ग्वाल बाल सब कछुक सयान्हे । नंदसुवन तिनमें कछु नान्हे ॥  
गाय गोप गोसुत बन जाई । तिनके मध्य श्याम सुखदाई ॥  
हरिसों सखा कहत समझाई । छोड़ि कहूँ जिनजाहु कन्हाई ॥  
वृन्दावन अति सघन विशाला । जैहौ भूलि कहूँ नँदलाला ॥  
सुनत श्यामघन तिनकी बाता । मनमन हँसत कहत जगन्नाता ॥  
तुम्हरो संग न छाँड़तराई । बनहि डरात बहुत मैं भाई ॥  
जात चले सब हर्ष बढ़ाये । खेलत श्याम संग सुखपाये ॥  
कोउगावत कोउवेणु बजावै । कोउनाचत कोउ कूदत आवै ॥  
देखिदेखि हरि अति हर्षाहीं । हँसत सखन सां दै गुलबाहीं ॥

१ गेरु ( सिलस्वरीआदिवनधातु )



भली करी तुम मोकोलाये । आज यशोमति हर्ष बढ़ाये ॥  
इहि विधि गोधन लै सब ग्वाला । यमुना तट पहुँचै नंदलाला ॥

दोहा-दई धेनु बगराय सब, चरन आपने रंग ॥

गाय चरावत नंदसुत, मिलि ग्वालनके संग ॥

सौ०-उर मुकुनकी माल, शीश मुकुट कटि पीत पट ॥

हाथ लकुटिया लाल, डोलत ग्वालन संग प्रभु ॥

अथ वत्सासुरवधलीला ॥

खेलत श्याम सखनके माहीं । यमुनाके तट तरुंकी छाहीं ॥

वत्सासुर तिहि अवसर आयो । पठयो कंस काल नियरायो ॥

वत्सरूप धरि आय समान्यो । कृष्ण ताहि आवतही जान्यो ॥

बल तन चितै कह्यो मुसकाई । तुम याको जानत हौ भाई ॥

यह तो असुर वत्स है आयो । हमको मारन कंस पढायो ॥

हलधरहू देख्यो धरि ध्याना । कहत सांच तुम श्याम सुजाना ॥

ग्वालनहू सों कहत कन्हाई । बछरा बेरि करो इक ठाई ॥

लाये बेरि वत्स सब ग्वाला । वह नाहिं घिरहि चपल विकराला ॥

बारवार हरि ओर निहारै । दांव घात मन माहिं विचारै ॥

तब हरि कह्यो याहि मैं ल्यावत । तुमतो याको छुवन न पावत ॥

हाथ लकुटिया लै हरि धाये । वत्सासुरके सन्मुख आये ॥

हरिको जवहिं जुदो करि पायो । असुर कोपकरि मारन आयो ॥

छं०-धायो असुर करि क्रोध मारन श्यामके सन्मुखगयो ॥

है गयो निष्पाप तबहीं योग्य सुरपुरके भयो ॥

धायके हरिचपरिताको पकरि पाँय फिराइयो ॥

पटक्यो धरणि तनु असुर प्रगट्यो फेरि श्वास न आइयो ॥

दोहा-वत्सासुर सुरपुर गयो, अधम असुर तनु त्याग ॥

सुर हर्षत वर्षत सुमन, गर्जन सहित अनुराग ॥

१ छातीपरमोतिनकाहार । २ वृक्ष । ३ दाऊजी । ४ सर्ग । ५ आकाश ।



सौ०-धाय पर सब ग्वाल, चकित कृष्ण बल देखिकै ॥

धन्य धन्य नँदलाल, कहत परम आनंदधरे ॥

असुर देखि सब अचरजपायो । कहत हमैं हरि आज बचायो ॥  
बछरा करि हम जान्यो याही । यहत असुर भयानक आही ॥  
आज सबनि धरिकै यह खातो । और कौन पै जात निपातो ॥  
हर्षि हर्षि हरिको उर लायो । असुर निकन्दन नाम सुनायो ॥  
कहत ग्वाल धनि धन्य कन्हई । धन्य धन्य ब्रज प्रगटे आई ॥  
यह ऐसो तुम अति सुकुमारा । किहि विधि भुजन फिराय पछारा ॥  
सबहीके देखत पलमाहीं । मान्यो असुर डरे तुम नाहीं ॥  
अबलौं हमन तुमहि पहिचान्यों । हो तुम बड़े सबनते जान्यों ॥  
कोउ वनमाल आनि पहिरावैं । कोउ वन धातु रगरि तनुलावैं ॥  
कोउ कुण्डल शिर मुकुट सँवारैं । अलिकावलिकोउ तिलक सुधारैं ॥  
जात भुजनपर कोउ बलिहारैं । तनु देखत कोउ वदन निहारैं ॥  
वनफल तोरि धरत कोउ आगे । कहत खाउ मीठे अति लागे ॥

दोहा-इहि विधि हरिको पूजिकै, ग्वाल बाल हरपाय ॥

सांझ निकट आवत चले, घरको धेनु चराय ॥

सौ०-परम सुदित सब ग्वाल, असुर मारि आवत घरहिं ॥

गावैं शब्द रसाल, ब्रजवासी प्रभुके गुणन ॥

सखन मध्य सोहत नँदनंदन । जलद श्यामतनु चित्रित चंदन ॥  
मोर मुकुट पट पीत सुहावन । इंद्र धनुष दामिनिहि लजावन ॥  
मुक्तमाल वनमाल विराजै । बँक शुकं अवैलि मनहुँ छविछाजै ॥  
हाथ लकुट कल कुण्डल कानन । कोटि काम छवि शोभित आनन ॥  
कुटिल अलक भ्रुव नैन विशाला । गोपदरज कन द्युति छविजाला ॥  
बल मोहन वनते वनिआवैं । निरखि निरखि ब्रजजन सुखपावैं ॥  
सखन सहित हरि धामहिं आये । हर्षि यशोमति कण्ठ लगाये ॥  
कहत ग्वाल सुनु यशुमति मैया । है तेरो रणवीर कन्हैया ॥

१ बगला । २ तोता । ३ पंक्ति । ४ मुख ।



वत्स रूप एक दानव वनमें । आय समान्यो बछरागनमें ॥  
 हम ताको कछु जानि न पायो । सो वह हरिको मारन धायो ॥  
 क्षणहीं माहिं ताहि हरि मान्यो । हम देखत महिषटकि पठान्यो ॥  
 यह कोउ बड़ो पूत तै जायो । भाग्य हमारे ब्रजमें आयो ॥

दोहा—सुनि ग्वालनके वचन ते, वत्सासुरको घात ॥

यशुमति सबके पांय परि, बार बार पछितात ॥

सो०—भयो महरि उर त्रास, बचे आज हरि असुरते ॥

मैं न बिगान्यो कास, भयो सहायक आनि हरि ॥

यशुदा शोच करत तू जाये । यह तो ख्याल कान्हके भाये ॥  
 पर्वत तुल्य विकट तनु जाही । कियो प्राण बिन क्षणमें ताही ॥  
 तुम्हरी रक्षाको यह नाही । हम सबको रक्षक यह आही ॥  
 याके चरणकमल चित लैये । बारबार याकी बलि जैये ॥  
 ग्वालन यों हरिके गुण गाने । ब्रजजन सब आश्चर्य भुलाने ॥  
 लीलासागर हरि सुखदानी । मोहे सब नरनारि सुवानी ॥  
 हँसि जननी सों कहत कन्हाई । देख्यो मैं वृन्दावन जाई ॥  
 अति रमणीक भूमि द्रुम नीके । कुंज सवन निरखत सुख जीके ॥  
 अति कोमल तृण हरित मुहाये । यशुनाके तट बच्छ चराये ॥  
 वनफल मधुर मिष्ट अति नीके । भूख मिटी खाये तिनहींके ॥  
 सखन सङ्ग खेलत वटछाहीं । वनमें मोहिं लगत डर नाही ॥  
 रोहिणि सहित यशोदा माता । सुदित सुनत हरिकी मृदु वाता ॥

दोहा—मोहिं लियो मन जननिको, मधुरे वचन सुनाय ॥

वत्सासुरको शोच उर, क्षणमें दियो मिटाय ॥

सो०—लगे दुहन सब गाय, जहँ तहँ हर्षित गोप गण ॥

गये तहां हरि धाय, गाय दुहन चाहत सिखन ॥

अथ धेनुदुहन लीला ॥

धेनु दुहत हरि देखत ग्वालन । कहत मोहिं सिखवो गोपालन ॥

१ यशोदा ।



मैं दुहिहों मोहिं देहु सिखाई । बैठि गये तिन सङ्ग कन्हाई ॥  
 कैसे गया थनहिं लगावत । कैसे नौर्य पगन अटकावत ॥  
 घुटहन गहत दोहनी कैसे । मोहिं बताय देउ तुम तैसे ॥  
 कैसे धार दूधकी होई । देहु दिखाय मोहिं सब कोई ॥  
 कहत ग्वाल तुम सुनौ कन्हाई । भई अबार आज अति भाई ॥  
 तुमको सिखवैं दुहन सवारे । अबकहुँ लगिहै चोट तुम्हारे ॥  
 श्याम कह्यो सबही समझाई । भोर दुहौं निजनन्द दुहाई ॥  
 मेरी सों मोहि लीजो ढेरी । मैं दुहिहों निज गाय सवेरी ॥  
 दुष्टलन सन्तन सुखदाई । ठाढे गैयन माझ कन्हाई ॥  
 आवहु कान्ह सांझकी विरिया । कहत जननि यह बडो कुबिरिया ॥  
 लरिकाई कछु छाँड़त नाही । सोवहु लाल आय घर माहीं ॥

दोहा-आये हरि यहसुनतही, जननि लिये अँकवार ॥  
 लै पौढ़ाये सेजपर, अजिरं चांदनी चार ॥  
 सो०-कहत कहत कछु बात, सोय गये वश नौंदके ॥  
 कहत यशोमति मात, सोय गयो हरि अजिरहीं ॥

दौड जननी हरुवै के हरिको । सेज सहित लीन्हें भीतरको ॥  
 बहुत आज हरि सोय गयो है । अतिहि नौंदके वशहि भयोहै ॥  
 नेक न बैठत थिर घर माहीं । खेलनमें मन रहत सदाहीं ॥  
 रोहिणि कहत देउ किन सोवन । खेलत हारि गयो मनमोहन ॥  
 माता हरुवै पवन दुरावति । निरखि वदन सुंदर सुखपावति ॥  
 प्रात जगावत नंदकीरानी । उठहु श्याम सुन्दर सुखदानी ॥  
 नाहिनइतो सोइयत लाला । सुनु सुत प्रात समय शुचि काला ॥  
 उग्योतरणि कुसुदिनि सङ्गचानी । घरघरगवालिनि मथतमथानी ॥  
 बारबार ढेरत सब ग्वाला । सांझकह्यो तुम दुहन गोपाला ॥  
 होत अबार गाय सब ठाहीं । भरि भरि क्षीर भारथनबाहीं ॥

१ दूहतीवारजो रस्सी बांधतेहैं । २ आंगन । ३ गिरते ४ पवित्र । ५ सूर्य ।



वत्सपुकारत आरत ताई । दुहत नाहिं तुम सोंह दिवाई ॥  
तुम्हरे लिये ग्वाल सब ठाढ़े । देखत वाट प्रेम उर बाढ़े ॥

दोहा—यह सुनतहि तुरतहि उठे, शशि मुखते पटटार ॥

धेनु दुहन सीखन चले, मोहन नन्दकुमार ॥

सो०—लाउ रोहिणी मात, वेगि तनकसी दोहनी ॥

कह्यो सिखावन तात, आज मोहिं गैया दुहन ॥

रोहिणि तुरत दोहनी लाई । घर घरते देखन सब आई ॥  
अटपट आसन बैठि कन्हारि । गोथन कर लीन्हो सुखदाई ॥  
धार अनतहीं जात निहारी । हँसै नन्द यशुमति महतारी ॥  
चितै चोर चित हरि हँसि दीन्हो । ब्रजवासी जन बलि बलि कीन्हो ॥  
किये यशोमति आनंद भारी । दियो दान विप्रनहि हँकारी ॥  
गावत मङ्गल ब्रजकी नारी । दुही गाय सन्तन हितकारी ॥  
अति आनंद मगन नँदराई । बैठे प्रसुदित गोप अथाई ॥  
लिये गोप सुन्दर वनश्यामहि । ब्रजके जीवन जन सुख धामहि ॥  
आयो तहाँ एक वनजारी । भृंगा मोती वेचन हारो ॥  
तिहि लखि अटके नंदकुमारा । देहि देहि कहि बारम्बारा ॥  
दीरघ मोल कह्यो व्यापारी । रहे उगे सब गोप निहारी ॥  
करपर राखि रहे हरि मोती । देत नहीं लखि सुन्दर जोती ॥  
अथ मोतीबानेकी लीला ॥

दोहा—सुक्कालै हरि घर गये, वये अजिरँ बलबीर ॥

आलँ वाल थल रोपिकै, पुनि पुनि सींचत नीरँ ॥

सो०—हँसत यशोमति मात, कहत करत मोहन कहा ॥

यह नहिं जानत बात, ये करता सब जगतके ॥

भये तुरत शाखाँ दल तामें । यशुमति अजिर मुक्त फल जायें ॥  
फूलत फलत न लागी वारा । ब्रह्मादिक नित करत विचारा ॥

१ गौकेयन । २ देखि । ३ बडो । ४ आंगन । ५ थामरो । ६ जल ।  
७ डाली । ८ मोतीरूपफल ।



Vinay Avasthi Sahib Bhuvan Varri Trust Donations

सुर नर सुनि कोउ मर्म न जानै । देखि देखि अति अचरज मानै ॥  
नन्द भवन हरि मुक्त जमाये । ब्रजवनितन गुहिहार बनाये ॥  
ब्रजवासी यह प्रभुकी लीला । सब गुण समर्थ सबगुणशीला ॥  
क्षणमहँ जासु रजायसुमाया । प्रकट करत ब्रह्मांड निकाया ॥  
ब्रह्मादिक जेहि पार न पावैं । नन्दअजिर सो ख्याल बनावैं ॥  
जाकी महिमा लखै न कोई । निर्गुण सगुण धरे वसुसोई ॥  
लोकरचै नाशै प्रतिपावैं । सो ग्वालन सँग लीला धारै ॥  
शिव विरंचि सुनि ध्यान न आवैं । ताहि यशोमति गोद खिलावैं ॥  
अगम अगोचर लीला धारी । सो वृंदावन कुंजविहारी ॥  
बड़े भाग्य सब ब्रजके वासी । जिनके सँग विहरत अविनासी ॥

दोहा—धनि धनि ब्रजके नारि नर, धनि यशुदा धनिनन्द ॥

विहरत जिनके सदनमें, ब्रह्म सच्चिदानन्द ॥

सो०—कहि कहि देवसिंहाय, धन्य धन्य ब्रज बाग बन ॥

जहाँ चरावत गाय, सकल सुरन शिर मुकुटमणि ॥

अथ बकासुरवधलीला ॥

प्रात चले उठि गाय चरावन । हलधर सुंदर श्याम सुहावन ॥  
देखत छबि ब्रज सुन्दरि ठाढ़ी । करत परस्पर आनंद बाढ़ी ॥  
देखु सखी ब्रज ते बन जाहीं । बल मोहन ग्वालनके माहीं ॥  
रोहिणिसुत छबि गौर सुहाई । यशुमति सुवन श्याम सुख दाई ॥  
ओठे नील पीतपट सोहैं । सो छबि निरखि वदन मन मोहैं ॥  
युगल जलैद घन दामिनि जानौ । जो रतिनाथ परस्पर मानौ ॥  
शीश मुकुट कलै कुंडल कानन । झलकैं बिम्बकपोलन आनन ॥  
सखन मध्य सोहत नैदलाला । मंद हँसनि दृग कमल विशाला ॥  
कैटि किकिणि कर लकुट सुहाये । जात चले बन मनहि चुराये ॥  
रहीं धकित लखि सब ब्रजनारी । गये वनहिं विहरत वनवारी ॥  
वन वन फिरत चरावत गैया । हलधर श्याम सखाइकठैया ॥

१ घरमें । २ वादर । ३ सुंदर । ४ करिहाउँ ।



करत विहार विविध वनमाहीं । बाल केलि रस वरणि न जाहीं ॥

दोहा-कबहुँ गावत सखन सँग, कबहुँ बजावत बेनु ॥

धौरी धूमरि नामलै, कबहुँ बुलावत धेनु ॥

सौ०-+कबहुँ नचावत मोर, सुन्दर श्यामलजलदजन ॥

गरज मुरलि घन घोर, वरषत परमानंदतन ॥

खेलत विविध खेल मनभावन । श्रीकृन्दावन परम सुहावन ॥

वृषित जानि नैयन नंदलाला । कछो चलहु जल देन गुपाला ॥

लेहु बुलाय सुरभिगण टेरी । सुनत ग्वाल सब लाये घेरी ॥

गोधनवृंद हांकिं सब लीन्हो । ग्वालन गमन यमुनतट कीन्हो ॥

तहां बकासुर ललकारि आयो । माया रचित स्वरूप बनायो ॥

एक चोंच भूतल महुँ लाई । एकरही आकाश समाई ॥

जगमें बैठ्यो वदन पसारी । ग्वालन देखि भयो भय भारी ॥

बालक जातहत जे आगे । ताहि देखि सो पाछे भागे ॥

कहत भये सब हरिसों आई । आगे एक बलाय कन्हाई ॥

आवत नितहि ग्वाल इहिठाहीं । ऐसो कबहुँ लेख्यो हम नाहीं ॥

तबहि कृष्ण ताको पहिचान्यो । यह बकासुर मैं यह जान्यो ॥

पलमें आज याहि मैं मारौं । असुर चोंच धरि वदन बिदारौं ॥

दोहा-निडर श्याम आगे भये, चले बकासुर पास ॥

कहत सखा सब श्याम सों, नहिं जीवनकी आस ॥

सौ०-अबहुँ नहीं डरात, बचे किते उतपातते ॥

चले कहां हरि जात, हम बरजत मानत नहीं ॥

तबहरि कछो चलहु तेहि पास । सब मिलि मारि करहि बकनाश ॥

जब हरि संग चले सब ग्वाला । देख्यो जाय बकहि विकराला ॥

ताके निकट गये सब जवहीं । लियो लीलि हरिको बक तबहीं ॥

जान्यो असुर काज में कीन्हो । तबहीं वदन मूढ़ि कै लीन्हो ॥

+ या सोरठमें वादरकी और कृष्णकी समानता दिखाई है । १ पृथ्वी ।

२ रस्ता । ३ देख्यो । ४ निगल गयो ।



ग्वाल पुकारत आरत भागे । बलसों आय कहन सब लागे ॥  
 हम बरजत हठि गये कन्हई । लीन्हे लीलि असुर बकधाई ॥  
 हरि चरित्र कछु जानि न जाहीं । उपजी आगि असुर तनुमाहीं ॥  
 लाग्यो जरन भयो अति व्याकुल । हरिको उगिलादियो अतिआकुल ॥  
 बहुरों पकरनको मुख बायो । चोंच पकरि हरि चीरि बहायो ॥  
 भरत चिकार असुर अति भारी । व्याकुल भये ग्वाल भय भारी ॥  
 ग्वालन विकल देखि बलरामा । कहत असुर मान्यो वनश्यामा ॥  
 देरि उठे उत ऊँवर कन्हई । आवहु सखा वृन्द सब धाई ॥  
 दोहा—बक विदारि हरि सखनको, देरत आवहु धाय ॥

चोंच फारि मारेउँ असुर, तुमहूँ करौ सहाय ॥  
 सो०—गये सखा सब धाय, सुनत श्यामके वचन वर ॥

निरखि नयन सुख पाय, पुनि पुनि भेंटत पुलकतनु ॥  
 कहत परस्पर सखा सयाने । ये कोउ ब्रज प्रगटे हम जाने ॥  
 इन्हें नाहिं कोउ घात करैया । ये हैं असुरतेके दलवैया ॥  
 जब ते इन्हें यशोमति जाये । तबते असुर कितेकउ आये ॥  
 तृणा पूतना शकटा मारे । तब वे रहे बहुत ही बारे ॥  
 हम देखत वत्सासुर मान्यो । कितक बात यह बका विदायो ॥  
 इनके गुण कछु जानि न जाहीं । हम अपने जिय डरे वृथाहीं ॥  
 धनि यशुमति जिन इनको जाये । धनि हम इनके सखा कहाये ॥  
 बकहि मारि सुन्दर वनश्यामा । यमुना तट आये सुखधामा ॥  
 सुरभीगण सब नीर पियाये । सखन समेत आप प्रभु आये ॥  
 वसि वन धातु चित्र तन कीन्हो । मोरमुकुट माथे धरि लीन्हो ॥  
 वनमाला रचि सखन बनाई । प्रेम सहित हरिको पहिराई ॥  
 वनफल मधुर गोष लै आये । सखन सहित हरि भोग लगाये ॥

दोहा—बल मोहन बरको चले, जानि साँझकी बेर ॥  
 लीनी गैयाँ धेरि सब, सुरली की ध्वनि टेर ॥

१ दैत्यनके मारवेवारे । २ सब गौ समूह ।



सो०-चले बजावत बेन, गवाल वृन्दके मध्य हरि ॥

अँग अँग छबिको ऐन, ब्रज जन मोहन साँवरो ॥

सुनि मुरली की ढेर रसाला । देखनको धाई ब्रजवाला ॥  
कहत परस्पर अति सुख पावत । देखु सखी बनते हरि आवत ॥  
नाना रंग सुभनकी माला । श्यामहिये छवि देत विशाला ॥  
मोरपक्ष शिर मुकुट विराजै । मधुर मधुर मुख मुरली बाजै ॥  
भुकुटी बिकट निकट सुखदाई । तिलक रेख छवि बरणि न जाई ॥  
कुण्डल लोल अलक घुंघरारी । निरखु सखी लागत अति प्यारी ॥  
नालानिकट अर्धर अरुणाई । जनु शुक बिम्बहि चोंच चलाई ॥  
मन्द हँसनि वन दामिनि जैसे । दुरि दुरि प्रगट होतहैं तैसे ॥  
तनु धनश्याम कमल दल नैना । बोलत मधुर मनोहर बैना ॥  
सुख अरविन्द मन्द सुर गावत । नटवर रूप सखन मनभावत ॥  
सब अँग चन्दन खौरि बनाये । गुंजमाल मन लेत चुराये ॥  
या मोहन छवि पर बलि जैये । नन्द नँदन देखत सुखपैये ॥

दोहा-गवाल बाल गोधन लिये, हरि हलधर दोउ भाय ॥

साँझ समय वनते चले, आये धेनु चराय ॥

सो०-राँभति धाई गाय, वत्स सुरति कर पयँ स्रवत ॥

हर्षि यशोदा माय, कहति श्याम आवत घरहि ॥

इतनी कहत श्याम घर आये । जननी दौरि हर्षि उरलाये ॥  
ब्रज लरिका सब तुरतहि धाये । महरि महर पद शीशनवाये ॥  
ऐसोपूत धन्य तुम जायो । इनको गुण कछु जात न गायो ॥  
आज गये वनगाय चरावन । चले यमुनतट जलहि पियावन ॥  
तहां असुर इक खँग तनुधारी । रह्यो यमुनतट वदन पसारि ॥  
एक चोंच महि सों लपटाई । एक रह्यो आकाश लगाई ॥  
हम बरजत पहिले हरिधायो । ताके मुख में जाय समायो ॥

१ फलनकी । २ होठनकीललोही । ३ यहां ब्रजवासी दास उपमा देयहैं कि जैसे तोता लालकदूरीके फलपर चोंच चलावे ऐसे श्रीकृष्णकी नासिका होठनके ऊपर शोभादेयहैं । ४ कमल । ५ दूध । ६ बगलाको रूप ।



हम सब डरपि भजे बल पासा । अति व्याकुल तनु भयो निरासा ॥  
कैसे धौं हरि बाहर आयो । चोंच फारि तेहि मारि गिरायो ॥  
सुनत नन्द यशुमति प्रजनारी । चकित चितरहे हरिहि निहारी ॥  
यशुदा कहति कहा कोउ जानै । नित प्रति होत आनकी आनै ॥  
भयो आज कोउ सुकृत सहाई । विधिकी गति कछु जानि न जाई ॥

दोहा-जन्म भयो है श्यामको, तबते यहै उपाधि ॥  
कह्या सन्यो हमरे यतन, विधि गति अगम अगाधि  
सो०-किन धौं करी सहाय, को जानै भावी प्रबल ॥  
को मेरे पछिताय, करी अघानी बूझविन ॥

लै बलाय छतियाँ हरि लाये । प्रेम सलिल लोचन भरि आये ॥  
मैं बलि जाउँ कहत कछु खाहू । तुम कित गाय चरावन जाहू ॥  
मन्द महर साँ पिता तुम्हारे । मोसी मात जाय बलिहारे ॥  
खिलत खात रहौ अपने घर । दधि माखन पकवान विविधवर ॥  
निरखि वदन सुनि वचन तुम्हारे । लोचन श्रवण सिरात हमारे ॥  
दुष्टदलन भक्तन सुखदानी । बोले मधुर मातुसाँ बानी ॥  
भैया मैं न चरैहाँ गया । अब वन मेरी जात बलैया ॥  
मोसाँ सबै ग्वाल वन जाई । गाय घिरावत हैं बरिआई ॥  
दौरत मेरे पाँय पिराहीं । जब मैं बैठि रहों तरुछाहीं ॥  
जो न पत्याय बूझ बल भाई । देहि आपनी साँह दिवाई ॥  
यह सुनतहि यशुमति रिसियानी । गारि देत ग्वालन दुखमानी ॥  
मैं पठवत लरिकहि वन जाई । आवहि तनिक मनहि बहलाई ॥

दोहा-जानहि कहा चरायकै, अवहीं मोहन गाय ॥  
अति वारो मेरो सुवन, भारत ताहि रिगाँय ॥  
सो०-हरि जनके सुखदाय, को जानै हरिके चरित ॥  
मधुरे वचन सुनाय, मोहि लियो मन मातको ॥

१ प्रेमके अश्रुमात । २ मेरोपुत्र । ३ डुलाय ।



अथ चकई भवैराखेलनलीला ॥

कछुक खाय हरि निशिको सोये । प्रातजगाय जननि मुखधोये ॥  
 कियो कलेऊ कछु सुखदाई । जननी सां बोले हर्षाई ॥  
 दे मैया भवैरा चक डोरी । खेलत रहिहौं ब्रजकी खोरी ॥  
 हर्षि जननि आरे पर भाखे । तुमहितनये मोल लै राखे ॥  
 लै आये हरि तुरत निकारी । भये मगन अति रङ्ग निहारी ॥  
 बार बार हर्षित मुख भाखै । मैया विन अरुको लै राखै ॥  
 विहँसि चले फेरत चक डोरी । खेलन सखन संग ब्रज खोरी ॥  
 जैसे आप सखा सब तैसे । सुन्दर कोटि मनोभव जैसे ॥  
 निराखि २ छवि गोप किशोरी । बार बार डारत तृण तोरी ॥  
 सबहिनको मन मोहन भावैं । सब ब्रजतिय हरिसां मनलावैं ॥  
 यह वासना करैं ब्रजबाला । होहिं हमारे पति नैदलाला ॥  
 हरि अन्तर्द्वामी सब जानैं । सबके मनकी रुचि पहिचानैं ॥

दोहा-चित है जो हरिको भजै, कोऊ कौनहु भाव ॥

ताको तैसेई सदा, प्रकटत त्रिभुवन राव ॥

श्लो०-भक्तनके सुखदान, भक्त बछल भगवान हरि ॥

नारि पुरुष नहिं मान, प्रेम भावके वश सदा ॥

गोपिनके यह ध्यान सदाई । नेक न अन्तर होहिं कन्हाई ॥  
 हरि उनके मनकी रुचि जानी । करहिं बात उनके मनमानी ॥  
 मारग चलत तिन्हें हटि रोके । खेलत माँझ जहाँ तहँ ठोके ॥  
 चकई भवैरा डोरि फिरावैं । तिनके भूषण सां अरु झावैं ॥  
 काहू सां हरि वदन सकोरैं । काहू सां दग वदन मरोरैं ॥  
 काहू सां अँखियां मटकावैं । आप हँसैं अरु उन्हें हँसावैं ॥  
 युवतिनके मन बसैं कन्हाई । देखे विन इक पल न सुहाई ॥  
 हरिको खेलत माँझ खिझावैं । खट कौरी है गारी गावैं ॥  
 गेद उरोजन माहिं दुरावैं । इहि विधि हरिसां अंग छुआवैं ॥

१ रात्रि । २ स्तन ।



कंचुकि फारि आपुही लेहीं । यशुदहि जाय उरहनो देहीं ॥  
अन्तर भुज गहि हरिहि दुरावैं । कहैं चलो नँदरानि बुलावैं ॥  
यशुमति पै तुमको लै जैहैं । कुँटिल भौंह किय हम न डरैहैं ॥

दोहा-यों ब्रज बनितन नेहवश, आनँद छवि घनरास ॥

रसिक पुरंदर साँवरो, ब्रजमें करत विलास ॥

सो०-अब वरणों सुखखानि, हरि वृषभानु कुमारिको ॥

प्राण एकही जानि, प्रथम मिलन दोउ देहको ॥

अथ राधाजूके प्रथममिलनकी लीला ॥

खेलन हरि निकसे ब्रजखोरी । मेवश्याम तनु पीठ पिछोरी ॥  
श्रवणनकुण्डलकी छवि छाजै । मोर पँखनको चुकुट विराजै ॥  
दर्शन दमक दामिनि द्युतिधोरी । हाथ लिये फेरैं चकडोरी ॥  
गये यमुनके तट मनमोहन । नाहीं तहां सखा कोउ गोहँन ॥  
औचक दृष्टि परी तहँ राधा । प्रेम राशि गुण रूप अगाधा ॥  
नयन विशाल भाल दिय रोरी । नील वसन तनुकी छवि गोरी ॥  
वेनी पीठ करत झक झोरी । अति छवि पुंज दिननिकी थोरी ॥  
संग लरिकिनी आवत देखी । चितै रहे मुख शोक निमेषी ॥  
रीझि रहे धनश्याम कन्हाई । अनुपम छवि लखि रहे लुभाई ॥  
नयन वयन मिलि परी ठगोरी । बृझत श्याम कौन तैं गोरी ॥  
रहत कहाँ काकीहै बेटी । अबलौं नहीं कहूँ ब्रजभेटी ॥  
काहेको हम ब्रजतन आवैं । खेलत रहत आपने गावैं ॥

दोहा-सुनत रहत श्रवणन सदा, नँदढोटा ब्रज माहिं ॥

घर घरते नित चोरिकै, माखन दधिलै खाहिं ॥

सो०-विहँसि कह्यो धनश्याम, तुम्हरो कहा चुरायहैं ॥

आवहु किन ब्रज धाम, नितहि खेलिये संग मिलि ॥

रसिक शिरोमणि नागर दोऊ । प्रीति पुरातन जान न कोऊ ॥  
ब्रजवासी प्रभु कुंजविहारी । बातन भुरै लई हरिप्यारी ॥

१ अँगिया । २ टेढी । ३ दांत । ४ विजुरीकी चमक । ५ संग । ६ मोहिलीनी ।



प्रथम सनेह दुहुँत मन जान्यो । गुप्त प्रेम शिशुता प्रकटान्यो ॥  
 कहत श्याम मन कत सकुचावहु । खेलन कवहुँ हमारे आवहु ॥  
 दूर नहीं कछु सदन हमारे । श्रवणन सुनियत बोल पुकारो ॥  
 लीजो मोहिं टेरि नंदपोरी । कान्ह नाम भरो सुनु गोरी ॥  
 सूधी बहुत देखियत तुमहुँ । ताते साथ कीजियत हमहुँ ॥  
 तुम्हें बवा वृषभालु दुहाई । घरी पहर खेलहु इतआई ॥  
 गैयां गिनन नंद जब जैहैं । तिनके संग हमहुँ उतऐहैं ॥  
 जो तुम गाय दुहावन ऐहौ । खरक मौझ तौ भोको पैहौ ॥  
 रसिक शिरोमणि जान न राई । इमि प्यारी संकेत बुलाई ॥  
 सुनत गूढ हरिकी मृदुवानी । मनहीं मन प्यारी मुसुकानी ॥

दोहा—गुप्त प्रीति प्रकटी नहीं, दोउअन हृदय छिपाय ॥

मनमोहन प्यारी चली, घरको नयन चलाय ॥

सो०—चली सदन सुकुमारि, मनमें उरझो साँवरो ॥

जानी बड़ी अवारि, मात त्रास उर आनिकै ॥

कहत सखिन सों चली कुँवरिवर । को जैहै खेलन इनके घर ॥  
 चलो वेग अपने घर जाहीं । भई अवार वसुनतट माहीं ॥  
 वचन कहत ऊपर मुख माहीं । हृदय प्रेम दुख मन हरिपाहीं ॥  
 गई भवन वृषभालु कुमारी । जैननी कहति कहां हुतिप्यारी ॥  
 अबलों कहां अवार लगाई । गैया खरक देख मैं आई ॥  
 ऐसे कहि मातहिं बहराई । अन्तर्गत वस रहे कन्हाई ॥  
 विरह विकल तनु गूढ न सुहाई । सुंदर श्याम मोहनी लाई ॥  
 खान पान कछु नेक न भावै । चंचल चित पुलकितनु आवै ॥  
 मात पिताको मानत त्रासो । नयनन हरि दर्शनकी आसा ॥  
 कहत दोहनी दै मोहिं मैया । जैहौं खरक दुहावन गैया ॥  
 अहिर दुहत तब गाय हमारी । जब अपनी दुहि लेत सवारी ॥  
 घरी एक मोहिं लागि तहँ जाई । तूमति आउ खरक अतुराई ॥

१ घर । २ सैनचलाय । ३ कीरति । ४ दर ।



Vinay Avasthi Sahib Bhuyan Vani Trust Donations

दोहा-लई मात साँ दोहनी, चली दुहावन गाय ॥

मन अटक्यो नँदलालसों, गई खरक समुहाय ॥

सो०-भगं भग सोचत जाय, कब देखों वह साँवरो ॥

जिन मन लियो चुराय, खरक मिलन मोसों कह्यो ॥

देखे जाय तहां हरि नाही । भई चकित प्यारी मन माहीं ॥

कबहूँ इत कबहूँ उत डोलै । प्रेम विकल कुछ मुख नहिं बोलै ॥

देखे नन्द सङ्ग हरि आवत । ललकि लगे लोचन सुख पावत ॥

देखी श्याम राधिका ठाढ़ी । लई बुलाय प्रीति अति बाढ़ी ॥

कह्यो महर लेखि खेलहु दोऊ । दूरि कहूँ मति जैयो कोऊ ॥

सुनि वृषभानुसुता इत आई । अपने साथ खेलाउ कन्हई ॥

हरि तन रहियो नेक निहारै । कोई कहूँ गाय जिनमारै ॥

नन्द बवाकी बात सुनो हरि । जाहु न मोहियते कतहूँटारि ॥

महर सौं पि हमको तुम दीन्हों । राधे हरिहवाँह गहि लीन्हों ॥

तुमको कहूँ जान नहिं दैहों । जोजैहौ तौ पकरि लै ऐहों ॥

मेरी बाँह छोड़दे राधा । कहत श्याम ऊपर मन साधा ॥

तुम्हरी बाँह न तजौ कन्हई । महर खीझिहैं हमको आई ॥

दोहा-परम नागरी राधिका, अति नागर ब्रजचन्द ॥

करत आपनी घात दोउ, बँधे प्रेमके फन्द ॥

सो०-समुझि पुरातन नेह, ब्रजविलास हित तनु धरे ॥

चलन चहत वन गेह, युगल विहारी कुंजके ॥

तबहिं श्याम घन घटा उठाई । गर्ज भेव महि चहुँ दिशि छाई ॥

पवन झकोर चली झकझोरी । चपला चपल चमक चहुँ ओरी ॥

हैगई भूमि सकल अँधियारी । तैसिय तरु तमाल युतिकारी ॥

डरे देखिके कुँवर कन्हई । कह्यो राधिका सों नँदराई ॥

कान्है संगलिये घरजारी । भई अकाश घटा अति भारी ॥

लिये बाँहगहि कुँवर कन्हई । चले युगल बन घर हरषाई ॥

नवल राधिका नवल विहारी । पुलक अंग मन आनँद भारी ॥

१ रास्तामें । २ देखिके । ३ बीजुरी । ४ श्यामतमालवृक्ष ।



नवलतेह नवरंग मन भायो । नवल कुंजवन शुभग सुहायो ॥  
नवल सुगन्ध नवल तरु फूले । गुंजत भ्रमर मत्तरस भूले ॥  
शुभग यमुन जल पवन झकोरै । उठत श्याम छवि कुंजहिंडोरै ॥  
वनज विपुल बहुरंग सुहावन । चारु विचित्र पुलिन अति पावन ॥  
गये युगल तहँ रसिक रसीले । नागर नवल प्रेम रसगीले ॥

दोहा-विहरत विविध विलास वन, युगल रूपकी रास ॥

गुणगावत मुनि वेद विधि, अहिपति पति कैलास

सो-अति रहस्य सुखदाय, वनविहार नंदलालको ॥

क्यों सुकहै कवि गाय, वेद भेद पावैं नहीं ॥

श्लोक गीतगोविन्द ॥

मेघैमैदुरभम्बर वनभुवः श्यामास्तमालद्रुमैर्नक्तम्भीरुरयं  
त्वमेवतदिमं राधेगृहं प्रापय ॥ इत्थंनन्दनिदेशतश्चलितयोः  
प्रत्यध्वकुंजद्रुमं राधाभाधवयोर्ययन्तियमुनाकूलरहःकलयः  
चले सदनं प्रभु कुंजविहारी । गृह पठई अंकर्म दै प्यारी ॥  
प्यारीकी सारी हरि लीन्ही । पीत पिछोरी प्यारिहि दीन्ही ॥  
बादर जहँ तहँ दिये उड़ाई । आये सदन श्याम सुखदाई ॥  
रही यशोमति हरिहि निहारी । ओढ़े देखि शीशपर सारी ॥  
मन धौ कहत कहां यह पाई । पीत पिछोरी कहाँ गँवाई ॥  
यशुमति तुरत आँखि पहिचानी । ब्रजयुवतिन भुरये यह जानी ॥  
पूछत हरिहि विहँसि नँदरानी । तरुणिनकी सिखई बुधि ठानी ॥  
पीत पिछोरी कितहिं बिसारी । यह तौ लाल तियनकी सारी ॥  
जानि लई जननी हरि जानी । तब इक बुद्धि तुरत उर आनी ॥  
मैं लैगाय गयो यमुनारी । तहँ बहु भरति हतीं पनिहारी ॥  
बिडरी गाय भर्जी सब नारी । बची वँसुरिया बहुत सवारी ॥  
हौलै भजो औरकी सारी । सो लै चादर गई हमारी ॥

१ कमल । २ शेष और श्रीमहादेवजी । ३ घर । ४ आलिंगनकरके ।



दोहा-पीत पिछौरी लैभजी, मैं पहिंचानत वाहि ॥

भैयारी मैं जायकै, वर लै आवत ताहि ॥

सो०-हरि मायाको जानि, पीताम्बर ताको कियो ॥

जननि देखायो आनि, कहतलै आयो ताहिसों ॥

राधा गई सदन ससुहाई । हाथ दोहनी दूध भराई ॥  
परम प्रीति हरि वसन दुरायो । जननी द्वारहिते गुहरायो ॥  
औरकी और कहत सुख बानी । जननी दौरि देखि भय मानी ॥  
कहत दीटि लागी कहूँ बारी । उर लगाय पछितात निहारी ॥  
वृझत नेह विकल महतारी । कहा भयो राधा तोहि प्यारी ॥  
अबहीं खरक गई तूनीके । आवत कौन व्यथा भई जीके ॥  
इक लरिकिनी संगही मेरे । कारेडसी आय तिहि नेरे ॥  
मूर्च्छि परी वह धरणि मझारी । मैं डरपी अपने जिय भारी ॥  
श्याम नरन इक ढोटा आयो । कहत सुनो वह नंदको जायो ॥  
कछु पड़िकै उनतुरतहि झारी । जानत नहीं कौनकी बारी ॥  
मेरे मन भरि त्रांस गयोरी । अब कछु नीको नेक भयोरी ॥  
अति प्रवीण वृषभानु डुलारी । यह कहि ससुझाई महतारी ॥

दोहा-सुनि जननी राधा वचन, उरसों लीन्ही लाय ॥

कहत ठरी करिवरबड़ी, बार बार पछिताय ॥

सो०-एक सुता द्वै तात, पायो देवन द्वारपरि ॥

भई आज कुशलात, बची सर्पेत लाडिली ॥

खीझी कछुक कुँवरि पै जननी । घर नहि रहत फिरत भई हरनी ॥  
कितनो कहत ताहि मैं हारी । दूरकहूँ वाहर जिनजारी ॥  
हैं लरिकिनी सबन घरमाहीं । तोसी निडर कहूँ कोउ नाहीं ॥  
कबहूँ खरिक कबहुँ बन जाई । कबहुँ फिरत यमुनतट धाई ॥  
चितै अकाश धरत पग धरनी । बात कहत लागत तोहि जरनी ॥  
सात वर्षकी भई कुमारी । बहुत महर वृषभानु डुलारी ॥



आज कुशल कुलदेवन कीन्ही । विधि बचाय विषधरते लीन्ही ॥  
 शीतल जल लै तुरत न्हावई । अङ्ग अँगोळ बसन पहिराई ॥  
 बारहि बार कहत कछु खारी । अब कहूँ खेलन दूरि न जारी ॥  
 यह सुनि हँसी मनहि मन प्यारी । हृदय ध्यानहरि कुंजविहारी ॥  
 कहत दूर अब कतहुँ न जैहों । गौम घरहि खेलत नित रहिहों ॥  
 जिनके गुणन विरंचि भुलाने । तिनके चरित कहा कोउ जाने ॥  
 दोहा—जनरञ्जन भञ्जन कलुष, राधा नन्दकुमार ॥

गुप्त प्रकट लीला करत, ब्रजमें युगल विहार ॥  
 सो०—देखि अनूपम बाल, मात पिता गुरु जन हरिहि ॥

असुर लखत बिकराल, नव किशोर चित चोर तिय  
 सर्व रूप सब वटके वासी । सब विधि करन सकल सुखरासी ॥  
 सर्व भाव सब फलके दायक । सर्वोपरि सब गुणके लायक ॥  
 सर्व आदि सब अन्तर्यामी । सबते परे सकलके स्वामी ॥  
 माया ब्रह्म कृष्ण अरु राधा । प्रेम प्रीति दोउ परम अगाधा ॥  
 छवि शृंगार मनहुँ इक जोरी । करत विहार श्याम अरु गोरी ॥  
 वसे श्याम श्यामा उरै माहीं । देखे बिन भावत क्षण नाहीं ॥  
 खेलन मिसु वृषभानु किशोरी । आई नन्द महरिकी पौरी ॥  
 ढेरत मधुर वचन सकुचाई । घर भीतर हैं कुँवर कन्हाई ॥  
 सुनत श्याम कोकिलसम वानी । अति आतुर राधा पहिचानी ॥  
 मातासों कछु कलह करत घरि । तुरतहि सो बिसराय दियोहरि ॥  
 तू पहिचानति इनको भैया । कहत बारही बार कन्हैया ॥  
 मैं यमुना तट काल्हि भुलान्यों । बाँहपकरि मोको इन आन्यों ॥  
 दोहा—तू सकुचति आवति इहां, मैं दै सोंह बुलाय ॥

अति नागर जननी हृदय, दियो प्रेम उपजाय ॥  
 सो०—भीतर लेहु बुलाय, कहत मात हरिसों निरखि ॥

१ सर्प । २ पाप । ३ दोनों । ४ अद्भुत । ५ मानो छवि और शृंगारहीकी  
 जोड़ी है । ६ हृदय ।



चले श्याम सुखदाय, लखि प्यारी आनंद भयो॥  
 नैन सैन लखि दोउ सुखपायो । विरह ताप दुख द्रव्य नशायो ॥  
 मनहीं मन आनंद अति भारी । भये मगन दोउ रूप निहारी ॥  
 कहत श्याम राधा किन आवै । तुमको यशुमति माय बुलावै ॥  
 बाँह पकरि लाये वनवारी । यशुमति बोलि निकट बैठारी ॥  
 देखि रूप मनमोह सिहानी । वृद्धत नन्द महरकी रानी ॥  
 ब्रजमें तोहि न कबहुँ निहारी । कौन गाँव है तेरो प्यारी ॥  
 को तेरो तात कौन महतारी । कहा नाम तेरो है प्यारी ॥  
 भूलि गयो है कालिह कन्हाई । भली करी तू कर गहि ल्याई ॥  
 धन्यकोखि जिन तोकहैं धारी । धन्य बरी तूजिहि अवतारी ॥  
 देखि रूप यशुदा अभिलाषी । सवितासों विनती करिभाषी ॥  
 नयन विशाल वदन शुभ छोटी । भली बनी है सुन्दर जोटी ॥  
 बार बार वृद्धत हरषाई । है तू कौन महरकी जाई ॥

दोहा-मैं बैठी वृषभानुकी, तुमको जानत माय ॥

बहुत बार मिलनो भयो, यमुनाके तट आय ॥

सो-अब मैं लीन्ही जान, वेतो कुलटाँ हैं बड़ी ॥

हैं लाँगर वृषभान, गारि देत हँसि नंदधरणि ॥

राधा बोलि उठी इत आई । करी कछु बाबा लँगराई ॥  
 ऐसो समर्थ कब उन पायो । हँसि यशुमति राधा उरलायो ॥  
 कहति महरि कीरति हम जोटी । अब कीजत है तेरी चोटी ॥  
 यशुमति राधा कुँवरि सँवारी । प्रेम सहित बारनि निरवारी ॥  
 बड़े बार कोमल अतिकारे । लै सुमनासुत ओंछ सँवारे ॥  
 आँग पारि वेनी रचि गूथी । मानहुँ सुन्दर छविकी यूथी ॥  
 गोरे वदन बिन्दु करि वन्दन । मानो इन्दु मध्य भुवनन्दन ॥  
 सारी नई सुरंग निकारी । यशुमति अपने हाथ सँवारी ॥  
 वदन पोंछि अश्वर सों दीन्हो । उर आनन्द निरखि छविकीन्हो ॥

१ जन्मलियो । २ छिनार । ३ नटखट । ४ फुल्ले ।



तिल चावरी बतासे मेवा । कुँवरि गोदभरि विनवति देवा ॥  
 कछो कान्हू सँग खेलहु जाई । यह सुनि कुँवरि मनहि हरषाई ॥  
 सुन्दर श्याम सुन्दरी राधा । खेलत दोउ छवि सिन्धु अगाधा ॥  
 छ०-छविसिंधु परमअगाध दोऊ नंद सदन विराजहीं ॥

लखि रूपकोटिकामरति घनदामिनीद्युति लाजहीं ॥  
 यशुमति विलोकाति चकित देखति रूप मन आनंदभरी ॥  
 सोइ भाँव देख्यो दुहुनके उर जोइ अभिलाषा करी ॥  
 दोहा-खेलत दोउ झगरनलगे, भरे परम अहलाद ॥  
 मानों वन अरु दामिनी, करत परस्पर वाद ॥

सो०-अमिय वचन रसमूल, अकथनीयछवि अभितगुण  
 रहीपशोमति भूल, युगल किशोर विहार लखि ॥

चली महारि सों कहि सुकुमारी । सदन आपने जानि अवारी ॥  
 यशुमति निरखि कछो हरषाई । खेल्यो करि हरि सँग नित आई ॥  
 बोलि उठे मोहन सुनराधा । तूकत सङ्गच करै जियवाधा ॥  
 मैं बोलत तू आवत नाहीं । जननी सों डरपति मनमाहीं ॥  
 तोको लखि मैया सुख पावै । देखि कितौ करि छोह बुलावै ॥  
 सुनि मोहनके वचन सयानी । चितै रही सुख मन मुसकानी ॥  
 बिहँसि चली वृषभालु दुलारी । हरि मरति उर टरत न टारी ॥  
 गई सदन वृझत महतारी । कहाहुतो अबलौरी प्यारी ॥  
 बेनी गूँथि माँग किन कीन्ही । बेंदी भाल लाल किन दीन्ही ॥  
 खेलत रही नंदके द्वारी । यशुमति बोलि निकट बैठारी ॥  
 वृझन नाम लगी पुनि मेरो । बाबाको पूछेउ अरु तेरो ॥  
 माहिं चितै पुनि सुतहि निहारी । कछु सवित्रासंगोदपसारी ॥

दोहा-मेरी शिर बेनी गुही, बेंदी लाल बनाय ॥  
 पहिराई निज हाथसों, सारी नई भँगाय ॥

सो०-तिल चावरि है गोद, विधना सों विनती करी ॥

१ स्त्रीपुरुषको भाँव । २ जैसे मेघ और बीजरीकी शोभाहोयहै । ३ सूर्यनारायणसों ।



उर करिकै अति मोद, तोहिं विहँसि गारी दई ॥  
 विहँसि कह्यो तोको नँदरानी । वह जैसी तैसी हमजानी ॥  
 तोहि नाम धरि धर्यो बवाको । कह्यो धूत वृषभानु, सदाको ॥  
 तबमें कह्यो ठग्यो कब तुमहीं । हँसिलपटानि लगी तब हमहीं ॥  
 सुनि कीरति राधाकी बातें । सरल स्वभाव भरी शिशुतातें ॥  
 कहत जवाब तैं नीको दीन्हो । बेटी दाँव आपनो लीन्हो ॥  
 जो कछु मोहिं कह्यो नँद वरणी । सो सबहै उनही की करणी ॥  
 हँसि हँसि कीरति कहत सुभाये । मनमें अति आनंद बढ़ाये ॥  
 फेरि फेरि यशुदाकी बातें । ब्रह्मति है जननी राधातैं ॥  
 सुनि सुनि वरसाने की नारी । गावत यशुमतिको हितयारी ॥  
 सुनि बातें कीरति सुखकानी । नँदरानीके जियकी जानी ॥  
 मेरी सुता विमल चपलासी । बेहारे मेव श्याम छविरासी ॥  
 बाढ्यो उर आनंद हुलासी । कीरति गई सखुझि पति पासी ॥  
 लुंद-सखुझि पतिके पास कीरति गई अति आनंदभरी ॥  
 प्रीति सीति जनाय हित सों बात सब परगट करी ॥  
 भयो अति उत्साह दंपति हर्षि मन आनंद भरे ॥  
 नित्य दूल्ह श्याम श्यामा वेद गुण गावत खरे ॥  
 दोहा-युगल किशोर स्वरूप वर, वृन्दावन रसखान ॥  
 नव दुलहिन दूल्ह सदा, राधा श्याम सुजान ॥  
 सो०-दूल्ह दुलहिन चार, मांडव वृन्दा विपिनके ॥  
 गावत नित्य विहार, शेष महेश गणेश विधि ॥  
 कहत यशोमति सों हरि प्यारे । जह तहँ रहत खिलौना डारे ॥  
 राधा जिन लै जाय चुराई । आवत सांझ सकार सदाई ॥  
 चितै रहति मुरलीकी बाहीं । मेरो प्राण बसत इहि माहीं ॥  
 तेरे भाये नेक न माता । राखु-उठाय मान भों बाता ॥  
 बलहूको पतियाय न राई । राखु खिलौना सबहि छिपाई ॥

१ ठग । २ बीजरीसी । ३ ब्रह्मा ।



कहत जननि हँसि लालन मेरे । कोलै जाय खेलौना तेरे ॥  
 नेक सुनत ताको जो पाऊं । बाको ब्रजते बास नश्राऊं ॥  
 बिन देखे तू काको कहिहै । सो कहु कैसेकै प्रगटैहै ॥  
 आवतही राधा लै जैहै । फिर तू पाछेत पछितैहै ॥  
 अजहूँ राखु उठाय सबारी । माँगिते पुनि देहै गारी ॥  
 जननी हरिकी बतियां भोरी । श्रवण सुनत रुचि होत न थोरी ॥  
 देव आपने सुतकी जानै ॥ बिरजाने क्योंहूँ नहि मानै ॥

दोहा—सैततिहै हरिके हरषि, महारि खिलौना जान ॥

भौरा चकई मुरलिका, गेंद बटा चौगान ॥

सो०—यशुमति सुखकी रास, नंद भवन भूषणपरम ॥

ब्रजमें करत विलास, ब्रजवासी जन जाहि बलि ॥

कहत श्यामसों यशुमति मैया । पियहु दूध कछु लेहुं बलैया ॥  
 आज सवार दुही मैं गैया । सोई दूध प्याव मोहि मैया ॥  
 और दूध रुचि मोहि न आवै । जो तू कोटि बतन कारि प्यावै ॥  
 जननी तबहिं सौंह करि ल्याई । यह धौरीको दूध कन्हाई ॥  
 तुमते और कौन मोहि प्यारो । औट धन्यो तुम्हरे हित न्यारो ॥  
 तातो जानि वदन नहि ल्यावै । फूँकि फूँकि जननी प्यप्यावै ॥  
 पय पीवत मोहन अलसाये । सुन्दरसेज जननि पौढाये ॥  
 प्रात जगावत नन्दकिरानी । उठहुलाडिले शारंगपानी ॥  
 भोर भयो जागहु मेरे प्यारे । ठाठे ग्वाल बाल सब द्वारे ॥  
 हरहुताप मुख कमल दिखाई । करौ कलेजु मिलि दोउ भाई ॥  
 सदमाखन दधि रैनजैमायो । माँगिलहु अरु जो मन भायो ॥  
 सखा वृन्द सब लेहु बुलाई । उठहुलाल जननी बलिजाई ॥

दोहा—तब हँसि चितये सेजते, उठे श्याम सुखदान ॥

यशुमति जल झारी लिये, सुख धोयो निजपान ॥

सो०—बोलि उठे बलराम, उठे सवारे आज हरि ॥

१ निकालदेउ । २ दूध । ३ रातिका जमाया ।



हर्षि मिले वनश्याम, दाऊजू कहि धातसों ॥

झारे सों सब सखन बुलायो । देखि वदन सबहिन सुख पायो ॥  
सखन सहित सुन्दर सुखदाई । कियो कलेऊ कछु दोउ भाई ॥  
गैयनलै वन चले गुवाला । संग चले मोहन नँदलाला ॥  
टेर सुनत बालक सब धाये । घर घरके वछरनलै आये ॥  
सखा कहत सब सुनहु कन्हैया । चलहु आज वृन्दावन भैया ॥  
यमुना तट सब वत्स चरैहैं । वंशीबट खेलत सुख पैहैं ॥  
भली कही हँसि कछो गोपाला । चले सकल वृन्दावन ग्वाला ॥  
कोउटेरत कोउ वेरलै आवैं । कोउ सुरभी गण जोर चलावैं ॥  
कोउ श्रृंगी कोउ वेणु बजावैं । कोउ परस्पर होरी गावैं ॥  
हेरीटेर सुनत मनमोहन । कहत मोहि सिखबहु निज गोहन ॥  
हरि ग्वालन सँग टेर उठाई । हँसे सकल पूरी नहि आई ॥  
कहत श्याम अबकै फिरि लीजो । अबके जाय तबै हँसि दीजो ॥

दोहा-गावत खेलत हँसत सब, सखा वृन्द गो साथ ॥

पहुँचे वृन्दावन सघन, वृन्दावनके नाथ ॥

सो०-फिरत चरावत धेन, दीनबंधु दुष्टनदलन ॥

कृष्ण कमल दल नैन, सबै अंग सुन्दर सुखद ॥

अथ अघासुरवध लीला ॥

तहाँ अघासुर वनमें आयो । कंस राज करि कोप पढायो ॥  
ताके एक बहिनहै भैया । मोर प्रथमहि कुँवर कन्हैया ॥  
एक पूतना जो ब्रज आई । बत्सासुर अरु बक दोउ भाई ॥  
तिनको बैर असुर उर धारी । कियो गर्व मनमें अति भारी ॥  
आज राजको कारज कीजै । और बैर भाइनको लीजै ॥  
गिरि समान अजगरतलु धारी । पन्यो असुर मगँ बदन पसारी ॥  
वन घन नदी रची सुख माहीं । मायाकृत पहिचानत नाहीं ॥  
वाही मग निकसे नँदलाला । गाय वच्छ लीन्हे सब ग्वाला ॥

१ सींग । २ अजगर-सर्प । ३ मार्गमें ।



हरि अंतर्गामी जिय जानी । कष्ट रूप यह लखि अभिमानी ॥  
 याको आज तुरत संहारों । असुर मारि भूभार उतारों ॥  
 ग्वालन आहि पर्वत करि जान्यो । तालु वदन गिरि कंदर मान्यो ॥  
 देखि सुहावन तृण हरियाई । गाय वत्स बैठे सब धाई ॥

दोहा-गाय वच्छ ग्वालन सहित, सब सुख गये समाय ॥

कहत परस्पर आज वन, सुरभी चरहि अघाय ॥

सो०-सब सुख गये समाय, असुर सकोरयो वदन तव ।

अंधकार गयो छाया, मानों वन घेरो निशा ॥

अति अकुलाय उठे तहँ ग्वाला । गाय वच्छ सब विकल विहाला ॥  
 कहत परे धों हम कहँ आई । त्राहि त्राहि घनश्याम कन्हआई ॥  
 सबके प्राण गये इहि बारा । तुमविन कौन उवारन हारा ॥  
 श्रवण सुनत प्रभु आरत वानी । भये दुखित चिन्ता उर आनी ॥  
 दीनबंधु भक्तन सुखदाई । पैठे आप अघा सुख आई ॥  
 अघा असुर उर अति हरपाई । लियो ओंठ सों ओंठ लगाई ॥  
 विद्याधर मुनिवर गंधर्वा । अति भय विकल मगन सुर सर्वा ॥  
 तबहि कृष्ण मन बुद्धि उपाई । अविगत गति भक्तन सुखदाई ॥  
 मुखते देह दुगुण विस्तारी । रूंधी श्वास भै बाल देवारी ॥  
 सक्यो नहीं तब असुर सम्हारी । कियो शब्द आघात पुकारी ॥  
 फूटि गये शिर दशन दुवारी । निकसी प्राण ज्योति उजियारी ॥  
 सोवह ज्योति स्वर्ग को धाई । बहुरि आय हरि मांझसमाई ॥

दोहा-वाही मग अब वदनते, निकसे गोकुलैराय ॥

कहत सखन आवहु निकसि, भैं करि लई सहाय ॥

सो०-अतिहिसकाने ग्वाल, गाय वच्छ व्याकुल सकल ॥

मिछ्यो तिमिर तिहि काल, जहँ तहँ हर्षे वचन सुनि ॥  
 वच्छ सहित बाहर सब आये । हरिको देखि परमसुख पाये ॥  
 हम अज्ञान वृथा भय भाई । श्याम हमारे साथ सहाई ॥

१ सर्प । २ दुःखितवाणी । ३ दैत्य । ४ कृष्ण ।



धन्य कान्हधनि धनि पितु माता । जिन जायो सुतको ब्रज बाता ॥  
गिरिसम असुर सर्प तनु धारी । ताहि हन्यो तुमहौ अरुरारी ॥  
कहत कान्ह तुम करी सहाई । तब मान्यो मैं असुर अन्याई ॥  
जो तुम मेरे संग न होते । तौ यह मान्यो जात न मोते ॥  
देखि अवासुर वध सुर ज्ञानी । वर्षि सुमन कहि जै जै बानी ॥  
विद्याधर किन्नर गन्धर्वा । अति आनंद गुण गावत सर्वा ॥  
अधा असुरकी करत बड़ाई । हरि भवि जाकी ज्योतिसमाई ॥  
करत अनेक यत्न मुनि ग्रामा । अंतकाल दुर्लभ हरिनामा ॥  
सौहरि अंतकाल जगपावन । बसे आप अव सुख दुख दावन ॥  
इहि सम और कौनके भागा । कहत देव सब अति अरुरागो ॥

दोहा—जै जै जै प्रभु जगत हित, जगत्राता जगदीश ॥

जाको मारनहूँ प्रगट, तारन विश्वा वीश ॥

सो०—हर्षि सुमन वरषाय, जय जय ध्वनि नभ करतसुर ।

गाय ग्वाल सुख पाय, अति आनंद निरखत हरिहि ।

तबहिं सखन सों विहँसि कृपाला । बोले करुणासिधु गोपाला ॥  
चलहु सकल वंशीवट छाहीं । आई हैहै छाक तहांहीं ॥  
भोजन करिये सब मिलिजाई । बलराहांकि लेहु अगुवाई ॥  
हर्षि चले तहँते बलवीरा । आये सब वंशीवट तीरा ॥  
वंशीवट अति सुभग सुहावन । और चहूँदिशि बहु द्रुम पावन ॥  
चरत वत्स सब वनके माहीं । बैठे आय श्याम वट छाहीं ॥  
आस पास गोपनके बालक । मध्य श्याम सुंदर जगपालक ॥  
भोर मुकुट कलकुण्डल कानन । कोटि काम छवि मोहन आनन ॥  
गेरुकादि चित्रित तनु श्यामा । पीतवसन वनमाल ललाईमा ॥  
बहु विशाल लकुटीकर लीन्हें । गुंजनके आभूषण कीन्हें ॥  
सखा वृन्द सब सुन्दर सोहैं । निरखत रूप मदन मन मोहैं ॥

१ फूल । २ प्रेम । ३ आकाश । ४ देवता । ५ वृक्ष । ६ सुन्दर । ७ बहुतसुघर ।



प्रेम भगन मन परम हुलासा । करत परस्पर हास विलासा ॥

दोहा-तहां छाक घर घरनतै, आई भरि भरि भार ॥

यशुमति पठये कान्हको, व्यंजन बहुत प्रकार ॥

सो०-छाकपठाई मात, हर्षि कहत हरि सखनसों ॥

दधिलवनी बहुभांत, सब मिलि भोजन कीजिये ॥

वन भोजन विधि करत कन्हई । छाक सबै इकठाँव रखाई ॥

जलते पुरइन पात मैगायो । दोना बहु पलाशके लायो ॥

कछु फल वृन्दावनके नीके । लिये मैगाय भावते जीके ॥

बैठे मंडल जोरि गोपाला । मध्य श्याम सुंदर नंदलाला ॥

भांति भांति व्यंजन रस पागे । परसि धरे सबहिनके आगे ॥

कछुकहधेरिन पर धरि लीन्हो । शाक खोलि अंगुरिन बिच कीन्हो ॥

मुरली मुकुट कांख तर लीने । भोजन करन लगे रस भीने ॥

मधु मंगल पर सैन्य सुदामा । सुबल सुखमना अरु श्रीदामा ॥

अपर अनेक गोप सुत लीने । जैवत सब मिलि श्याम प्रवीने ॥

लेत परस्पर कौर छुड़ाई । कबहुँ कितनको देत कन्हई ॥

कबहुँ काहू देन बुलावै । डहँकिताहि अपने मुख नावै ॥

मीठे खाटे स्वाद बखानै । हास विलास करत सुखसानै ॥

दोहा-देखत मुरगण सिद्ध मुनि, चढ़े विमान अकाश ॥

लखि कौतुक चकित सबै, गये कमल भव पास ॥

सो०-कह्यो ब्रह्मसों जाय, कहत जाहि वर ब्रह्म तुम ॥

सो ग्वालन सँग खाय, छोरि छोरि करत कवर ॥

अथ ब्रह्माके मोहकी लीला ॥

हरि माया मोहे सब प्राणी । कह ब्रह्मा कह सुर मुनि ज्ञानी ॥

मुनि विरंचि मुरगणकी वानी । भयो मोह उरमें यह आनी ॥

गोकुल जन्म कौन यह आयो । मैं कछु वाको भेव न पायो ॥

परचौलै देखौ प्रभुताई । बाल वत्स हरि ल्यावों जाई ॥



जो सर्वज्ञ ईश भगवाना । लेंहैं तुरत मँगाय सुजाना ॥  
 यह विचार विधि मन ठहरायो । नृत्यो तुरत वृन्दावन आयो ॥  
 देखि सरित वनमें अति पावन । पुहुप लता द्रुम परम सुहावन ॥  
 अति रमणीक कदम चहुँ पासा । वंशीवट मधि सुखद निवासा ॥  
 गोप मण्डली मण्डन मोहन । भोजन करत सखन सँग गोहन ॥  
 देखि विरंचि चकित भ्रम भारी । बछरा हरि लीन्हें वनझारी ॥  
 हरि अन्तर्यामी सब जानी । विधिके मनकी रुचि पहिचानी ॥  
 तब पठ्ये द्वै ग्वाल कन्हारै । लावहु वत्स धेरि सब जाई ॥  
 दोहा—ग्वाल सकल वन ढूँढिकै, फिरि आये हरि पाहिं ॥  
 कहत वत्सगे दूर कहूँ, खोज पाइयत नाहिं ॥

सो०—तब हँसि कह्यो कन्हाय, तुम सब यहँ बैठे रहौ ॥  
 मैयों देखौं जाय, चलें आप बहराय तब ॥

जबगे दूर वनहिं जनत्राता । तबहीं बालक हरे विधाता ॥  
 प्रभुलीलाकी गम कछु नाहीं । गर्वित गयो लोक निजपाहीं ॥  
 निजमाया सों करि मति भोरी । राखे बाल वत्स इक ठोरी ॥  
 गुणसागर नागर नैदनन्दन । वंशीवट आये जगवन्दन ॥  
 दीनबन्धु भक्तन हितकारी । यह अपने मन माझ विचारि ॥  
 बालवत्स जो ब्रज नहिं जैहैं । मात पिता इनके दुख पैहैं ॥  
 ताते रूप सबन को धारों । या विधि तिनको दुःख निवारों ॥  
 बाल वत्स विधि लै गये जेतें । भये श्याम तब आपुन तेतें ॥  
 वैसोइ रूप वैसगुणशीला । वैसिय बुद्धि पराक्रम लीला ॥  
 रङ्ग रेख जैसो जिहि माहीं । अंग चिह्न अंतर कछु नाहीं ॥  
 बोलन हँसन चलन चतुराई । हेरन डेरन फेरन राई ॥  
 भूषण वसन लकुट करजैसे । भये श्याम तब आपुन तैसे ॥

दोहा—मारन उद्धारन यदपि, हैं समर्थ भगवान ॥

तदपि जान निज दास विधि, करीतासुकी कान ॥



सो०-अपनो करि विधि जान, अनजानत ठीठो करी ॥  
ताते कीन्हे आन, मन भायो विधिको कियो ॥

कह्यो श्याम सब सखन बुलाई । लावहु घेरि वत्स सब जाई ॥  
ब्रजको चलहु सांझ नियराई । वर्षि चले बालक समुदाई ॥  
चहुंपास सब सखा सुहाये । मध्य श्याम बछरन अगुवाये ॥  
वेणु विशाल रसाल बजावत । अपने अपने रंग सब गावत ॥  
राँभति गाय क्षत्स हित लागीं । देखत ब्रज युवती अनुरागीं ॥  
मोर मुकुट कुंडल बनमाला । हँसन मनोहर नयन विशाला ॥  
xगोपदरज मुख पर लविछाई । मनहुँ चंद्रकन अभिय निकाई ॥  
ब्रज वनिता सब तन मन वारत । निरखि रूप भेंटत चित वारत ॥  
पहुँचे ब्रजहिं श्याम सुंदर वर । गये वत्स बालक निज निज वर ॥  
गोसुत ग्वाल बाल हर्षाई । लीन्हे तात मात उरलाई ॥  
परम प्रीति करि भोजन दीन्हों । कृष्णचरित काहु नहिं चीन्हों ॥  
यशुमति कहत सुतहि मिलि प्यारे । वनहिरात कत करत ललारे ॥

दोहा-मैं सबेर घरको चलयो, सखा करत सब रात ॥

देखि अगम वनमें डरयो, वे डरपावत जात ॥

सो०-बारबार पछिताय, लै बलाय यशुमति कहत ॥

ल्यावाहिं गाय चराय, काल्हि जायँ वेई सबै ॥

यह सुनिकै हँसि कहत कन्हाई । काल्हि चरावन जात बलाई ॥  
लागी भूख बहुत मोहिं हैरी । भोजनको तुरतहिं कछु दैरी ॥  
सुनत तुरत माखन लै आई । तब लौं खाहु जननि बलि जाई ॥  
है जल तप्त यामको प्यारे । तेल परसतनु न्हाहु ललारे ॥  
जाते वनको श्रम मिटि जाई । भोजन करहु बहुरि दोउ भाई ॥  
तब जननी गहि बाँह न्हावाये । जेवनको बलराम बुलाये ॥  
अति रुचि सों जेवत दोउ भाई । परम प्रीति परसतहैं माई ॥

१ नगीच आय पहुँची । x जेसैं चंद्रके उपर अमृतको बूंद हो याप्रकार  
कृष्णके मुखारविंद पर गोरज शोभा देयहै । २ तेललगायके ।



जेई उठे अचमन तब कीन्हों । वीरादुहुँन रोहिणी दीन्हों ॥  
जानि उनींदे सेज बिछाई । जननी पौढ़ाये दोउ भाई ॥  
श्याम राम सोवत दोउ भैया । सुख पावत निरखत दोउ भैया ॥  
अधम रह्यो विधि गर्व नवायो । ब्रजवासिन कलु भेद न पायो ॥  
बाल वत्स हरि नये उपाये । सब जानत वेईहें आये ॥  
दोहा-बाल वत्स नव कृत तिन्हें, ब्रजवनिता अरु धेन ॥

पूरवप्रीतिहुते अधिक, करत रहत उर चैन ॥

सो०-ब्रज मंगल भगवान, ब्रह्म सच्चिदानंद प्रभु ॥

भक्तनके सुखदान, लगे देन सुख घरन घर ॥

तब विरंचिके मन यह आई । ब्रजके लोगन देखों जाई ॥  
हैं करत विलाप कलापा । बिन बच्छन गैयन सन्तापा ॥  
आय विरंचि तुरत तहँ देख्यो । घरही घर सब कौतुक पेल्यो ॥  
जहँतहँ दहत गाय पशुपालक । खेलत निजनिज घर सब बालक  
देखि विरंचि चकित मनमाहीं । हैं यह ब्रज कैधों वह नाहीं ॥  
मैं विधना सब सृष्टि उपाई । यह रचना धौं किनहि बनाई ॥  
कैधौंहों यहि भ्रमहि भुलाना । हैं हरि अविनाशी नहि जाना ॥  
अन्तर्ग्यामी जानत सबहीं । बाल बच्छ धौं ल्याये तबहीं ॥  
अति संभ्रम विधिज्ञान भुलायो । गयो फेरि निजलोकाहि धायो ॥  
देखे वत्स बाल जहँ राखे । चकित बहुरि ब्रजको अभिलाखे ॥  
क्षण भूतल क्षण लोक सिधारे । बालवत्स दुहुँ ठौर निहारो ॥  
वर्ष दिवस इहि भांति बिताई । भयो थकित अति उर भ्रमछाई ॥  
दोहा-मोहविकल अति देखिकै, सुंदर श्याम सुजान ॥

प्रकट कियो जन जानि निज, विधिके उरमें ज्ञान ॥

सो०-हृदय भयो तब शुद्धि, ये पूरण अवतार प्रभु ॥

धिक धिक मेरी बुद्धि, बैर बढ़ायो कृष्णसों ॥

मैं मतिहीन भवै नहि जान्यो । मोहविवश प्रभुसों छल ठान्यो ॥

१ उत्पन्नकिये । २ ब्रह्मा । ३ भेद ।



यह अपराध बहुत मैं कीन्हो । निज अज्ञान न प्रभुको चीन्ह्यो ॥  
 भई गिलानि बहुत मन माहीं । सन्मुख होय सकत विधिनाहीं ॥  
 भयो शोच उरमाँझ विशेषा । प्रभु प्रभाव तब परगट देशा ॥  
 बालक वत्स सहित सब साजू । कृष्णरूप सब लख्यो समाजू ॥  
 शिव ब्रम्हादिक देव अनेका । देखे अधिक एकते एका ॥  
 चरण कमल वन्दन प्रभु करे । गावत गुण गन्धर्व वनेरे ॥  
 देखि चकित चित भर्म नशान्यो । पूरण ब्रह्म कृष्ण पहिचान्यो ॥  
 शरण शरण कहि अति अतुराई । परचो चरण कमलन परजाई ॥  
 अनजानत मैं करी ढिठाई । क्षमा करहु त्रिभुवनके राई ॥  
 मैं प्रभु तुम प्रताप नहि जान्यो । तुम्हरी माया माँझ भुलान्यो ॥  
 चूक परी मोते निज भोरे । नाथ न वनै तुम्हैं मुख मोरे ॥

दोहा-मैं अपराधी हीनमति, परचो मोहके जाल ॥  
 ममकृत दोष न मानिये, तुम प्रभु दीनदयाल ॥  
 सो०-कह जानों तुव भेव, मैं ब्रह्मा तुम्हरो कियो ॥  
 तुम देवनके देव, आदि सनातन अर्जित अंज ॥

जो जनते विगरै बिन जाने । सो अपराध न प्रभु कलुमाने ॥  
 जो शिशु अज्ञ दोष उरमाहीं । माता कबहुं मानत नाहीं ॥  
 तोष पोष ताको वह करई । बिकसत चित अंकलै भरई ॥  
 रेंदरलनादल जौरिस होई । कहौ कौन परकीजै सोई ॥  
 निजतनु व्याधि पीर जन पावै । यदपि यत्न करि नहीं बचावै ॥  
 तैसेही प्रभु मोको कीजै । क्षमि मम दोष शरण गहि लीजै ॥  
 तुम जाने बिन जीव सदाहीं । उत्पति परलय माँझ समाहीं ॥  
 तुम करि कृपा जनावहुजाको । सो जानै तुम्हरी प्रभुताको ॥  
 मैंविधि एक लोकको साई । जिमि कृमि गूलर माँझगोसाई ॥  
 तुम्हरे रोम रोम प्रति गाता । कोटि कोटि ब्रह्माण्ड विधाता ॥

१ जीतनेपै न आवे । २ अजन्मा । ३ बालक मूर्ख । ४ दांत जीभ । ५ गू-  
 लरके भुनगा ।



कोटि खद्योत प्रकाश कराहीं । रवि सम क्योंहूँ होहिं सुनाहीं ॥  
अब प्रभु बनै सँभारे तोहीं । राखिय चरण शरण निज मोहीं ॥  
दोहा-अतिही अगम अगाध हरि, अविगति गतिको जान ॥

तासु पार चाहौं लखो, मैं विधि अति अज्ञान ॥  
सौ०-करिय विरदकी लाज, ममकृत दोष न मानिये ॥

दीनबन्धु ब्रजराज, शरणागत पालन हरे ॥  
जब विधि कही दीन बहु बानी।शरण शरण कहि अति भयमानी ॥  
तब नहिं बाल बच्छ कछु देखे। एकै रूप कृष्ण विधि पेखे ॥  
कृपा करी तब श्रीब्रजनाथा । हस्तकमलपरस्थो विधिमाथा ॥  
अभय कियो विधि शोच मिटायो । चरणकमलते शीश उटायो ॥  
बार बार पदकमल निहोरी । स्तुति करत दुहूँ कर जोरी ॥  
जो जग धाम श्याम सुखराशी । ज्योति स्वरूप सबै उरवासी ॥  
गुणगण अगम निगम नहिं पावैं । ताहि यशोदा गोद खिलावैं ॥  
धरै जल अनल अनिलन भँछाया । पाँच तत्त्व मिलि जगत उपाया ॥  
काल डरै जाके भय भारी । सो ऊखल बांधे महतारी ॥  
जग करता पालन संहरता । विश्वम्भर सब जगके भरता ॥  
ते गैयन सँग ग्वालन माहीं । ब्रजमें हँसि हँसि जूठनिखाहीं ॥  
बड़े भाग्य ब्रजवासिन करे । तिनके प्रेम रहत तुम धरे ॥  
छं०-रहत जिनके प्रेम धरे, धन्य ब्रज वासी सबै ॥

ब्रह्म एक अनीह अविगति, वरन वर जिनके फवै ॥  
धन्य श्रीवसुदेव देवकि, पुत्र करि जिन पाइयो ॥  
धन्य यशुमति नन्द जिन, पय प्याय गोद खिलाइयो ॥  
धन्य ब्रजके गोप जिन सँग, धन्य गाय चरावहीं ॥  
चार मुख मैं कहा वरणों, सहस्र मुख नित गावहीं ॥  
धन्य बालक बच्छ तिनते, नाथ यह दरशन लियो ॥

१ पटवोजना ( सुनकेहरवा ) २ वेद । ३ पृथ्वी । ४ अग्नि । ५ पवन ।  
६ आकाश । ७ शेष ।



परसि चरण सरोज मस्तक, पाप तजि पावन भयो ॥  
 अब देहु ब्रजको वास सुहि, प्रभु आश यह मेरे हिये ॥  
 रेणु तृण हुमँ लता खँग मृग, होहि जो तुम्हरे किये ॥  
 यह नित्य ब्रजलीला तुम्हारी, तुम अनुग्रह ते लही ॥  
 महत श्रीवृन्दाविपिनको, आभित भित सकको कही ॥  
 लोक मोहि न सुहात अब प्रभु, आन विधि कोउ कीजिये  
 मोहि ग्वालनको करौ भृत, खाय जूठनि दीजिये ॥  
 बार बार मनाय युग पद, नाथ पद वर माँगहूँ ॥  
 द्वैरहौ वृन्दा विपिन रज, चरणपंकज लागहूँ ॥  
 दोहा-करि स्तुति गद्गद वचन, दृगजल पुलक शरीर ॥  
 परचो चरण पंकज बहुरि, विधि अति प्रेम अधीर ॥  
 सो०-तब हँसि बोले श्याम, गर्वप्रहारी भक्त हित ॥  
 जाहु आपने धाम, वचन हमारौ मानि अब ॥

और काहि अब करौ विधाता । तुमहौ कर्म धर्मके दाता ॥  
 तुमते है यह सब संसारा । मम मायाको नाहिन पारा ॥  
 ताते अब मम आयसु कीजै । ब्रजकी जाय प्रदक्षिण दीजै ॥  
 जाते तनुके पाप नशाहीं । बहुरि जाहु लोकहि सुख माहीं ॥  
 हरि उरहार विविध पहिरायो । बिदाकियो सब शोच नशायो ॥  
 प्रभु आयसु माथेपर धारी । पाय प्रसाद हरषि मुखचारी ॥  
 ब्रज दाहिन फिर पाप नशाये । बाल बत्स प्रभु पहुँ पहुँचाये ॥  
 बार बार चरणन शिरनाई । विधि निज लोक गये सुखपाई ॥  
 ग्वालन यह कछु मर्म नजान्यो । वाहि समय सबहिन मनमान्यो ॥  
 हरिसों कहत विलंब कहँलाई । हम तुम बिना छाक नहिं खाई ॥  
 तुमसब भोजन माँझ भुलाने । बच्छ जाय बन दूर हिराने ॥

१ वृक्ष । २ पक्षी । ३ चाकर । ४ नेत्रजल । ५ ब्रजकी प्रदक्षिणा करके ।



खोजत खोजत क्योंहूँ पाये । सों मैं लै तुम पहुँचाये ॥  
दोहा-अब राखौ सब धैरिकै, दूरि निकसि नहिं जाहिं ॥

तब सुचिते द्वैके सबै, रुचि सों भोजन खाहिं ॥  
सो०-ऐसे कहि ब्रजराय, सखन सहित भोजन कियो ॥

बहुरि यमुन तट जाय, जल अँचयो धोयो बदन ॥  
सन्ध्यासमय चले वरगवाला । मध्यश्याम सुन्दर नँदलाला ॥  
बच्छ घेरि आगे करि नीके । कौंधनपर धर लीन्हे छीके ॥  
जन जन शृङ्ग बजावत गावत । बनते बने ब्रजहि हरि आवत ॥  
घर आये ब्रज मोहन लाला । कहत यशोमति सों सब ग्वाला ॥  
अहो महरि बन आज कन्हाई । महादुष्ट इक मान्यो जाई ॥  
उरग रूप निगले शिशु बच्छा । करी आज सबकी हरि रच्छा ॥  
गिरि कन्दर सम तिन सुखवायो । पैठियाम तिहि तुरत नशायो ॥  
याके बल हम बढत नकाहू । फिरत सकल बन सहित उछाहू ॥  
जीते सबै असुर बन माहीं । यह काहूते हाय्यो नाहीं ॥  
बीते वर्ष कहत सब ग्वाला । आज अवा मान्यो नँदलाला ॥  
यह प्रभु लीला अपरम्पारा । कौन कौन को भुरै न पारा ॥  
यशुमति सुनि चक्रित पछिताई । मैं बरजत बन जात कन्हाई ॥

दोहा-केती करवरते बच्चो, तऊ न नेकडरात ॥

अति विचित्र गति ईशकी, जानी जात न बात ॥  
सो०-खीझति यशुमति मात, मानत नहिं मेरो कह्यो ॥

श्याम मनहिं मुसकात, अब वनमें नहिं जाइहौं ॥  
हरिकी लीला कहत न आवै । सुर नर असुर सबहिं भरमावै ॥  
पय पीवत पूतना नशाई । पटक्यो टूणा शिलापर जाई ॥  
तीन लोक सुखमें दिखराये । यमला अर्जुन वृक्ष ढहाये ॥  
वत्सासुर बक बहुरि नशायो । अवामारि विधि गर्वनवायो ॥  
यशुमति यह पुरुषारथ देखी । तापर खिझपछितात विशेषी ॥

१ जलपीयो । २ भीतरघुसकै । ३ मान्यो । ४ ब्रह्माको गर्व दूरकन्यो ।



अघा मारि आये नँदलाला । घरघर कहत फिरत सब ग्वाला ॥  
 सुनि सुनि ब्रज युवती उठि धाईचकित बिलोकत हरिमुख आई ॥  
 मन मन करत यह अनुमाना । इनकी सर कोऊ नहि आना ॥  
 येई हैं ब्रजके रखवारे । येई हैं पति प्राण हमारे ॥  
 कहत परस्पर सुनहु सयानी । हैं ये जगपति हम यह जानी ॥  
 प्रेम मगन ब्रजके नरनारी । लहत परम सुख हरिहिनिहारी ॥  
 ब्रज मोहन सुन्दर सुखरासा । भोजन प्रांगत यशुमति पासा ॥  
 दोहा-खाहु लाल जो भावई, रुचि सों सखन समेत ॥  
 सद माखन व्यंजन सरस, करि राखे तुम हेत ॥  
 सो०-देरोटी नवनीत, और मोहि भावै नहीं ॥

दियो मात अति प्रीत, खात हैं सत मिलिसखनसँग ॥

गोदोहन लीला ॥

हँसि जननी सों कहत कन्हैया । दोहनि दे दुहिहों में गैया ॥  
 नंद बवा मोहि दुहन सिखायो । ग्वालन की सर दुहन चढ़ायो ॥  
 धौरी धूमरि काजरि गैया । तुरतहि दुहिल्यावों दे भैया ॥  
 भयो मोहि बल माखनखाई । अब न डरात बूझ बल भाई ॥  
 तोहि नहीं पतियारो आवै । बैठि ऊँठकर भाव बतावै ॥  
 अँगुरी भाव देखि हँसि माता । उरलगायलिये सांवलगाता ॥  
 कहत कहां इतनी बुधि पाई । हर्षि निराखि सुख बलि बलि जाई ॥  
 लै दोहनी दर्द करमाता । हर्षित चले दुहन सुखदाता ॥  
 बछरा छोरि तुरत थन लायो । मात दुहत लखि हर्ष बढ़ायो ॥  
 सखा परस्पर कहत कन्हवाई । हमहूँ ते तुम करत बढ़ाई ॥  
 दुहन देहु कछु दिन मोहि गैया । तब करियो मेरी सरभैया ॥  
 जब लगि एक दुहौ तबताई । दश न दुहौ तो नन्द दुहाई ॥  
 दोहा-सखा कहत सब झूठही, नंद दुहाई खात ॥

प्रात साथ हम दुहहिंगे, देखहिंको अधिकात ॥

१ माखन । २ गैया दुहिनेको भाव ।



सो०-कह्यो कान्ह हर्षाय, भली कही तुम बात यह ॥

मात दुहाहिं गाय, हम तुम होइ लगायके ॥

श्रीवृषभानु कुँवर मन माहीं । श्याम सुरत क्षण विसरत नाहीं ॥  
दरश लालसा दृगन न थोरी । देखोइ चहत बहोरि बहोरी ॥  
उठे प्रभात दोहनी लीन्ही । सुरत श्याम दर्शनकी कीन्ही ॥  
जननी देखि कह्यो दुलराई । जातिकितै राधा अतुराई ॥  
खरकाहिं जात दुहावन मैया । दुहत सबेर ग्वाल सब गैया ॥  
कालिह तनक मैं विलँव लगाई । उठे अहिर सब मोहिं रिसाई ॥  
गई गाय सब बच्छ पियाई । रीती दोहनि लै फिरि आई ॥  
तुमहूँ खीझन लगि तब मोही । जातसवार आज कहि तोही ॥  
ऐसे कहि जननी समुझाई । वरते चली ब्रजहि समुहाई ॥  
नंदसदन आई हरिप्यारी । दुहत गाय गृह द्वार विहारी ॥  
दुहत परस्पर अति सुख पायो । निरखि बदन छवि हर्ष बढ़ायो ॥  
राधहि देखि महारि नंदरानी । लई बुलाय निकट हर्षानी ॥  
दोहा-दंपतिको मुख देखिकै, मुदित यशोमति माय ॥

वार वार लखि युगल छवि, मनहीं मन बलिजाय ॥

सो०-महारि मुदित मुसकाय, मथन कह्यो दधिकुँवरिसों ॥

भान दुहाइ दिवाय, आयसुते ठाढी भई ॥  
नेति पाणि मन अति अनुरागी । रीतोइमाट बिलोवनलागी ॥  
तैसइ भई श्याम गति भोरी । मनलाग्यो जहँ कुँवरि किशोरी ॥  
वृषभहिसों लोई लै लैया । बिसरि गई ठाढी कित गैया ॥  
दम्पति दशा देखि नंदरानी । रही चकित नहिं जात बखानी ॥  
राधा सों कहि प्रगट जनायो । किन यह तोको मथन सिखायो ॥  
निज घर मथति ऐसही जानी । कै भरे घर आय भुलानी ॥  
मैं नहिं मथन कबहुँ दधि कीनी । तुम मोहिं सोंह बबाकी दीनी ॥  
ताते मथन करन मैं लागी । तुम्हरो वचन सकी नहिं त्यागी ॥

१ देरी । २ नंदरायके घरमें । ३ दोनों कृष्णराधिकाकी ।



तब नैद घरनी मथन बतायो । राधे हरि तन ध्यान लगायो ॥  
 दुहन श्याम गैया बिसराई । लैया वृषभ पाव अटकाई ॥  
 दोहनी श्याम माँग तब लीन्ही । तुरत सखा इक लै कर दीन्ही ॥  
 कहत दुहौ हरि करो चडाई । हँसत गोप बालक समुदाई ॥  
 दोहा—हँसत कहत हरिसों सबै, कह तुम रहे लुभाय ॥

सुनत सखनकी बात नहिं, प्यारी सों चितलाय ॥  
 सो०—प्रिया वदन दृगं लाय, रहे श्याम इकटक निरखि ॥

देह दशा बिसराय, भूलि गये सब चतुरता ॥  
 यशुमति कहत अधिकहिटेरे । येढँग हैंरी प्यारी तेरे ॥  
 ऐसी हाल मथत दधि तेरो । हरि भयो मानहु चित्र चितेरो ॥  
 तेरो मुख सम शशि नहिं भ्राजै । नयननलाखि खंजन गतिलाजै ॥  
 चपलाईते चमकत हैंरी । करिहै कहा श्यामको तैरी ॥  
 मेरो कह्यो सुनत कछु नाहीं । है धौ कहा गुणत मनमाहीं ॥  
 इकटकदीठि तबहिं तेल्याई । तनुकी सुरति सबै बिसराई ॥  
 अवहीं ते ऐसे ढँग योहीं । अवहीं बहुत होनहै तोहीं ॥  
 ऐसे ढँगहि लगायो श्यामहिं । काज नहीं कछु तेरे धामहिं ॥  
 चितयो मतिहि करै टकलाई । हिलिमिलि खेल श्याम संग आई ॥  
 कैरहो बैठि आपने धामहिं । धेनु दुहनदे मेरे श्यामहिं ॥  
 देखत तोहिं श्याम सुधि जाई । तू चितवति तनु सुधि बिसराई ॥  
 मूधेरहि जो इहां तु आवै । ऐसी ढँग मोको नहिं भावै ॥  
 दोहा—करत अचंकारी आयत, यह नहिं मोहिं सुहाय ॥

सूधे खेलहि श्याम संग, कैतू इत मति आय ॥  
 सो०—ऐसे महारि रिसाय, सीख दई हरि भाव तोहिं ॥

तब कछु मन सुधि पाय, बोली अति भोरे वचन ॥  
 मोहिं खीजति वरजत सुत नाहीं । नित उठि मोहिं बुलावन जाहीं ॥  
 मोहिं कहत बिन तोहिं निहारे । रहत न मेरे प्राण मुखारे ॥

१ नेत्र । २ चित्रके समान । ३ चंद्रमा । ४ वीजुरी । ५ चपलता ।



छोह लगत मोको सुनि बानी । तब आवत मैं ह्यां घरजानी ॥  
 मुख पावति आवति मैं तातें । तुम कछु लावत औरहिं बातें ॥  
 यशुमति सुनि प्यारीकी बानी । भोरे भाय समझि सकुचानी ॥  
 बाँह पकरि उरसों लै लावति । प्यारी मनसों रोष मिटावति ॥  
 हँसत कहत मैं तोसों प्यारी । मनमें कटू बिलग जनिलारी ॥  
 सिखवत तोहिं सीखगुणकारी । मैं तेरी जैसे महतारी ॥  
 सुनियत महारि सुघर अधिकारि । गृहकारज कछु तोहिं सिखाई ॥  
 सुनि यशुमतिके वचन सप्रीती । बोली अति नागरि शिशुरीती ॥  
 मैया मोसों टहल करावै । खीझत जात देखि जो पावै ॥  
 सुनि यशुमति राधाकी बानी । श्रीवृषभानु लाड़िली जानी ॥

दोहा-अति सप्रेम दुलरायकै, लई बहुरि उर लाय ॥

श्रीराधाके चित्तते, दीनों क्षोभ मिटाय ॥

सो०-कापे वरणी जाय, हरि प्यारीकी चतुरता ॥

लीनी सहज सुभाय, बातनहीं यशुमति भुरै ॥

कहत सखा हरिसों मुसकाई । दुहत कहा तुम आज कन्हाई ॥  
 काल्हि दुहत रहे होडलगाई । विसर गई सब आज बड़ाई ॥  
 गिरति दोहनी कम्पित हाथा । नोवत वृषभ वत्सलै साथी ॥  
 सुनि ग्वालनके वचन गोपाला । कछुक सकुचि विहँसे नँदलाला ॥  
 बच्छ छोरदियो खरिक चलाई । आप जननिसों कहत कन्हाई ॥  
 मुरली मुकुट देहि पट मेरो । सुनि आऊं दाऊ मोहिं टेरो ॥  
 जननी हरषि तुरत सब दीनो । लै हरि मुकुट शीश धरिलीनो ॥  
 चारु पीत पट कटि लपटाई । कर मुरली लै मधुर बजाई ॥  
 मुरलीमें कहि प्यारी प्यारी । गये बुलाय खरिक सुखकारी ॥  
 लखि प्यारी हरिकी चतुराई । कहति यशोमति सों अतुराई ॥  
 जाति घरहि प्रातहि मैं आई । खरिक दुहावनको निजगाई ॥

१ बालपनकी रीतिसों । २ प्यारकर । ३ क्रोध । ४ बैलके पायनमें लोमना-  
 डारके दुहौहौ । ५ कमरमें पीतांबर कस ।



पायो ग्वाल खरिक कोउ नाहीं । खोजति मैं आई इत माहीं ॥

दोहा-इहाँ अजिर गैया दुहत, देखे आय कन्हाय ॥

तनके दोहनि तनक कर, देख रही चित लाय ॥

सो०-सुनि अति सरस सुभाय, सने प्रेम प्यारी वचन ॥

यशुमति मन सुखपाय, कहत कुँवरि सों जान घर ॥

जा प्यारी घर आवत रहियो । हमरो मिलन महारि सों कहियो ॥

यह सुनि कुँवरि चली हर्षाई । मन हरि लीन्हो कुँवर कन्हाई ॥

गई खरिक करंदोहनि लीने । चितवत भगै जहँ श्याम प्रवीने ॥

तहां मिलीं बहु सखी सहेली । वृद्धति राधहि कहा अकेली ॥

प्रात दुहावन मात पठायो । तहां खरिक कोउ अहिर न पायो ॥

इत आई मैं ग्वाल बुलावन । जात खरिक अब गाय दुहावन ॥

बोलि उठे हरि तब इत आवो । हम दुहि देई दोहनी लावो ॥

दुहन देन कहि श्याम बुलाई । सुनत गई प्यारी सुखपाई ॥

कहति सखीसब मन मुसुकाई । कहां प्रीति इन आय लगाई ॥

बरसाने यह ब्रजहि कन्हैया । आई कहां दुहावन गैया ॥

हरि मुख लखि वृषभानुकिशोरी । प्रेम विवश भइ तनु सुधि भोरी ॥

मोहन लई दोहनी करते । प्रिया प्रीति रस वश भइ वरते ॥

दोहा-धेनु दुहावत लाड़िली, दुहत नन्दको लाल ॥

सो सुख काँपै जाय कहि, देखत ब्रजकी बाल ॥

सो०-बछरा पद अटकाय, गोथन लीन्हों हाथ हरि ॥

प्रिया वदन दृग लाय, दूध धार छांडत छलन ॥

दुहत धेनु अतिही छवि बाढ़ी । प्यारी पास दुहावन ठाढ़ी ॥

एक धार दुहनी में डारे । प्यारी तन इक धार पखारे ॥

हरि करते पय धार छुटाहीं । लसत छोट प्यारी मुख माहीं ॥

नमहु मयैङ्ग कलङ्ग पखारी । शोभित जहँ तहँ चन्द्र सुधारी ॥

कै धौं पै निधि खोरि मयङ्गा । लसत सुधाँसह खोय कलङ्गा ॥

१ छोटी । २ हाथ । ३ मार्ग । ४ चन्द्रमा । ५ अमृत ।



लखतनीलपट कनक किनारी । मोरत सुखहि सुदित मन प्यारी ॥  
 मनहुं शरदं शशि सुधा उदार । घनदाग्नि धेन्यो इक वारा ॥  
 इहि विधि रहसत विलसत दोऊ । हेतु हिये थोरे नहि कोऊ ॥  
 मनहुं उभय आनंद सर भारी । मिलत चहत मर्याद बिसारी ॥  
 हाव भाव रस दम्पति पूरे । निरखत ललितादिक दुर दूरे ॥  
 इहि विधि श्रीवृषभानुदुलारी । हरि पै धेलु दुहावत प्यारी ॥  
 विलसत ब्रजविलास ब्रजप्यारि । ये मुख तीन भुवनते न्यारे ॥  
 दोहा-दुही कुँवर नंद लाडिले, श्रीराधाकी गाय ॥

दोहनि देत न हँसि प्रिया, माँगत हाहाखाय ॥  
 सो०-त्यों त्यों हँसत कन्हाय, ज्यों ज्यों प्रिय हाहाकरत ॥  
 सो मुख वरणि नजाय, अरझे दोऊ प्रेम रस ॥

फिर हाहाकर कहत कन्हाई । अकबैदेहों नन्द दुहाई ॥  
 फेरि करी हाहा हँसि प्यारी । दई दोहनी बिहँसि बिहारी ॥  
 हाव भाव करि मन हरिलीन्हों । कुँवरहि कान्ह बिदा तब कीन्हों ॥  
 यह छवि निरखि सखी हर्षानी । चली अग्रद्वै कछुक सयानी ॥  
 प्यारी निरखि श्याम सुन्दरको । चलन चहत पग चलत न धरको ॥  
 अंतरनेक न हरिसों भावै । पुरजनसकुच बहुरि सकुचावै ॥  
 धिक यह लाज कहत मन माहीं । निरखन देत श्याम जो नाहीं ॥  
 कछु दिन ज्यों त्यों और बिताई । दूर करौं पुनि इहि दुखदाई ॥  
 यह विचार मनमें ठहराई । चली सदन उर राखि कन्हाई ॥  
 सुरि सुरि नंद नंदन तन हेरे । आवति विरह बिथा तन वेरे ॥  
 आगे धरत परत पग नाहीं । मन फेरत मन मोहन पाहीं ॥  
 चितवत श्याम खरिक महुँ ठाढ़े । प्यारी तन मन आनंद बाढ़े ॥  
 दोहा-भये दृगनते ओट दोउ, गये सदन सुखरास ॥

१ श्रीराधिकाजीके मुखपर सुनहरी किनारी लगी नीलीसारी अत्यंत सोभा देय उसकी ब्रजवासीदास उपमा देयहैं कि जैसे । २ मानो शरदऋतुके चन्द्रमाको एककालमेंही मेघऔर वीजरीने धेन्यो होय । ३ होनों । ४ सरोवर । ५ नेत्रनते । ६ घरको ।



विरह विकल प्यारी गई, ज्यों त्यों सखियन पास ॥

सो०-सखियन आवत देखि, श्रीवृषभानु कुमारको ॥

उर आनंद विशेष, हर्षि सबै ठाढी भई ॥

बूझति सबै सखी मुसकानी । कहहु राधिका कुँवरि सयानी ॥

और अहिर तुम्हरे कित प्यारी । हरि दुहि दीन्ही गाय तुम्हारी ॥

यह सुनि चकित भई मति भोरी । गिरी धरणि मुरझाय किशोरी ॥

देखि सखी सब आतुर धाई । लई उठाय कुँवरि उरलाई ॥

क्यों नागरी गिरी मुरझाई । दूध दोहनी दई गिराई ॥

यह वाणी कहि सखिन सुनाई । कोरे मोहिं डसीरी माई ॥

भई विकल कछु तनु सुधि नाही । कहत सखी सब आपसमाहीं ॥

अबहीं देखत नीके आई । कहा भयो कोरे कित खाई ॥

यहतो कारो कुँवर कन्हाई । हमहूँ को जिन फूंक लगाई ॥

जाकी मुर मुसकन विष बाँको । याके रोम रोम विष ताको ॥

तन मन दृगन साँवरो छायो । देह गेह सब नेह भुलायो ॥

सब सखियन मन यह ठहराई । लैराधिकहिं सदन पहुँचाई ॥

दोहा-लेहु महारि कीरति सुता, अपनी देखहु आय ॥

कहुँकारे याको डसी, गिरी धरणि मुरझाय ॥

सो०-ल्यावहु गुणी बुलाय, वेग यत्न याको करहु ॥

गयो वदन कुम्हिलाय, ज्यों त्यों हम लाई इहाँ ॥

जनैनी सुनत उठी अकुलाई । रोवति धाय कंठ लपटाई ॥

प्रात गई नीके उठि घरते । मैं बरजी मान्यो नहिं अरते ॥

अतिहि हठीली कह्यो न मानै । सोई करति जु मनमें आनै ॥

डरी मात लखि अँग सब जूडे । अतिही शिथिल स्वेदजल बूडे ॥

महारि नगर ते गुनी बुलाये । सुनत सकल आतुर उठि धाये ॥

मंत्र यंत्र बहु भाँति जगावैं । थके सकल कछु भेद न पावैं ॥

गारुड हरि जो रहे मन माहीं । महारि विकल अति मन पछिताहीं ॥



फिर फिर बूझत सखिन बुलाई । कह प्यारी कहि तुमहि सुनाई ॥  
कहत सखी सब परम सयानी । सुनहु महरि इतनी हम जानी ॥  
हम आगे यह पाछे आई । गिरी धरणि दुहनी ठरकाई ॥  
यही कह्यो कारे मोहि खाई । तब हम आतुर लई उठाई ॥  
सो कारो हमहुं पुनि देख्यो । लग्यो सबन विष याहि विशेष्यो ॥  
दोहा—सो अब हम तुम सो कहैं, मानिलेहु यह बात ॥

बड़ो गारुडू रायहै, नंदमहरको तात ॥

सो०—ल्यावहु ताहि बुलाय, देखतही विष जायगो ॥

तुरतहि लेहि जिवाय, हम नीके यह जानहीं ॥

देखहु धौ यह बात हमारी । एकहि मंत्र जियावहि झारी ॥  
त्रिभुवन गुनी और नहि ऐसो । है वह नंद महरिको जैसो ॥  
कीरति महरि सुनी यह वानी । अपने मनहि सांचकर मानी ॥  
इकदिन राधा हू यहवानी । मोसों कही हली यह जानी ॥  
कीरति चली नंदके धामहि । बोलन आतुर गारुडू श्यामहि ॥  
महरि यशोदहि जाय पुकारो । अहो गारुडू सुवन तुम्हारो ॥  
मेरी सुता लाडिली गोरी । विहल विकल परीमति भोरी ॥  
प्रातहि खरिक दुहावन आई । तहां कहूं कारे डसिखाई ॥  
नेक पठै सुत काज विचारो । यह यश हैहै बड़ो तुम्हारो ॥  
सुनि यशुमति कीरतिकी बांली । कहत महरि तुम भई अयांनी ॥  
मंत्र यंत्र कह जानै मेरो । अतिही बाल वर्ष पैट केरो ॥  
किन तुमको दीनो बहँकाई । यह तुम बूझो गुणिन बुलाई ॥  
दोहा—मैं चकित तुम वचन सुनि, यह अचरजकी बात ॥

श्याम भयो कब गारुडू, तुम आई अतुरात ॥

सो०—अबलों सुनी न कान, भयो श्याम कब गारुडू ॥

बालक अति अज्ञान, यंत्र मंत्र जानै कहा ॥

महरि गारुडू कुँवर कन्हाई । इक दिन राधा मोहि सुनाई ॥



एक लरकिनी कारे खाई । जाको तुरतहि श्याम जियाई ॥  
 ताते में आई अतुरानी । पठबहु सुतहि नेक नंदरानी ॥  
 है मम कुँवरि बिकल अधिकाई । प्रात खरिक कारे कहूँ खाई ॥  
 बड़ो धर्म यशुमति यह लीजै । वेगि बुलाय कान्हरो दीजै ॥  
 यह सुनिकै यशुमति मुसकाई । अबहि हती मेरे घर आई ॥  
 है राधा मोहन कछु कारन । छुप है मन में लगी विधारन ॥  
 वहाँ सखी ललतादि सयानी । प्यारिहि देखि हृदय अनुमानी ॥  
 याहि डसी बंशीधर कारे । चितवन फण मुसकन विषधारे ॥  
 प्रेम प्रीति दौडारत जारे । लगे न मंत्र गुणी सब हारे ॥  
 थके सकल करि विविध उपाई । यह विष मोहन बिन नहि जाई ॥  
 सखी एक हरि पास पठाई । तिन मोहन सों जाय जनाई ॥

दोहा—अहो महरिके लाड़िले, मोहन श्याम सुजान ॥

कित सीखे यह गौदुहन, हम सों कहौ बखान ॥

सो०—दुहि दीनी जिहिगाय, आज भोरही खरिकमें ॥

वेग विलोकौ जाय, निज नयनन ताकी दशा ॥

जबते दुहि दीन्ही तुम गैया । अहो अनोखे गाय दुहैया ॥  
 घर लौं कुँवरि जान नहि पाई । बीचहि धरणि गिरी सुरझाई ॥  
 देखत संग सखी सब धाई । जैसे तैसे गृह पहुँचाई ॥  
 सों अब तनुकी सुधिन सम्हारै । परी बिकल नहि हंगन उचारै ॥  
 सकसकात तनु स्वेद बहाई । उलटि पलटिभरि लेत जँभाई ॥  
 कहति मोहि कारे अहिखाई । कियो यतन बहु गारुड आई ॥  
 ताहि कलू उपचार न लागै । तुमरो नाम लेत कछु जागै ॥  
 हौं पठई इक सखी सयानी । यह विष तुमरो निहचै जानी ॥  
 यह कारो अहिरूप तुम्हारो । मुसकनिविष ता ऊपर डारो ॥  
 अब जो चाहौ ताहि जियावो । वेगि चलो जिन गहर लगावो ॥  
 अतिहि बिकल वह विरह अधीरा । दरश दिखाय हरौ तनु पीरा ॥



तुम अश्विनीकुमार कन्हाई । वेगि चलो हरि लेहु जिवाई ॥  
 दोहा-नजर दीठ इकरावरी, ढेर कहत हम कान्ह ॥  
 नहिं जागति तो देहिंगी, नन्द द्वार सब प्रान ॥  
 सो०-व्याकुल जननी तास, धरनि महर वृषभानुकी ॥  
 गई यशोमति पास, वेगि जाय सुधि लीजिये ॥  
 कीरति आगम सुनत कन्हाई । कीनी बिदा सखी मुसुकाई ॥  
 जो कहूँ डसी भुजङ्गम प्यारी । तौ हम आय देहिंगे झारी ॥  
 ऐसे कहि हरि सदनहि आये । देखि यशोमति निकट बुलाये ॥  
 तू कछु जानत मंत्र कन्हैया । ब्रजति विहँसि यशोमति मैया ॥  
 कीरति महारि बुलावन आई । कुँवरि राधिका कारे खाई ॥  
 आनहु झारि वेगि सँग जाई । कुँवरि जिवाये अतिहि भलाई ॥  
 गारुड भयो भले सुत जानी । आज सुनी श्रवणन यह बानी ॥  
 मैया एक मंत्र भेँ जानों । तेरी साँ कहि सत्य बखानों ॥  
 अहि काट्यो मो दृष्टि जु आवै । मोपै क्योंहूँ मरण न पावै ॥  
 जननि कछो सुत जाउ कन्हाई । देहु राधिकहि जाय जिवाई ॥  
 जननी वचन सुनत ब्रजनाथा । चले हर्षि कीरतिके साथ ॥  
 चली महारि हरि संग लिवई । गई वृषभानु पुरा समुहाई ॥  
 दोहा-रुदतिमहारि लखि कुँवरिको, अतिहि गई कुम्हलाय ॥  
 शिथिल अंग वाणी निरखि, लीनी कण्ठ लगाय ॥  
 सो०-तवाहिं श्यामके पांय, परी कुँवरि लैके महारि ॥  
 मोहन देहु जियाय, अति व्याकुल भरी सुता ॥  
 आये गारुड कुँवर कन्हाई । कुँवरि कान्हने यह सुनि पाई ॥  
 धन्य धन्य आपनको जानी । हृदय हर्ष दृग आनंद पानी ॥  
 प्रगट रोम तनु स्वेद बढ़ाई । विहल देखि जननि अकुलाई ॥  
 अन्तर भाव भेद हरि जाने । रसिक शिरोमणि मन मुसकाने ॥  
 तब कछु पाठिकै कुँवर कन्हाई । मुरलि अंगसाँ दई छुवाई ॥

१ घर । २ आनंदजल ।



तत्क्षण लोचन कुँवरि उघारे । सन्मुख सुंदर श्याम निहारे ॥  
 निरखत दृगन परम सुख लीनो । सकुच सँभारि वसन सम कीनो  
 बूझत बात जननि सौँ प्यारी । आज कहा यह है महतारी ॥  
 जननी कहति हरषि उरलाई । तोहिं भरतते कान्ह जिवाई ॥  
 करत लाज तू कारी प्यारी । करिवर बड़ी आज विधि डारी ॥  
 यों कहि महरि हृदय अनुरागी । नंदसुवनके पांयन लागी ॥  
 बड़ो मंत्र तुम कियो कन्हाई । सुता हमारी भरत जिवाई ॥

दोहा—उर लगाय मुख चूमिकै, पुनि पुनि लेत बलाय ॥

धन्यकोखि यशुमति महारि, जहां अवतरे आय ॥  
 सो०—कछु भेवा पकवान, कहाँ खान धनश्याम सों ॥

विदा किये दै पान, कीरति श्याम सुजानको ॥  
 महरि मनहिं मनमें अनुमानी । जोरी भली विधाता बानी ॥  
 ब्रज घर घर यह बात चलाई । बड़ो गारुड कुँवर कन्हाई ॥  
 सखी कहत हरिसों सुसकाई । भले भले हो गारुडराई ॥  
 प्रगट्यो गारुड नाम तुम्हारो । भले आज तुम विवाहि उतारो ॥  
 जननि कहति मेरो अति बारो । अबधौं कौन करै निरवारो ॥  
 जान्यों कठिन वसन ब्रजकारो । अब यह मंत्रहिं मतिहिं विसारो ॥  
 फिर कारो कहूँ करहिं पसारो । हम तब लेहैं नाम तुम्हारो ॥  
 यह गारुडी कहाँ तुम पाई । प्यारी एकहि ढेर जिवाई ॥  
 अब हम जानी बात तुम्हारी । जाहु आपने सदन विहारी ॥  
 रसिक मुकुटमणि कुंज विहारी । हँसवशकीनी घोष कुमारी ॥  
 विवश भई सब ब्रजकी बाला । गये सदन मोहन नंदलाला ॥  
 ब्रजविलास बिलसत ब्रज प्यारो । ब्रजवासी जनको रखवारो ॥  
 दोहा—कारोसुत नंदरायको, जाकी लीला नित ॥

तिनहींको हरि डसतहैं, जिनको उज्ज्वल चित्त ॥  
 सो०—धन्य धन्य ब्रज बाल, धनि धनि ब्रजके ग्वाल सब ॥

१ मैया । २ बेटी । ३ घर । ४ गोपनकी कन्या ।



जिनके संग नँदलाल, दुहत चरावत गाय नित ॥  
 प्रात होत बल मोहन लाला । गाय बच्छ सबलै संग ग्वाला ॥  
 चले चरावन ब्रज वन माहीं । क्रीड़ा करत सकल मग जाहीं ॥  
 देखि मुदित सब ब्रजकी बाला । वृन्दावन गये मदनगुपाला ॥  
 गैया बगर गई वन माहीं । बैठे कान्ह कदमकी छाहीं ॥  
 सखालिये संग सुबल सुदामा । क्रीडा करत सहित बलरामा ॥  
 ग्वाल जहाँ तहँ गाय चरावै । आनँद भरे कृष्ण गुण गावै ॥  
 करत विहारविविध सबग्वाला । गये दूरि वन सघन विशाला ॥  
 कोऊ गैयन धेरन धायो । कोऊ बछरन लै बिलगायो ॥  
 हलधर रहे कहूँ वनजाई । आप अकेले रहे कन्हवाई ॥  
 मन मन कहत श्याम सुखदाई । सखारहे कत वन विरमाई ॥  
 गौराभन कहूँ सुनियत नाही । गये निकसि धौं कित वन माहीं ॥  
 आलस गात जानि मनमाहीं । बैठे बंशीवटकी छाहीं ॥  
 दोहा-सखा वृन्द हलधर सहित, लिये बच्छ अरु गाय ॥  
 वृन्दावन घन छाँड़िकै, रहे ताल वन जाय ॥  
 सो०-मन हरषे सब ग्वाल, देखि भूमि सुन्दर परम ॥  
 फरे विपुल तरु ताल, अति रस मय मीठे मधुर ॥

अथ धेनुकवध लोला ॥

गोधन वृन्द दिये बगराई । लगे खान फल मन हरपाई ॥  
 अचयो बलरस ताल रसाला । बाढ़यो उर आनँद विशाला ॥  
 सुरत नन्दनन्दनकी आई । कछो सखन सों कहां कन्हवाई ॥  
 ल्यावहु धेरि जाय सब गैया । चलौ वेगि जहँ कुँवर कन्हैया ॥  
 सुनत सखा हलधरकी वानी । वनमें श्याम अकेले जानी ॥  
 आनुर गैयन धेरन धाये । ढेर दई सब ग्वाल बुलाये ॥  
 तहां असुर इक धेनुकनामा । खरके रूप रहै वनधामा ॥  
 सोयो हुतो विटपकी छाया । सुनत शोरकर तामस धाया ॥  
 अति बलवान विशाल कराला । परम भयंकर मानहु काला ॥



दाऊ कहि सब ग्वाल पुकारे । भाजे जित तित भयके मारे ॥  
 असुर महाबल गर्व बढ़ाई । बलके सन्मुख गरजो आई ॥  
 मत्त तालके रस बलराई । देखि असुर मन रिस उपजाई ॥  
 दोहा-बल सँभारि उठिकोपकरि, असुर प्रचान्यो जाय ॥

अग्रज माता श्यामको, तिहुँ पुर जासु बड़ास ॥

सो०-बलको आवत जानि, असुर जोरि दौऊ चरण ॥

चपर चलाई आनि, बहुरो हठ ठाढ़ो भयो ॥

बहुरो फिर मारनको धायो । बल जूको तामस तब आयो ॥  
 जबाहिं असुर फिर चरण चलायो । गहि लीनो करिकोप फिरायो ॥  
 पटक्यो लै तरुताल हिलाई । भयो प्राण विन तरुहिं गिराई ॥  
 तरुसों तरु टूटे भहराई । उल्यो सकल वन वन बहराई ॥  
 और बहुत धेनुक परिवारा । कीन्हों बल सबको संहारा ॥  
 मान्यो असुर महा दुखदाई । ग्वाल बाल सब करत बढ़ाई ॥  
 आये सब वृन्दावन माहीं । जहँ तहँ श्यामहिं ढेरत जाहीं ॥  
 चढ़ि चढ़ि द्रुमन पुकारत ग्वाला । आवहु हो मोहन नँदलाला ॥  
 ल्याये घेरि मिली सब धेनू । आवहु मधुर बजावहु वेनू ॥  
 कोमल चरण कहूँ मति धावहु । कंटक कठिन मही इत आवहु ॥  
 ऐसे हरिको ढेरत जाहीं । तृषितभये सब वनके माहीं ॥  
 ग्वाल बाल सब यमुनहिं आये । बलरस मत्त न पहुँचन पाये ॥

दोहा-गोप गाय अचवत भये, कालीदहको नीर ॥

निकसत सब अकुलायकै, बैठ गये जल तीर ॥

सो०-परे सकल मुरझाय, जहां तहां विष झारते ॥

ग्वाल बच्छ अरु गाय, भये मनो विन प्राण सब ॥

हरि ठाढ़े बंशीवट छाहीं । बाराहिं बार कहत मन माहीं ॥  
 अवाहिं रहे सब संग चरावत । निकसि गये धौंकितवन धावत ॥  
 गौराँभन ग्वालनके बैना । श्रवण न माँझ परत कछु हैना ॥  
 तरु चढ़ि इत उत गैयन हेरत । लै लै नाम सखनको ढेरत ॥



कालीदह तन आहट पाई । शोधलेत उत चले कन्हई ॥  
 वन घन दूँडत हरि तहँ आये । गाय ग्वाल सब मूर्च्छित पाये ॥  
 मनमें ध्यान करतही जान्यो । कालीअहि ह्यां आय समान्यो ॥  
 रहत इहां खगपति भयमानी । अँचयो इन ताको विषपानी ॥  
 अमीदृष्टि प्रभु सकल निहारी । तुरत उठे सब भये सुखारी ॥  
 देखि कृष्णको अति सुखपाई । मिले सकल प्रेमातुर धाई ॥  
 बोले हरि मृदुवचन सुहाये । तुम सब मोहिं छोडिकै आये ॥  
 कितते कित इतनिकसे आई । मैं वन दूँडि रह्यो पछिताई ॥

दोहा-खोज लेत आयो इहाँ, देखे सब बेहाल ॥

मुरलि परे काहे धरणि, भयो कहा जंजाल ॥

सो०-गाय बच्छ अरु ग्वाल, उठे एकही बार पुनि ॥

कहा कियो इह ख्याल, देखि मोहिं अचरज भयो ॥

सुनि हरि वचन परम सुखदाई । कहत सखा सब सुनहु कन्हई ॥  
 अचयो तृषित यमुन जल आई । तबहिं गिरे सब तट अकुलाई ॥  
 कारण हम कछु जान्यो नाहीं । भये प्राण विन सब क्षण माहीं ॥  
 इह हम जानी कुँवर कन्हई । तुमहीं हमहिं जिवायो आई ॥  
 हौ तुम ब्रज जनके रखवारे । तहां तहां तुम हमहिं उबारे ॥  
 तब हरि बलदाऊको हेरो । कह्यो चलहु वन होत अँधेरो ॥  
 सखा बोलि ल्याये बलरामहिं । हँसे देखि सुन्दर घनश्यामहिं ॥  
 बड़ीदेर भइ तुम्हें कन्हैया । रहे अकेले वनमें भैया ॥  
 चलहु वेगि अब घरको जाहीं । लेहु लिवाहि गाय वन माहीं ॥  
 हेरी देत चले सब ग्वाला । गावत गुण सुन्दर गोपाला ॥  
 गोधन आगे दये चलाई । सखन मध्य मोहन बलभाई ॥  
 चले ब्रजहि ब्रज जन सुखदाई । निरखि वदन छवि मदन लजाई ॥

दोहा-सुनि ब्रज सुन्दरि परस्पर, कहत मुरलि सुर घोर ॥

आवत वनवासि अहर निशि, आगम नंदकिशोर ॥

सो०-धाई गृह तजि काज, निरखनको मन भावतो ॥



सुन्दर सुत ब्रजराज, लाज साज सब छोड़िके ॥

वे देखो आवत बल मोहन । सुबल सुदाम सुदामा गोहन ॥  
मेघश्याम गैयन पाछे । शीश मुकुट कटि कछनी काछे ॥  
कमल वदन कर वेणु बजावैं । गौरी राग मिले सुरगावैं ॥  
नयन विशाल कमल ते आछे । कोटि मदन की छविको बाछे ॥  
कुंडल श्रवण वदन छवि छाई । गोरज छवि कहूँ चंद्र छिपाई ॥  
निरखि सुदित सब ब्रजकी वाला । पहुँचे आय सदन नँदलाला ॥  
ब्रज जीवन बल मोहन भैया । निरखि जननि दोउ लेत बलैया ॥  
ग्वाल कहत धनि यशुभा माता । धनि धनि बल मोहन दोउ भ्राता ॥  
नरतनु धरे देव ये कोऊ । ब्रज अवतार लियो इन दोऊ ॥  
येहैं सब ब्रजके रखवारे । गाय गोपके राखनहारे ॥  
गर्दभ रूप असुर इक भारो । ताहि आज हलधर वन मारो ॥  
हम सब यमुनातट मुरझाई । तहां कान्ह सब मरत जिवाई ॥

दोहा-अब हम काहू डरत नहिं, येहैं हमें सहाय ॥

बल मोहनके बल फिरत, वन वन चारत गाय ॥

सो०-परत गाढ़ जब आय, तब तब होत सहाय हरि ॥

चिरजीवै दोउ भाय, यशुमति ये तेरे कुँवर ॥

यशुमति सुनि ग्वालन की बानी । कह्यो गर्ग सब सत्य बखानी ॥  
नित नव चरित सुनत हरि केरे । हैं कोऊ ये बडन बडेरे ॥  
धन्य धन्य ये ब्रजमें आये । धन्य धन्य हम सुत करि पाये ॥  
अतुलित कर्म दुहुनके जानी । दोउ जननी मन मांझ सिहानी ॥  
श्याम राम दोऊ नँदरानी । लिये लाय छाती हर्षानी ॥  
भूखे जान तुरत अन्हवाये । षट्स व्यंजन सरस जिमाये ॥  
भोजन करि अचये दोउ भाई । लीन्हे पान संत सुखदाई ॥  
पौढे सेज दास हितकारी । ब्रज जन वासीहैं बलिहारी ॥  
चिंतामणि हरि जन सुखदानी । कालीकी चिन्ता उर आनी ॥  
ग्वाल गाय नित वनको जाहीं । दुखपावत कालीदह माहीं ॥



विषधरको रहबो जलमाहीं । वृन्दावन ढिग नीको नाहीं ॥  
कालिहिकाठि इहां ते दीजै । यमुनाको जल निर्यल कीजै ॥  
दोहा-यह विचार मनमें करत, भये नौंद वश श्याम ॥

यशुमति हरि पौढायकै, आपलगी गृह काम ॥

सो०-खरैं न बोलन देत, घरमें काहूको महरि ॥

बल मोहनके हेत, जागि परैं मति नौंदते ॥

शिव सनकादि दिवसनिशिध्यावै।कबहुं जाको अन्त न पावैं ॥  
ब्रह्म सनातन आनैदखानी । सोनैद सदन सोवत सुखदानी ॥  
देखो नंद कान्ह अति सोवत । श्रमिंत जानि बनके सुख जोवत ॥  
मानत नाहिं कहाँ किन कोऊ । आप हठीले भैया दोऊ ॥  
करसों पोंछत सुभग शरीरा । कहियत यहै प्रेमकी पीरा ॥  
निजपलका तहँ लियो मँगई । सोये हरिके ढिग नँदराई ॥  
यशुमति हूँ पौढी तहँ आई । निशिबीते अधिकी अधिकाई ॥  
जाग उठे तब कुँवर कन्हैया । कहाँ गई मोढिगते भैया ॥  
सँग सोवत जान्यो बल भाई । अंतिही श्याम उठे अकुलाई ॥  
जागे नँद अरु महरि यशोदा । हरिको ऐंचिलियो नँद गोदा ॥  
काहे झिझकि उख्यो अनियासा । तुरतहिदीपक कियो प्रकासा ॥  
सपने गिरो यमुन जल जाई । काहू मोको दियो गिराई ॥  
दोहा-नित प्रति मैं बरजतरहौं, तू हठि यमुना जाय ॥

सुधि रह गई अन्हानकी, जिन हो लाल डराय ॥

सो०-कोरै लै नँदराय, पौढाये निज संग तब ॥

वृन्दावन तू जाय, किहि कारण जित तित फिरत ॥

अब तू वृन्दावन जनि जाई । तहां कौनधौं रहत बलाई ॥  
सोये दंपति बीच कन्हआई । तुरतहिगई नौंद फिर आई ॥  
सपनौ सुनि जननी अकुलानी । कहत नंद सां यशुदरानी ॥  
देख्यो धौं कह स्वप्न कन्हआई । या ब्रजके जीवन दोउ भाई ॥

१ सुखमानी ।



यहै यत्न इनको अब कीजै । गाय चरावन जान न दीजै ॥  
 गृहसंपति है तनक दुठौना । इनहीं लौं बल भोग ठठौना ॥  
 येवन जात चरावन गैयां । हँसी करत ब्रज लोग लुगैयां ॥  
 दंपति आपसमें इहि भांती । करत विचार बीति गइ राती ॥  
 तारागण सब गगन छिषाने । गद्यो तिमिर अम्बुज विकसाने ॥  
 उठि यशुमति लागी गृह काजा । भूलिगयो निशि शोच समाजा ॥  
 प्रात स्नान यमुन नित जाई । नंदहि तुरतहि दियो उठाई ॥  
 मथन हारि ग्वालनि सब जागीं । जित तित दही विलोवन लागीं ॥  
 दोहा-हरिप्यारी सुरभीनको, जम्ब्यौ जुदाधि बिलगाय ॥

सो हरि हित माखन लिये, मथति यशोदा माय ॥

सो०-सदमाखन निज पानि, मथत तुरत मथनी धन्यो ॥

बड़ भागिनि नंदरानि, माखन प्यारे लाल हित ॥

लगी जगावन हरिको जाई । उठहु तात माता बलि जाई ॥  
 प्रगट्यो तरणि किरणि महि छाई । खोलि देहु मुख कमल कन्हाई ॥  
 सखा द्वार सब तुम्हाहि बुलावैं । तुम कारण सब धाये आवैं ॥  
 उठि तिनको मिलिकै सुखदीजै । होत अवार कलेऊ कीजै ॥  
 तब हरि उठिकै दरशन दीनो । माता निरख मुदित मनकीनो ॥  
 दाऊ जू कहि श्याम पुकान्यो । नीलांबरगहि सुखते टाँयो ॥  
 मनु घनते शशि भयो निवारो । प्रगट्यो सुन्दर मुख उजियारो ॥  
 हँसत उठे सुन्दर दोउ वीरा । गौर श्याम अति सुभग शरीरा ॥  
 शयन भवन ते बाहर आये । लखि दोउ जननि परम सुखपाये ॥  
 दँतवनलै दोउवन कर दीनी । चौकी बैठि मुखारीकीनी ॥  
 मातन निज निज कर सुख धोयो । नयननको आरस सब खोयो ॥  
 अँचरन सों मुख कमल अँगोछे । उर लगाय सब अंगन पोछे ॥

दोहा-करहु कलेऊ लाल दोउ, तब कहूँ बाहर जाउ ॥

मथ्यो तुरत मीठो मधुर, माखन रोटी खाउ ॥

सो०-दर्ई दुहुनको मात, रोटी अरु माखन मधुर ॥



हरषि परस्पर खात, माता अंतर हेतु लखि ॥

अथ कालीदमन लीला ॥

ऋषि नारद हरि भक्त सयाने । प्रभुके मनकी रुचि पहिचाने ॥  
गावत गुण हरि परम हुलासा । गये तुरत मथुरा नृप पासा ॥  
देखि कंस आदर अतिकीनो । करिदंडवत बरासनदीनो ॥  
नारद कह्यो कुशल नृपराई । कछुक शोचवश परत लखाई ॥  
तुम प्रताप मुनि कुशल सदाई । एक शोच मोहि बड़ो गुसाई ॥  
येदोउ ब्रजमें नंदकुमारा । जानि परत मोहि कोउ अवतारा ॥  
कहत जिन्हें बलराम कन्हारै । तिनकी गति मति जानि न पाई ॥  
तृणावर्त्तसे दैत्य पठाये । सो उन पल इक माहि नशाये ॥  
बकी पठाय दई पहिलेहीं । ऐसनको बल सब लैलेहीं ॥  
उनते भयो नहीं कछु काजा । यह सुनि समुझि होत मोहि लाजा ॥  
अबमुनि तुम कछु कहहु विचारा । जिहि विधि मारहुँ नंदकुमारा ॥  
मुनि हरिके गुण नीके जाने । मुनि नृप वचन मनहि सुसकाने ॥  
दोहा-तब बोले मुनि नृपति सों, सत्य कही तुम तात ॥

वे दोऊ अबतारहैं, इन गति जानि न जात ॥

सो०-हैं ये तुम्हरे काल, प्रगट भये ब्रज आयकै ॥

नंद गोपके बाल, तुम इनको राखो मतिहि ॥

एक बात मेरे मन आवै । करहु कंस तुमको जो भावै ॥  
काली अहि रह्यो यमुना आई । तहां कमल फूले विपुलाई ॥  
फूल तहां ते मांगि पठावहु । दूत पठै नंदहि ढरपावहु ॥  
यह सुनि ब्रजके लोग डरै हैं । यह बात वेऊ मुनि पैहै ॥  
जैहैं अंशु फूलके काजा । तहां घात करिहैं अहिराजा ॥  
यह सुनि कंस बहुत सुखपायो । भलौ मंत्र मुनि मोहि बतायो ॥  
धनि धनि कहिपुनि रशिरनावत । हरषि चले मुनि हरि गुण गावत ॥  
तबहिं कंस इकदूत बुलायो । ब्रजहि नंदके पास पठायो ॥  
दीनो ताको पत्र लिखाई । कहियो यहै नंदको जाई ॥



कोटि कमल कालीदह केरे । पहुँचावहुलै कालिह सबेरे ॥  
 कंसराज अति काज मँगाये । बनिहै तुमको तुरत पठाये ॥  
 चलो दूत आतुर ब्रज धाई । जानि लई सब कुँवर कन्हाई ॥  
 दोहा-आप रहे ता दिन घरहिं, वनहि पठाये ग्वाल ॥

ब्रजवासी जनके सुखद, ब्रजजीवन नँदलाल ॥  
 सो०-दूतहि आवत जान, आप गये बहराय हरि ॥

सुन्दर श्याम सुजान, खेलत ग्वालन संग मिलि ॥  
 आये नन्द यमुन जल न्हाये । पैठत सदन ठीक भई बांये ॥  
 महर मलिन मन अशकुन जान्यो । आज कहा उर शोच समान्यो ॥  
 तबहीं चलो दूत जब आयो । नंद महर घरही में पायो ॥  
 बोललिये पाँती करराखी । नृपको कहाँ सुखागर भाखी ॥  
 कालीदहके फूल मँगाये । ता कारण अति डाट पठाये ॥  
 जो नाँह मोको फूल पठावहु । तो कोउ ब्रजमें रहन न पावहु ॥  
 गोप नन्द उपनन्दजितेका । डारों मार न राखों एका ॥  
 जो नाँह कालिह कमल में पाऊँ । तो दोउ सुत तेरे बाँधि मँगाऊँ ॥  
 यह सुनि नन्द गये सुरझाई । और गोप सब लिये बुलाई ॥  
 तिन सबको सब बात सुनाई । परी आय यह अति कठिनाई ॥  
 कोटि कमल कालीदह माहीं । कहाँ कौन धौं काढ़न जाहीं ॥  
 कह्यो फूल जो कालिह नपाऊँ । तो सुत तेरे बाँधि मँगाऊँ ॥

दोहा-मेरे सुत दोउ नृपति उँर, खटकत हैं दिनरात ॥  
 आज कही यह बातसों, बल मोहन पर घात ॥  
 सो०-चढ़िहै ब्रजपर धाय, कालिह कंस अति कोप कर ॥  
 बन्यो मरण अब आय, को राखै कित जाइये ॥

सुहि अपने जियको डर जाहीं । शोच श्याम बलको उर माहीं ॥  
 अब उबार देखियत नाँह कोई । बल मोहनहिं राखि को गोई ॥  
 बरु मोहिं राखै बाँधि नृपाला । रहैं सदन बल मोहन लाला ॥



नन्द वचन सुनि सब ब्रजवासी। भये दुखित मन परम उदासी ॥  
 काहु पै कछु बात न आई। अति भय त्रसित गये मुरझाई ॥  
 चकित महा ब्रजवासी ठाढ़े। मानहुँ चित्र चिह्न लिखि काढ़े ॥  
 नन्दधरन ब्रजनारी विचारै। अति व्याकुल नयनन जल ठारै ॥  
 ब्रजहिं बसत सब जन्मसिरान्यो। इहि विधि कंस न कबहुँ रिसान्यो  
 कालीदहके फूल मँगाये। कहौ कौन विधि जातसो पाये ॥  
 अतिहि शोचवश सब नर नारी। भये कंस भय बहुत दुखारी ॥  
 कोउ कह शरण चलो सब जाहीं। शरण गये कहिये कछु नाहीं ॥  
 कोउ कह देहु जितो धन चाहैं। ऐसे सब मिलि बुद्धि उपाहैं ॥

दोहा—यहै शोच सब मिलि पंगे, नहीं कहूं निरवार ॥

ब्रज भीतर नंद भवनमें, घर घर यही विचार ॥

सो०—अन्तर्यामी जानि, खेलत ते आये घरहिं ॥

देखतही नंदरानि, दृग भर लिये लगाय उर ॥

चितवत माता कुँवर कन्हारै। बूझत कत रोवत दुख पाई ॥  
 बूझहु जाय तात सों बातों। मै बलि जाउँ बदन जलजाता ॥  
 तुमहीं काज कंस अकुलारै। बाहर मत कहूँ जाहु कन्हारै ॥  
 जाय तातको शोच मिटावो। अपने मैथुरे वचन सुनावो ॥  
 आयो श्याम नंद पै धायो। जान्यो मात पिता दुख पायो ॥  
 बूझत नंदहि कुँवर कन्हैया। तात दुखित कत तुम अरु मैया ॥  
 मोसों बात कहौ किन सोई। कहा शोच वश हो सब कोई ॥  
 नंदलाल कनियां बैठारे। कहा कहौ तुम सों मै प्यारे ॥  
 जबते जन्म भयो सुत तेरो। करत कंस तुमसों भरझेरो ॥  
 केतीकँवर टरी तुम्हारी। कुलदेवन कीन्हों रखवारी ॥  
 प्रथमाहिं अधम पृतना आई। शकट तृणा पुनि आयो धाई ॥  
 वत्सबका अघ पुनि दुख दीन्हों। सबते तोहि राखि विधिलीन्हों ॥

१ अतिशय । २ लवलीन । ३ गृह । ४ अन्तरके जाननेहारे । ५ आंखें ।

६ मीठे । ७ बलायें ।



दोहा-कालीदहके फूल अब, पठये भूप मँगाय ॥

सबते यह गाढ़ी परी, कोकरि लेय सहाय ॥

सो०-जो नहि आवैं फूल, लिख्यो कंस मोहिं डाटिकै ॥

करौं ब्रजहि निर्मूल, बांधि मँगाऊं तब सुतन ॥

बाबा तुम काहे दुख पाई । कहत कौन धौं करै सहाई ॥

सो देवता ब्रजहिके माहीं । रहत हमारे संग सदाहीं ॥

लीन्हों जिन सब ठोर बचाई । करिलेहैं सोइ देव सहाई ॥

सोई कंसहि फूल पठैहै । ब्रजवासिनको शोच मिटैहै ॥

कंस केश गहि सोई मारै । असुर मारि भूभार उतारै ॥

सब मिलि सोई देव मनावो । अपने मनते शोच मिटावो ॥

सुनत महर हरि मुखकी वानी । भये सुखी धीरज उर आनी ॥

इष्टदेवको शीश नवायो । जहां तहां तुम श्याम बचायो ॥

शरण शरण प्रभु शरण तुम्हारी । अबहूँ करहु सहाय हमारी ॥

जाते कंस वास मिटि जाई । रहैं सुखी बलराज कन्हारी ॥

मात पितहि हरि इहि ढँगलाई । आप चले खेलन हर्षाई ॥

सखन मध्यं गये कुँवर कन्हारी । कछो खेलिये गेंद मँगाई ॥

दोहा-श्रीदामा यह सुनतही, गयो धाम निज धाय ॥

अपनी गेंदले आयके, दीन्हों हरिको आय ॥

सो०-चलो खेलिये धाय, बाहर घोष निकासिकै ॥

जहँ कोउ आय न जाय, गेंद खेल बनिहै तहाँ ॥

सखन संगलै बाहर जाई । रच्यो गेंदको खेल कन्हारी ॥

इक मारत इक भाजत जाहीं । रोकलेत इक बीचहि माहीं ॥

आपस मांझ परस्पर मारैं । नाना रँग करिकै किलकारैं ॥

भाजत मारत दूजो जाहीं । मारत धाय बहुरि सो ताहीं ॥

श्याम सखनको खेलत माहीं । यमुना तटं तन लीन्है जाहीं ॥

१ जडतेउजाह । २ बाल । ३ कुलदेवता । ४ बीच । ५ घर । ६ अपने ।

७ किनारे ।



आपन जात कमलके लालन । सखा संग लीन्हें सब ख्यालन ॥  
को जानहि यह हरिके ख्याला । यमुना निकट गये सब ग्वाला ॥  
श्याम सखाको गेद चलाई । अंग मोर सो गयो बचाई ॥  
परी गेद यमुना जल माहीं । है गयो खेल भंग तिहि ठाहीं ॥  
पकरी धाय फेंट श्रीदामा । मेरी गेद देहु तुम श्यामा ॥  
जान बूझ तुम गेद गिराई । बनिहै दीन्हें गेद मँगाई ॥  
और सखा मोको मति जानो । मोसों मतिहिं ठिठाई ठानो ॥

दोहा-सखा हँसत सब तारिदे, भली करी तुम कान्ह ॥

दीन्ही गेद बहाय जल, देहु श्रीदामहिं आन्ह ॥

सो०-सकल लोक शिरताज, पार न पावैं ब्रह्म शिव ॥

ताहि गेदके काज, फेंट पकरि झगरत सखा ॥

छांडि देहु मेरि फेंट सुदामा । राँरि बढावत थोरहि कामा ॥  
बदले गेद लेहु तुम मोसों । फेंट न गहौ कहौ मैं तोसों ॥  
छोटो बड़ो न जानत काहू । करत बराबर पकरत बाहू ॥  
हम काहिको तुमहि बराबर । तुम उपजे अब बडे नंदवर ॥  
ऐसे हम अब गये बिलाई । तुमहु बराबर नाहि कन्हाई ॥  
सुनहु श्याम हम तुम इक जोटा । कहा भयो तुम नंदके होटा ॥  
गेद दियेही बनै मँगाई । मोसों चलिहै नाहिं ठिठाई ॥  
मुँह सँभारि बोलत नाहिं मोसों । करिहौ कहा धुँताई तोसों ॥  
पुनि पुनि करत बराबर आई । तैं नाहिं जानत मोरि धुताई ॥  
प्रथम पूतना शकटा मान्यो । कागासुर अरु तृणा पछान्यो ॥  
वत्स वकासुर बनके माहीं । मान्यो सो कह जानत नाहीं ॥  
अब मान्यो पुनि देखत तोहीं । ऐसो धूत न जानत मोहीं ॥

दोहा-तुम मारे सो साँच सब, कतही लाल डराहु ॥

कंस कमल अब देहु तब, हमहिं मारियो जाहु ॥

सो०-कालिहि परिहै जानि, पकरि भँगैहै कंस जब ॥

१ झगडा । २ न रहे । ३ धूर्तता ।



देत फूल किन आनि, बहुत अचकरी करि रहे ॥

सांच कहौं मैं सुनु श्रीदामा । आयो यहां फूलके कामा ॥  
कितक बापुरो कंस बतायो । जाके भय तुम मोहि डरायो ॥  
केश पकरि गहि ताहि पछारों । देखहुगे तुम देखत मारों ॥  
कोटि कमल तिहि आज पठाऊं । ब्रजते ताको चास नशाऊं ॥  
कालीदह जल पियत मेरे सब । गहि ल्याऊं सोई काली अब ॥  
लीन्ही रिस करि फेंटे छुड़ाई । चढे कदम पर धाय कन्हाई ॥  
नीचे सखा हँसन सब लागे । श्रीदामाके डर हरि भागे ॥  
रोय चले श्रीदामा घरको । जाय कहत मैं महरि महरको ॥  
टेरंत कहि कहि सखा कन्हाई । लेहुंगेद मैं ल्यावत जाई ॥  
यह कहि नटवर मदन गोपाला । कूदि परे जलमें नँदलाला ॥  
हाय हाय करि सखा पुकारे । भये श्यामबिन बहुत दुखारे ॥  
रोवत चले ब्रजहि सब धाई । श्रीदामाको दोष लगाई ॥

दोहा-कोमल तनु अति साँवरो, साजे नटवर साज ॥

जलमें पैठि गये तहां, जहँ सोवत अहिराज ॥

सो०-यहि अंतर हरिमाय, भूखे है हैं जानि हरि ॥

खेलत ते अब आय, मोसों भोजन मांगिहैं ॥

यशुमति चली रसोंई कारन । तबहीं लींक उठी इक ग्वालन ॥  
ठिठकिरही उर शोचत ठाढ़ी । अली नहीं कछु चिंता बाठी ॥  
आई अजिर निकसि पछिताई । चली बहुरि सो दोष मिटाई ॥  
माँजारी तब पंथ कटाई । बहुरो यशुमति बाहर आई ॥  
व्याकुल भई निकरि गई द्वारे । कहँ धौं खेलत मेरे वारे ॥  
बायें काग दाहिने स्वर खरै । सुनि आई अति व्याकुल फिर घर ॥  
क्षण बाहर क्षण आंगन माहीं । टेरत हरिहि शांत मन नाहीं ॥  
तबहीं नंद चले घर आरत । देख्यो खान श्रवण फट कारत ॥  
दाहिने काहू रोय सुनायो । माथेपर है काग उड़ायो ॥

१ कमर । २ पुकारत । ३ गधा । ४ कान ।



सन्मुख गररी करत लराई । डरे नन्द अशकुन बहु पाई ॥  
आये वर मन मलिन विशेखी । व्याकुल मलिन वदन तिय देखी ॥  
बूझत यशुदहि नन्द डराई । काहे तव मुख गयो झुराई ॥

दोहा-चली रसोई करन हौं, छोक भई मुहि आज ॥

आगे है माँजारि पुनि, गई दूसरे भाज ॥

सो०-तबते मोजिय शौच, हरिधौं खेलत हैं कहां ॥

समुझ कंस कृत पोच, मेरे मनमें त्रास अति ॥

नन्द कहत पैठत घर माहीं । मोहिं शकुन नीके भे नाहीं ॥  
आज कहा यह समुझि न जाई । हैं धौं कित बलराम कन्हाई ॥  
महरि महर मन त्रास जनाई । खोजत हरिहि चले अकुलाई ॥  
सखा सकल इहि अंतर धाये । रोवत ब्रजहि पुकारत आये ॥  
महरि महर सों आय जनाई । यमुना बूडे कुँवर कन्हाई ॥  
सुनि दम्पति बूझत अकुलाई । कैसे कहां कहीं समुझाई ॥  
खेलत कदम चढ़े हरि धाई । कूदि परे कालीदह जाई ॥  
सुनतहि परी धरणि महँ मैया । कीनो सपनो सत्य कन्हैया ॥  
रोवत नन्द यमुन तट आये । बालक सब नंदहि सँग धाये ॥  
ब्रज घर जहां तहां यह बाता । ब्रजवासी धाये बिलखाता ॥  
कहां पन्यो गिरि कुँवर कन्हाई । दई बालकन ठौर बताई ॥  
त्राहि त्राहि करि नंद पुकारे । गिरे धरणि नहि अंग सँभारे ॥  
दोहा-लोटत अतिव्याकुल धरणि, परन चलत जल धाय ॥

कहत श्याम तुम दियो दुख, मोको बैसँ बुढाय ॥

सो०-लोग उठे सब रोय, दीन वचन सुनि नंदके ॥

कहत विकल सब कोय, हरि तुम ब्रजसूनो कियो ॥

नन्दहि गिरत सबहि गँहि राख्यो । ताक्षणको दुख जात न भाख्यो ॥  
कहत गोप नंदहि समुझाई । बन्यो मरण सबहीको आई ॥  
हरि बिन को जीवै ब्रजमाहीं । कहौ कान्ह किहि जीवन नाहीं ॥

१ भय । २ बीच । ३ नंद-यशोदा । ४ रोते पीटते । ५ अवस्था । ६ पकर ।



मोह मगन अति यशुमति भैया । ढेरत मेरे लाल कन्हैया ॥  
 आज कहां तुम बेर लगाई । माखन धन्यो खाउ किन आई ॥  
 अति कोमल तुम्हरे मुख योगू । जेवहु लाल लेहूँ मैं रोगू ॥  
 धौरी दूध धन्यो ओटाई । तुम निज कर दुहि गये अन्हाई ॥  
 सदमाखन अतिहित मैं राख्यो । आज नहीं तुमने कछु चाख्यो ॥  
 प्रातहिते मैं दियो जगाई । दंतवन करि जु गये दोउ भाई ॥  
 मैं चितवत तव पंथ कन्हआई । देखत आज अवार लगाई ॥  
 बैठो आय संग दोउ भैया । तुम जेवहु मैं लेहूँ बलैया ॥  
 शोकसिंधु बूडत नैदरानी । तनुकी सुधि बुधि सबै भुलानी ॥

दोहा-ब्रज युवती सुनि महरिके, वचन प्रेम आधीर ॥

अकुलानी रोवत सबै, बढी काठिन उर पीर ॥

सो०-बरजत यशुदाहि ग्वाल, यह कहि कहि हरि हैं भले ॥

सुत विर्योग विकराल, जात नहीं कहि मातको ॥

चौकपरीतनुकी सुधि आई । रोवत देखे लोग लुगाई ॥  
 तव जानी दह गिरे कन्हआई । पुत्र पुत्र कहिकै उठि धाई ॥  
 ब्रजवनिता सबसंगहि लागीं । श्याम विर्योग विथा सब पागीं ॥  
 कान्ह कान्ह कहि सकैल पुकारैं । तोरतलट उरसां कर मारैं ॥  
 अति व्याकुल यमुनातट जाई । गिरी धरणि यशुमति अकुलाई ॥  
 मुरझि परी तनुदशा भुलाई । प्राण रह्यो हरि सुरतिसमाई ॥  
 ब्रजवासी सब उठे पुकारी । जल भीतर कह करत मुरारी ॥  
 संकटमें तुम करत सहाई । अब क्यों नाहि बचावत आई ॥  
 मात पिता अतिही दुख पावैं । रोय रोय सब कृष्ण बुलावैं ॥  
 आय गये हलधर तेहि काला । देखी जननी विकल बिहाला ॥  
 नाक मूँदि जल सींचि जगाई । जननी कहि कहि ढेर लगाई ॥  
 बार बार जब हलधर देख्यो । भयो चेत कछु बलतन हेन्यो ॥

दोहा-कहत उठी बलरामसों, वनहिं तज्यो लखु आत ॥

१ लड़का । २ विछोहा । ३ सम्पूर्ण । ४ ध्यान । ५ माता ।



कान्ह तुमहिं बिन रहत नहिं, तुमसों क्यों रहिजात ॥  
सो०-मगन शोच सर मांझ, कहत लै आवहु कान्ह कोउ ॥

भूखे द्वैगड सांझ, आज कछु खायो नहीं ॥

कबहुँ कहत बनगयो कन्हई । कबहुँ बतावत घर समुहाई ॥  
कान्ह कान्ह कहि ढेर लगावै । कित खेलत कहि लाल बुलावै ॥  
अतिही मोह बिकल नँदरानी । करत बोध हलधर मृदुबानी ॥  
कतरोवत तू यशुमति मैया । नीके हैं धरु धीर कन्हैया ॥  
श्यामहिं नेक कहूँ डर नहीं । तू कत डरपत है मनमाहीं ॥  
तेरी सों मैं कहत पुकारे । वह काहूके मरै न मारे ॥  
जिन काली भय होहु दुखारी । तू अपने मन देखु विचारी ॥  
पहिले बकी कपट करि आई । तब दिन दशके हते कन्हई ॥  
शकटा तृणावर्त्त पुनि आयो । तू देखत हरि तिन्हें नशांयो ॥  
वत्स बका अघ बनमें मारे । विष जलते सब सखा उबारै ॥  
अब वे कालीनाथ लैऐहैं । कमल पठाय कंसको दैहैं ॥  
मोहिं भरोसो कान्हर केरो । मानों सत्य कहो सुनु मेरो ॥

दोहा-मोहिं दुहाई नंदकी, अबहीं आवत श्याम ॥

नाग नाथ लै आवहीं, तौ कहियो बलराम ॥

सो०-सुनि हलधरके बैनै, अति उदार हरिके चरित ॥

भयो कछुक उर चैन, जो कछु कराहि सु सोह सब ॥  
बांह पकरि बलको बैठाई । लैबलाय उर रही लगाई ॥  
अति कोमल तनुधरे कन्हई । पहुँचे कालीके ढिग जाई ॥  
हरिको देखि उरगकी नाँरी । रही चारुमुख चिह्न निहारी ॥  
कहत कौन तू इत कित आयो । अति कोमल तनुकाको जायो ॥  
बारहि बार कहति अकुलाई । वेणि भाज इतते कितजाई ॥  
देखै नाग जागकै जवहीं । है है भस्म क्षणक में तबहीं ॥  
सुनत नाग नारीकी वाणी । बोलें हैंसि हरि सारंग पाणी ॥

१ कसम । २ मान्यो । ३ वचन । ४ सर्प-काली । ५ स्त्री ।



पठयो मोहिं कंस नृपराई । तू याको अब देहु जगाई ॥  
 कंस कहा तू इनहिं बतैहै । एक फूंकमें तू जरिजैहै ॥  
 अजहूं भाजि कछो करि मेरो । लगत छोह देखत तनु तेरो ॥  
 भरहु कंस जिन तोहिं पठायो । तूकत इहां मरणको आयो ॥  
 बालक जानि दया अति मेरे । दुख पैहैं पितु माता तेरे ॥

दोहा—अरी बावरी सर्पसों, कहा डरावत मोहिं ॥

जैसो मैं बालक प्रकट, अबहिं दिखावहुं तोहिं ॥

सो०—तू किन देत जगाय, देखौं मैं याके बलहि ॥

यापै कमल लदाय, लैजैहों इहि नाथ ब्रज ॥

सुनत वचन अहिनारि रिसानी । छोटे वदन कहत बड़िवानी ॥  
 खगपतिसों सरवर जिनठानी । ताहि कहत नाथन अज्ञानी ॥  
 देखतही हैहै जर छारा । केतिक तू बैपुरो सुकुमारा ॥  
 वपुरो मोहिं कहत अहिनारी । बोलत नाहिन बात सँभारी ॥  
 अबहीं तोहिं वपुरि करि डारौं । एकहि लात खँसमतुवमारौं ॥  
 सोवत काहू मारिय नाहीं । चलि आई है बात सदाहीं ॥  
 ताते तू पति देहि जगाई । देखौं मैं याकी मनसाई ॥  
 जो पै तोहिं मरन बुधि आई । तो तूही किन लेत जगाई ॥  
 तब हरि झटकि ताहि दैगारी । दावी चरण पूछ अहिकारी ॥  
 मसकी नेक धरौणि सो लाई । काली उरग उठ्यो अकुलाई ॥  
 आयो जानि गरुड भय बाढ्यो । देख्यो बालक आगे ठाढ्यो ॥  
 तबहिं क्रोध करि गर्व बढ़ायो । झटकि पूछ अति रिसकरि धायो ॥

दोहा—दांव घात लाग्यो करन, सहसौ फन फटकार ॥

बार बार फुंकार कर, डारत विषकी झार ॥

सो०—जरत यमुनको नीर, जात फेन उतरात विष ॥

परसत नाहिं शरीर, अरिमर्दमोचन श्यामके ॥

१ मोह । २ गरुड । ३ छोटा । ४ पति । ५ पृथ्वी । ६ सहस्र-हजार ।  
 ७ पानी । ८ स्पर्श । ९ कालीका गर्व निवारणवारे ।



कियो युद्ध बहु उरग अवाई । सुरे नहीं नेकहु यदुराई ॥  
 कहत परस्पर अहि की नारी । देखहु यह बालक अति भारी ॥  
 विष ज्वाला जल जरत यमुनको । याकेतनु परसत नहितनको ॥  
 यह कछु मंत्र यंत्र धौं जानै । अतिकोमल विषनेक नमानै ॥  
 सहस्रांकनन करत अहिघाता । अबलों बच्चो पुण्य पितु माता ॥  
 तब अहिराज श्याम तन हेरी । कहत पूछ दावी इन मेरी ॥  
 अतिहि क्रोधकरि आतुर धाई । हरिके अंग गयो लपटाई ॥  
 नखते शिखलौं अहि लपटाई । कहत करी इन बहुत ठिठाई ॥  
 कौतुकनिधि हरि सब गुण खानी । दियो दांवइहि अहिको जानी ॥  
 तिहि अवसर सुर सुनि गन्धर्वा । अति व्याकुल आये ब्रजसर्वा ॥  
 उरग नारि मन मन पछिताहीं । हरिको रूप समुझि मनमाहीं ॥  
 कहैं गर्वकरि अति यह आयो । काल विवश पगइतहिं चलायो ॥

दोहा—काली हरिसों लिपटकै, गर्व कियो मन मांह ॥

कहत मोहिं जानत नहीं, मैं सर्पनको नाह ॥

सो०—भंजन गर्व गोपाल, गर्व भरे सुनि अहि वचन ॥

कीन्हो वपुष विशाल, विकल भयो अहिराजतन ॥

जबहिं श्यामतन अति विस्तारो । टूटन लग्यो अंग सब सारो ॥  
 शरण शरण तब उरग पुकारो । मैं नाहिं जान्यो रूप तिहारो ॥  
 जीवदान प्रभु मोको दीजै । अपनी शरण राखि मोहिं लीजै ॥  
 यह वाणी सुनतहि भगवाना । सकुचि गये हरि कृपानिधाना ॥  
 यहै वचन गजराजसुनायो । गरुड़ छांड़ि ताके हित आयो ॥  
 यहै वचन सुनि द्रुपदसुताको । वसन बढ़ाय दियो पुनिवाको ॥  
 यहै वचन सुनि लाक्षा गृहते । लीने राखि पाण्डवन जरते ॥  
 यहवाणी सहिजात न श्यामहिं । दीनबन्धु करुणाके धामहिं ॥  
 लीनो अंगसँकोच कृपाला । देख्यो विकल शिथिल जबव्याला ॥

१ विह्वल । २ चोटी । ३ राजा । ४ शरीर । ५ गजेन्द्रमोक्षाख्यानका हाथी ।

६ द्रौपदी । ७ लुगडा-वस्त्र । ८ नाग ।



पगसों चापि नाकधरि फोरी । लीनो नाथ हाथगहि डोरी ॥  
 कूदिचढ़े हरि ताके शीशा । मनमन करत विचार अहीशा ॥  
 मैं यह सुन्यो हतो विधिपाही । कृष्ण अवतार होहि ब्रजमाहीं ॥

दोहा-ते गोकुलमें अवतरे, मैं जान्यो निरधार ॥

ये अविनाशी ब्रह्महैं, ब्रज कृष्णा अवतार ॥

सो-किये बहुत फन घात, बार बार पछितात मन ॥

स्तुति करत लजात, रह्यो दीनहैं सकुचि अति ॥

देख्यो व्याल विहाल कृपाला । दियो दरश निज दीनदयाला ॥  
 देखि दरश मनहर्ष बढ़ाई । बोल्यो दीन वचन अहिराई ॥  
 मैं अपराध कियो बिन जाना । क्षमौ नाथ तुम क्षमानिधाना ॥  
 तामस योनि कीटें बिषजानो । कौनभांति तुमको पहिचानो ॥  
 अब कीन्हों प्रभु मोहिसनाथा । दीनो दरश जगतके नाथा ॥  
 अशरण शरण नाथ तब वाना । कहत सन्त सब वेद पुराना ॥  
 ते अपराध क्षमा सब कीजै । अब प्रभु शरणराखि मोहिलीजै ॥  
 आज धन्य यह मेरो माथा । जापर चरण दिये मम नाथा ॥  
 अब ये चरण परसिप्रभु तेरे । मिटे दोष दुख अब सब मेरे ॥  
 जो पदकमल पुनीत तुम्हारे । निशिदिन रहत रमा उरधारे ॥  
 शिव विराञ्चि सनकादिक ध्यावैं । जे पद योगी ध्यान लगावैं ॥  
 जे पदपद्म सलिल सुर सरित्तो । तीन लोककी पावन करिता ॥

दोहा-जिन पद पंकज परसते, गति पाई ऋषिनारि ॥

सुर नर मुनि वन्दित तिन्हें, सन्तत प्राण अधारि ॥

सो-फिरत चरावत गाय, श्रीवृन्दावन जे चरण ॥

भक्तनके सुखदाय, ब्रजवासी जन दुखहरण ॥

जे पद पंकज परम सुहाये । प्रभु मैं आज सुलभ करि पाये ॥  
 गरुड़ वास ते इत भजिआयो । भलो कियो मोहि गरुड़ सतायो ॥  
 जाते दरश भयो, प्रभुतेरो । अब भय ताप मिट्यो सब मेरो ॥

१ ब्रह्मा । २ कीडा । ३ पाप । ४ आकाशगंगा । ५ कमलसे पद । ६ सदैव । ७ सहज ।



आज भयो मैं नाथ सनाथा । गहो नाथ मम प्रभु निजहाथा ॥  
 सुनत दीन कालीकी वानी । दीनबंधु अतिशय सुखमानी ॥  
 फनप्रति चरण सरोज छुवाये । ताके सब सन्तोष नशाये ॥  
 तब ब्रजनाथ भक्त हितकारी । यह अपने मनमाहिं विचारी ॥  
 कालीको ब्रज देश दिखैये । कमल भौर यापै लै जैये ॥  
 हैं हैं ब्रजके लोग दुखारी । क्यों जाय अब तिनहिं सुखारी ॥  
 कमल कंसको देखै पठाई । काहि चढ़ै गो ब्रजपर आई ॥  
 लीन्है अहिपर कमल लदाई । चले ब्रजहिं ब्रज जन सुखदाई ॥  
 लियो नाथ गहि अहि उचकाई । फनपर ठाढ़े कुँवर कन्हैयाई ॥

दोहा-उरगँनारि कर जोरि कै, प्रभुके सन्मुख आय ॥

करत विनय अति दीनहै, पति हित हरिहिसुनाय ॥

सो०-इत यशुमति उर माहिं, उठी लहर अति प्रेमकी ॥

कान्हर आयो नाहिं, कहत रोय बलराम सों ॥

कहत राम सुख यशुमति मैया । अवहीं आवत कुँवर कन्हैया ॥  
 नेक धीरधर मति अकुलाई । यह सुनि कै बलकी बलिजाई ॥  
 पुनि यह कहत कान्ह नाहिन अब । झूठहिं मोहिं प्रबोध करत सब ॥  
 भई विनासुत व्याकुल मैया । कहत कहां मेरो बाल कन्हैया ॥  
 गिरी धरणि व्याकुल सुरझाई । रोयउठे सब लोग लुगाई ॥  
 ब्रजवासी सब भये विहाला । कहत कहां मोहन नँदलाला ॥  
 तुम बिम यह गति भई हमारी । आवत नहीं धाय बनवारी ॥  
 प्रातहिते जल मांझ समाने । तुमहिं विना युग याम विहाने ॥  
 अबको बसै जाय ब्रजमाहीं । धृग धृगं जीवन तुमहिं विनाहीं ॥  
 अति व्याकुल रोवत नँदराई । विकल मनहुं प्राणि मणी गँवाई ॥  
 यशुमति भाय चलत जल माहीं । राखति ब्रज युवती गहि बाहीं ॥  
 हलधर शबहिनको समझावैं । विना श्याम कोउ धीर न पावैं ॥

१ दुःख । २ बोझा । ३ कालीकीनाथ पकड़ । ४ कालीकी पत्नी । ५ सम-  
 भावत । ६ दशा । ७ धिक्कार-तुच्छ । ८ दौड़ ।



दोहा-कहत यशोदा नंदसों, धृग धृग बारहिं बार ॥

और किते दिन जियहुगे, मरतनहीं मोहिंमार ॥

सौ०-कर देखहु मन ज्ञान, ऐसे दुखमें मरण सुख ॥

नंद भये विन प्रान, मूर्च्छि परे सुनि तिय वचन ॥

तबहिं धाय बल पिता जगायो । बार बार कहि कहि समुझायो ॥

वृथा मरत कोहे सब कोई । कान्हार भारन हार न कोई ॥

हलधर कहत सुनहु ब्रजवासी । वे अन्तर्यामी अविनाशी ॥

सब गुणसागर आनंद राशी । रमा सहित जलहीके वासी ॥

मेरो कह्यो सत्य करि मानो । आवत श्याम धीर उर आनो ॥

यमुनाके भीतर तिहिकाला । उठ्योसलिल झक शोर विशाला ॥

बोलि उठे आतुर बलरामा । वे देखो आवत वनश्यामा ॥

सुनत वचन लखि कै उठि धाये । यमुना नीर तीर सब आवे ॥

कोउ जलमें कोउ बाहर ठाढे । दरशातुर विरहानल बाढे ॥

प्रगट भये जलते तेहि काला । ब्रज जन जीवन नंदके लाला ॥

कमल भार काली पर लीन्हे । नटवर भेष मैनोहर कीन्हे ॥

भये सुखी सब ब्रजके वासी । लखिहरि वदन परम सुखरासी ॥

छं०-हरि वदन लखिकै राशि सुखकी मुंदित ब्रजवासीभये ॥

मनहुँ बूडत नाव पाई परम उर आनंद छये ॥

मात पितु लखि जो भयो सुख जात सो कापै कह्यो ॥

पुलकतनमन हरषि गदगद प्रेम जल लोचन बह्यो ॥

चकित हरितन लखत इकटक मिलनको आतुरहियो ॥

श्याम निरर्तत अहि फनन पर खौर चन्दनतलु क्रियो ॥

श्रवण कुण्डल लाल लोचन चारु मुकुट विराजहीं ॥

मनहुँ मरकत गिरि शिखर मणि मोर तापर राजहीं ॥

पीतपट कटिकाछनी उर माल मणि भूषण सजे ॥

१ श्रीकृष्ण । २ नाशनही । ३ पानी । ४ दुःखसमरे । ५ देखकर । ६ मनको

लुभानेहारा । ७ प्रसन्न । ८ नाचत ।



नृत्य ताण्डव करत फण प्रति व्योमदिव दुन्दुभिबजे ॥  
 भई जय ध्वनि गर्गन वर्षहिं सुमन सुर आनंद भरे ॥  
 गन्धर्व गुण गण गगन गावत तान तालन अनुसरे ॥  
 उरगनारी श्याम सन्मुख करत प्रस्तुति आवही ॥  
 नाथ अब अपराध क्षमि कर कर कृपा पति पावही ॥  
 राखे चरण निज शीश याके अति बड़ाई इन लई ॥  
 ऐसी बड़ाई औरको प्रभु नाहिं तुम कबहूँ दई ॥  
 शेष इक ब्रह्माण्ड भरि शिर राखि मन गर्वित कियो ॥  
 कोटि कोटिब्रह्माण्ड तवतन अधिक इन यह भरिलियो ॥  
 सुर असुर नर नाग खग मृग कीट जन सब रावरे ॥  
 क्षमिय अब अपराध अहिके शुभग सुन्दर सांवरे ॥  
 दोहा-सुनि अहिनारिनके वचन, करुणामय यदुराय ॥  
 उतरि परे अहिशीशते, यमुनाके तट आय ॥  
 सौ०-तट पर कमल धराय, कालीको आयसुदियो ॥

उरगद्वीप अब जाय, करहु वास निर्भय सदा ॥  
 तब काली कह सुनहु कृपाला । तब वाहेन डर डरत विशाला ॥  
 धनि ऋषि शाप दियो है ताहीं । ताते आय सकत ह्यानाहीं ॥  
 तबमें भागि बच्यो इत आई । नातरलेत मोहिं सो खाई ॥  
 चरण चिह्न लखि तव फण भरे । परिहै गरुड़ आय पग तेरे ॥  
 तू अब अति खगपतिहि डराई । अपने द्वीप करहु सुख जाई ॥  
 याते बडो कौन सुखनाथा । अभयदान पद परस्यो माथा ॥  
 जे पद कमल भजन परतापा । जन प्रह्लाद मिटे सन्तापा ॥  
 ते पद चिह्न शीश परधारी । जन्म जन्मको भयो सुखारी ॥  
 उरगिन सहित नाइ पद माथा । गयो उरग द्वीपहि अहिनाथा ॥  
 जैजै ध्वनि नभसुरन बखानी । धन्य धन्य जनके सुखदानी ॥

१ आकाश । २ पुष्प । ३ आज्ञा । ४ गरुड़ । ५ दुःख ।



शरण राखि काली अहि लीन्हों । जलते काढ़ि कृपा कारि दीन्हो ॥  
फन पर चरण चिह्न गगटाई । कठिन गरुड़की त्रास मिटाई ॥

दोहा-धन्य धन्य प्रभु धन्य कहि, सुदित सुमन वर्षाय ॥

गये देव निज निज सदन, हृदय परम सुख पाय ॥

सो०-द्वीप पठायो व्याल, सुरगण सुर लोकहि पठै ॥

आयो निकसि गोपाल, ब्रजवासी जन सुख करन ॥

धाय मिले सगरे ब्रजवासी । विरह ताप तनुकी सब नाशी ॥

माता दौरि कण्ठलपटानी । पुलकरोमतन गद्गदवानी ॥

नयन नीर अति प्रेम अधीरा । उरलगाय मेटत उर पीरा ॥

कहि कहि भरो बाल कन्हैया । दुहूं करन सों लेत बलैया ॥

धाय नन्द उरसों लै लाये । गये प्राण मानहुं फिरि आये ॥

गद्गद बैन नयन जल ढारो । कहत जन्म फिरि भयो तुम्हारो ॥

बार बार उर सों लपटावत । दारुण उरकी ताप जशावत ॥

प्रेमाकुल देखी बल माता । मिले रोहिणी सों सुखदाता ॥

निरखि वदन कह यशुमति मैया । मै बरजौनित तुमांहि कन्हैया ॥

यसुना तीर न्हान मति जाहू । तुम बरजो मानत नहिं काहू ॥

मैं निशि स्वप्ने मांझ डरान्यो । सोई कछु आय प्रकटान्यो ॥

कंस कमलके फूल मँगाये । ब्रजवासी सब अतिहि डराये ॥

दोहा-मैं गेंदहि खेलत यहां, आयों यसुना तीर ॥

मोहिं डारि काहू दियो, कालीदहके नीर ॥

सो०-देख्यो उरग विशाल, जाय तहां मैं डरो अति ॥

तब पूंछयो मोहिं व्याल, किन पठयो तोको इहां ॥

तब ऐसे मैं ताहि बतायो । कमल काज मोहिं कंस पठायो ॥

यह सुनताहिं अहि उठयो डराई । मोको फनपर लियो चढ़ाई ॥

कमल लियो निज पीठ लदाई । आपुहि आय गयो पहुँचाई ॥

ऐसे जननी बोध कृपाला । सुनत वचन सब ब्रजकी बाला ॥

१ डर । २ प्रसन्नतासे । ३ गृह । ४ जल । ५ समझाकर ।



लै लै हरिको उरसों लावैं । कठिन बिरहकी शूल मिटावैं ॥  
 श्याम बिना बहुतै दुख पायो । सोहरि तिनको ताप नशायो ॥  
 लखे सखा सब आरत बाढे । प्रेमातुर मिलवेको ठाढे ॥  
 गये दौरि तिन पास कन्हवाई । मिले धाय सब कण्ठ लगाई ॥  
 कहत सखा धनि धन्य कन्हैया । जो तुम कह्यो कियो सोइ भैया ॥  
 तुमहौ सब ब्रजके सुखदानी । कंस मारिहौ तुम हम जानी ॥  
 कहा भयो जो तुमहौ बारे । हँ तुम्हरे गुण सबते न्यारे ॥  
 भलो यदपि लिहनको छोटे । कौनकाज गजलम्बो मोटे ॥

दोहा—तुम हम पर रिस करि गये, सो अब देहु भुलाय ॥

यह सुनतहि हरि हँसि उठे, मिले बहुरि हर्षाय ॥

सो०—जब हलधर अरु श्याम, मिले बिहँसि दोउ मनहि मन ॥

निरखि मगन नरबाम, भेद न कोउ जानहीं ॥

सब कोउ कहत धन्य बलराम । तुम जो कही करी सोइ श्याम ॥  
 तब हरि कह्यो नन्दसों जाई । मेरे मनहि बात यह आई ॥  
 आज बसैं सब यमुना तीरा । अति रमणीक सुगन्ध समीरा ॥  
 यहां कीजिये भोग विलासा । होत मात सब चलहि अर्वासा ॥  
 कमल पढाय कंसको दीजै । सुनहु तात अब विलंबनकीजै ॥  
 गोप जाय आवैं पहुँचाई । कारहि चढ़ै नतु ब्रजपर धाई ॥  
 यह सुनि नन्द बहुत सुख पायो । सब ब्रजवासिनके मन भायो ॥  
 तुरत ग्वाल बहु धरन पठाये । षट्हरस भोजन बहुत मैगाये ॥  
 यमुनातीर गोप समुदाई । भोजन कियो बहुत सुखपाई ॥  
 नन्दराय तब शकंठ मैगाये । कोटि कमल तिनपर लदवाये ॥  
 बहुत भार दधि घृतके कीन्हे । ते अहिरन कांधे धर लीन्हे ॥  
 अपनी सरजे गोप सुहाये । तिनीहि संग करि नृपहि पठाये ॥

दोहा—बहुत विनय करि कंसको, दीन्हों पत्र लिखाय ॥

कहियो मेरी ओरते, नृपसों ऐसी जाय ॥

१ पीडा । २ छोटे । ३ पृथक् । ४ स्त्री । ५ पवन । ६ घर । ७ छकडा ।



सो०-गयो कमलके काज, कालीदह मेरो सुवन ॥

तुव प्रताप ते राज, आप गयो पहुँचाय अहि ॥

कोटि कमल नृप मांगि पठाये । तीनिकोटि तहँते हैं पाये ॥  
 सो राखे जल मांझ सजाई । आयसु होय तो देखै पठाई ॥  
 तब गोपन सों कुँवर कन्हाई । ऐसे बोलि उठे सुसकाई ॥  
 नृपसों लीजो नाम हमारो । यह कारज हम कियो तुम्हारो ॥  
 कमल शकट दधिघृतके भारा । चले गोपले नृपके द्वारा ॥  
 राजद्वार शकटन पहुँचाई । जाय पौरियन खबरि जनार्ण ॥  
 तुरत पौरिया भीतर धाई । समाचार सब नृपहि सुनाई ॥  
 सुनत बात यह मनहि डरान्यो । आपनिकासि आयो अलुरान्यो ॥  
 देखी शकट भीर अति भारी । भयो चकित सुधिबुद्धि बिसारी ॥  
 कमल देखि भय भयो विशाला । लगे ताहि भनो व्याल कराला ॥  
 नन्द बिनय तब गोपन भारी । दीनो पत्र भेंट सब राखी ॥  
 गोपन बहुरिं कह्यो नृपराई । नन्दसुवन यह कह्यो कन्हाई ॥

दोहा-हम कालीदह जाय यह, कियो राजको काम ॥

नृप हमको जानत नहीं, कहियो मेरो नाम ॥

सो०-सुनत श्याम सन्देश, देखि कमल अति भय विकल ॥

भीतर गयो नरेश, मन बाढी चिन्ता विपुल ॥

मनहीं मन यह करत विचारा । यासों मेरो नाहि उबारा ॥  
 दैत्य गये ते सबहि नशायें । काली ते ऐसे बचि आये ॥  
 ताहीपर कमलनलै आये । सहस शकट भरि मोहि पठाये ॥  
 कबहुँ कहत गोपनको मारों । इनको हाते तुरत निकारों ॥  
 फेर कछु मनमें भय पावै । करत विचार न कछु बनि आवै ॥  
 पुनि सँभारि धीरज उन कीन्हो । गोपन बोलि भीतरहि लीन्हो ॥  
 हृदय दुखित ऊपर सुखमानी । पहिराये दीने मनमानी ॥  
 सरोपाव नन्दहुको दीन्हो । कहियो काज बड़ो तुम कीन्हो ॥

१ पुत्र । २ कालीनाम । ३ कंस । ४ सर्प । ५ मारे । ६ हजार ।



तेरे सुत बलराम कन्हई । एक दिवस देखिहौं बुलाई ॥  
 यह सुनि अति पुरुषारथ कीन्हो । कालीदहके फूलन लीन्हो ॥  
 यह कहि बिदा किये सब ग्वाला । भयो कंस उर शोच विशाला ॥  
 मनहीं मन सोचत हरिके गुन । रह्यो काठ ज्यों भीतरहीधुन ॥

दोहा-तब दावानल बोलिके, कह्यो मरम सवताहि ॥

देखौं मैं तेरे बलहि, तू अब ब्रजको जाहि ॥

सो०-जाय कीजियो छारें, ब्रज सब ब्रजवासिन सहित ॥

बचहि न नन्दकुमार, ऐसो यत्न विचारि उर ॥

दावानल सुनि नृपकी बानी । चलयोरिसाय गर्व उर आनी ॥  
 करौं भस्म इक पल महुँ जाई । सहित गोप नन्द सुवन कन्हई ॥  
 नृपको काज आज करि आऊं । जो कहूँ एक ठौर सब पाऊं ॥  
 इहां गोप कमलन पहुँचाई । आये यमुन तीर हर्षाई ॥

नन्द तुरत सब निकट बोलाये । सुनत सकल ब्रज जन जुरि आये ॥  
 गोपन कही नन्द सों आई । लिये कमल नृप अति सुखपाई ॥  
 दियो हर्ष तुमको पहिरायो । सुंदित नन्द लै शीश चढायो ॥  
 अपने सब पहिराव दिखाये । लखि सब ब्रजवासिन सुखपाये ॥

हरिको नाम सुन्यो जब राजा । हरषि कह्यो कीनो उन काजा ॥  
 इक दिन बल मोहन दोउ भाई । देखहुँगो मैं इहां बुलाई ॥  
 यह सुनि नन्द बहुत सुखपायो । हरबिभूप मो सुतन बुलायो ॥  
 करी कृपा अति नृप हरिपाहीं । सब नर नारि हरषि मन माहीं ॥

दोहा-कहत श्याम बलराम सों, हँसि हँसिकै यह बात ॥

नृप हम तुम देखन लिये, कह्यो बुलावन ताँत ॥

सो०-ब्रज जन परम हुलास, इक सुख हरि अहिते वचे ॥

मिथ्यो कंसको त्रास, दुतिय कमल पठये नृपहिं ॥

अथ दावानलवर्णन लीला ॥

यहि विधि ब्रजजन अति सुख पायो। खान पान करि दिवस बितायो ॥

२ भेद । २ राख । ३ हर्षित । ४ पिता । ५ कालीनागते ।



सोये सब मिलि यमुना तीरा । राखि हृदय सुन्दर बलवीरा ॥  
 वहां असुर दावानल आयो । चाहतहै सब ब्रजहि जरायो ॥  
 देखे सब ब्रजजन इकठाहीं । कियो हर्ष अपने मन माहीं ॥  
 प्रकटी दावानल चहुँ ओरा । अतिहि प्रचण्ड पवन झक झोरा ॥  
 दशहूँ दिशिते घेरत आवै । तृण तरु खग मृग जीव जरावै ॥  
 जागि परे सब ब्रज नर नारी । कहैं चहुँ दिशि लगी दवारी ॥  
 भये चकित सब अति मन माहीं । काहू दिशि मंग देखित नाहीं ॥  
 चहत चलन भजि नहीं निकासू । लेत सब भारे शोकउसासू ॥  
 आयगई दब अतिहि निकटहीं । चले कहत सब यमुना तटहीं ॥  
 अब न देखियत कहूँ उवारा । बढी अनल पहुँची नभ झारा ॥  
 ब्रजके लोग अतिहि अकुलाने । जरे सकल मन मांझ डराने ॥  
 छं०—अति विकल सब डरे ब्रज जन देखि अनल भयावनो ॥

भई धरै नभज्वाल पूरण धूम धुंध डरावनो ॥  
 लपट झपटत जरत तरुवर गिरत बहि भहरायकै ॥  
 उठत शब्द अघात चहुँ दिशि बढत झरझहरायकै ॥  
 फटत फल फूटत पटकदल जरत बरत लताधनी ॥  
 काँस चटकत बाँस पटकत अंगार उचटत नभतनी ॥  
 हरिण मोर बराह वन पशु विकल पन्थ न पावहीं ॥  
 जरत जहँ तहँ जीव खग मृग विपुल जित तित धावहीं ॥  
 दोहा—दावानल अति क्रोध करि, लियो दशहूँ दिशि घेर ॥

उठी अनल ज्वाला प्रबल, मानहुँ अचल सुमैर ॥  
 सो०—धूम धुन्ध विकराल, भयो अँधेरो गगन सब ॥

बिच बिच चमकत ज्वाला, तडित माल जनु सघनघन ॥  
 भये देखि ब्रजलोग दुखारे । तब सब हरिकी शरण पुकारे ॥  
 कहत श्याम तुम करो सहाई । जरत सकल ब्रज लेहु बचाई ॥  
 तृणा शकट बक अघ तुम मारे । कंस नासते तुमहि उवारे ॥

१ तिनका । २ आग । ३ मार्ग । ४ आकाश । ५ अग्नि । ६ धरती ।



जहँ जहँ परी गाढ हम आई । तहाँ तहाँ तुम करी सहाई ॥  
 अब हरि यत्न कछु सो कीजै । हमहिं बचाय अग्निसे लीजै ॥  
 व्याकुल गोप नन्द मन माहीं । करत विचार वनत कछु नाहीं ॥  
 यशुमति सबहिन कहत पुकारे । दई परचोहै ख्याल हमारे ॥  
 नाता रूप असुर बहु आये । कोउखन कोउ पशु रूप बनाये ॥  
 कोऊ पवन रूपहै आयो । भयो तहां कोउ पुण्य सहायो ॥  
 आज उरगँसों बच्यो कन्हआई । बड़े भाग्य नृप नास नशाई ॥  
 अब यह बाढी अग्नि अपारा । होत सकल ब्रजको संहारा ॥  
 किमि बचिहैं यह बालक दोऊ । माँहिं लखि परत उपाय न कोऊ ॥

दोहा—सुनि जननीके वचन प्रभु, लखि सब ब्रज वेहाल ॥

कह्यो सबन धीरज धरो, मति डरपौ लखि ज्वाल ॥

सौ०—कौतुक निधि गोपाल, को जानै तिनके गुणनि ॥

दुख सुख जिनके ख्याल, जनके हित कारक सदा ॥

तब हरि कह्यो डरो मति कोई । बिनबहु देव बहुरि सब सोई ॥  
 जिन सहाय कीनी अवताई । सोई करें सहाय सदाई ॥  
 हरिहँसि सबसों आखि सुँदाई । करिगये अग्निपान सुखदाई ॥  
 हैगइ चहुँ दिशि शीतलताई । रह्यो न अग्निलेश कहूँ राई ॥  
 खोलि देहु दग सब हरि बोलै । सुनतहि तुरत सबन दग खोले ॥  
 देखिचकित सब ब्रज नर नारी । कहत धन्य धनि तुम बनवारी ॥  
 धरणि अकाश बराबर ज्वाला । लपट झपट अतिही विकराला ॥  
 नहिं बरस्यो नहिं सींच्यो काहू । गयो बिलाय कहां धौं दाहू ॥  
 कैसे यह सब अग्नि बुझानी । हम यह कछु न काहू जानी ॥  
 तब हँसि बोलै कुँवर कन्हआई । वह करनी यह कहि न सुहाई ॥  
 तृणकी आग प्रथम बहु जागै । फिरि तिहि दुझत बिलंब न लागै ॥  
 सुनत श्यामकी कोमल वानी । भये सुखी सब त्रास नशानी ॥

दोहा—जीव जन्तु खग मृग जिते, भये सुखी ततकाल ॥



द्रुम वेली तृण हरित सब, प्रफुलित बन सुख माल ॥  
 सो०—श्याम सहायक जाहि, ताहि कहौ डर कौनको ॥  
 यह न बड़ाई वाहि, पांच तत्त्व उनके किये ॥  
 कहत परस्पर ब्रजकी नारी । हैं सखि बड़े वीर बनबारी ॥  
 देखत कोमल श्याम सलोना । यह सखि जानत है कछु ढोना ॥  
 नाथ्यो नाग पतालहि जाई । लायोतापर कमल लदाई ॥  
 मांगे कमल कंस नृपराई । कोटि कमल तिहि दिये पठाई ॥  
 दावानल नभ धरणि बराबर । घेर लिये ब्रजके नारी नर ॥  
 नयन मुँदाय कहा धौं कीन्हों । रख्यो नहीं कछु ताको चीन्हों ॥  
 ये उत्पात मिटैं उनहींपै । और न होय सकै किनहीं पै ॥  
 यह कोउ सखी बड़ी अवतारा । है यहही कर्ता संसारा ॥  
 लखि हरि चरित यशोदा मैया । चकित निरखि मुख लेति बलैया ॥  
 लखि सुत चरित मुदित नँदराई । करत गोप गण सकल बड़ाई ॥  
 कहत देव मुनि अति अनुरागा । हैं ब्रजवासिनके बडभागा ॥  
 जिनके संग श्याम सुख शीला । करत रहत नित नव रस लीला ॥  
 दोहा—एक दिवस निशि यमुन तट, बस सब गोपी ग्वाल ॥  
 होत प्रात निज निज सदन, आये सहित गोपाल ॥  
 सो०—हरि जनके सुखकार, विलसत विविध विलास ब्रज ॥  
 सन्तन प्राण आधार, ब्रजवासी जन जाहि बलि ॥  
 हरि ब्रज जनके दुख विसरावना करत चरित सुर मुनि मन भावन ॥  
 तुरत सकल ब्रज लोग भुलाये । कौन कंस कब कमल मँगाये ॥  
 कब हरि यमुना जलहि सप्राये । कालीनाग नाथि कब लाये ॥  
 कब दावानल जारन आयो । एक दिवस निशि कहाँ बितायो ॥  
 नहि जानत कछु नंद यशोदा । करत श्याम सोई बाल बिनोदा ॥  
 माखन मांगत कुँवर कन्हाई । बार बार जननी सों जाई ॥  
 आतुर दधिहि मथत नँदरानी । सद माखन हरिको रुचि जानी ॥

१ दिन रात । २ घर ।



कहत तनक तुम रहत ललारे । तुम्हें देउँ नवनीत पियारे ॥  
 मैं बलि भूख लगी तुम भारी । बात बनावत सुतहि दुलारी ॥  
 वृक्षत बात काहुकी कान्हहि । कहत श्याम सों सुनत न कान्हि ॥  
 झूठहि देत हुँकारी जननी । भूल गई सब हरिकी करनी ॥  
 तब लौं मथि दधि माखन कीन्हो । तुरतहि लै सुतके कर दीन्हो ॥

दोहा-लैलै अधरन परसि करि, माखन रोटी खात ॥

कहत प्रशंसा मधुर कहि, सुनत प्रफुल्लित मात ॥

सो०-जो प्रभु अलख अपार, दुर्लभ शिव सनकादिकहुं ॥

धन्य नन्दकी नार, ताको सुत कर मानई ॥

अथ प्रलम्बासुरवध लीला ॥

नित नव लीला करत कन्हई । तात मात ब्रज जन सुखदाई ॥  
 सुदित सकल ब्रजके नर नारी । निशिदिन सुख हरिचंद निहारी ॥  
 इक दिन श्याम राम दोउ भाई । खेलत सखन संग बन जाई ॥  
 नाना विधि सब करत कलोलैं । भांति भांतिकी वाणी बोलैं ॥  
 कबहुं मोर हंसकी नाई । बोलत हंसत श्याम सुखदाई ॥  
 कबहुं मधुरे स्वर सबगावैं । मध्य श्याम धन वेणु बजावैं ॥  
 कबहुं चढत तरुन पर जाई । कूदि परत गहि डार नवाई ॥  
 नाना विधिके खेलन खेलैं । बाल विनोद मोदरस केलैं ॥  
 तहां प्रलम्ब असुर इक आयो । कंसताहि दै पान पठायो ॥  
 सो छल रूप गोप वपु धारी । मिल्यो आय सब सखनमँझारी ॥  
 ताको ग्वाल न काहू जान्यो । यहतो असुर श्याम पहिचान्यो ॥  
 बलदाऊको दियो जनई । ताहि हतनको रच्यो उपाई ॥  
 दोहा-सखा बुलाये निकट सब, तिनहि कह्यो नँदलाल ॥

फल बुझाय अब खेलिये, भये सुदित सुनि ग्वाल ॥

सो०-द्वै बालक करि राय, सखा लिये तब बांदि सब ॥

आधे इक दिशि आय, आधे एक दिशा भये ॥

१ बताय । २ मारनको ।



निज निज जोट सखन जु रि लीन्हो। हलधर जोट दनुज सँग कीन्हो॥  
 आपसमें यह होड लगाई। जो हारै सो पीठि चढाई ॥  
 भांडीर वनलों लै जाही। फेर इहां पहुँचावै ताही ॥  
 फलको नाम बुझावन लागे। वृद्धदियो बल सबते आगे ॥  
 चले सखा चढि चढि निज जोरी। चढे दनुज बल घाँच मरोरी ॥  
 भांडीर वन पहुँचे जाई। फिरे सखा सब ठाँव लुवाई ॥  
 असुर चलयो लै बलको आगे। प्रकट्यो दनुज शरीर अभागे ॥  
 तब बलदेव कोप करि भारी। मुष्टि एक ताके शिरमारी ॥  
 बिकसि गयो शिर निन्यो अधीरा। उतारि परे तब श्रीबलवीरा ॥  
 भयो फलकमें सो बिन प्राना। देखत सुर मुनि चढ़े विमाना ॥  
 भई गगन ते जय जय वानी। फूलनकी वर्षा वर्षानी ॥  
 बहुविधि प्रस्तुति बलहि सुनाई। मुदित सकल सुर मुनि समुदाई ॥

दोहा—ग्वाल बाल चकित सबै, दौरि गये बल पास॥

मृतक असुर तनु देखिकै, तब मन कियो हुलास॥

सो—धन्य धन्य बलराम, धन्य तुम्हारे मात पितु ॥

बड़ो कियो यह काम, कपट रूप मारयो असुर॥

यह शठ गोप भेष वन आयो। हम काहू इहि जान न पायो ॥  
 जो यह शठ नहि जात निर्यातो। तो काहू लरिकहिलै जातो ॥  
 हौ तुम बड़े वीर दोउ भाई। जहँ तहँ हमको होत सहाई ॥  
 वनके दुष्ट सकल तुम मारे। हौ तुम हम सबके रखवारे ॥  
 ताहि कहो काको डर भैया। जासु भीत बलराम कन्हैया ॥  
 देत ग्वाल सब बलहि बड़ाई। धन्य धन्य ब्रज जन सुखदाई ॥  
 दुष्ट मारि बल मोहन लाला। आये सदन सहित सब ग्वाला ॥  
 ग्वालन कही आय सब बाता। सुनत चकित ब्रजजन पितुमाता ॥  
 करत सकल बलराम बड़ाई। जननी मुदित लिये उरलाई ॥

१ दैत्यप्रलम्बासुर । २ दाऊजी । ३ मुक्का । ४ फटगयो । ५ आकाश । ६ मा-

न्योजातो ७ आयमिले तब हँसे कन्हई ।



बल मोहन दोउ बीर निहारी । दोऊ जननि जात बलिहारी ॥  
 भूखे जान बनहिंते आयो । दोउ भइयन भोजन करवायो ॥  
 जो सुख लहत नंदकी रानी । सो शारद नहिंसकै बखानी ॥  
 दोहा-सुतसनेहयशुमति भगन, निशि दिन जात नजान ॥  
 करत चरित सन्तन सुखद, भक्त वछल भगवान ॥  
 सो०-नित नव परम हुलास, ब्रजवासी हरि संग लहत ॥

बिलसत विविध विलास, बाट घाट गृहवनसघन ॥

अथ पनिघटलीला ॥

पनिघट यमुनाके तटमाहीं । ठाढ़े श्याम कदमकी छाहीं ॥  
 सखा वृन्द चहुँ ओर विराजै । कौटि काम छवि निरखत लाजै ॥  
 शीश मुकुटकी लटक सुहाई । सुरंग खौर केसर छविछाई ॥  
 कुंडल झलक अलक घुघरायी । कंठ कनक कंठी युतिकारी ॥  
 चटकीली लटकी बनमाला । परसति चरण सरोज विशाला ॥  
 मुक्तमाल मणि माल सुहाई । उर विशाल पै अति छविछाई ॥  
 अरुण अधर दशननयुतिनीकी । मुर मुसकान मोहनी जीकी ॥  
 चटकीलो पट पीत विराजै । कटि तटि क्षुद्र घंटिका राजै ॥  
 भुज विशाल भूषण युत सोहै । कर मुद्रिका मुदित मनमोहै ॥  
 तनु घन श्याम रसीले नैना । हँसि हँसि कहत सखन सों बैना ॥  
 कनक लकुटिसों पगलपटान्यो । भूषण सहित न जात बखान्यो ॥  
 गहि द्रुम डार तिरीछे ठाढ़े । अंग अंग अनुपम छवि बाढ़े ॥  
 दोहा-कबहुँ बजावत अधर धरि, करि मुरली ध्वनिधोर ॥

निकट बुलावत वन मृगन, कबहुँ नचावत मोर ॥

सो०-रहे गगन वन छाये, सुखदछांह शीतल किये ॥

वर्षाऋतुको पाय, निरखत सुत नंदरायको ॥

हरित भूमि चहुँ ओर सुहाई । मनहुँ काम मैसन्द विछाई ॥  
 बहत समीर धीर सुखदाई । शीतल अधिक सुगंध सुहाई ॥

१ सुगंधकी । २ चरणकमल । ३ सेज ।



बहत यमुन बाहुलते पूरी । परत भँवर जहँ तहँ छबिरूरी ॥  
 उठत श्याम जल शुभगतंरंगा । छवितरंग जिमि हरिके अंगा ॥  
 या छबि सों पनिघट हरि ठाढ़े । संग गोष बालकहित बाढ़े ॥  
 यमुना जल तिय भरन न जाहीं । ग्वाल भीर देखत सकुचाहीं ॥  
 हरिके गुण मनमें सब जानैं । रोकत टोकत शंक न मानैं ॥  
 ताते जल्प सकत कोउ नाहीं । दूरश लालसा अति मनमाहीं ॥  
 सबके अन्तर्यामि कन्हाई । युवतिनके मनकी गति पाई ॥  
 तब इक बुद्धि रची नँदलाला । रसिक शिरोमणि मदनगोपाला ॥  
 सखन एक तरतैर बैठाई । पनिघटते सब भीर मिटाई ॥  
 आपरहे द्रुम ओट छपाई । हेरत युवतिनमग चितलाई ॥

दोहा—इहि अन्तर आवत लखी, युवती इक घनश्याम ॥

आपरहे द्रुम ओट हरि, यमुना तट गई वाम ॥

सौ०—नागरि जलहिं हिलोर, भरि गागरि शिर धर चली ॥

पाछेते चितचोर, घटलै दियो लुटाय महि ॥

गही चतुर ग्वालनि भुजहरिकी । पाई कनक लकुटिया करकी ॥  
 सब सों तुम करिरहे ठिठाई । तैसेहिं मोसों लगत कन्हाई ॥  
 देन लगै तब हरि हैंसि गागरि । लेत नहीं ग्वालनि अति नागरि ॥  
 कहत किरीतो वटनहिं लेहों । जल भर देहु लकुटि तब देहों ॥  
 कहा जो तुम नंद सुवन कन्हाई । हम हूं बड़े बापकी जाई ॥  
 एक गाँव बस बास हमारो । मैं नहिं सहिहों कस्यो तुम्हारो ॥  
 एक कहौ तो दश मैं कहिहों । मैं कछु तुमसों डरपि न जैहों ॥  
 यह सुनि हैंसिदीन्हें नँदलाला । लियो चोरि चित मदनगोपाला ॥  
 कहत लकुटिया देरी भेरी । मैं भरि देहों गागरि तेरी ॥  
 देखत रूप सुनत मृदुवानी । ग्वालनि तनुकी दशा भुलानी ॥  
 लागी हृदय मदनकी सांटी । मन पर गयो प्रेमकी घांटी ॥  
 करते लकुटि गिरत नहिं जान्यो । विवश भई चित चेत हिरान्यो ॥

१ वृक्षकेनीचे । २ कामदेवकी साटी ।



दोहा-तब घट भरि हरि भावते, दीन्हो शीश उठाय ॥

नेकहुँ सुधि ता तनुनहीं, चली ब्रजहिं समुहाय ॥

सो०-कियो दृगन में धाम, सुन्दर नट नागर सुखद ॥

जित देखे तित श्याम, पंथ ताहि दीखे नहीं ॥

उतै अपर ग्वालनि इक आई। कहत कहा तू रही भुलाई ॥

सूधे पंथ चलतहै नाही। कहा शोच तेरे मनमाहीं ॥

अबहीं हँसति भरन जल आई। कहाचली इत आप गँवाई ॥

ताकोदेखि कहत सुनु आली। मोपै श्याम मोहनी घाली ॥

मैं जल भरन अकेली आई। मेरी गागरि कृष्ण लुटवाई ॥

तब मैं कनक लकुटि गहिलीन्हों। उन मोतन लखिकै हँसिदीन्हों ॥

वहै हँसनि मोहिं परी उगौरी। तबहीं ते मैं हैगइ बौरी ॥

कहा कहौं तोसों अबआली। मेरेचित वह चितवन शाली ॥

बस्यो श्याम मेरे दृग माहीं। और कछू मोहिं दीसत नाही ॥

सुनत बात वह ग्वालि सयानी। आप विलोकन को अनुरानी ॥

ताहि बाँहगहि घर पहुँचाई। आपगई जलको अनुराई ॥

देख्यो जाय श्यामतहँ नाही। इत उत लखिशोचति मनमाहीं ॥

दोहा-हरि देखत तरु ओटहै, ग्वालनिमन दुख पाय ॥

चली नीर भरि गागरी, बार बार पछिताय ॥

सो०-मनके जाननहार, देखि ग्वालनि विकल अति ॥

प्रकटे नंदकुमार, आय अचानक निकटही ॥

गहिलीन्हों अंकम भरिगारी। ताके तनुकी लपनि निवारी ॥

तातन चितै कह्यो तूकोरी। तोहिं कबहुँ देख्यों नहि गोरी ॥

मन हरिलीन्हों रूप दिखाई। बहुरि भये तरु ओट कन्हाई ॥

मिलि हरिसों सुखपायो ग्वाली। लकी प्रेमरस लखि बनमाली ॥

नाहि जानतमैं को कित आई। भई भगन मन तनु बिसराई ॥

घरको पंथ भूलिगइ नागारि। इत उत फिरत शीशलिये गागारि ॥

१ नेत्र । २ मार्ग ।



और सखी इक उतते आई । देखि दशा तिन निकट बुलाई ॥  
 कहा फिर भूली मगमाहीं । बूझत सखी सुनत कछुनाहीं ॥  
 चौकपड़ी सपने ज्योंजागी । तासों वचन कहन तबलागी ॥  
 श्याम बदन एकमिल्यो दुठौना । तिनमोको कछु कीनांठोना ॥  
 मैभरि गागरि शीशचढ़ाई । औचक मोहिं अंक भरिलाई ॥  
 मोसों कछो कौन तू गोरी । देखीनाहिं कबहुं ब्रजखोरी ॥

दोहा-ऐसे कहि चितयो विहँसि, मैं लखि रही भुलाय ॥

तबहिं भयो अंतर कहूं, मेरो चित्त चुराय ॥

सो०-कही सखी सों बात, ग्वालिनि लाज विसारिकै ॥

निरखि नंदको तात, भई जलदिकी बूंद जिमि ॥

सोसखि सावधान करिताको । चली आप आतुर यमुनाको ॥  
 देखी श्याम युवति दिगआई । ठाढे तरुकी ओट कन्हाई ॥  
 तासु अंग छबिरहे निहारी । गोरे बदन चूनरी कारी ॥  
 छूटी अलक बदन छबिछाई । मनहुं जलज अलि अवलि सुहाई ॥  
 हाथन चूरी चारु विराजै । कनक सुंदरियन अति छबिछाजै ॥  
 सहज श्रृंगार उरोज उठोहैं । अंग अंग सुठि सुंदर सोहैं ॥  
 ग्वालिनि हरिको देख्यो नाहीं । जाने कहूं गये वनमाहीं ॥  
 जल भरिचली मनहिं पछिताई । गागरि नागरि शीश उठाई ॥  
 औचक श्याम गही लट आई । यह कहि कहां चली अतुराई ॥  
 चिन्हुक परस उरसों करलायो । ग्वालिनि मनहिं हर्ष अतिपायो ॥  
 ऊपर कहत बंककर भौहन । छांड़िदेहुमेरी लटमोहन ॥  
 उर परसत कछु सजुचन मानत । और ग्वालि सी मोको जानत ॥

दोहा-छांड़ि देहु लट देखिहै, ब्रज युवती कोउ आय ॥

हाहा मैं पांयन परति, तुमको नंद दुहाय ॥

सो०-इतने हीको मोहिं, सोंह दिवावत बावरी ॥

+ इन औचकमोहिं अंकमैलाई । १ मेघ । २ कपल । ३ भौरा । ४ पंक्ति ।

५ स्तन । ६ ठोड़ी ।



पहिचान्यों नहि तोहि, ताते मुख देखत तनक ॥

यो कहि श्याम छांड़ि लट दीन्हों। सुरि सुसकनि नागरिषश कीन्हों।  
चली भवन मन हरि हर लनिों। जिय यह कहति कहा हरि कीनों।  
पगद्वै चलत ठिठकि रहि जाई। भूलगई मारग जिहि आई ॥  
प्रेम मगन तनु सुधि विसराई। रहे दृगनमें श्याम समाई ॥  
गृह गुरुजनकी सुधि जब आई। तब कछु जियमें गई लजाई ॥  
ज्यों त्यों करि पहुँची गृह माहीं। उरते श्याम दूरत क्षण नाहीं ॥  
सखी संगकी बूझत आई। कहां यमुन तट बेर लगाई ॥  
और दशा भई है कछु तेरी। कहति नहीं हमसों सखि हेरी ॥  
कहा कहां तुमसों री आली। मोह्यो मोहि श्याम वनमाली ॥  
सुनहु सखीरी वा यमुना तट। मैं जल भयो अकेली पनिषट ॥  
लैगरी शिर मारग डगरी। कितहूँ ते आया मो दिगरी ॥  
औचक आनि गही लट मेरी। कछौनेक मुख देखन देरी ॥

दोहा-मैं मृदु वचन अमोल सुनि, देखि वदन जलजात ॥

जकी चकी सी है रही, उन परस्यो मो गात ॥

सो०-प्रफुलित हिये गुवारि, मनमोहनके रस विवश ॥

कुलकी लाज बिसारि, कही सखिन सों बात सब ॥

सुनत बात सब सखी सयानी। श्याम विलोकनको अतुरानी ॥  
इक क्षण श्याम न विसरत काहू। सुनत भयो यह अधिक उछाहू ॥  
घर घरते धाई सब नागारि। लैलै आई जलकी गागारि ॥  
चलीं यमुन तट अति अतुराई। देख्यो कुँवर नंदको जाई ॥  
मोर मुकुट कटिकछनी सो है। कुंडल चटक लटक मन मोहै ॥  
पीत वसन लखित डितै लजाई। नयन विशाल अधर अरुणाई ॥  
देखत कछो सखिन ढिग जाई। ठगत फिरत हौ नारि पराई ॥  
काहि ठग्यो कैसे ठग चीन्हों। तुमरो कहां कहा ठग लीन्हों ॥  
कौन ठग्यो कहि कहा बखानै। औरहिंके ठग तुमको जानै ॥

१ कमल । २ बिजरी ।



कहा ठग्यो सो हम नहि मानैं । कहौ नाम धरि तब हम जानैं ॥  
 सर्वस ठगत पलकके माहीं । कहा ठग्यो सो जानत नाहीं ॥  
 ठगके लक्षण मोहिं बतावहु । कैसे मोको ठग ठहरावहु ॥

दोहा-ठगलक्षण हमपै सुनहु, फाँसी मृदु मुसकान ॥

रूपठगौरीते ठगत, ब्रज तिय मन धन प्रान ॥

सो०-फिरत विकल बेहाल, लोक लाज कुलकान तजि ॥

ठगी नंदके लाल, भई विदित तिहुँ लोक तिय ॥

अपने लक्षण मोहिं लगावहु । जैसे तुम सब चितहि चुरावहु ॥  
 कहति कि प्रकटी तिहुँपुर बाता । ब्रजतिय ठगत नंदकी ताता ॥  
 यह अति कहति कहत सब कोई । सुर नर सुनि वेदहु नहि गोई ॥  
 तीन लोकको ठाकुर जोई । ब्रज बनितनवश कीन्हों सोई ॥  
 यों सुनि सब ग्वालिनिसुकानी । कहौ सखी सुनि हरिकी बानी ॥  
 हरि तुम बात उलटि यह ठानत । तुम्हरी नागरता हम जानत ॥  
 अतिहि कान्ह तुम करत ढिठाई । छांडि देहु अब यह लँगराई ॥  
 काहूकी डारतहौ गगरी । काहू लट गहि करत अचगरी ॥  
 काहूको अंकम भरि लावत । ब्रज लोगनपै सबन हैसावत ॥  
 तुमते मग कोउ चलन न पावत । बाट घाट डरपत सब आवत ॥  
 यसुना भरन देत नहि पानी । बहुत अचगरी अब तुम ठानी ॥  
 कहो तो यशुदहि जाय सुनावैं । फेरि तुम्हें उखल बंधवावैं ॥

दोहा-यह सुनि हरि रिस करि उठे, इँडुरी लई खुड़ाय ॥

कहो जाय सब मातसों, लीजो मोहिं बंधाय ॥

सो०-मोहिं कहत ठग चोर, आप भई साहुनि सबै ॥

डारी गागरि फोर, कहत जाहु बुगली करन ॥

तब युवती सब हरि ढिग आई । कहत इँडुरी देहु कन्हआई ॥  
 नहि तो तुमको गहि लै जैहैं । यशुमति पास न नेक डरैहैं ॥  
 बाट घाट तुम करत ढिठाई । काहु न नेक डरात कन्हआई ॥  
 इँडुरि लै फोरी सब गागरि । आज भिदावैं तुम्हरी लांगरि ॥



तब हरि चढे कदम पर जाई । ईंदुरी दीन्ही जलहि बहाई ॥  
 बदन लकोरत भौंह मरोरत । सुरि सुसकनि सबके चितचोरत ॥  
 कहत कहौ भैयासों जाई । सब मिलि लीजो मोहि बुलाई ॥  
 तुम सब जुरि मोहि मारन धाई । तब मैं ईंदुरी जलहि बहाई ॥  
 ऐसो करि तुम मोको पायो । मानहु मोको मोल भैयायो ॥  
 यह सुनि युवति कहत सुसकाई । कहति यशोमति सों हम जाई ॥  
 वेदिन बिसर गये मनमोहन । बाँधे मात ऊखली गोहन ॥  
 छाई रहौ तौ बदाहि कन्हाई । जाउ कहं तो नन्द दुहाई ॥  
 दोहा—कान्हहि सौंह दिवायकै, लै उरहन सब बाम ॥

ऊपर रिस अंतर सुखी, चली नंदके धाम ॥  
 सो०—मथति महारि निज धाम, दधि माखन हरिके लिये ॥  
 तिहि अंतर ब्रज बाम, आवत देखी भीर अति ॥  
 मैं जानति हरि इनहिं खिसाई । ताते सब उरहन लै आई ॥  
 कहत युवति सब रिस भरि आई । ऐसो ठीठ कियो सुत माई ॥  
 भरन देत नहिं यमुना पानी । रोकत आयं करत कुलकानी ॥  
 काहूकी गागरि ढरकावै । ईंदुरी लै जलमाहि बहावै ॥  
 काहूको घट डारत फोरी । गारी देत सहै नित खोरी ॥  
 महारि कहत तुमसों सकुचाहीं । हरिके गुण तुम जानति नाहीं ॥  
 अब नाहीं ब्रजवास हमारो । करत अचकरी सुवन तुम्हारो ॥  
 नेक नहीं सकुचत मन माहीं । महारिसुतहि तुम वरजत नाहीं ॥  
 यशुमति सबहिन कहत निहोरी । कहा करौं सो तुमहि कहोरी ॥  
 जो हरिको मैं ह्यां गहि पाऊं । तो तुम सबको अवहि दिखाऊं ॥  
 तुमहूं जानति हौ गुण हरिके । ऊखल सों बाँधे मैं धरिके ॥  
 मारन लगी सांठि लै जवहीं । बज्यों मोहि तुमहि तब सबहीं ॥  
 दोहा—अब घर आवहि जबहि हरि, तबहिं करौं सोइ हाल ॥  
 लरिकाईते अचकरो, मैं जानत गोपाल ॥

१ यशोदा । २ घाट । ३ पुत्र ।



सो०-अब जो पकरन जाऊँ, ताहि गहन पाऊँ कहाँ ॥

सुनतहि मेरो नाउँ, कोजानै भजि जाय कित ॥

यह अपराध क्षमो सब हमको । यहै कहत हौं मैं अब तुमको ॥  
इहि विधि युवतिन बोध कराई । महरि सबनको घरन पठाई ॥  
इतते घरन चलीं सब ग्वाली । उतते घर आवत वनमाली ॥  
हैगइ भेंट बीच मग आई । तुरत नयन हरि गये लजाई ॥  
मात बुलावत जाहु कन्हआई । बहुत बड़ाई करि हम आई ॥  
निरखि बदन हँसि कह्यो कन्हआई । मैं सकुझाय लेउँगो माई ॥  
सकुचतही आये घर मोहन । द्वारहिते लागे हरि जोहन ॥  
देखि जननि घरकारज लागी । गोपिन उरहनके रिस पागी ॥  
भीतर रोहिणि पाक बनावै । कहि कहि तिनसों बात सुनावै ॥  
हैरुवै हरुवै तब हरि जाई । सुनत आप पाछे चित लाई ॥  
यहै कहति यशुमति रिसि आई । गयो कहांधौं भाजि कन्हआई ॥  
पनिषट रोंकत धूम मचावत । यमुनाजल कोउ भरन न पावत ॥  
दोहा-गारि देत बेटिन बहुन, वै आवत ह्यां धाय ॥

हाहामैं सबको करति, क्योंहू खोट छुटाय ॥

सो०-इँडुरी देत बहाय, सबकी गागारि फोरिकै ॥

कित धौं गयो पराय, यह कहि कहि धिरवत सुतहि ॥

जाति पांतिसों कह लँगराई । मारेहु मानत नाहि कन्हआई ॥  
तब पाछेते हरि उठि बोले । मधुर वचन कोमल अति भोले ॥  
तूमोहीं को मारन जानै । उनके गुणन नाहि पहिंचानै ॥  
कहति जुवै मानत तू सोई । तिनके चरित न जानत कोई ॥  
कदमतीरते मोहि बुलावैं । बाते गढ़ि गढ़ि आप बनावैं ॥  
मटकत गिरै शीशते गगरी । नाम लगावत मेरे सिगरी ॥  
फिरि चितई देखे हरि पाछे । सुन्दर श्याम पीतपट काछे ॥  
कह तू कहाँ रह्यो मो पारी । मैं कह तोको जानत नहीं ॥

१ धीरेधीरे ।



हरि मुख देखतही नैदनारी । तुरतहि भूलिगई रिस भारी ॥  
कहतकि उरहन सब लै आवैं । झूठहि खोर कान्हको लावैं ॥  
मैं जानत गुण उन सबहीके । बातन जोरि बनावत नीके ॥  
वे सब योवनकी मदमाती । फिरत सदा हरिसों अठिलाती ॥

दोहा—कहां श्याम मेरो तनक, वे सब योवन जोर ॥

अब उरहन जो आवहीं, तौ पठऊं मुख मोर ॥

सौ०—तुक्ति उनठिगजात, मैं बरजत मानत नहीं ॥

लावत झूठी बात, वे सब ठीठ गुवालिनी ॥

यह कहि चूम सुतहि उरलायो । मन मोहन मन हर्ष बढ़ायो ॥  
ब्रज घर घर यह बात जनार्ह । पनिघट रोकत कुँवर कन्हई ॥  
श्याम वरण नटवर वपुकाछे । सुरली मधुर वजावत आछे ॥  
करत अचकरी जो मन भावै । यलुना जल कोउ भरत न पावै ॥  
बैठत आप कदमकी डारी । सबन बुलावत दै दै गारी ॥  
काहूकी गागरी गहि फोरै । काहूकी ईंदुरी गहि बोरै ॥  
काहूकी अंकमगहि लावै । काहूको बटे भूमि लुटावै ॥  
नयन सैनदै चितहि चुरावत । काहूसों मन अपना लावत ॥  
ब्रज युवती सुनि सुनि उठि धावैं बिनहारि दरश न क्षण कल पावैं ॥  
कोउ बरजै कोउ कहै कोटि विधिसबके ध्यान श्याम सुन्दरनिधि  
मन क्रम वचन तिन्हैं रति हरि सों नातो नेह न मानत घरसों ॥  
निशिदिन जागत सोवत मारी नंद नैदन क्षण विसरत नाही ॥

दोहा—यह लीला सब करत हरि, ब्रज युवतिनके हैत ॥

कृष्ण भजै जो भाव जिहि, तोहितैसो फलदेत ॥

सौ०—चिन्तामणि जेहि नाम, चितत फलदायक जनन ॥

सबहीको सब वाम, जैसोको वैसो सदा ॥

सुनि यह श्रीवृषभालु डुलारी । पनिघट ठाढे कुंज बिहारी ॥  
देखनको चित अति अलुराई । कह्यो सखिन सों कुँवरि बुलाई ॥



चलहु यमुनतट ल्यावहि पानी। सुनत बात यह सब हर्षानी ॥  
 इक इक कलश सबन गहिलीनों। तुरत गमन यमुना तट कीनों ॥  
 देखे तहां कुँवर नँदलाला। सुन्दरश्यामल नयन विशाला ॥  
 प्यारी मन अति हर्ष बढ़ायो। प्यारिहि देखि श्याम सुख पायो ॥  
 रहे रीझि हरि दीठि लगाई। भन्यो नीर प्यारी सुसकाई ॥  
 चलीघरहि यमुना जल भरिकै। सखिन मध्य गागरि शिर धरिकै ॥  
 मंद मंदगति चलति सुहाई। मोहन मनहि मोहनी लाई ॥  
 चले श्याम संगहि उठि लागे। विवश भये प्यारी रस पागे ॥  
 सखियन बीच नागरी सोहै। गागरि शिरपै हरि मन मोहै ॥  
 डुलत ग्रीव लटकत नकवेसर। वंदन बिन्दु आड दिये केसर ॥

दोहा-लोचन लोल विशाल अति, सुरि रचितवत जाय ॥

भुकुटी धनुष कटाक्ष शर, हरि दृग मृगन लगाय ॥

सो-अँग अँग छवि समुदाय, मानहुँ सेना कामकी ॥

अंचल ध्वज फहराय, ठढकि चलत हरि मन हरत ॥

रीझे श्याम निरखि छवि प्यारी। संगहि चले लागि वनवारी ॥  
 कबहुँक आगे जात कन्हआई। कबहुँ रहत पीछे चितलाई ॥  
 नाना भांतिन भाव बतावैं। प्यारिहि निज अभिलाष जनावैं ॥  
 कनक लकुटलै करके माहीं। आगे पंथ सँवारत जाहीं ॥  
 देखत जहाँ प्रिया परछाहीं। तहां मिलावत निजतनु छाहीं ॥  
 छवि निरखत तनु वारि जनावैं। पीतांबरलै शीश फिरावैं ॥  
 कबहुँ श्याम पाछे रहि जाहीं। निरखत कुँवरी छबिललचाहीं ॥  
 गागरि ताकि कांकरि मारैं। उचटि उचटि तिय अंगन पारैं ॥  
 ओट पीतपट शीश नवाई। इहि मिस निकसतदिग है आई ॥  
 प्यारी अपने जिय अनुमाने। मेरे हित हरि भावनउने ॥  
 सखियन मध्य नागरी जाई। नहिं पावत लग लगन कन्हआई ॥  
 कियो चरिततव रसिक बिहारी। सखिन सहित मोही सुकुमारी ॥



दोहा-भिसकर निकसे निकटहै, निराख वदन मुसकाय ॥

मन हरिलीनो सवनको, दियो काम उपजाय ॥

सो०-भई विवश सुकुमार, अंग उमँग आँगी दराकि ॥

मोहे नंदकुमार, सुधि सुधि विसरी देहकी ॥

सखिन संग पहुँची घर आई । अटकियहो मन हरि सँग जाई ॥  
 पुनि पुनि उरयह करत विचारा । कैसे मिलहि श्याम सुकुमारा ॥  
 गागरि निज निज गृह पहुँचाई । बहुरि सखी प्यारी दिग आई ॥  
 बार बार सब कहत निहोरी । चलिये यमुना जलहि बहोरी ॥  
 तिनको उत्तर देत न प्यारी । चित उरझो चितवन परवारी ॥  
 ठग सी रही मनहि मन शोचै । प्रेम विवश दृग बारि विमोचै ॥  
 देखि दशा बृझत सब ग्वारी । कहा भयो तो कोरी प्यारी ॥  
 शोचति कहा कहै किन सोरी । काहूलयो चोर कछु चोरी ॥  
 उत्तर हमें देत क्यों नाहीं । कहा ठगीसी है मन माहीं ॥  
 गहि गहि भुजा कहति सब गोरी । चलहि न यमुना आवहि खोरी ॥  
 तव सखियन वृषभानु दुलारी । लीन्हों सवन निकट बैठारी ॥  
 जलजैनयन जल भरि अनुरागी । हरिके चरित कहन सब लागी ॥

दोहा-कहौ सखी कैसे चलैं, वा यमुनाकी ओर ॥

गैल न छाँड़त सांवरो, रसिया नंदकिशोर ॥

सो०-धरै न कोऊ नांव, इह शंकनिडरपत हियो ॥

एक भांतिको गांव, वह चंचल मानै नहीं ॥

भोको देखत जहां कन्हाई । मेरेसंग लगत उठि धाई ॥  
 इत उत नयन चुराय निहारै । भोको मगमें आनि जुहारै ॥  
 आगे चलत लकुट करलाई । मेरो पंथ सँवारत जाई ॥  
 सो बहु मोहिं निहोरो लाई । फिर चितवै मोतन मुसकाई ॥  
 जबमैं यमुनाको जल भरिकै । चलति गागरी शिरपर धरिकै ॥  
 तब घट में वह कांकरि मारै । उचटि लगत तब अंग निहारै ॥



मेरे उर अंचर फहराई । सोवह देखि देखि ललचाई ॥  
 कबहुं पीताम्बर शिर फेरै । बार बार करि मोतन हैरै ॥  
 कबहुं आपनि छवि दरशावै । मेरो चितको आनि चुरावै ॥  
 जब देखौं तब मोतनु हैरै । नेक नहीं दृग इत उत फेरै ॥  
 जहां जाति मेरी परछाई । तहां मिलाय रहत निज छाई ॥  
 जब लग लागन पावत नहीं । तब वाको जिय अति अकुलाहीं ॥

दोहा-मोतनु छुवै हरि चले, ताहि भरतहै अंक ॥

हौंसकुचत बोलों नहीं, लोक लाजकी शंक ॥

सौ०-ब्रज घर २ यह शोर, को जानै कहियत कहा ॥

चितवत यह चितचोर, विवश होत सखि प्राण तब ॥  
 कहिये कहा सखी जिय जैसी । भइ गति सांघ छछूंदर + कैसी ॥  
 घरते निकसत बन नहि आवै । लोक लाज कुल कानि मिटावै ॥  
 जो घर रहौ रघो नहि जाई । तनु घरमें मन जहां कन्हाई ॥  
 कितो करों आवत इत नहीं । बँधो पीत पट आंचर माहीं ॥  
 अवतों मेरे मन यह रांची । करिहौं प्रीति श्याम सँग सांची ॥  
 ब्रजके लोग हँसो किन कोई । कुल मर्याद जाउ किन सोई ॥  
 कहा लाभ सो कहहु सयानी । जामें होय जीवकी हानी ॥  
 सोनो कहा कानजिहि टूटै । अंजन कहा आंखि जिहि फूटै ॥  
 कहा कांच संग्रहते होई । जो अमोल मणि करते खोई ॥  
 विष सुमेरु कहु कौन काजा । सुखद बूंद इक ओषधि राजा ॥  
 कुलकी कानि कांच किरचाई । चिन्तामणिकी खानि कन्हाई ॥  
 कहा लेहुं कह तजौं सयानी । सिखवहु मोहि सखी जिय जानी ॥

दोहा-मोको अब सूझै नहीं, विनु वह मृदु सुसुकान ॥

कापै न्यारो होतरी, चूनो हरदी सान ॥

सौ०-भेटि लोककी कानि, पतिव्रत राखौं श्याम सों ॥

यहै बनी अब आनि, भलो बुरा कोऊ कहौ ॥

+ सतावे ।



सुनत गोपिका राधा बानी । हरि अनुराग सिंधु मन मानी ॥  
गद्गद कंठ पुलकतनु आये । लोचन जलज प्रेम तनु छाये ॥  
भई प्रेम वश गोप कुमारी । लोक सकुच कुलकानि विसारी ॥  
बारहि बार कहत ब्रजनारी । धन्य धन्य वृषभानु दुलारी ॥  
हम सब तोसों सत्य बखानै । तैं हरि भली भांति पहिचानै ॥  
यह मोहन सबको मन मोहै । तिय लखि विवश न होय सुकोहै ॥  
अंग अंग प्रति अति छबि छाजै । समता काम कोटि व्युति लाजै ॥  
सुमन श्याम दोउ पाणि पकरिकै । करत वेणु धुनि अधरन धरिकै ॥  
तब यह दशा सबनकी होई । जड़ चेतन मोहत सब कोई ॥  
वन मृग निकट धाय सब आवैं । खग है मौन न अंग डुलावैं ॥  
तृण गहि दंत धेनु रहि जाहीं । धनते क्षीर पियत बछ नाहीं ॥  
यमुना बहिबेते रहि जाई । जलचर प्रकटत बाहर आई ॥

दोहा—जड़चेतन चेतन जड़हि, सुनत होत कल बैन ॥

कै विष कै मद कै अमी, किधौं भन्यो रस मैन ॥

सो—गृहवन कछु न सुहाय, सुनत श्रवण वह मधुर धुनि ॥

गृहकारज विसराय, चकित थकित रहियत सबै ॥

बाट घाट जहँ मिलत कन्हवाई । मोहत सुन्दर रूप दिखाई ॥  
नई २ छवि क्षण २ माहीं । झलकावत सब अंगन माहीं ॥  
ऐसी को जु देखि नहि मोहै । नंदसुवन सम सुन्दर कोहै ॥  
वह सखि सबहीके मन भावै । सब कोउ वाहि देखि सुख पावै ॥  
लोक लाज कुल कौने कामहि । जो पावैं सुन्दर बर श्यामहि ॥  
पै यह मोहि अगम अति लागै । यह सुख मिलै नहीं बिन भागै ॥  
इनको गर्ग कह्यो नंदपाहीं । बिना सुकृत ये प्राप्त नाहीं ॥  
तुमहू इनको तप करिपायो । ऐसे नदहि गर्ग सुनायो ॥  
कहँ सखि इतना भाग हमारे । जो बर पावहि नंददुलारे ॥  
ताते भैं मनमें यह आवै । कीजे जो सबके मन भावै ॥



मेरे उर अंचर फहराई । सोवह देखि देखि ललचाई ॥  
 कबहुं पीताम्बर शिर फेरै । बार बार करि मोतन हैरै ॥  
 कबहुं आपनि छवि दरशावै । मेरो चितको आनि चुरावै ॥  
 जब देखौं तब मोतनु हैरै । नेक नहीं दृग इत उत फेरै ॥  
 जहां जाति मेरी परछाई । तहां मिलाय रहत निज छाई ॥  
 जब लग लागन पावत नाही । तब बाको जिय अति अकुलाहीं ॥

दोहा-मोतनु छूवै हरि चले, ताहि भरतहै अंक ॥

हौंसकुचत बोलों नहीं, लोक लाजकी शंक ॥

सो०-ब्रज घर २ यह शोर, को जानै कहियत कहा ॥

चितवत यह चितचोर, विवश होत सखि प्राण तब ॥  
 कहिये कहा सखी जिय जैसी । भइ गति सांघ छछूंदर + कैसी ॥  
 घरते निकसत बन नहि आवै । लोक लाज कुल कानि मिटावै ॥  
 जो घर रहौ रह्यो नहि जाई । तनु घरमें मन जहां कन्हाई ॥  
 कितो करों आवत इत नाही । बँध्यो पीत पट आंचर माहीं ॥  
 अबतो मेरे मन यह रांची । करिहौं प्रीति श्याम सँग सांची ॥  
 ब्रजके लोग हँसो किन कोई । कुल मर्याद जाउ किन सोई ॥  
 कहा लाभ सो कहहु सयानी । जामें होय जीवकी हानी ॥  
 सोनो कहा कानजिहि टूटै । अंजन कहा आंखि जिहि फूटै ॥  
 कहा कांच संग्रहते होई । जो अमोल मणि करते खोई ॥  
 विष सुमेरु कहु कौन काजा । सुखद बूंद इक ओषधि राजा ॥  
 कुलकी कानि कांच किरचाई । चिन्तामणिकी खानि कन्हाई ॥  
 कहा लेहुं कह तजौं सयानी । सिखबहु मोहि सखी जिय जानी ॥

दोहा-मोको अब सूझै नहीं, विनु वह मृदु मुमुकान ॥

कापै न्यारो होतरी, चूनो हरदी सान ॥

सो०-मेदि लोककी कानि, पतिव्रत राखौं श्याम सों ॥

यहै बनी अब आनि, भलो बुरो कोऊ कहौ ॥

+ सतावै ।



सुनत गोपिका राधा बानी । हरि अनुराग सिंधु मन मानी ॥  
 गह्वर कंठ पुलकतनु आये । लोचन जलज प्रेम तनु छाये ॥  
 भई प्रेम वश गोप कुमारी । लोक सकुच कुलकानि विसारी ॥  
 बारहिं बार कहत ब्रजनारी । धन्य धन्य वृषभानु दुलारी ॥  
 हम सब तोसों सत्य बखानै । तैं हरि भली भांति पहिचानै ॥  
 यह मोहन सबको मन मोहै । तिय लखिविवश न होय सुकोहै ॥  
 अंग अंग प्रति अति छवि छाजै । समता काम कोटि द्युति लाजै ॥  
 सुमन श्याम दोउ पाणि पकरिकै । करत वेणु धुनि अधरन धरिकै ॥  
 तब यह दृशा सबनकी होई । जड़ चेतन मोहत सब कोई ॥  
 वन मृग निकट धाय सब आवैं । खग है मौन न अंग डुलावैं ॥  
 तृण गहि दंत धेनु रहि जाहीं । धनते क्षीर पियत बछ नाहीं ॥  
 यमुना बहिबेते रहि जाई । जलचर प्रकटत बाहर आई ॥

दोहा—जड़चेतन चेतन जडहि, सुनत होत कल बैन ॥

कै विष कै मद कै अमी, किधौं अन्यो रस मैन ॥

सो०—गृहवन कछु न सुहाय, सुनत श्रवण वह मधुर धुनि ॥

गृहकारज विसराय, चकित अकित रहियत सबै ॥

बाट घाट जहँ मिलत कन्हवाई । मोहत सुन्दर रूप दिखाई ॥  
 नई २ छवि क्षण २ माहीं । झलकावत सब अंगन माहीं ॥  
 ऐसी को जु देखि नहि मोहै । नंदसुवन सम सुन्दर कोहै ॥  
 वह सखि सबहीके मन भावै । सब कोउ वाहि देखि सुख पावै ॥  
 लोक लाज कुल कौने कामहि । जो पावैं सुन्दर बर श्यामहि ॥  
 पै यह मोहिं अगम अति लागै । यह सुख मिलै नहीं बिन भागै ॥  
 इनको गर्ग कह्यो नंदपाहीं । बिना सुकृत ये प्राप्त नाहीं ॥  
 तुमहू इनको तय करिपायो । ऐसे नदहि गर्ग सुनायो ॥  
 कहँ सखि इतना भाग हमारे । जो बर पावहि नंददुलारे ॥  
 ताते भैं मनमें यह आवै । कीजे जो सबके मन भावै ॥



तप कीजै हरिके हितलागी । पूजि गौरिपतिसों बर मांगी ॥  
नंदसुवन सुन्दर बर पावैं । और सकल कामना नशावैं ॥

दोहा—जप तप संयम नेमते, प्रभु प्रकटत पाषाण ॥

ताते अब तप कीजिये, और उपाय न आन ॥

सो०—कीजै यह दृढ़ नेम, प्रात जाय यमुना नदी ॥

पूजहिं सब करि प्रेम, तौ पावहिं पतिकरि हरिहि ॥

तपकरि योगी जन हरि ध्यावैं । मन बांछित फल तपकरि पावैं ॥

सकल कामनाके शिवदास । कहत वेद विधि पंडित ज्ञाता ॥

इमको मन बांछित सखि एहा । नंदसुवन पदकमल सनेहा ॥

सुनत सप्रेम सखीकी बानी । श्रीवृषभानुसुता हर्षानी ॥

यहै मंत्र सबके मन मान्यो । धन्य ३ कहि ताहि बखान्यो ॥

कहत सबै कीजै सखि सोई । जाविधि नंद नंदन हितहोई ॥

वृथा जन्म जग जान न दीजै । यशुमति सुतसों हितकरिलीजै ॥

यहै मंत्र सबहिन दृढ़ कीन्हों । नंद नंदनसों पतिव्रत लीन्हों ॥

धन्य धन्य ब्रज गोपकुमारी । जिनके हित पति कृष्णमुरारी ॥

मन बच क्रम हरिसों मन मानी । लोक लाज तिनका सम जानी ॥

इकक्षण श्याम न उरते टरहीं । नेम धर्म व्रत हरि हित करहीं ॥

जिनको यश शारद श्रुति गावैं । ब्रजवासी जन कहा नतवैं ॥

दोहा—जाग्रत स्वप्न सुषुप्तिहू, ब्रज युवतिन मन भाहिं ॥

सदा एक तुरिया रहत, और अवस्था नाहिं ॥

सो०—ऐसो कौन प्रवीन, चहै प्रेम ब्रज तियनको ॥

हरि छवि जल मन मीन, बिछुरि सकत नहिं एकपल ॥

अथ चौरहरण लीला ॥

भवैन रवन सबहिन बिसरायो । ब्रज युवतिन हरिसों मन लायो ॥

यहै वासना सब उर जामी । होय गुपाल हमारो स्वामी ॥

काम वासना करि उर धायो । हरिके हेत तपहि मन लायो ॥

१ पति । २ पत्थरते । ३ सरस्वती । ४ घर ।



षट्दर्शसहस गोपकी कन्या । करन लगीं तप हरि हित धन्या ॥  
 रहत क्रिया युत तप को साथे । छांड दई सब भोग उपाधे ॥  
 प्रातकाल यमुनाजल न्हाहीं । प्रहर + प्रयन्त रहैं जल माहीं ॥  
 जपहि उमापति हर वृषकेतू । सुन्दर श्याम कृष्णपति हेतू ॥  
 शीत भीत मनमें नहिं लयावै । नयन मूंदिके ध्यान लगावै ॥  
 बार बार यह कहैं मनाई । हम बर पावहिं कुँवर कन्हाई ॥  
 जलते बहुरि निकासि सब आई । पूजाहिं गौरीशिव जाई ॥  
 चन्दन बिल्वपत्र जल धारा । अक्षत सुमन सुगंध अपारा ॥  
 प्रीति सहित सब शिवहि चढावैं । धूप दीपकरि स्तुति गावैं ॥  
 छंद-करहिं स्तुति गानबहुविधि, पाणि पंकज जोरहीं ॥

बारबार नवाय मस्तक, प्रेम सहित निहोरहीं ॥  
 जयप्रहेश कृपालु शिव, आनन्दनिधि गिरिजापते ॥  
 कैलासपति कल्याण अगजग, नाथ सर्व नमामिते ॥  
 जटाजूट त्रिपुण्ड्र शशि कल, गंगयुत शोभित शिरे ॥  
 कमल नयन विशाल सुन्दर, चारु कुण्डल श्रुति धरे ॥  
 नीलकंठ भुजंग भूषण, भस्म अंग दिगम्बरे ॥  
 अर्द्धग गौरिविशाल उर, शिरमालधर करुणाकरे ॥  
 कर्पूर गौरि प्रसन्न आनन, पंचवक्त्र त्रिलोचने ॥  
 कामप्रद सुखधाम पूरण, काम शोच विमोचने ॥  
 भगवान भौभव भय हरण, भूतादि पति शंभूहरे ॥  
 प्रणत जन पूरण मनोरथ, जगत पति मन्मथ अरे ॥  
 वृषभ वाहन त्रिपुर अरि, मृगराज धरछालाम्बरे ॥  
 शूलपाणि त्रिशूल मूलन, मूलकर शिवशंकरे ॥  
 सुर असुर नर नाग तव पद, वन्दि मनवांछित लहैं ॥  
 पूजते पदकमल प्रभु हम, कृष्णपति चाहति अहैं ॥

१ सोलहहजार। + प्रहर एक रहैं जलकेमाहीं । २ कामकेशत्रु । ३ त्रिपुरकेवैरी ।



तप कीजै हरिके हितलागी । पूजि गौरिपतिसों बर मांगी ॥  
नंदसुवन सुन्दर बर पावैं । और सकल कामना नशावैं ॥

दोहा—जप तप संयम नेमते, प्रभु प्रकटत पाषाण ॥

ताते अब तप कीजिये, और उपाय न आन ॥

सो०—कीजै यह दृढ़ नेम, प्रात जाय यमुना नदी ॥

पूजहिं सब करि प्रेम, तौ पावहिं पतिकरि हारिहिं ॥

तपकरि योगी जन हरि ध्यावैं । मन बांछित फल तपकरि पावैं ॥

सकल कामनाके शिवदास । कहत वेद विधि पंडित ज्ञाता ॥

इमको मन बांछित सखि एहा । नंदसुवन पदकमल सनेहा ॥

सुनत सप्रेम सखीकी बानी । श्रीवृषभानुसुता हर्षानी ॥

यहै मंत्र सबके मन मान्यो । धन्य २ कहि ताहि बखान्यो ॥

कहत सबै कीजै सखि सोई । जाविधि नंद नंदन हितहोई ॥

वृथा जन्म जग जान न दीजै । यशुमति सुतसों हितकरिलीजै ॥

यहै मंत्र सबहिन दृढ़ कीन्हों । नंद नंदनसों पतिव्रत लीन्हों ॥

धन्य धन्य ब्रज गोपकुमारी । जिनके हित पति कृष्णमुरारी ॥

मन वच क्रम हरिसों मन मानी । लोक लाज तिनका सम जानी ॥

इकक्षण श्याम न उरते टरहीं । नेम धर्म व्रत हरि हित करहीं ॥

जिनको यश शारद श्रुति गावैं । ब्रजवासी जन कहा बतवैं ॥

दोहा—जाग्रत स्वप्न सुषुप्तिहू, ब्रज युवतिन मन भाहिं ॥

सदा एक तुरिया रहत, और अवस्था नाहिं ॥

सो०—ऐसो कौन प्रवीन, नहै प्रेम ब्रज तियनको ॥

हरि छवि जल मन मीन, बिछुरि सकत नहिं एकपल ॥

अथ चीरहरण लीला ॥

भवैन रवन सबहिन विसरायो । ब्रज युवतिन हरिसों मन लायो ॥

यहै वासना सब उर जामी । होय गुपाल हमारो स्वामी ॥

काम वासना करि उर धायो । हरिके हेत तपहि मन लायो ॥

१ पति । २ पत्यरते । ३ सरस्वती । ४ घर ।



षट्दर्शसहस्र गोपकी कन्या । करन लगीं तप हरि हित धन्या ॥  
 रहत क्रिया युत तप को साथे । छांड दई सब भोग उपाधे ॥  
 प्रातकाल यमुनाजल न्हाहीं । प्रहर + प्रयन्त रहैं जल माहीं ॥  
 जपहि उमापति हर वृषकेतू । सुन्दर श्याम कृष्णपति हेतू ॥  
 शीत भीत मनमें नहिं लयावैं । नयन मूंदिके ध्यान लगावैं ॥  
 बार बार यह कहैं मनाई । हम बर पावहिं कुँवर कन्हाई ॥  
 जलते बहुरि निकसि सब आई । पूजाहिं गौरीशिव जाई ॥  
 चन्दन विल्वपत्र जल धारा । अक्षत सुमन सुगंध अपारा ॥  
 प्रीति सहित सब शिवहि चढावैं । धूप दीपकरि स्तुति गावैं ॥  
 छंद-करहिं स्तुति गानबहुविधि, पाणि पंकज जोरहीं ॥  
 बारबार नवाय मस्तक, प्रेम सहित निहोरहीं ॥  
 जयमहेश कृपालु शिव, आनन्दनिधि गिरिजापते ॥  
 कैलासपति कल्याण अगजग, नाथ सर्व नमामिते ॥  
 जटाजूट त्रिपुण्ड्र शशि कल, गंगयुत शोभित शिरे ॥  
 कमल नयन विशाल सुन्दर, चारु कुण्डल श्रुति धरे ॥  
 नीलकंठ भुजंग भूषण, भस्म अंग दिगम्बरे ॥  
 अर्द्धग गौरिविशाल उर, शिरमालधर करुणाकरे ॥  
 कर्पूर गौरि प्रसन्न आनन, पंचवक्त्र त्रिलोचने ॥  
 कामप्रद सुखधाम पूरण, काम शौच विमोचने ॥  
 भगवान् भौभव भय हरण, भूतादि पति शंभूहरे ॥  
 प्रणत जन पूरण मनोरथ, जगत पति मन्मथ अरे ॥  
 वृषभ वाहन त्रिपुर अरि, मृगराज धरलालाम्बरे ॥  
 शूलपाणि त्रिशूल मूलन, मूलकर शिवशंकरे ॥  
 सुर असुर नर नाग तव पद, वन्दि मनवांछित लहैं ॥  
 पूजते पदकमल प्रभु हम, कृष्णपति चाहति अहैं ॥

१ सोलहहजार । + प्रहर एक रहैं जलकेमाहीं । २ कामकेशव । ३ त्रिपुरकेवैरी ।



दोहा-तुम सर्वज्ञ सुजान शिव, जानत जनमन पीर ॥

परम दान दीजै हमें, सुन्दर वर बलबीर ॥

सो०-यह बरदान न आन, शिव तुमसों चाहत अहैं ॥

कृष्ण कमल पद ध्यान, रहै हमारे उर सदा ॥

यहि विधि ब्रज तिय नेम निवाहैं। शिवको पूजि कृष्ण पति चाहैं ॥

नित प्रति प्रात यमुन जल खोरैं। प्रीति रीति सों मन नहि मोरैं ॥

सविता सों बहु भांति निहोरैं। गोदपसारि युगल कर जोरैं ॥

तेज राशि दिनमणि जग स्वामी। जगत चक्षु सब अन्तर्यामी ॥

प्रणत मनोरथ पूरण कारी। हम पर होहु दयालु सुरारी ॥

काम हमारे तलुहि जरावै। नन्द सुवन वर हमको भावै ॥

होय हमारो पति नंदलाल। करहु कृपा सो दीनदयाल ॥

ऐसे हरि हित गोप कुमारी। करैं नेम व्रत तप तलु धारी ॥

गेह देहकी सुरति विखारी। कृशतलु भई परम सुकुमारी ॥

वर्ष दिवस यों कहत बिहान्यो। प्रभु अन्तर्यामी सब जान्यो ॥

मोहित शिव पूजत ब्रजनारी। और कामना सकल निवारी ॥

सकल भावके हरि हैं ज्ञाता। सकल देव द्वारा फल दाता ॥

दोहा-देखि नेम यह प्रेममय, गोपिनको गोपाल ॥

भये प्रसन्न कृपालु चित, जनहित दीनदयाल ॥

सो०-मो कारण जलन्हात, भये जलहिमें प्रकट हरि ॥

सुन्दरश्यामलगात, नवकिशोर वर वपु धरे ॥

न्हात जहां युवती सब आछे। मीजत पीठि सबनके पाछे ॥

चकित सबन पाछे हरिहेरो। देख्यो कान्ह कुँवर नंदकेरो ॥

मनमें हर्षित भई सब नारी। व्रत फल प्रकटे कुंज बिहारी ॥

नवल किशोर ध्यान मन लायो। सोई प्रगट रूप दरशायो ॥

दृष्टि परतही सकल लजानी। लागीं अंग दुरावन पानी ॥

एक एकको भेद न जानै। हरिको सब अपने ढिग मानै ॥

१ सूर्य । २ दोनों ।



कहत लाज लागत नहिं तुमको । बिना बसन देखतहौ हमको ॥  
 हैंसि निकसे तब कुँवर कन्हाई । चीर हारलै चले पराई ॥  
 हांक देत सब शपथ दिवावैं । फिरहु बसन भूषण हम पावैं ॥  
 डारि बसन भूषण तब दीन्है । गोपिन तुरत दौरिकै लीन्है ॥  
 चीर फटे भूषण सब टूटे । लेत न बनै तहां नहिं छूटे ॥  
 एक एककी लाज लजाहीं । बसन अभूषण पहिरत जाहीं ॥

दोहा—लगे श्याम ढीठी करन, यह कहि २ पछितात ॥

अन्तरगति आनन्द अति, झूठहि खीझत जात ॥

सो०—लोगन कहत सुनाय, कान्ह करत लँगराइ अति ॥

यशुमतिके ढिगजाय, कहत चलो कहिये सबै ॥

चलीं यशोमति पै सब ग्वारी । प्रेम विवश तनुदशा विसारी ॥  
 पुलक अंग अँगिया दरकानी । टूटे हार लिये निज पाँणी ॥  
 चीर चीर नख बात बनाई । यह मिसकरि उरहनलै आई ॥  
 देखो महारि श्यामके ये गुन । ऐसे हाल किये सबके उन ॥  
 चोली चीर हार दिखराये । डेर करत इतको भजि आये ॥  
 और बात इक लुनहु न माई । ढीठ भयो अति कुँवर कन्हाई ॥  
 बिना बसन हम न्हाति जहां सब । मीजत पीठ जाय पाछे तब ॥  
 और कहत तुमसों सकुचावैं । उर उधारिके तुमहिं दिखावैं ॥  
 महारि विचारत कहत कहा सब । भयो श्याम यहि लायक धौं कब ॥  
 सुनि युवतिनके मुख यह बानी । बोली बिहँसि नंदकी रानी ॥  
 बात कहौ सो जो निवहैरी । विनामीत नहिं चित्र लहैरी ॥  
 तुमको कहत लाज नहिं आवति । चोरी रही छिनारो लावति ॥

दोहा—तुम चाहति हो गगनैते, गहन तोरैया वाम ॥

सो कैसे करि पाइहौ, तुम लायक नहिं श्याम ॥

सो०—मैं बूझी सब बात, तुमसों हौं कहिहौं कहा ॥

वृथा फिरत अठिलात, मष्ट करौ सुनिहै जगत ॥

१ सौगंध । २ हाथ । ३ आकाशते । ४ चुप ।



यहि अन्तर हरि आय गये घर । शीश मुकुट लीन्हें मुरलीकर ॥  
 अति कोमल तनु भूषण सोहैं । बाल भेद देखत मनमोहैं ॥  
 जननी बोलि बांहगहि लीनी । कहत सबनिसों रसरिसभीनी ॥  
 देखदुरी तुम सब इत आवो । इनहींको अपराध लगावो ॥  
 देखहु समुझि लाज नहि आवत । इनहीके नख उरन दिखावत ॥  
 मेरो कान्ह अबहि सुत वारो । तुम कोउ औरहि जाय निहारो ॥  
 देखत हरिहि युवति भई भोरी । कहत महरि कछु तुमहि न खोरी ॥  
 देन उरहनो तुमको आई । नीकी पहिरावन हम पाई ॥  
 आपसमें सब कहत सुनाई । देखदुरी यह भाव कन्हआई ॥  
 यमुना तीर मिले जब आई । कहां गई तबकी तरुणाई ॥  
 इनके गुण ऐसेको जानै । और करत औरही ठानै ॥  
 घर आवतही भये नन्हआई । ऐसे मनके चोर कन्हआई ॥

दोहा-देखि चरित नंदलालके, भई बाल मति भोर ॥  
 सुधि बुधि मन कछु थिर नहीं, कहत औरकी और ॥  
 सौ०-सकुचीं बहुरि सँभारि, विवश देखि अपनी दशा ॥  
 चलीं घरन ब्रजनारि, हरि मुखकमल निहारिकै ॥

गई घरन ब्रज गोप कुमारी । चित हरिलीनो मदन मुरारी ॥  
 नेक न मन लागत सर माहीं । धाम कामकी सुधि कछु नाहीं ॥  
 मात पिताको डर नहि मानो । गारि दैत कोउ सुनत न कानो ॥  
 प्रात होतही गोप कुमारी । गई यमुन तट सब सुकुमारी ॥  
 देखत जहां जाय नंदनंदन । मोर मुकुट शोभित तनु चंदन ॥  
 मकराकृत कुण्डल उर माला । पीत वसन दृग कमल विशाला ॥  
 दूरश देखि आँखियां तृपतानी । भई सुखी उरतपन बुझानी ॥  
 कहत परस्पर मिलि सब ग्वाली । यमुना निकट गये वनमाली ॥  
 कौन भौंति करि आज अन्हैबो । बनत नाहि अब यमुना ऐबो ॥  
 कैसे करि हम वसन उतारैं । कान्ह हमारी ओर निहारैं ॥  
 मीजत पीठ औचकहि आई । वसन अभूषण लै भजिजाई ॥



कहौ फेरि कैसे तब पावैं । अब नहिं कान्ह घाट पै आवैं ॥

दोहा-कहत सकुचकी बात सब, ऊपर मन आनंद ॥

अन्तरगतिके वृत्तको, जानत सब नंदनंद ॥

सो०-जानी जाननराय, लाजान्तर युवती करत ॥

सो अब देखैं मिटाय, अन्तर भलो न प्रेममें ॥

और बात इक्ष श्याम विचारी । ये जल भीतर न्हात उचारी ॥

जातिय जलमें नांगी न्हाई । ताको दोष होत अधिकाई ॥

ताको दोष नाश तबपावैं । नांगी परपति सम्मुख आवैं ॥

सो इनको यह दूषण दारौं । और लाज अन्तर निरवारौं ॥

करौं आज इनसों विधिसोई । इनको हित ममकौतुक होई ॥

जो कुछ चूक दासते होई । आप सुधारि लेत हरि सोई ॥

अन्तर प्रभुको नेक न भावैं । भजै निरंतर जब हरिपावैं ॥

अन्तर रहित भक्ति हरिप्यारी । कहत वेद सब सन्त पुकारी ॥

तब हरिमन यह कियो विचारा । इनके बसै नहरौं इक बारा ॥

प्रभु सबकी तन दृष्टि बचाई । कदम वृक्ष चढि रहे लुँकाई ॥

जब गोपिन हरिदेख्यो नाहीं । चकित विलोकी इत उत माहीं ॥

जाने सदैव न गये नंदलाला । न्हात चलीं तब सब ब्रजबाला ॥

दोहा-धरे उतारि उतारि सब, तटपर भूषण चीर ॥

नमै होय स्नान हित, पैठीं यमुना नीर ॥

सो०-ग्रीवालों जलमाहि, पैठि करति स्नान सब ॥

मुख छवि कही न जाहि, कनक कंज फूले मनहुं ॥

बार बार झूझत जलमाहीं । प्रेम सहित मन सुदित नहांहीं ॥

शिवसों चितली करत निहोरी । कबहुं रविचन्दें करजोरी ॥

यहै कामना करि सब ध्यावैं । नंद नन्दनको पति करि पावैं ॥

कामातुर सब गोपकुमारी । धरैं ध्यान उरकुंजविहारी ॥

मृदहिं नयन दरश चितलावैं । शब्द विचार श्रवण सुखपावैं ॥

१ वृत्तांत । २ वस्त्र । ३ दुबकगये । ४ घर । ५ नंगी । ६ सुवर्णके कमल ।



यहि अन्तर हरि आय गये घर । शीश सुकुट लीन्हें मुरलीकर ॥  
 अति कोमल तलु भूषण सोहैं । बाल भेद देखत मनमोहैं ॥  
 जननी बोलि बांहगहि लीनी । कहत सबनिसों रसरिसभीनी ॥  
 देखहुरी तुम सब इत आवो । इनहींको अपराध लगावो ॥  
 देखहु समुझि लाज नहि आवत । इनहीके नख उरन दिखावत ॥  
 मेरो कान्ह अवहि सुत वारो । तुम कोउ औरहि जाय निहारो ॥  
 देखत हरिहि युवति भई भोरी । कहत महरि कछु तुमहि न खोरी ॥  
 देन उरहनो तुमको आई । नीकी पहिरावन हम पाई ॥  
 आपसमें सब कहत सुनाई । देखहुरी यह भाव कन्हाई ॥  
 यमुना तीर मिले जब आई । कहां गई तबकी तरुणाई ॥  
 इनके गुण ऐसेको जानै । और करत औरही ठानै ॥  
 घर आवतही भये नन्हाई । ऐसे मनके चोर कन्हाई ॥

दोहा-देखि चरित नंदलालके, भई बाल मति भोर ॥  
 सुधि बुधि मन कछु थिर नहीं, कहत औरकी और ॥  
 सौ०-सकुची बहुरि सँभारि, विवश देखि अपनी दशा ॥  
 चली घरन ब्रजनारि, हरि मुखकमल निहारिकै ॥

गई घरन ब्रज गोप कुमारी । चित हरिलीनो मदन मुरारी ॥  
 नेक न मन लागत सर माहीं । धाम कामकी सुधि कछु नाहीं ॥  
 मात पिताको डर नहि मानो । गारि दैत कोउ सुनत न कानो ॥  
 प्रात होतही गोप कुमारी । गई यमुन तट सब सुकुमारी ॥  
 देखत जहां जाय नंदनंदन । मोर सुकुट शोभित तलु चंदन ॥  
 मकराकृत कुण्डल उर माला । पीत वसन दग कमल विशाला ॥  
 दूर देखि अँखियां तृपतानी । भई सुखी उरतपन बुझानी ॥  
 कहत परस्पर मिलि सब ग्वाली । यमुना निकट गये वनमाली ॥  
 कौन भौंति करि आज अन्हैबो । वनत नाहि अब यमुना ऐबो ॥  
 कैसे करि हम वसन उतारैं । कान्ह हमारी ओर निहारैं ॥  
 मीजत पीठ औचकहि आई । वसन अभूषण लै भजिजाई ॥



कहौ फेरि कैसे तब पावैं । अब तहिं कान्ह घाट पै आवैं ॥

दोहा-कहत सकुचकी बात सब, ऊपर मन आनंद ॥

अन्तरगतिके वृत्तको, जानत सब नंदनंद ॥

सो०-जानी जाननराय, लाजान्तर युवती करत ॥

सो अब देखैं मिटाय, अन्तर भलो न प्रेममें ॥

और बात इक्ष श्याम विचारी । ये जल भीतर न्हात उधारी ॥

जातिय जलमें नांगी न्हाई । ताकी दोष होत अधिकाई ॥

ताको दोष नाश तबपावैं । नांगी परपति सम्मुख आवैं ॥

सो इनको यह दूषण टारौं । और लाज अन्तर निरवारौं ॥

करौं आज इनसों विधिसोई । इनको हित ममकौसुक होई ॥

जो कुछ चूक दासते होई । आप सुधारि लेत हरि सोई ॥

अन्तर प्रभुको नेक न आवैं । भजै निरंतर जब हरिपावैं ॥

अन्तर रहित भक्ति हरिप्यारी । कहत वेद सब सन्त पुकारी ॥

तब हरिमम यह कियो विचारा । इनके बसै नहरौं इक बारा ॥

प्रभु सबकी तब दृष्टि बचाई । कदम वृक्ष चढि रहे लुकाई ॥

जब गोपिन हरिदेख्यो नाहीं । चकित विलोकी इत उत माहीं ॥

जाने खर्दैन गये नंदलाला । न्हात चलीं तब सब ब्रजबाला ॥

दोहा-धरे उतारि उतारि सब, तटपर भूषण चीर ॥

नयें होय स्नान हित, पैठीं यमुना नीर ॥

सो०-ग्रीवालों जलमाहिं, पैठि करति स्नान सब ॥

मुख छवि कही न जाहिं, कर्मक कंज फूले मनहुं ॥

बार बार बूझत जलमाहीं । प्रेम सहित मन मुदित नहांहीं ॥

शिवसों चिनती करत निहोरी । कबहुं रविचन्दें करजोरी ॥

यहै कामना करि सब ध्यावैं । नैद नन्दनको पति करि पावैं ॥

कामातुर सब गोपकुमारी । धरैं ध्यान उरकुंजविहारी ॥

मुदहिं नयन दरश चितलावैं । शब्द विचार श्रवण सुखपावैं ॥

१ वृत्तांत । २ वस्त्र । ३ दुबकगये । ४ घर । ५ नंगी । ६ सुवर्णके कमल ।



भुज जोरत अंकम हितलागी । मगन प्रेमरस तिय बड़भागी ॥  
 प्रभु अन्तर्दामी सबजानैं । देखैं कदमचढ़े सुखमानैं ॥  
 कहत धन्यधनि ब्रजकी बाला । भरे हित तप करत विशाला ॥  
 प्रीति रीति सबकी पहिचानी । क्षण क्षणकी सेवा हरिमानो ॥  
 काहु भाव मोहिं कोउ ध्यावै । मोहिं विरदराखे बनिआवै ॥  
 कियो बहुत अमममहित कारण । अब इनको दुखकरों निवारण ॥  
 उपजी कृपा खलुझि जनपीरा । उतरे तरुते श्रीबलवीरा ॥

दोहा-प्रेम मगन युवती सबै, रहीं ध्यान मन लाय ॥

हरि सब भूषण वसन लै, चढ़े कदमपर जाय ॥

सो०-भूषण वसन अपार, सोरह सहस वधूनके ॥

हरै एकही बार, लै राखे तरु नीपपर ॥

कस्यो नीपतरु अति विस्तार । फूले सुमन सुगंध अपार ॥  
 लैलै वसन डार अटकाये । जहां तहां भूषण लटकाये ॥  
 नीलाम्बर पट्टाम्बर सारी । श्वेत पीत चूनरि अरुणारी ॥  
 जहां तहां शाखन प्रतिखोहैं । देखत छवि वसन्त मनमोहैं ॥  
 सो तरुशाखा परम सुहाई । बैठे छबिकी राशि कन्हाई ॥  
 युवती सुकृति तरुण धरिमानो । पस्यो सुकृति पूरण फलजानो ॥  
 देखत कदम चढ़े नैदलाला । बसन बिना जलमें सब बाला ॥  
 ध्यान करतते जब सब जागीं । तब जलबाहर निकसन लागीं ॥  
 जलते निकारि आयतट देख्यो । भूषण वसन तहां नहिं देख्यो ॥  
 इत उत चितै चकित भईभारी । सकुचिगई फिर जल सुकुमारी ॥  
 नाभि प्रयन्त नीरमें ठाढी । भुजलगाय उरचिन्ता बाढी ॥  
 कैपत शीतमें अति अकुलानी । बार बार कहि कहि पछितानी ॥

दोहा-ऐसोको भूषण वसन, सबके एकहि बार ॥

तटते लये चुरायके, लगी न नेक अवार ॥

सो०-हम जानत यह बात, अम्बर हरि हर लगये ॥

१ दूकरो । २ वृक्ष । ३ कदम वृक्ष । ४ वस्त्र ।



और कौनको गात, जो ब्रजमें ढीठो करे ॥

दीन होय तब युवति पुकारी । हौ कहूँ श्याम जाहिं बलिहारी ॥  
 दरश दिखाय विनय सुनि लीजै । अम्बर देहु कृपा अब कीजै ॥  
 थर थर काँपत अँग सुकुमारी । देखि श्याम नहिं सके लँभारी ॥  
 बोलि उठे तब मदन गोपाला । कहा कहत मोसों ब्रजवाला ॥  
 कतहौ जलमें भरत जड़ाई । लेहु वसन भूषण इत आई ॥  
 तुम पट भूषण सुरति बिसारी । तब मैं लै कीन्हों रखवारी ॥  
 अब अपने पट भूषण लीजै । रखवारी कछु हमको दीजै ॥  
 जब ऐसे हरि बोल सुनायो । तब सबके मन धीरज आयो ॥  
 सुनि हरि वचन सकल हरषानी । लखे कदम ऊपर सुखदानी ॥  
 कहत सुनो सखि हरिकी बातें । वसन बुराय करैं ये घातें ॥  
 हम सब जलके बीच उधारी । मँगत हैं हमसों रखवारी ॥  
 तब हँसि बोली ब्रजकी बाला । सुनहु श्याम सुन्दर नंदलाला ॥

दोहा-तन मन धन अपों तुम्हें, है जु तुम्हारे पास ॥

अब अम्बर दीजै हमें, जानि आपनी दास ॥

सौ०-तब हँसि कह्यो कन्हाय, जो तन मन मोकों दियो ॥

लेहु वसन ह्यां आय, तौ मानो मेरो कह्यो ॥

सुनहु श्याम बन बात हमारी । नशैं कौन बिधि आवं नारी ॥  
 हम तरुणी तुम तरुण कन्हाई । बिना वसन क्यों देह दिखाई ॥  
 यह मति आप कहाँ औं पाई । आज सुनी यह बात नवाई ॥  
 पुरुष जात यह कहत न जानहु । हाहा ऐसी मन जनि आनहु ॥  
 कहत श्याम जो नश न ऐहौ । तौ तुम पट भूषण नहिं पैहौ ॥  
 जो तनमन दीन्हों तुम मोही । तौ राखतकित लज्जा ब्रोही ॥  
 यह अन्तर मोसों जनि राखौ । मानि लेहु तुम मेरे भापौ ॥  
 शीत सहतकत नवल किशोरी । लाज देहु जलहीमें बोरी ॥  
 जलते निकसि वेग इत आवो । हाथ जोरि मोहिं विनय सुनावो ॥



ज्यों जलमें रबिते कर जोरो । त्यों है सन्मुख मोहि निहोरो ॥  
 यह सुनि हैंसी सकल ब्रजनारी । ऐसी बात न कहौ मुरारी ॥  
 हाहा लागहि पाँय तिहारे । पाप होत हैं जाड़न मारे ॥  
 दोहा-छाँड़ि देहु यह टेक हरि, बरु भूषण तुम लेहु ॥

शीत भरत हम नीरभें, वसन हमारे देहु ॥

सो०-दूषण होत अपार, जो तियअंग देखहि पुरुष ॥

ताते नंदकुमार, नारी नम्र न देखिये ॥

तुमको लोह होत नहि राई । बड़े निदुर हौं ऊँवर कन्हाई ॥

ऐसो करौ जो तुमको सोहै । आज तुम्हारी पटतर कोहै ॥

आजहिते हम दासि तिहारी । कैसे अंग दिखावहि नारी ॥

अंग दिखाये भूषण पैहौ । नातर जलमें बैठी रहौ ॥

मेरे कहे निकलि सब आवो । थोरे में मो भलो मनावो ॥

कत अंतर राखत हौ हम सों । बार बार मैं भाषत तुमसों ॥

लेहु आय अपने पटभूषण । यह लागै हमको सब दूषण ॥

मोहित तुम कीन्हो तप भारी । अब कत लज्जा करत हमारी ॥

मैं अन्तर्यामी सब जानी । करिहौं तुम्हारे मनकी मानी ॥

अब पूरण तप भयो तुम्हारे । अन्तर इतो दूरि करि डारो ॥

सुनि यह मोहनके मुख वानी । सब युवती मनमें हर्षानी ॥

तब सबहिन यह बात विचारी । अवतौ टेक परे बनवारी ॥

दोहा-कहत परस्पर मिलि सवै, हरि हठ छाँड़त नाहि ॥

वसन विना कैसे बने, कौन भांति घरजाहि ॥

सो०-बलौ लीजिये चीर, इनहींको हठ राखिकै ॥

मनमोहन बलबीर, जो कछु कहैं सो कीजिये ॥

यह विचार जल बाहर आई । बैठि गई तट अतिहिलजाई ॥

बार बार हरि निकट बुलावैं । त्यों त्यों अधिक लाज को पावैं ॥

कहत श्याम अम्बर अब दीजै । हाहा इतनो हठ नहि कीजै ॥



बहत समीर शीत अति भारो । मानेंगी उपकार तुम्हारो ॥  
हम दासी तुम नाथ हमारे । हम सबकी पति हाथ तुम्हारे ॥  
कहत श्याम यह तजौ सयानी । छांडहु लाज करहु मम बानी ॥  
अपने वसन लेहु ह्यां आई । देहौ तुमको नन्द दुहाई ॥  
आधु लकल लाजको त्यागे । करहु श्रृंगार आय मो आगे ॥  
तब सबहिन यह मनमें जानी । करिहैं श्याम आपनी ठानी ॥  
करकुच अंग टांकि भई ठाढी । वदन नवाय लाज अति बाढी ॥  
गई कदमतर हरिके पासा । कहति देहु अब हमको वासा ॥  
हरि बोले यों वसन न पावो । हाथ जोरि मोहिं विनय सुनावो ॥

दोहा—जो कहिहौं करिहैं सबै, हँसि बोलीं ब्रज वाम ॥

लहैं दांव हमहूँ कबहुँ, सुनो श्याम अभिराम ॥

सौ०—उभय कमल कर जोरि, सलैजसहास निहारि हरि ॥

मांगत सकल निहोरि, कहत देहु अब वसन प्रभु ॥

लखि युवतिनकी प्रीति कन्हाई । रीझे भक्तनके सुखदाई ॥  
धन्य धन्य बोले गोपाला । निश्चय प्रीति करी तुम बाला ॥  
देखि निरन्तर गोप कुमारी । दीन्है वसन अभूषण डारी ॥  
अति आतुर सब पहिरन लागीं । प्रेम प्रीतिके रस मति पागीं ॥  
तब हँसि बोले कुंजविहारी । मैं पति तुम भरी सब प्यारी ॥  
अन्तर शोच दूरि करि डारो । मेरो कह्यो सत्य उर धारो ॥  
शरद रात तुम आश पुरैहौं । अंकम अरि सबको उर लैहौं ॥  
अब तप करि तुम मत तनुगारो । मैं तुमते क्षण होत न न्यारो ॥  
करखों परश सबन सुख दीन्हो । विरह ताप तनुको हरि लीन्हो ॥  
बिदा करी हँसि नैदके लाला । निज निज सदन गई ब्रजवाला ॥  
गोपिन उर अति हर्ष बढ़ायो । मन मन कहति कृष्ण बर पायो ॥  
ब्रजवासी जनके सुखदाई । आये अपने सदन कन्हाई ॥  
दोहा—इहि विधि ब्रज सुन्दरिनको, हित करि सुंदरश्याम ॥

१ लज्जायुक्त । २ ब्रजकीन्त्री ।



ब्रज विलास विलसत विविध, सकल लोक अभिराम ॥  
 सो०—सुंदर धन सुखरास, सब विधि करि सबके सुखद ॥  
 नित नव करत विलास, मुदित सकल ब्रज लोग लखि ॥

अथ वृन्दावन वर्णन लीला ॥

हरि लखि मात पिता सुख पावैं । बाल भाव बहु लाड लडावैं ॥  
 नवलकिशोर शुभगतनु श्यामा ॥ निरखत मुदित सकल ब्रजवासि ॥  
 ग्वाल बाल सब समकरि जानैं । सखा प्राण प्रीतम करि मानैं ॥  
 नित उठि गाय चरावन जाहीं । क्रीडा करैं विविध ब्रजमाहीं ॥  
 इकदिन सोवत सदन कृपाला । आये द्वार बुलावन ग्वाला ॥  
 चलहु श्याम बन धेनु चरावन । यह लुनिजननी लगी जगावन ॥  
 उठहु तात मैया बलि जाई । ढेरत ग्वाल बाल बल भाई ॥  
 वदन दिखाय सबन सुख देऊ । दंतवन करि कलु करहु कलेऊ ॥  
 भई बेर बनको नंदलाला । अब मति सोवहु मदनगोपाला ॥  
 देखनको छवि अति अतुगई । सखा द्वार सब ढेर लगाई ॥  
 सोवतते हरि जागत नाही । लुनत बात आलस मन माहीं ॥  
 कबहुं वसन टांपि मुख सोवैं । कबहुं उघारि जननि तनु जोवैं ॥  
 खोलत नयन पलक झुकि आवैं । सो छवि निरखि मातु सुख पावैं ॥

दोहा—उठो लाल जननी कह्यो, तब चितये हंसि मन्द ॥

पटगहि पुनि पुनि फेर मुख, तबहि उठे ब्रजचन्द ॥

सो०—कबके ढेरत ग्वाल, बलदाऊ यह कहि उठे ॥

बनको भई अवार, गई गाय आगे निकसि ॥

यह सुनि तुरतहि उठे कन्हवाई । यशुमति जल झारी भरिलाई ॥  
 दुहुँ भैयन करवाय सुखारी । पाँले मुख जननी निज सारी ॥  
 करहु कलेऊ अब कलु प्यारे । एक थार दोउ सुत बैठारे ॥  
 दधि माखन रोटी अरु मेवा । करत प्रात दोउ भ्रात कलेवा ॥  
 करत निकट बैठे मनमोदा । दृग सुख लूटत महारि यशोदा ॥

१ बराबरके । २ घरमें । ३ यशोदा । ४ दांतन ।



मात प्रेमते अति लपताई । अँचवन कर जु उठे दोउ भाई ॥  
दूरे ढेर उठ्यो इक ग्वाला । बन कहँ बेगि चलहु नँदलाला ॥  
बल मोहन आवहु दोउ भैया । आगे निकसि गई हैं गैया ॥  
ग्वाल वचन सुनि अति अतुराई । कछु अँचयो कछु नहिँ दोउ भाई ॥  
सुरली सुकुट लकुट पटलीन्हो । निकसि दूरि वनहीं मन दीन्हो ॥  
केतिक दूरि गई चलि गैया । ग्वालहि बूझत जात कन्हैया ॥  
कछु वन पहुँची हैहैं जाई । कछु मग मिलिहैं कुँवर कन्हवाई ॥

दोहा-वन पहुँचत सुरभी लई, बल मोहन दोउ धाय ॥

कहत सबन सों जात कित, हमहूँ पहुँचे आय ॥

सो०-तुम आय अतुराय, जँवत पर लखिके हमैं ॥

तुम सँग रहत बलाय, अब हम दूरि चरायहैं ॥

यह सुनि सखा धाय सब आये । हरिको अंकम भरि उर लाये ॥  
तुमहौ सबहिनके सुखदाई । हमको तजि मति जाहु कन्हवाई ॥  
आज कुमुद बन चलहु चरावन । शीतल सुखदसवन अति पावन ॥  
सुनत कछो अति हर्ष कन्हवाई । नीकी कही बात यह भाई ॥  
अपनी अपनी गाय बुलावो । एक ठोर करि सबन चरावो ॥  
यह सुनि ग्वाल सुरभिगण घेरत । लै लै नाम गाय सब ढेरत ॥  
धौरी धूमरि राती कवरी । पियरी गोरी गैनी कजरी ॥  
खैरी फुलही रौची चौरी । धूरी हमरी मुंडी भौरी ॥  
लीली कपिली सुवरन जेती । लाखी निकही रतनी तेती ॥  
ऐसे सुरभी ढेर बुलाई । सब मिलि चले कुमुदवन धाई ॥  
तब बल कछो दूरि मति जाहु । नंद रिसैहैं अरु यशुदाहू ॥  
बलको कछो मानि सुखदाई । बोलि लिये सब सखा कन्हवाई ॥  
दोहा-कहत सबन समुझाय हरि, कौन कुमुद बन जाय ॥

बुरो मानि हैं नंद सुनि, और यशोदा माय ॥

सो०-लावहु गाय फिराय, चलिये वृन्दावन सुखद ॥

सुरभी चरत अघाय, वंशीवट यमुना निकट ॥



यह कहि श्याम चले अगुवाई । फेरी गाय ग्वाल सब धाई ॥  
 वृन्दावनहि चले मनमोहन । हर्षित सखा वृन्द तव गोह्वन ॥  
 करत कुलाहल आनँद भारी । पहुँचे वृन्दावन वनवारी ॥  
 सुरभीगण चहुँदिशि बगराई । कहत सखा सब हर्ष बढ़ाई ॥  
 जादिन अच हति श्याम सिधाये । ता दिनते या वन अब आवे ॥  
 देखत वन सब भये सुखारी । बहत मनोहर त्रिविध बयारी ॥  
 विटपनकी शोभा चित दीन्हे । देखत श्याम सखन लँग लीन्हे ॥  
 नव किसलयदल सुमन सुहाये । मनहुँ वसन्त श्रृंगार बनाये ॥  
 मधुर मिष्ट सुन्दर सुखकारी । फलके भार रहीं नवडारी ॥  
 मनहुँ देखि श्यामहि सुखपाई । देत भेंट तरु शीश नवाई ॥  
 सुमन भँवर गुंजत छवि पावै । स्तुति मनहुँ मधुर सुर गावै ॥  
 एक पांव ठाढ़े सब आगे । जहँ तहँ थकित मनहुँ अनुरागे ॥

दोहा-बेलि विविध लपटी ललित, फूलि रहीं बहुरंग ॥

शोभितसहित श्रृंगारजिमि, नारि पतिनके संग ॥

सो०-हालि उठत सब पात, मन्द पवन लागत कबहुँ ॥

आनँद उर न समात, बार बार पुलकत मनहुँ ॥

कुंज पुंज मंजुल सुखदाई । शीतल सुमन सुगंध सुहाई ॥  
 हरि विश्राम हेतु वन जानो । रचे विचित्र सदन बहु मानो ॥  
 बोलत हैं कल खग बहुरङ्गा । कीर कपोत कोकिला भुंगा ॥  
 मनहुँ भेरि सब आनँद गावै । जहँ तहँ वरही नृत्य दिखावै ॥  
 तरुदल खरक पवन गति साजै । मधुर सुरन बाजन ज्यों वाजै ॥  
 क्रीडत मर्कट शुभगति लीने । करत कला ज्यों नट परवीने ॥  
 मृग गण चित्त अत आनँद बाढ़े । मनहुँ तमाशगीर सब ठाढ़े ॥  
 पाय श्याम घनहित वनराई । करी मनहुँ आनँद बधाई ॥

१ संग । २ गौवनकेझुंड । ३ शीतल मंद सुगंधयुत । ४ फूल । ५ पंछी ।

६ तोता । ७ कबूतर । ८ मोर । ९ वंदा ।



वनशोभा कछु वरणि न जाई । ऋतु वसंत जहँ रहत सदाई ॥  
जहां स्वभाव काल गुण नाहीं । वैरभाव नहिं खग मृग माहीं ॥  
सदा एकरस परम प्रकाशी । परमसुखद आनंदकी राशी ॥  
चिन्तामणि सब भूमि सुहावन । कोमल विमल शुभग अति पावन  
दोहा-शोभा वृन्दा विपिनकी, वरणि सकै अस कौन ॥

शेष महेश गणेश विधि, पार न पावत तौन ॥

सो०-महिमा अमित अपार, श्रीवृन्दावन धामकी ॥

जहँ नित रहत बिहार, परब्रह्म भगवान हरि ॥  
देखि श्याम वन भये सुखारी । बैठे तरतैर विपिन विहारी ॥  
वृन्दावनकी करत बड़ाई । बलदाऊ सों कहत कन्हाई ॥  
मैं यह वट देखत सुख पावत । वृन्दावनभोको अति भावत ॥  
कामधेनु सुरतरु विसरावत । रम्यो सहित बैकुण्ठ भुलावत ॥  
यह यमुना तट यह वन यावत । ये सुरभी अति सुखद सुहावत ॥  
यहसुख त्रिभुवनकितहुँनपावत । ताते मैं तनु धरि इत आवत ॥  
दाऊजू तुम सचकर मानौं । यह वृन्दावन जडमति जानौं ॥  
चितवनमें आनंदकी रासा । प्रेम भक्तिको यहां निवासा ॥  
परमधाम मम परम सुहावन । पावनहूँते पावन पावन ॥  
जे तरु वृन्दावनके माहीं । कल्पवृक्ष तिनकी सरि नाहीं ॥  
कल्पवृक्षके तरु जब जाई । तब मांगे वांछित फल पाई ॥  
वृन्दावन तरु चितत जोई । प्रेम भक्ति मम पावत सोई ॥  
दोहा-जाके वशमें रहत हौं, अपनी प्रभुता त्याग ॥

प्रेम भक्तिसौ लहत नर, वृन्दावन अनुराग ॥

सो०-श्रीमुख वरण्यो श्याम, श्रीवृन्दावनकोर्महत ॥

मुख पायो बलराम, सुनत कान्हूके वचन वर ॥  
सखा वृन्दसुनि श्रीमुख वानी । प्रेम मगन तनु दशा भुलानी ॥  
चितवतहरिमुखपलकविसारी । जिमि चक्रोदगण शशिहि निहारी

१ ब्रह्मा । २ वृक्ष । ३ वृन्दावनविहारी । ४ लक्ष्मी । ५ पवित्रतेहूपवित्र । ६ माहात्म्य ।



कहतचकितसबअतिसुखपावत। निज लीला हरि प्रगट जनावत ॥  
 पुनि पुनिपुलक कहत शिरनाई। सुनहु श्यामघन कुँवर कन्हैयाई ॥  
 बार बार तुमको कर जोरैं। हमहि कान्ह तुम तजहु न भोरैं ॥  
 जहां जहां तुम तनुधरि आवो। तहां तहां जनि चरण छुड़ावो ॥  
 तब हँसि बोले कुँवर कन्हैया। ब्रजते तुम्हें नटारों भैया ॥  
 तुम मेरे मनको अति भावत। तुमते मैं बहुतै सुख पावत ॥  
 या ब्रजसम त्रिभुवन कहूँ नाहीं। तुम्हारे ढिग मैं रहत सदाहीं ॥  
 मैं तुम हेतु देह यह धारी। तुमते ब्रजलीला विस्तारी ॥  
 है यह ब्रज मोको अति प्यारो। ताते कबहूँ होत न न्यारो ॥  
 ऐसे हरि ग्वालनके माहीं। गुप्त बात कहि कहि समुझाहीं ॥

दोहा-मधुर वचन सुनि श्यामके, सखा वृन्द सुखपाय ॥  
 प्रेम पुलकितनु मुदित मन, रहे सबै गहि पाय ॥  
 सी०-धनि धनि धनि तुम श्याम, धनि ब्रज धनि वृन्दा विपिन  
 तुम्हारे गुण अभिराम, हम सब अंज न जानहीं ॥

सुनहु श्यामघन नन्ददुलारे। तुम प्रभु हम सब दास तुम्हारे ॥  
 दुल्लभ यह हरि संग तुम्हारे। कबधौँ फेरि गोप तनु धारो ॥  
 नाजानिये बहुरि ब्रजनाथा। कब तुम फिरिहौ सुर सुनि साधा ॥  
 कब तुम छाक छीनिकैखैहौ। कबधौँ फिरि ऐसे सुख दैहौ ॥  
 बलि बलि जइये श्याम तुम्हारी। अब इक विनती सुनहु हमारी ॥  
 सुन्दर मुरली नेक बजावो। अधरसुधारस श्रवणन प्यावो ॥  
 तुम्हें नन्दकी साँह दिवावैं। मुरलीधुनि सुनि हम सुखपावैं ॥  
 तुम्हारे सुख यह बाजत नीकी। हम सबकी जीवन है जीकी ॥  
 सुनत सखनकी कोमल बानी। प्रेम सुधारस सों लपटानी ॥  
 गुण गम्भीर गोपाल कृपाला। भक्त वश्य प्रभु दीनदयाला ॥  
 भये प्रसन्न भक्त सुखदाई। चितये कमलनयन समुदाई ॥  
 करतेलकुट निकट धरि दीनो। पाछे मुरलीको गहि लीनो ॥



दोहा-पकरि दुहूँ कर अधर धर, मधुर सुरलि धुनिगान ॥

मोहिलियो चर अचरनभै, जल थल श्यामसुजान ॥

सो०-भई थकित गति पौन, यमुना जल लीन्ही शयन ॥

है गये खग मृग भौन, रहे जहां तहँ चित्रसे ॥

उपजावत गावत गति सुंदर । राग रागिनी ताल विविधवर ॥

सखा वृन्द सुनि तनमन वारै । निरखत मुख छवि पलकविसारै ॥

चलत नयन झुकुटी पुट नासा । करपल्लव सुरली सुरश्वासा ॥

मानहुँ निरतक भाव बतावैं । शुभगति नायक सैन सिखावैं ॥

कुंचित अलंक वदन छवि देई । मनहुँ कमल रस अलिगण लेई ॥

कुंडल झलक कपोलन माहीं । मनहु सुधारस मँकर भ्रमाहीं ॥

दशनदमकमोतिन लर शीवां । मनहु सकल शोभाकी सीवां ॥

तिलक विचित्र भालछवि छाजै । मनहु महा छवि दशन बिराजै ॥

चमकत मोर चंद्रिका चारू । मनहु सकल भृंगार भृंगारू ॥

श्याम गात उर गजमणि माला । सँग शोभित वनमाल विशाला ॥

भरकत गिरि मनो सुरसरिधारा । बैठी पंगति कीर किनारा ॥

कटि तटपीत तंडित दुतिहारी । पद पंकज नूपुर रुचिकारी ॥

दोहा-ग्रीवा लटकनसुरकि पर, शोभित छविसमुदाय ॥

प्रेम भगन निरखत मुदित, गोप बाल मुखपाय ॥

सो०-सुन्दर श्याम सुजान, देत परमसुख सखनको ॥

वारत तन मन प्रान, धन्य धन्य कहि ग्वाल सब ॥

रीझत ग्वाल रिझावत श्यामा । लेत सुरलिमें सबको नामा ॥

हँसत ग्वाल सब दैकर ताला । लेत हमारो नाम गोपाला ॥

कहत श्याम अब तुमहुँ बजावो । ऐसे हमको गाय सुनावो ॥

हँसि सुरली तिनके कर दीन्हो । अधरनधर अमृत रस लीन्हो ॥

लैलै निज कर सकल बजावत । हरिके स्वरको रूप न पावत ॥

१ आकाश । २ पवनचलने सों रहिगयो । ३ वहिवेते रहिगयो । ४ सुप-  
हैगये । ५ घुंघरवारी अलक । ६ भौरनके समूह । ७ मगर । ८ नार । ९ पन्ना-  
को पर्वत । १० गंगा । ११ तोता । १२ बिजुली ।



आस पास सोहत सब बालक । मधि प्रभु प्रीति रीतिके पालक ॥  
 हँसि हँसि सबके चित्त चुरावैं । सब मिलि प्रेमानंद बड़ावैं ॥  
 जैसे श्री मुरलीधर गायो । काहू पै सो रूप न आयो ॥  
 हँसि हँसि कहत परस्पर भाई । हरिकी समको लकै बजाई ॥  
 चतुरानन पंचानन ध्यावैं । सहस्रानन नवनित गुण गावैं ॥  
 सुरनर सुनि कोउ पार न पावैं । सो ग्वालन संग वेणु बजावैं ॥  
 ब्रजवासी जनको प्रतिपाला । भक्त वश्य प्रभु दीनदयाला ॥

दोहा—कारण करण अनंत गुण, निर्गम नेत जिहि गाव ॥

सो ग्वालन संग गावहीं, देखहु भक्ति प्रभाव ॥

सो०—वृन्दावन की रेनु, ब्रह्मादिक वांछित सदा ॥

जहां श्याम मुखदेनु, ग्वालन संग चारत सुरभि ॥

अथ द्विजपत्नीयाचन लीला वर्णन ॥

विहरत वृन्दावन बनवारी । विविध भांति लीला अनुसारी ॥  
 कबहुं सखन संग मिलि गावैं । कबहुं मुरली मधुर बजावैं ॥  
 कबहुं गैयन धरत धाई । कबहुं यमुनाके तट जाई ॥  
 करत कुलाहल आनंद भारी । दैत दिवावत रसकी गारी ॥  
 ऐसे लीला करत अपारा । भये क्षुधारत गोपकुमारा ॥  
 कहत भये तब हरिसों जाई । हमको क्षुधा लगी अधिकाई ॥  
 यह सुनि प्रभु भक्तन हितकारी । अपने मन यह बात विचारी ॥  
 सुनि सुनि मेरे गुण गण गाना । करत रहत द्विजतिय मन ध्याना ॥  
 तिनको दरशन आज दिखाऊं । तिनके मनकी ताप नशाऊं ॥  
 तब हरि ग्वालन कह्यो बुझाई । यज्ञ करत ह्यां द्विर्जसमुदाई ॥  
 तिनके निकट जाउ तुम भाई । प्रथम प्रणाम कीजियो जाई ॥  
 कहियो हमको कृष्ण पठायो । तुमपै भोजन मांगन आयो ॥  
 दोहा—यह सुनि ग्वाल गये तहां, जहां विप्रसमुंदाय ॥

१ ब्रह्मा । २ महादेव । ३ शेष । ४ वेद । ५ भूखे । ६ माथुरब्राह्मण ।

७ अनेक ब्राह्मण ।



यज्ञ करत अहमित लिये, विद्याको बल पाय ॥  
 सो०-गवालन करी प्रणाम, कछो तिन्हें करं जोरिकै ॥  
 हमैं पठाये श्याम, मांग्यो है भोजन कछू ॥  
 वनमें राम कृष्ण दोउ भैया । आये इतहि चरावन गैया ॥  
 वे कछु आज भयेहैं भूखे । यह सुनि विप्र द्वैगये रूखे ॥  
 कछो यज्ञहित करी रखौई । अहिरन पहिले देय न कोई ॥  
 यह सुनि गवालनसकल फिरि आये । हरिसों तिनके वचन सुनाये ॥  
 सुनि हलधरतनचितै कन्हौई । बोलै वचन मन्द मुखकाई ॥  
 येद्विज धर्म कर्म लपटाने । विना भक्ति मोको नहि जाने ॥  
 तब गवालनसों कछो सुरारी । जाँउ जहाँ इनकी सब नारी ॥  
 उनको है दृढ़ भक्ति हमारी । वे मानैगी कहो तुम्हारी ॥  
 उनसों भोजन मांगहु जाई । कहियो भूखे भये कन्हौई ॥  
 तब द्विज नारिन द्विगये आये । हाथ जोरि तिनके शिरनाये ॥  
 कछो राम अरु कुँवर कन्हैया । वनमें भूखेहैं दोउ भैया ॥  
 मांग्योहै कछु भोजन तुमसों । आज्ञा देहु सो कहिये उनसों ॥  
 दोहा-गवालनके सुनि वचन सब, हर्षि उठी द्विजवाम ॥  
 कहत हमारी भाग्य धनि, भोजन मांग्यो श्याम ॥  
 सो०-करत रहीं नित ध्यान, सुनि सुनि जिनके गुण श्रवण ॥  
 सफल जन्म निज जान, तिनको भोजन लै चलीं ॥  
 षट्सके व्यंजन विधि नाना । कोमल भांति अमित पकवाना ॥  
 खीर खांड सिखरन दधिन्धारो । माखन लियो श्यामको प्यारो ॥  
 कहँलग वरणों कहों प्रकारा । प्रेम सहित लीन्हे भरि थारा ॥  
 बहुते गवालनके करदीने । बहुते अपने शिर धरि लीने ॥  
 नयनन दर्श लालसा बाढी । उपजी चाह हृदय अति गाढी ॥  
 चलीं पतिनकी कानि बिसारी । देखनको प्रभु गोप बिहारी ॥  
 गवालन सों पूछत यह वाता । कितहैं हरि जनके सुखदाता ॥

१ अहंकार । २ हाथ ।



जिनके पुरुष होते घरमाहीं । तिनको जान देत सो नाहीं ॥  
 कहत जात तुम कित अनुराई । लोकलाज तनु दशा भुलाई ॥  
 तिनसों कहत भई ते नारी । हमको श्रीगोपाल हैंकारी ॥  
 भोजन मांग्यो है हम पाहीं । तिनहि देन ग्वालन सँग जाहीं ॥  
 तिनको दरश देखि सुख पैहैं । बहुरि तिहारे घर हम ऐहैं ॥

दोहा—यह सुनि पति अति क्रोध करि, तिनहिं दिखायो त्रास  
 कहत भई तुम बावरी, बैठति नाहिं अवाँस ॥

सौ०—जिनके उर नंदलाल, बसे लकुट मुरली लिये ॥

तिनहिं न भय यम काल, कौन भांति रोके रुकहिं ॥

हरिपै हमें जान पिय देहू । कहारोंकि अपयेश शिर लेहू ॥  
 देखन देहु नंदके लालहि । त्रिभुवन पति प्रभु मदन गोपालहि ॥  
 इतनी बात मानि पिय लीजै । हा हा हमें दान यह दीजै ॥  
 वेहैं यज्ञपुरुष भगवाना । अन्तर्यामी कृपानिधाना ॥  
 करत यज्ञ विधि तिन्हैं विसारी । कहा सखी बात तिहारी ॥  
 कहैं लगि कहौं बात समुझाई । जात दरशकी अवधि बिहाई ॥  
 जो तुम स्वामी जानत नाहीं । तो हम सख्य कहैं तुम पाहीं ॥  
 मनतो मिल्यो जाय नंदलालहि । करिहों कहा रोंकि कै खालहि ॥  
 लेहुसँभारि देह यह सारी । जासों पिय तुम कहत रुमारी ॥  
 को राखै इतने जंजालहि । मिलिहैं प्राण यशोदा लालहि ॥  
 जो निश्चय नाहिं श्याम सनेहा । तौ यह कौन काजकी देहा ॥  
 सब सखियनके आगे जाई । देखोंगी लवि कुँवर कन्हवाई ॥

दोहा—ऐसे देह अरु गेह तजि, पतिकी कानि निवारि ॥

पहुँची सबते प्रथमही, जो रोकी ब्रजनारि ॥

सौ०—काठिन प्रेमकी पंथ, तहां नेमकी गर्भनहीं ॥

कहत सकल सदग्रंथ, जहां नेम तहँ प्रेम नाहिं ॥

१ घर । २ चुलाई । ३ बेर । ४ देह । ५ गम्यनहीं ।



एसे भोजनलै द्विज बाला । पहुँची वन जहँ मोहन लाला ॥  
 नटवर भेष चित्र तलु कीने । टाढे सखा संग भुजदीने ॥  
 मोर मुकुट वैजन्ती माला । करसुरली दृग नयन विशाला ॥  
 कुण्डल अलक तिलक झलकाहीं । कोटिकामलविपटतर नाही ॥  
 सुख मृदुहँसिनि लसनि पटपीरो । निरखत नयन ताप भयो सीरो ॥  
 भोजन लै हरि आगे राखे । अपने आग्य धन्य करि भाखे ॥  
 तिन्हें देखि हरि मन सुख मान्यो । वचनन करि तिनको सन्मान्यो ॥  
 तिनसों बहुरो कछो कन्हार्ई । गृहपति तजि तुम कित इत आई ॥  
 कहियत विप्र वेद अधिकारी । हौं तिनकी तुम पतिव्रतनारी ॥  
 वे सब यज्ञ करत वन माहीं । तुमकिन यज्ञ होय है नाहीं ॥  
 यह तुम कछु भलो नहिं कीन्हो । पतिको कछो मानि नहिं लीन्हो ॥  
 पति आयसु तिय पालै जोई । चारि पदार्थ पावै सोई ॥

दोहा-पति देवता सुतीय कहँ, वेद वचन परमान ॥

जाहु वेगि तुम पतिन पहुँ, ताते यह जियजान ॥

सो०-सुनि हरि वचन प्रमान, कर्म धर्म मानो सुखद ॥

द्विजतिय परम सुजान, बोलैं सब कर जोरिकै ॥

सुनहु श्यामवन अन्तर्यामी । तुमहीं सकल जगतके स्वामी ॥  
 यज्ञपुरुष तुमहीं सुखधामा । तुमही सबके पूरण कामा ॥  
 विविध यज्ञ करि तुमको ध्यावैं । तुमते चारि पदार्थ पावैं ॥  
 सकल धर्म ते शरण तुम्हारी । है सब जीवनको सुखकारी ॥  
 यह हम सुनी पतिन सुख बानी । कहत वेद इतिहास बखानी ॥  
 ताते शरण तुम्हारी आई । यह दूषण नहिं हमें गुसाई ॥  
 तव मायावश सकल भुलाने । ताते पतिन न तुम पहिंचाने ॥  
 तिनको दोष क्षमा प्रभु कीजै । हमको शरण आपनी दीजै ॥  
 चारि पदार्थ हूते भारो । है प्रभुदर्शन शरण तुम्हारे ॥  
 ताते नहीं निरदार कीजै । अपने चरण शरण रख लीजै ॥  
 सुनि प्रभु द्विजपत्नी की बानी । भये प्रसन्न भक्त सुखदानी ॥

१ धर्म, अर्थ, काम, मोक्ष ।



धन्य धन्य प्रभु तिनको भाख्यो । हितकरि तिनको भोजनराख्यो ॥  
दोहा-दै अपनी दृढ भक्ति हरि, तिन्हें कह्यो वरजाहु ॥

हैं हैं तुम्हारे दरशते, शुद्ध तुम्हारे नाहु ॥

सो०-हरि आयसु धरिमाथ, पाय भक्ति वरदान वर ॥

राखि हृदय ब्रजनाथ, चलीं हर्षि द्विजतिय सदन ॥

नैद नन्दनकी करत बड़ाई । द्विजपत्नी सब घरको आई ॥

देखत तिन्हें विप्र समुदाई । भये पुनीत विमल जति पाई ॥

धन्य धन्य कहि तियन बखानी । आप कहत हम अति अज्ञानी ॥

जिनके हेतु यज्ञ हम कीन्हो । तिन मांग्यो भोजन नहिं दीन्हो ॥

हम विद्या अभिमान भुलाने । अविगतिकी गति कैसे जाने ॥

परब्रह्म प्रभुजन सुखदाई । भक्तन हित प्रगटे प्रभु आई ॥

तिनको हम पहिचान्यो नाहीं । बारबार यह कहि पछिताहीं ॥

हैं ये तिय अतिशय बड़भागी । कृष्णचरण पङ्कज अनुरागी ॥

ब्रह्मादिक खोजत हैं जिनको । देख्यो जाय प्रगट इन तिनको ॥

देखे बहु विधि तियन सराहीं । आदर करि लीन्ही वरमाहीं ॥

प्रेम प्रीति करि जो हरि ध्यावै । सो नर नारि अभयपद पावै ॥

नरनारी कछु नाहिं विचारा । प्रभुको केवल प्रेम पियारा ॥

दोहा-भाव तियनको धारि उर, तहँ हरि कृपानिकेत ॥

सखन सहित भोजन करत, रुचि सों प्रीति समेत ॥

सो०-ब्रह्मलोक लौं शोर, ग्वालनके संग खात हरि ॥

छीनि छीनिकै कौर, करत परस्पर हासरस ॥

अति हित भोजन तहँ हरि कीमो । सखा वृन्दको अति सुख दीनो ॥

वनमें फिरत चरावत गैयां । बैठे आय कदमकी छैयां ॥

भये सखा सिंगरे इकठाहीं । गैयां बगर रहीं वनमाहीं ॥

दुपहर घास जान मनमाहीं । लागे चलन सघन वनछाहीं ॥

बैठे ग्वालवाल चहुँ उरियां । आगे धरीं दूधकी घरियां ॥

३ पति । २ स्त्रीनको ।



मध्य श्याम सुन्दर नन्दनन्दा । उद्गुणमें जिमि पूरणचन्दा ॥  
 मोर मुकुट कटि कछनी काछे । कोटि कामकी छबिको आछे ॥  
 कबहुं सुरली मधुर बजावैं । कबहुं सखन मिलि सारंग गावैं ॥  
 कोऊ सखा नृत्यको करहीं । कोऊ टटकारी उच्चरहीं ॥  
 करत केलि ऐसे बन माहीं । देखि देखि सुरवृन्द सिहाहीं ॥  
 कोऊ ताल बजावत नीके । उपजावत कोउ आनंद जीके ॥  
 कहत धन्य ये ब्रजकी बाला । विहरत जिन सँग कृष्णकृपाला ॥

दोहा-धन्य विटप धनि भूमि यह, धनि वृन्दावन चन्द ॥

धनि ब्रज कहि वपैं सुमन, रीझ रीझ सुरवृन्द ॥

सो०-मन मन देव सिहाहिं, वन विहार हरिको निरखि ॥

श्रीवृन्दावन माहिं, हम न भये दुमलता तृण ॥

श्रीदामा तब कह्यो बुझाई । खेलहिमें सब रहे भुलाई ॥  
 गैयां कितहि चरति को जाने । यह सुनिकै सब खेल भुलाने ॥  
 जित तित हेरनैको उठि धाये । गैयां जाव घेरि लै आये ॥  
 जे सुरभी आई नहिं जानी । चरत सधन वन माझ सयानी ॥  
 तिनको तब चढि कान्हबुलाई । सुरली टेर सुनत उठि धाई ॥  
 ऐसी गैयां श्याम सधाई । सुरली सुनि सब हरिपै आई ॥  
 जब जब गैयन श्याम बुलावैं । हूँ करि सब हरिपै आवैं ॥  
 तिनपर कर फेरत मनमोहन । पीतांबर सों झारत छोहन ॥  
 करत प्यार तिनपर वनमाली । हस्तकमल की सब प्रतिपाली ॥  
 हरिको निरखि गाय सुख पावैं । तिनके भाग्य कहत नहिं आवैं ॥  
 जब हारि गैयन करसों परसैं । लखि लखि कामधेनु मन तरसैं ॥  
 कहत कहा जो कामद कीनो । हमको विधि ब्रज जन्म न दीनो ॥

दोहा-धनि धनि ब्रजकी धेनु ये, चारत त्रिभुवननाथ ॥

झारत पोंछत दुहत नित, हितकरि अपने हाथ ॥

सो०-मनहीं मन पछिताहिं, कामधेनु ब्रज धेनु लँखि ॥

१ तारागणनमें । २ देवगण । ३ दूदवेका । ४ देखकर ।



हम न भई ब्रज माहिं, हरिपद पंकज परसती ॥

ऐसी लीला करत अनेका । वनमें ललित एकते एका ॥  
वृन्दावन सब दिवस बितायो । संध्या समय निकट जब आयो ॥  
तब हरि बालो चलो अब गेहू । गैयां सब आगे करि लेहू ॥  
पहुँची सांझ आय नियराई । वनमें करहु अवेर न भाई ॥  
यह सुनि गाय सबन अशुवाई । भली बात यह कही कन्हाई ॥  
वनते निकरि चले सब ग्वाला । ब्रज आवत नटवर गोपाला ॥  
सुरभी वृन्द गोप बालक सँग । अति आनंद गावत नाना रँग ॥  
अधर नृप मुरली सुर कौरी । ऊँचे सुरन बजावत गौरी ॥  
सुन्दर श्रवण सुनत ब्रज धाई । गृहकारजतिर्य तजि सब आई ॥  
कहत परस्पर मोहन आवत । देखि देखि छवि अति सुख पावत ॥  
पूरण कला उदित शशि जैसे । कुमुदिनि सर फूली तिय तैसे ॥  
नयन चकोर रहे टकलाई । दिवस विरहकी ताप नशाई ॥

दोहा-प्रेममगन आनंद अति, कहत सकल ब्रज बाध ॥

देखहु सखि यशुमति सुवन, शोभित अति अभिराम ॥

सो०-श्यामल तनु पटपीत, जलज माल बरही मुकुट ॥

लई मनो इन जीत, वनदामिनि वग धनुष छवि ॥

धुङ्कुटि विकट दृग चंचलताई । अति छवि देति वरणि नहिं जाई ॥  
धनुष देखि बिच खंजन जानों । उडन करत डारि उडत न मानों ॥  
प्रफुलित नयन शरद अंजुसै । मनोकुंडलि रविकरके परसै ॥  
गोपद रज पराग छवि छाई । तामधि अलि बैद्यो जनु आई ॥  
एक कहत देखहु वह शोभा । अति सुख देत लसत मन लोभा ॥  
कमलवदन मुरली रस लेई । कुटिल अलक ऐसे छवि देई ॥  
मानो अलिगर्ण साजी सैना । सहिन सकत चाहत निजऐना ॥  
अधर सुधा लागि अति दुखपाई । मुरली सों मनो करत लड़ाई ॥

१ ब्रजगोपिका । २ कमलमाल । ३ मोरमुकुट । ४ कमल । ५ भौरा ।

६ भैरोंके मुंड ।



शोभितनाशा परम सोहाई । तामें सखि उपमा यह पाई ॥  
 मनहुँ अनंग सहायक आयो । तिलमसून शर ताहि चलायो ॥  
 सुनि यह युक्ति सकल हर्षाई । निरखत हरि मुख छवि सुखपाई ॥  
 कृपादृष्टि हरि सबन निहारी । आये ब्रज जन मन सुखकारी ॥  
 दोहा—कहत मुदित मन युवतिजन, धनि धनि सखि वे मोर ॥

जिनके पांखनको सुकुट, कीन्हो नंदकिशोर ॥  
 सो०—धनि धनि सखि वे बांस, जाकी मुरली अधर धरि ॥  
 हरि पूरत निज सांस, को पुनीत ताके सदृश ॥  
 निज निज सदन गये सब गवाला । आये घर हलधर गोपाला ॥  
 देखि दुहुँ मातन सुखपायो । हरणि दुहुनको कण्ठ लगायो ॥  
 काहे आज अवार लगाई । यह कहि बार बार बलि जाई ॥  
 रोहिणि सां कह यशुमति भैया । भूखे हैं दोऊ भैया ॥  
 मैं दोउनको देत न्हाई । तुम भोजनको काहु चढाई ॥  
 निकट लये मुरली कर लीन्ही । हरि करते लड्डुटी धरि दीन्ही ॥  
 नीलाम्बर पीताम्बर लीन्हो । सुकुट उतारि श्याम तब दीन्हो ॥  
 प्राण समान यशोमति जानी । धरयो सँभारि सदन नँदरानी ॥  
 छोरति अँग भूषण महतारी । सुक्तमाल बनमाल उतारी ॥  
 कटि किकिणि अंगद भुज छोरै । निरखि गौत आनंदन औरै ॥  
 पट लै दोउनके अँग झारे । उरलगाय लीन्हे अति प्यारे ॥  
 तुम दोउ भरे गाय चरैया । और नकोऊ टहल करैया ॥

दोहा—लीन्हे तुमहिं विसाहि मैं, तब अति रहे नन्हाय ॥

सुनि हँसि हरि बलसां कहत, कहत झूठही माय ॥

सो०—यह तो समुझि न जाय, सांच झूठकी बात कहु ॥

यशुमति लेत बुलाय, मैं चोरी हँसि हँसि कहत ॥

सुमंनासुत अंगन परसाई । तपत तरणिको जल लै आई ॥

१ नासिका । २ कामदेव । ३ तिलपुष्पवत्त्राण । ४ बदन । ५ सुगंधितपुष्पो-  
 का तेल ।



परम प्रीति दोह सुत अन्हवाये । सरसवर्धनतनु पोंछि सुहाये ॥  
 षट्स भोजन आय जिमाये । यशुमतिके सुख जायँ नगाये ॥  
 शीतल जल वपूर रस रचयो । लैझारी दुहुँ भैयन अँचयो ॥  
 भोर भयो सुख धोय उठे जब । पीरे पान दये जननी तब ॥  
 बीराखात लुदित दोउ भाई । ब्रजवासिन जूठनि सब पाई ॥  
 यशुमतिके सुख कौन गनावै । शारदहू कहि पार न पावै ॥  
 धन्य नन्द धनि यशुमति माता । महिमा नाहिं कहिसकै विधाता ॥  
 ब्रह्म सनातन हैं प्रभु जोई । जिनके पुत्र कहावत सोई ॥  
 जो प्रभु सकल विश्वके स्वामी । तीनिलोक पति अन्तर्यामी ॥  
 विश्वम्भर निजनाम कहावैं । ताहि यशोमति माय खवावैं ॥  
 रात सुवावैं प्रात जगावैं । बालक ज्यों फुसलाय लड़ावैं ॥

दोहा—रहत मगन गुण श्यामके, निशिदिन आठौ याम ॥

महरि महरके प्राणधन, मोहन सुंदर श्याम ॥

सो०—हरि क्षण विसरत नाहिं, ब्रजके नरनारी जिनहिं ॥

मगन प्रेम मन माहिं, निशिदिन जात न जानहीं ॥

अथ गोवर्द्धनलीला ॥

कृष्ण प्रेम ब्रज लोग समाने । देव पितर सब लोक भुलाने ॥  
 कार्तिक शुद्धि परिवा जब होई । इंद्रहि पूजत ब्रज सब कोई ॥  
 ताकी सुधि बुधि सबन भुलाई । सबके मनमें ध्यान कन्होई ॥  
 सो तिथि अति सैमीज जब आई । तब यशुमतिके उर सुधि आई ॥  
 कहत नंदसों नन्दकिरानी । सुरपति पूजा तुमहिं भुलानी ॥  
 जाकी कृपा वसत ब्रज माहीं । एकहु वस्तु कमी कछु नाहीं ॥  
 जाकी कृपा दूध दधि गाई । सहस मथानी मथत सदाई ॥  
 जाकी कृपा पुत्र हम पाये । जालु कृपा सब विघ्न नशाये ॥  
 भई सकल ब्रज मांझ बड़ाई । कुशल रहौ वलराम कन्होई ॥  
 सुरपतिहैं कुलदेव हमारे । गोप गाय ब्रजके रखवारे ॥



तिनकी तुम सब सुरति भुलाई । रहे दिवस पांचक अब आई ॥  
कहो सकल गोपनके राई । इन्द्र यज्ञकी करो चढ़ाई ॥

दोहा-भली दिवाई मोहिं सुधि, कहत महरिसों नंद ॥

भूलि गये हम देवको, काज मोहवश मंद ॥

सो०-हाथ जोरि नंदराय, विनय करत सुररायसों ॥

तुमको गयो भुलाय, क्षमा कीजियां मोहिं प्रभु ॥

तबहिं नन्द उपनन्द बुलाये । श्रीवृषभालु सहित सब आये ॥

सबको देखि नन्द सुख पायो । महरि महर कहि शीश नवायो ॥

अति आदर सबहींको कीन्हों । सादर सबको बैठक दीन्हों ॥

मनहीं मन सब शोध कराहीं । कंस कछु मांग्यो तौ नाहीं ॥

राज अंश उनको जो होई । बिन मांगे हम दीन्हो सोई ॥

बृहत् नंदहि सब सकुचाये । कौन काज हम सबन बुलाये ॥

तबहिं नन्द सबको समझाये । मैं तुमको यहि काज बुलायो ॥

सुरपति पूजाके दिन आये । सो तुम सबदिन मिलि बिसराये ॥

मैंहूँ राज काज लपटानो । निशिदिन लोभाहिं मांझ भुलानो ॥

इन्द्र यज्ञकी सुरति भुलानी । अति समीप दिन पहुँचो आनी ॥

ताते अब सब करो चढ़ाई । इन्द्रयज्ञ कीजे सुखदाई ॥

इन्द्रहिको हम सदा मनावैं । तिनहीं ते ब्रज जन सुख पावैं ॥

दोहा-यह सुनि मन हषैं सबै, देवकाज जिय जान ॥

हम सब भूले सुरपतिहिं, मन लागे पछितान ॥

सो०-भली करी नंदराय, तुम हमको दीन्ही सुरति ॥

सुरपतिको शिरनाय, क्षमा करावत पाप सब ॥

बिदाहोय सब गोप सिंघाये । घर घर बाजन लगे बधाये ॥

पूजाकी विधि करत सबै मिलि । जिहि जिहि भांति सदा आई चलि ॥

अमिर्त भांति पकवान मिठाई । होत वरनि घर वरणि न जाई ॥

नन्द महर घर बजत बधाई । गावत मंगल अति हर्षाई ॥



नेवज करत यशोदा आतुर । आठौं सिद्धि घरहिं अति चातुर ॥  
 भेदाके अनेक पकवाना । बेसनके बहु करत विधाना ॥  
 घृत मिष्टान्न सबै परिपूर्ण । मिश्रीकरत पाकको चूरण ॥  
 विविध भांति पकवान मिठाई । कहैं लगि नाम कहाँ सब गाई ॥  
 और नारि ब्रजकी सँग लागी । घृतपक करत सबै अनुरागी ॥  
 जहां तहां कहैं चढ़ी कढाई । यशुमति सबन सराहत जाई ॥  
 जो सामा मांगति हैं जोई । रोहिणि ताहि देतिहै सोई ॥  
 महरि करति रचि और निहारे । धरत जोरि विधि न्यारे न्यारे ॥

दोहा—सैंति सैंति अति नेमसों, धरति अछुते जात ॥

श्याम कहूं परसैं नहीं, यह मनमाहि डरात ॥

सो०—शंक करत मनमाहि, सुरपति पूजा जानि जिय ॥

यशुमति जानति नाहि, सब देवनके देव हरि ॥

खेलत ते सन्तन सुखदाई । भीतर आये कुँवर कन्हाई ॥  
 जननी कहति इहां जनि आवै । लरिकनको यह देव डरावै ॥  
 रहे ठिठुकि आनगहिं डराई । मनहीं मन हैंसि कहत कन्हाई ॥  
 मैयारी मोहिं देव दिखैहै । इतनो भोजन वह सब खैहै ॥  
 यह सुनि खीझि कहतिहै मैया । ऐसी बात न कहाँ कन्हैया ॥  
 जोरि जोरि कर देव मनावै । बालकको अपराध क्षमावै ॥  
 बाहर चले श्याम अनखाई । युवति कहैं हरि गये रिताई ॥  
 जान देहु हरि अबहिं अयाने । देवकाज बालक कहैं जाने ॥  
 छुड़है कहूं श्याम यह भोजन । उनकी पूजा जानै को जन ॥  
 और नहीं हम काहू जानैं । कैसुरपति के गोधन मानैं ॥  
 यह कहि कहि इन्द्रहि शिर नावैं । राम श्यामकी कुशल मनावैं ॥  
 और देव नहिं तुमहि सरिशा । कह नहिं कृपा करी सुरईशा ॥

दोहा—ऐसे सुरपति यज्ञहित, यशुमति करति विधान ॥

द्वारे बैठे नंद जहूँ, गये तहां को कान्ह ॥



सो०—जुरे नंद ढिग आय, ब्रजके जे उपनंद सब ॥

बैठे अति सुखपाय, करत बात विधि यज्ञकी ॥

दीप मालिका रचि रचि साजत। पुहुप माल मण्डली विराजत ॥  
ढोल निशान बाजने बाजैं। सुदित ग्वालगण जित तितराजैं ॥  
गैयन चित्र विचित्र बनावैं। अंगन आभूषण पहिरावैं ॥  
सात वर्षके कुँवर कन्हारै। खेलत मन आनंद बढाई ॥  
द्वारन युवती चित्र बनावैं। मंगल गान सुदित मनगावैं ॥  
सथियारचि पुनि थापहि हाथा। पूजा देखिहँसे ब्रज नाथा ॥  
मो आगे सुरपतिकी पूजा। मोते और देव को दूजा ॥  
ब्रजवासी मोको नहि जानैं। मो अच्छत सुरपतिको मानैं ॥  
अब यह मेदों यज्ञ बिहाने। लीन्हो भाग बहुतदिन याने ॥  
ब्रजवासिनपै आप पुजारुं। गिरि गोवर्द्धन नाम धराऊं ॥  
यह विचार मनमें ठहराई। गये नन्द ढिग कुँवर कन्हारै ॥  
हर्षि नन्द कैनियां पौढाये। वदन चूमि उरसां लपटाये ॥

दोहा—तब हरि बोले नन्दसों, मधुर मन्द सुसकाय ॥

करत पुजाई कौनकी, बाबा मोहि बताय ॥

सो०—कौन देव सो आहि, काहेको पूजत तिन्हें ॥

मैं नहि जानत ताहि, कहौ मोहि समुझाय सब ॥

नंद कह्यो तब सुनहु कन्हारै। इन्द्र सकल देवन को राई ॥  
तिनको पूजत गोप सदाई। कुलमें यहै रीति चलि आई ॥  
ताते तिन्हें पूजियत ताता। जाते कुशल रहौ दोउ भ्राता ॥  
यापूजाते सुरपति हरषैं। ह्वै प्रसन्न तब जल वे बरषैं ॥  
तृण अनाज उपजत है जाते। गाय गोप सुख पावत ताते ॥  
याते सदा यज्ञ यह कीजै। जो गोधन धन कबहुँ नछीजै ॥  
तब हरि कह्यो सुनो नंद ताता। ऐसे तुम जु कही यह बाता ॥  
जहां इन्द्र पूजत नहि प्राणी। तहां कहा वर्षत नहि पानी ॥

१ पुष्पमाल । २ प्रसन्न । ३ मोद । ४ राजा ।



जब हरि ऐसे वचन सुनायो । तब नन्दहि उत्तर नहि आयो ॥  
सुनि हरिवचन रहे सकुचाई । मनहि कहत चतुरङ्ग कन्हाई ॥  
है बालक अबहीं अति नान्हा । देव कार्य कहै जानै कान्हा ॥  
तब चुचकार कह्यो नैदराई । सदैव जाउ तुम कुँवर कन्हाई ॥

दोहा—ऐसे में जिन जाहु कहूँ, भीड़ बड़ी है तात ॥

को जानै किहि भावको, कित धौ आवत जात ॥

सो—सोय रहौ गोपाल, मेरे पलंगा जाय तुम ॥

मैंहूँ आवत लाल, पाछे ते तुम्हरे निकट ॥

तब हरि मन इक बुद्धि उपाई । बैठे ओर महरि दिगजाई ॥  
तिनको हरि यों कहि समुझायो । आज मोहि सपनो इक आयो ॥  
पुरुष पुनीत एक अतिचारू । चार भुजा तनु शुभग शृंगारू ॥  
तिन मोसों यों कह्यो बुझाई । इन्द्रहिपूजे कहा बड़ाई ॥  
मैं तुमको इक देव बताऊँ । गिरि गोवर्द्धन प्रगट दिखाऊँ ॥  
यह पूजा तुम इनहि चढ़ावो । जाते मुँह मांगे फल पावो ॥  
तुम आगे भोजन वह खैहै । प्रगट आपनो रूप दिखैहै ॥  
चार पदारथके ये दाता । अन धन गोधनकोतिक बाता ॥  
ऐसे देव छाडि घरमाहीं । तुम पूजत सुरपतिहि वृथाहीं ॥  
कोटि इन्द्र क्षणमें वै मारैं । क्षणहीमें पुनि कोटिसवारैं ॥  
गोवर्द्धन सब देव न दूजा । करहु जाय उनहींकी पूजा ॥  
ताते मां मनमें यह आई । पूजहु गोवर्द्धन सब जाई ॥

दोहा—चकित गोप सब वचन सुनि, कहत अकथ यह बात ॥

सुने न अबलौं देव कहूँ, प्रगट होयके खात ॥

सो—सुनी बात यह नन्द, शोचत सब उपनन्द मिलि ॥

कहा कहत नैदनन्द, समझ परत नहि स्वप्न यह ॥

सुनि यह बात सबन ब्रजपाई । देख्यो ऐसो स्वप्न कन्हाई ॥  
सुरपति पूजा देत मिटाई । गोवर्द्धनकी करत बड़ाई ॥  
कोऊ कहत कान्हकहै सांची । कोऊ कहै बात यह कांची ॥  
बालक जानै कहा पुजाई । कोऊ कहत कहै को भाई ॥  
कोऊ इन्द्रहि कहत सकानि । हमतौ कछु यह बात नजाने ॥

१ वर । २ पवित्र । ३ सुंदर । ४ डोपे ।



हलधर कहत सुनो ब्रजवासी । को महिमा जानत अविनाशी ॥  
 इनको बालक करि मति जानो । जो हरिकह्यो सत्य करि मानो ॥  
 नन्द निकट जो गोप सयाने । हरिको बलप्रताप सब जाने ॥  
 कहत नन्दसों ते सुखपाई । कीजै सोइ जो कहत कन्हई ॥  
 कहत नन्द तब सबन सुनाई । मेरे हू मनमें यह आई ॥  
 हरिको स्वप्न झूठ नहि होई । है प्रतीति मेरे मन सोई ॥  
 कालीको स्वप्नो हरि देखो । भयो प्रातही तालु विशेषो ॥

दोहा-ताते सोई कीजिये, कान्ह कहैं जोइ बात ॥

सब ब्रजवासी पूजिये, गोवर्द्धन चलि प्रात ॥

सो०-यहै मंत्र ठहराय, ब्रह्मत हरिसों हर्षि सब ॥

कहौ कान्ह समझाय, कौन भांति गिरि पूजिये ॥

हर्षिकान्ह तब सबन बुलायो । इन्द्रयज्ञ हित तुम जु बनायो ॥  
 बहु व्यंजन पकवान मिठाई । सो सब शकटनलेहु भराई ॥  
 नाचत गावत सहित हुलासा । चलहु सकल गोवर्द्धन पासा ॥  
 तहां जाय गिरिवरहि मनाई । पूजहु बहु विधि मंगल गाई ॥  
 मांगि मांगि तुमसों गिरिखैहै । लुहमांगे तुमको फलदैहै ॥  
 मेरो कह्यो सत्य तुमजानो । मेरो स्वप्न झूठ मतिमानो ॥  
 यह परचो तुम आखिन देखो । तबहिं मोहिं सांचो करिलेखो ॥  
 जो चाहे ब्रजकी ठकुराई । तौ पूजो गोवर्द्धन राई ॥  
 कान्हर जो कछु आज्ञा दीन्ही । सबहिनबात मानि सो लीन्ही ॥  
 कहहिं परस्पर सब सुखपाई । चलहु गोवर्द्धन कहत कन्हई ॥  
 ब्रज वरवर सबहोत झुलाहल । फिरत गोप आनन्द उमाहल ॥  
 मिलत परस्पर अंकम देलै । शकटनसाजत भोजन लेलै ॥

दोहा-बहु व्यंजन पकवान बहु, बहुत मिठाई पाक ॥

रस गोरस मेवा विविध, अमित भांतिके शाक ॥

सो०-षट्सके सब भोग, कछु शकटन कछु काँवरिन ॥



गृह गृह ते ब्रजलोक, लै लै गिरिपूजन चले ॥

नन्द महरके घरकी सामा । कहँ लगि वराजि बताऊँ नामा ॥  
 सहस शकट पकवान मिठाई । रस गोरस बहु भार भरवाई ॥  
 नन्द सदन ते लै बहु ग्वाला । चले अग्र उर हर्ष विशाला ॥  
 पटभूषण सब गोपन साजे । भाँति अनेक बाजने बाजे ॥  
 नन्द महर अरु महारि जितेका । और गोप बहु भीर अनेका ॥  
 बलदाऊ अरु कुवैर कन्हैया । शुभग शृंगार किये दोउ भैया ॥  
 सखा वृन्द सुन्दर सब लीन्हे । कोटि काम छवि लज्जित कीन्हे ॥  
 शोभित नन्द महरके साथ । चले सकल पूजन गिरिनाथा ॥  
 यशुमति अरु रोहिणि महतारी । नन्दगाँवकी अरु जे नारी ॥  
 भूषण बसन सँवारि सँवारि । चलीं हर्ष उर आनंद भारी ॥  
 पुरवृषभातु आदि जे ग्रामा । चलीं सकल गोपन की बामा ॥  
 श्रीराधा वृषभातु दुलारी । ललतादिक सब गोप कुमारी ॥

दोहा-नौसत साज शृंगार अति, पट भूषण बहु रंग ॥

यूथ यूथ जुरिकै चलीं, कीरति जूके संग ॥

सो०-सबके मन यह काम, देखनको हरि रूप दृग ॥

परम मुदित सब वाम, सबके मनमोहन वसे ॥

चन्द्र बदनसी सब मृगतयनी । सकल सुघर सब कोकिल वयनी ॥  
 नवयौवनमें सबहिं शवीना । सबको मन मोहन आधीना ॥  
 चलीं सकल गोवर्द्धन वहीं । भई भीर अति भारग माहीं ॥  
 शकट वृन्द अरु गोप समूहा । जात चले युवतिनके यूहा ॥  
 कौतुक करत गोप गण राजें । ताल मृदंग अनेकन बाजें ॥  
 कोउ गावत कोउ नाचत जाहीं । कोउ ठाढ़े मग पावत नाहीं ॥  
 कोउ शकटन साजि सँवार । कोउ एकन एक पुकारे ॥  
 गावत मंगल गोपकुमारी । निरखि श्याम छवि होत सुखारी ॥  
 होत कुलाहल अति मगमाहीं । कोउ बात सुनब कछु नाहीं ॥

१ बरवानो । २ गोपी ।



कौतुक श्याम देखि दर्शाहीं । अति उत्साह सबन मन माहीं ॥  
सखन संग खेलत हरि जाहीं । सबकी सुरति श्यामके माहीं ॥  
ब्रजवासिनकी भीर सुहाई । उपमा मोपै वरणि न जाई ॥

छं०-उपमा न मोपै जात वरणी, भीर अति सुन्दर भई ॥

षट्ठयो आनँदासिधुको सुख, विविध तनुवर सोहई ॥

छवि उजागर नगरकैधों, सुकृत पुंज सुहावने ॥

तिनमध्य सबके श्याम नायक, सकल लायक पावने ॥

दोहा-नंदमहर उपनंद सब, श्याम राम दोउ भाय ॥

पहुँचे गोवर्द्धन निकट, निरखि शिखर सुख पाय ॥

सौ०-उतरे सहित समाज, चहुँ ओर ब्रजलोग सब ॥

मधि शोभित गिरिराज, कौटिकामशीभा सरस ॥

चहुँ दिशि फेर कोश चौराशी । उतरे घेर सकल ब्रजवासी ॥

ब्रजवासिनकी भीर अपारा । लगे चहुँ दिशि चारु बजारा ॥

वस्तु अनेक वरणि नहिं जाई । बिन मोलहि सब सौंज बिकाई ॥

ठौर ठौर ब्रजयुवती गावैं । जहँ तहँ नटवा नाच दिखावैं ॥

कहूँ विदूषक हांस हँखावैं । हर्ष माझ अति हर्ष बढावैं ॥

नर नारी सब परमहुलासा । अति आनंद उमँगि चहुँ पासा ॥

बुझत पूजन विधि नँदराई । अधिकारी तहँ कुँवर कन्हाई ॥

कह्यो कृष्ण तब विप्र बुलाई । प्रथम यज्ञ आनंद कराई ॥

पूछि वेद विधि तिनसों लीजै । वाही विधि गिरिपूजा कीजै ॥

तबहिं विप्र नँदराय बुलाये । आदर सहित गोप लै आवे ॥

हरिको कह्यो मानि तिन लीन्हों । प्रथमारम्भ यज्ञको कीन्हों ॥

परम रुचिर वेदिका बनाई । सामवेद ध्वनि द्विज बर गाई ॥

दोहा-देखतको धायै सबै, ब्रजके नर अरु वाम ॥

भयो देवता गिरि बड़ो, ताहि पुजावैं श्याम ॥

सौ०-बड़े महर उपनंद, नंद आदि ठाठ सबै ॥



कहत जो कछु नँदनंद, करत सकल सोई तहां ॥

पंचाश्रुत बहु कलश भरायो । डारि शिखरते गिरि अन्हवायो ॥  
 बहुरो लै गंगाजल द्वारयो । चंदन वन्दन तिलक सँवारयो ॥  
 भूषण वसन विचित्र चढाये । सुमन सुगंध माल पहिराये ॥  
 धूपदीप करि आरति साजी । घंटा शंख झालरैं बाजी ॥  
 करत वेद धुनि विप्र सुहाई । चकृत नभ लखि लुर ससुदाई ॥  
 सुरपति पूजा कृष्ण मिटाई । थाप्योगिरि ब्रज तिलक चढाई  
 देखि इन्द्र मन गर्व बढायो । ब्रजवासिनके मन कह आयो ॥  
 पूजत गिरिहि मोहि बिलसाई । गिरि समेत ब्रज देउँ बढाई ॥  
 पावहि मम अपमान सजाई । देखौं तब को करत सहाई ॥  
 अब देखौं मैं इनकी करनी । उपजी है इनकी बुधि मरनी ॥  
 गिरिको पूजत प्रेम बढाई । स्वप्नेको सुख लेत मनाई ॥  
 कितकबार पुनि इनको मारत । ऐसे सुरपति मनहि विचारत ॥

दोहा-कह्यो कृष्ण तब नन्दसों, भोजन लेहु मँगाय ॥

गिरि आगे सब राखिकै, अरु यह विनय सुनाय

सो०-यह सुनिकै नँदराय, लावहु ग्वालनसों कह्यो ॥

लीन्ही तहां मँगाय, सामग्री सब भोगकी ॥

नाना भांति जात पक्वाना । विविध मिठाई अमित समाना ॥  
 षट्स व्यंजन बहु तरकारी । दही दूध सिखरन रुचिकारी ॥  
 मधु मेवा फल फूल अनेका । सुंदर स्वाद एकते एका ॥  
 खीर आदि बहु भांति रसोई । कहँ लगि वरजिसकै सबकोई ॥  
 मृग भात अरु बरा पकौरी । बहुतकदधि बोरी अरु कोरी ॥  
 कियो अन्नको कूट सुहावन । जैसी गिरि गोवर्द्धन पावन ॥  
 परसि परसि गिरि आगे राखत । जैसी विधिसों मोहन भाषत ॥  
 गिरि पूजत जिहि भांति कह्यो । तैसे सब ब्रजलोग लुगाई ॥  
 गिरि गोवर्द्धनके चहुँ पासा । कीन्हो बहु विधि सहित हुलासा ॥



ठौरहि ठौर वेदिका राजै । अन्नकूट चहुँ ओर विराजै ॥  
तिनमधि गोवर्द्धन गिरि पावन । परम अनूप स्वरूप सुहावन ॥  
चंदन केसरि रौरी हाथा । शोभित अति चहुँ दिशि गिरि माथा  
दोहा-गिरिगोवर्द्धन रायकी, छवि नहिं परत लखाय ॥

ब्रजवासी जनके हिये, ध्यान परम सुखदाय ॥

सो०-महिमा अभित अपार, श्रीगोवर्द्धन अचलकी ॥

जेहि पूजत करतार, शारद विधि नहिं कहि सकै ॥

प्रातहिते परसत भोजन सब । गयो हरकि युगैयाम तरंगि तब ॥  
कह्यो श्यामसों तब नैदराई । जेवहि गिरिसों कह्यो कन्हाई ॥  
तब हरि कह्यो सबन ससुझाई । भोग समर्पहु थंड बजाई ॥  
मनमें कछु खटक जिन राखो । दीन वचन सुखते कहि भाषो ॥  
नयन मृदिकै ध्यान लगावो । प्रेम सहित करजोरि मनावो ॥  
हरि गोपन पूजा सिखरावैं । अपनी पूजा आप करावैं ॥  
जिनपर कृपा करत नैदन्दन । तिनसों आप करावत वंदन ॥  
सबन मानि हरि कह्यो जो लीन्हो । बहु विधि गिरि आराधन कीन्हो ॥  
तब प्रगटे गोवर्द्धन तथा । यज्ञपुरुष प्रभु श्रुतिके माथा ॥  
सहस्रभुजा तनु श्याम तमाला । मोर मुकुट वैजंती माला ॥  
नख शिख भूषण परम सुहाये । अंग अंग छवि झलकन छाये ॥  
भये देखि ब्रजलोग सनाथा । दियो दर्श गोवर्द्धन नाथा ॥  
दोहा-जय जय जय कहि देव मुनि, वर्षत सुमन अकास ॥

ब्रजवासी जय जय करत, भये अनंद हुलास ॥

सो०-सहस्रौ भुजा पसारि, लागे भोजन करन गिरि ॥

देखत ब्रज नर नारि, अति अद्भुत हरिके चरित ॥

कहत मुदित सब लोग लुगाई । कान्हहि की शोभा गिरिराई ॥  
जैसे कान्ह श्यामतनु सोहै । तैसेई गिरिवर मनमोहै ॥  
तैसेई कुण्डल तैसेई माला । तैसेई चंचल तमन विशाला ॥

१ पर्वतकी । २ सरस्वती । ३ दोपहर । ४ पूजा



तैसोइ मुकुट पीतपट तैसो । नख शिख रूप कान्हको जैसो ॥  
 द्वैभुज हरिके परम सुहाई । गिरिकी भुजा सहस अधिकई ॥  
 देखि दर्श गिरिवरके रूरे । नंद यशोदा आनंद पूरे ॥  
 कहतकि बड़े देव हमपाये । देखहु परकट दरश दिखाये ॥  
 ऐसो देव सुन्यो नहि देख्यो । जीवन जन्म सफल करिलेख्यो ॥  
 ललता राधहि कहत बुझाई । मैं यह बात सजुझिहै पाई ॥  
 यह लीला सब श्याम बनावैं । आपहि जेवत आप जिमावैं ॥  
 मैं जानी हरिकी चतुराई । इंद्रहि भेटि आप बलि खाई ॥  
 हैं इनके गुण अगम अगाधा । मेरी बात मान तू राधा ॥

दोहा-इतहि नंदको कर गेहे, गोपन सों बतरात ॥

उत आपाहिधरिसहस भुज, रुचिसों भोजन खात ॥

सो-श्री राधासुखपाय, मुदित विलोकति श्याम छवि ॥

अक्तनके सुखदाय, नित नव करत विनोद ब्रज ॥

इत गोपन सँग हर्षित राहीं । उत सबहिनको भोजन खाहीं ॥  
 ग्वालिन एक विलोकन हारी । रहिवृषभालु सदन रखवारी ॥  
 तासु नाम बदरीलागायो । तिन वरहीते भोग लगायो ॥  
 प्रेम सहित बहु विनय सुनाई । सबके अन्तर्यामि कन्हाई ॥  
 ऐसे प्रीति क्षुधित बनवारी । लई तासुबलि भुजा पसारी ॥  
 भोजन करत परमरुचि मानी । गुणसागर लीला यह ठानी ॥  
 कहत नंदसों ऊँवर कन्हाई । मैं जो बात कही सो आई ॥  
 अब तुम गिरिगोवर्द्धन जाने । मेरे वचन सत्य करि माने ॥  
 तुम देखत भोजन सब खायो । परगट तुमको दर्श देखायो ॥  
 तुम्हरी भक्ति भाव पहिचानी । गिरि तुम्हरी पूजा सब मानी ॥  
 तुम अब मांग्यो चाहौ जोई । मांगिलेहु इनपै सब सोई ॥  
 नंद कहत धनि धन्य कन्हाई । यह पूजा तुम हमहि बताई ॥

दोहा-प्रीति रीतिके भावसों, भोजन सबके खाय ॥

१ हजार । २ पकड़े । ३ प्रीतिके भूखे ।



हैं प्रसन्न अति नंदसों, तब बोले गिरिराय ॥  
सो०—लैहु नंद वरदान, अब जो तुम हमसों चहौ ॥  
मैं लीन्हो सुखमान, बहुत करी तुम भक्ति मम ॥

भली करी तुम मेरी पूजा । सेवक तुमते और न दूजा ॥  
तेरे सुत बल मोहन भाई । इनको कुशल अनन्द सदाई ॥  
मैंहीं इनको स्वप्न दिखायो । मैंहीं सुरपतियज्ञ मिटायो ॥  
अब जो सुरपति तुमहिं रिसाई । जल वधैं ब्रज ऊपर आई ॥  
तौ तुम अपने जिय मति डरियो । कान्ह कहै सोई तुम करियो ॥  
अब तुम मम प्रसाद ले खाहू । अपने अपने घर सब जाहू ॥  
ब्रजमें बसो निशंक सदाहीं । और कछु मांगौ हम पाहीं ॥  
यह सुनि चकित सकल ब्रजनारी । भोजन कियो प्रथम गिरिधारी ॥  
अब बोलत मुख वचन प्रमाना । ऐसे परछत देव न आना ॥  
नंद कह्यो कह मांगों स्वामी । देखि दूरश भयो पूरण कामी ॥  
सकल सिद्धि सुख तुम्हरो दीन्हो । कृपासेन्धु मैं तुम्हरो कीन्हो ॥  
मोहविवश प्रभु तुमहिं बिसारे । भूलि फिन्स्यो देवनके द्वारे ॥

छंद—फिरयौ भूल्यो देवद्वारन नाथ तुमहिं बिसारके ॥  
पूजा तुम्हारी कहा जानें हम अहीर गँवारके ॥  
आपही करि कृपा दीन्ह्यो स्वप्नश्यामहिं आयकै ॥  
दई बालकको बड़ाई नाथ यह अपनायकै ॥  
अब हमैं डर कौनको प्रभु शरण तुम्हरी पायकै ॥  
इन्द्र कह करिहै हमारो नाथ ब्रजपर आयकै ॥  
तुमहिं कर्त्ताहौ सबनके तुमहिं सबके ईश हौ ॥  
कोटि कोटि ब्रह्माण्ड तुम्हरे रोमप्रति जगदीश हौ ॥  
इयाम हलधर दास तेरे कुशल ये दोऊ रहैं ॥  
करि कृपा यह देहु प्रभु हम और कछु नाहीं चाहैं ॥  
सुतन लै दोउ डारि गिरिपद आप नंदचरणन परे ॥

१ प्रत्यक्ष । २ मालिकहो ।



बिहंसि गिरि लखि प्रीतिपंकज पाणि दुहुँ माथे धरे॥  
 दोहा-नन्द गोप उपनन्द सब, श्रीवृषभानु समेत ॥  
 बार बार गिरिराजके, चरण परत अति हेत ॥  
 सो०-करि सबको सनमान, दै प्रसाद निज पाणिसों ॥  
 सवन कह्यो वरजान, है प्रसन्न गिरिराज तब ॥  
 चलहु वरन तब कह्यो कन्हारै। भये प्रसन्न देव गिरिराई ॥  
 भली भाँधि पूजा तुम कीन्ही। गिरिवर राज मान सब लीन्ही ॥  
 दोड करजोरि भये सब ठाढ़े। भक्ति भाव सबके मन बाढ़े ॥  
 हारि करि परिकरमा सब गिरिको। परशत चरण चलत ब्रजधरको॥  
 देखि चकित गण गंधरव सुर मुनि। कहत धन्य ब्रजवासी गुण मुनि॥  
 धन्य नंदको सुकृत पुरातन। धन्य धन्य पर्वत गोवर्द्धन ॥  
 करत प्रशंसा सुर मुनि पुनि पुनि। वर्षि सुमन करि करि जैजै पुनि ॥  
 निज निज लोकन देव सिधाये। ब्रजवासी सब ब्रजको धाये ॥  
 सुदित सकल ब्रज लोग लुगारै। गोवर्द्धनकी करत बड़ाई ॥  
 कहत धन्य यशुमतिको जायो। बड़ा देवता कान्ह पुजायो ॥  
 अब इनते ब्रजमें सुख पैहें। गोप गाय सब सुखसों रहैं ॥  
 वर्ष वर्ष प्रति इन्द्र पुजायों। कबहुं प्रगट दर्शनहि पायों ॥  
 दोहा-प्रगट देत हैं दर्शगिरि, सबके आगे खात ॥  
 परमहर्ष नर नारि सब, सबके सुख यह बात ॥  
 सो०-खेलत नित नव ख्याल, भरुपाल नंदलाल ब्रज ॥  
 दुष्टनके उरशाल, सुरनरमुनि मोहत निरखि ॥  
 इन्द्र देखि गोवर्द्धन पूजा। कियो क्रोध मो सम को दूजा ॥  
 ब्रजवासिन मोको बिसरायो। मेरो बलि लै गिरिहि चढायो ॥  
 नेक नहीं शंका उर आनी। कहू कानि मेरी नहि मानी ॥  
 तैंतिस कोटि सुरनको नायक। मेघ वर्त सब मेरे पायक ॥  
 कियो अहीरन मम अपमाना। काधौं इन अपने मन जाना ॥  
 जानि बूझि इन मोहि भुलायो। गिरिहि धापि शिर तिलक चढ़ायो॥



काहू उन्हें दियो बहकाई । मरण काल ऐसी मति आई ॥  
 तुरत उन्हें अब देहु सजाई । देखौ धौ को करत सहाई ॥  
 पर्वत पहिले खोदि बहाऊं । ब्रजजन मारि पताल पठाऊं ॥  
 फूलि फूलि भोजन जिन कीन्हों । नेक न राखौ ताको चीन्हों ॥  
 सकल गोप यह नयनन देखैं । बड़े देवताको फल लेखैं ॥  
 ता पाछे ब्रज देउं बहाई । भुवपर खोज रहै नाहि राई ॥

दोहा-ऐसे सुरपति क्रोधकरि, मनमें गर्व बढ़ाय ॥

प्रलयकालके मेघ सब, लीने तुरत बुलाय ॥

सो०-तिनहिं कह्यो सुरराय, ब्रजपर वर्षी जाय तुम ॥

पर्वत प्रथम मिटाय, पुनि बोरहु ब्रज लोक सब ॥

मोसों अहिरन करी छिटाई । मेरी बलि पर्वतहि खवाई ॥  
 ताकारण में तुम्हीं बुलाये । सैन समेत जाहु सब धाये ॥  
 गिरि समेत सब देहु बहाई । भूतल खोज रहै नाहि राई ॥  
 सुरपति वचन सुनत धनतमके । कामर क्रोध करत प्रभु मनके ॥  
 केतक गिरि ब्रज हमरे आगे । तुम प्रभु क्रोध करत केहि लागे ॥  
 क्षणहींमें ब्रज खोदि बहावैं । झुंगरको घर नाम मिटावैं ॥  
 होत प्रलय प्रभु हमरे पानी । रहत अक्षय वट तनक निशानी ॥  
 आप क्षमा कीजै सुरराई । हम करिहैं उनकी पहुचाई ॥  
 यह सुन सुनासीर सुखपायो । हर्षि पान दै तिनहिं चढ़ायो ॥  
 चले मेघ सब शीशनवाई । आये ब्रजके ऊपर धाई ॥  
 क्षणहींमें रवि गैगन छिपाने । देखत ही देखत अधिकाने ॥  
 कीन्हों शब्द गरज घन भारी । अतिही घटा भयावन कारी ॥  
 छंद-अतिही भयानक घटाकारी कज्जलहु पटतर नहीं ॥  
 घेरि लीन्हों ब्रज चहुंदिशि पवन प्रलय झकोरहीं ॥  
 गरजत गगन घन घोर तड़पत तडितें बारहिं बारहीं ॥  
 होत शब्द अघात ब्रज नर नारि चकित निहारहीं ॥

१ पृथ्वी । २ इन्द्र । ३ आकाश । ४ बीजुरी ।



गये वन जे गाय लै ते धाय फिर ब्रज आवहीं ॥  
 अन्ध धुन्ध अपार खोजत धाम पन्थ न पावहीं ॥  
 सैतत जहां तहँ वस्तु सब नर नारि मन शोचत महा ॥  
 वैर सुरपति सों कियो अब होन धौं चाहत कहा ॥  
 दोहा-धुमड़ि धुमड़ि घहराय घन, परन लगे जल जोर ॥  
 ढेरत सुतको मात पितु, ब्रज गलबल चहुँ ओर ॥  
 सो०-ब्रजजन सकल विहाल, बिललाने जित तित फिरत ॥  
 श्याम करत यह खयाल, देखि देखि मनमें हँसत ॥  
 अति व्याकुल जहँ तहँ नरनारी । कहत देत पर्वतको गारी ॥  
 आये पूजि गोवर्द्धन जाई । सुरपति निजकुल देव मिटाई ॥  
 दीन्हो गिरिवर यह फल भारी । लेहु सबै अब गोदपसारी ॥  
 चढ्यो प्रचारि कोप सुरराई । देत पलकमें ब्रजहि बहाई ॥  
 जोपै बडे देव गिरिराजू । तौ किन आय बचावत आजू ॥  
 नंदसुवन यह पूजा ठानी । ताते इन्द्र चढ्यो रिस मानी ॥  
 कहति यशोमति सों ब्रजवाला । कहा काम यह कियो गोपाला ॥  
 सुरपति हैं कुलदेव हमारे । ब्रज ते भेटि दिये तैं न्यारे ॥  
 चढ्यो आय ब्रज ऊपर सोई । अब सहाय काहेन गिरि होई ॥  
 घन गरजत तरजत अति भारी । देखि देखि डरपत नरनारी ॥  
 सकल विकल भय मन पछिताहीं । लरिकन दुरवत गोदन माहीं ॥  
 भये शोच वश सब ब्रजलोका । कहत बन्यो अब मरण संयोगा ॥  
 दोहा-देखि देखि ब्रजकी दशा, नन्दमहारि पछिताति ॥  
 कियो निरादर इन्द्रको, मनमें बहुत डराति ॥  
 सो०-श्याम राम दोउ भाय, लिये निकट शोचत महारि ॥  
 जुरे गोप तहँ आय, मनहीं मन मुसुकात हरि ॥  
 कहत कृष्णसों सब ब्रजवासी । सुनहु श्याम सुन्दर सुखराशो ॥  
 तुमतो सुरपति यह मिटायो । ब्रजवासिनपै गिरिहि पुजायो ॥



तुम्हरे कहे अहो ब्रज मण्डन । सुरपति मान कियो हम खण्डन  
 ताहीते सुरराज रिसाई । दिये प्रलयके मेघ पठाई ॥  
 वर्षत ते भववाके पायक । विषम बूंद लागत जनु सायक ॥  
 भीजत गाय गोप गोसुत सब । धरिक माहिं बूडतहै ब्रज अब ॥  
 राखि लेहु अब ब्रजके नायक । तुमहीं यह दुख मेटन लायक ॥  
 दावानलते राखे जैसे । अब जलते राखौ प्रभु तैसे ॥  
 बर्की बिनाशन शकट सँहारन । तुणावर्त वत्सालुर मारन ॥  
 अवमर्दन बक बदन विदारन । तुमहीं ब्रज जनके दुख दारन ॥  
 दीजै अभय वेगि नैदलाला । वर्षत मेघ महा विकराला ॥  
 राखि लेहु बूडत ब्रज खेरो । अब चितवत हरि सब मुख तेरो ॥

दोहा—जब जब गाढपरी हयैं, तब तुम कियो उबार ॥

इहि अवसर अब राखिये, मोहन नन्दकुमार ॥

सो०—ब्रजजनके सुखदान, देखि विफल ब्रजलोग सब ॥

हँसि बोले तब कान्हू, धरहु धीर उर उरहु मति ॥

चलहु सकल मिलि गिरिके पाहीं । उनको ध्यान धरहु मन माहीं ॥  
 करि लेहैं ब्रजराज सहाई । रहिहैं सुरपति मन पछिताई ॥  
 यह कहि हरि गोवर्द्धन आयो । अभय बाँहदै सबन बुलायो ॥  
 गाय वत्स ब्रज लोग लुगाई । गये सकल हरिके संगधाई ॥  
 सबहीके देखत गहि धरते । उचकि लियो गिरिवर हरि करते  
 छिगुली छोर बाम कर राख्यो । तब हरि ब्रजवासिन ते भाष्यो ॥  
 करो सहाय देव गिरिराया । आवहु तुम सब इनकी छाया ॥  
 गाय गोप गोसुत नरनारी । भये सकल क्षण माहिं सुखारी ॥  
 चकित देखि सब लोग लुगाई । कहत धन्य तुम कुँवर कन्हाई ॥  
 प्रेम उमँग उर आनँद भारिके । परसत चरण धाय सब हरिके ॥  
 कान्हू कहत देखहु गिरिराई । कीन्हीकेहि विधि तुरत सहाई ॥  
 भक्तन हित हरि गिरिहि उठायो । तब ते गिरिधर नाम कहायो ॥

१ इन्द्र । २ बाण । ३ बज्रा । ४ पूतना । ५ अघामुर । ६ हृदय ।



छं०-परेउ तबते नाम गिरिधर, वामकर गिरिवर धरयो ॥  
 देखि व्याकुल सकल ब्रजको, शोच इकक्षणमें हरयो ॥  
 करत जय जय गोप गोपी, सकल मन आनंद भरे ॥  
 श्याम सबके मध्य ठाढे, करंजनख गिरिवर धरे ॥  
 पारि अखण्डित धार मूशल, सलिलकी वर्षा करे ॥  
 अन्ध धुन्ध अकाश चहुँ दिशि, सबन झकझोरत खरे ॥  
 वज्रनीर गंभीर पुनि पुनि, गर्ज पर्वत पर गिरे ॥  
 करत अति उत्पात ब्रजपर, मेघ परलयको करे ॥  
 दोहा-बार बार चपला चमकि, झकझोरत चहुँ ओर ॥  
 अरर अरर आकाशते, जल डारत घन घोर ॥

सौ०-हरि जनके सुखदाय, गिरि कीन्हों विस्तार अति ॥

सब ब्रज लियो बचाय, बूंद न आवत भूमिपर ॥

कहत गोप सब मनहि डराई । गिरिवरनीके धरहु कन्हाई ॥  
 महाप्रलय पर्वत यह भारी । अतिकोमल भुज तनक तुम्हारी ॥  
 नखते गिरिवर धरिको धारै । ऐसे बल बिन कौन सँभारै ॥  
 देखि नन्द व्याकुल मन माहीं । महा भार गिरि कोमल बाहीं ॥  
 दाबत भुजा यशोमति मैया । बार बार मुख लेति बलैया ॥  
 देखि भार मन अति सुख पावै । पुनि पुनि गोवर्द्धनहि मनवावै ॥  
 नाथ आपनो भार सँभारी । करियो कान्हरकी रखवारी ॥  
 पर्य पकवान भिठाई भेवा । बहुरि पूजिहौं तुमको देवा ॥  
 मात पितहि हरि देखि दुखारी । तब इक बुद्धि करी गिरिधारी ॥  
 कह्यो नन्द सों निकट बुलाई । तुमहूँ सब मिलि करहु सहाई ॥  
 लै लै लकुट राखि गिरि लेहु । मति राखहु उरमें सन्देह ॥  
 गोवर्द्धन गिरि भयो सहाई । आप कह्यो मोहि लेहु उठाई ॥  
 दोहा-यह सुनि जहँ तहँ गोप सब, रहेलकुटि गिरिलाय ॥

१ अंगुलिके नहपर । २ एकसीवारागिरि । ३ बीजुरी । ४ दूध । ५ लट्ठ ।



कहत श्याम तब नन्दसों, भले लियो उचकाय ॥  
 सो०-ठाढे ढिग बलराम, देखि देखि लीला हँसत ॥  
 कौतुक निधि सुखधाम, करत चरितसंतनसुखद ॥  
 सात दिवस बीते यहि भांती । वर्षत जल जलधर दिनराती ॥  
 कोपि कोपि डारत जलधारा । मिटी न ब्रजकी नेकुलगारा ॥  
 जरत जलद जल बीचहि अँवर । वैसेइ गिरि वैसेइ ब्रज सुंदर ॥  
 धर जल पवन अनल नभ जाको । सुरपति कहा करिसकौ ताको ॥  
 भये जलद जलते सबरीते । रक्षो एक गुण द्वैगुण बीते ॥  
 कहत बात आपस में वादर । पठयो इन्द्र हमें दै आदर ॥  
 कहाँ देहु ब्रजजाय बहाई । कहिहैं कहा जाय अब भाई ॥  
 महा प्रलय जल वर्षे आनी । ब्रजमें बूंद न पहुँच्यो पानी ॥  
 भये भेष मनमें सब कादँर । अब करिहैं सुरराज निरादर ॥  
 अति भय तनुको दशा सुलाने । गये इन्द्रपै सब खिसाने ॥  
 कहत भेष सुरपतिके पाहीं । सुनहु देव हम कहत डराहीं ॥  
 कै मारो कै शरण उबारो । ब्रज पै जोर न चलत हमारो ॥  
 दोहा-सात दिवस परलय सलिल, हम वर्षे ब्रजजाय ॥  
 ब्रजवासी भाये नहीं, निदरयो हमें बनाय ॥  
 सो०-निघट गयो सब बारि, एक बूंद पहुँचो न घर ॥  
 यह अचरज अति भारि, कहत लगतलजाहमें ॥  
 यह सुनि चकित भयो सुरराई । पुनि पुनि बूझत भेष बुलाई ॥  
 कहा भयो परलय को पानी । यह कछु ब्रजकी बात नजानी ॥  
 सुरपति मन यह करत विचारा । पर्वतमें कोउहै अवतारा ॥  
 तब सुरेश सब देव बुलाये । आज्ञा सुनत तुरत सब आये ॥  
 देवन आय सबन शिरनायो । कौन काज सुरराज बुलायो ॥  
 तबहीं देवन सों सुरराई । ब्रजवासिनकी बात सुनाई ॥  
 बीते वर्ष देतहैं पूजा । सो अब देव कियो उनदूजा ॥

१ वादल । २ आकाश । ३ कायर ।



मोहिं मेदि पर्वतको थाप्यो । ताते मैं अतिरिस करि कांथ्यो ॥  
 दिये प्रलयके मेघ पठाई । आवहु ब्रज गिरि सहित बहाई ॥  
 ते वर्षे परलय जल जाई । ब्रजमें नीर न पहुँच्यो राई ॥  
 आये मेघ हार सब रोई । कारण कहा कहो सो मोई ॥  
 देवन कह्यो सुनो सुरईशा । प्रगछ्यो ब्रजहिं ब्रह्म जगदीशा ॥  
 दोहा-तुम जानत प्रभु भूमि जब, दुखित पुकारी जाय ॥

कह्यो लेन अवतार तब, सो विहरत ब्रज आय ॥  
 सो०-कहै इन्द्र पछिताय, मैं भूल्यो जान्यों नहीं ॥

कीन्ही बहुत ठिठाय, भय कर मन व्याकुलभयो ॥  
 मैंसुरपति जिनहींको कीन्हो । तिन आगे चाहौं बलि लीन्हो ॥  
 रवि आगे खँद्योत उजेरी । तैसी बुद्धि भई है मेरी ॥  
 कीन्ही बहुतै मैं अधिकाई । कहा करौं अब मन पछिताई ॥  
 सुरन कही सुनिये सुरराई । ब्रजहि चलो नहिं आन उपाई ॥  
 वे हैं प्रभु दयालु करुणाकर । क्षमा करैगे भीसुंदरवर ॥  
 सुनि विचार कीन्हो सुरराजा । यद्यपि वदन दिखावत लाजा ॥  
 तद्यपि वै स्वामी मैं दासा । करिहैं कृपा अवशि मोहिं आशा ॥  
 अब नहिं बनत रहे मुखे गोई । शरण गये जो होय सो होई ॥  
 यह विचार मनमें ठहराई । चलयो शरण सुर संग लिवाई ॥  
 कामधेनु करि अग्र सुहाई । शोचत चलयो ब्रजहि समुदाई ॥  
 अतिसकोच सुरपति मनमाहीं । आगे धरत परत पग नाहीं ॥  
 जगत पितासां करी ठिठाय । कहिहौं कहा वदन दिखराई ॥  
 दोहा-शरण शरण कहि चरण परि, परिहीं जाय उताँल ॥

शरणागत पालन विरद, तजिहैं नाहिं गोपाल ॥  
 सो०-दीन वचन सुनि कान, करिहैं कृपा कृपालु प्रभु ॥

यहै करत अनुमान, सुरनायक आयो ब्रजहि ॥  
 देखि सुरनकी भीर अहीरा । अति डरपे उरभये अधीरा ॥

१ जुगुन । २ मुखछिपाये । ३ व्याकुल ।



दौरि कृष्ण सों जाय सुनायो । सुरपति आप सैन सजिआयो ॥  
 कहत श्याम हँसि मतिहि डरावो । गिरिवरतजि कितहूँ मति जावो ॥  
 ब्रज बाहर सेना सबराखी । वाहनते उतयो सहसाखी ॥  
 सकुचत चह्यो कृष्णके पासा । कछुक दुखितमन कछुक उदासा ॥  
 धाय परयो चरणन पर जाई । कृपासिंधु राखो शरणाई ॥  
 विसयो तुमहि तुम्हारी माया । अब तुम बिन नहि और सहाया ॥  
 शरण शरण पुनि पुनि कहि बानी । धोये चरण नयनके पानी ॥  
 राखि राखि त्रिभुवनके राई । मोते चूक पडी अधिकाई ॥  
 मैं अपराध कियो अनजानी । क्षमा करो प्रभु जन सुखदानी ॥  
 जो बालक पितु सों विरझाई । लेत पिता तेहि गोद उठाई ॥  
 ऐतेहि मोहिं करो जन बाता । जैसे सुतहित पित भरु माता ॥

दोहा-ब्याकुल देखि सुरेश अति, दीनबंधु यदुराय ॥

अभय कियो करमाथधरि, भुजगहि लियो उठाय ॥

सो-लीन्हों हृदय लगाय, देखि दीनता इन्द्रकी ॥

शिर नहि सकत उठाय, बार बार परशतचरण ॥

कहत इन्द्रसों कुँवर कन्हई । तुमकत सकुचतहौ सुरराई ॥  
 हम तुमसों कीन्ही अधिकाई । तुम्हरी पूजा हम सब खाई ॥  
 भली करी ब्रज वर्षे पानी । हम कछु तुमसोंरिस नहि मानी ॥  
 यह दीन्ही मेरी ठकुराई । तुम नहिं जानत करी ढिठाई ॥  
 कहा भयो जो मेघ पठाये । मैं सब ब्रजके लोग बचाये ॥  
 तुम कुछ उरमें शोच न आनो । मैं तुम सों कछु बुरो न मानो ॥  
 भली करी ब्रज देखन आये । तुम मेरे मनमें अति भाये ॥  
 अपने मनकी शोच मिटाई । देवन सहित करौ सुख जाई ॥  
 सुनि हरि वचन देवगण हषे । जय जयकरि कुसुमांजलि वर्षे ॥  
 पुलकि अंग सुख गदगद बानी । कहत धन्य प्रभुजन सुखदानी ॥  
 अशरण शरण तुम्हारी बानो । यह लीला सब तुमही जानो ॥

१ मूलकी अंजली ।



धन्य धन्य सब ब्रजकेवासी । जिनके प्रेम विवश अविनाशी ॥  
 दोहा-प्रभुहि देखि अनुकूल मन, धीर कियो सुरराय ॥  
 मिटी त्रास उरते तऊ, बार बार पछताय ॥  
 सो०-कहत बारही बार, तुम गति अगम अगाध प्रभु ॥  
 मैं भूल्यो संसार, जान्यों ब्रज अवतार नहि ॥  
 प्रभु आगे चाहौं मैं पूजा । मोते मन्द औरको दूजा ॥  
 अहो नाथ तुम प्रभु मैं दास्ता । रवि आगे खँद्योत प्रकाशा ॥  
 मेरो गर्व कितक यह बाता । कोटिन इंद्र तुम्हारे गाता ॥  
 मैं अपराध कियो यह भारी । प्रभु राख्यो निज ओर निहारी ॥  
 दीनबन्धु तुम जन हितकारी । विरदबखानत वेद पुकारी ॥  
 कृपा करी प्रभु दरशन पाये । भयो सुखी तनु ताप नशाये ॥  
 येदिन वृथा गये बिनकाजा । तुमको नहि जान्यो ब्रजराजा ॥  
 धन्य धन्य प्रभु गिरिवर धारी । भजन विपति भक्त हितकारी ॥  
 दैत्य दलन प्रभु भार उतारन । सन्त धेनु द्विज हित तनु धारन ॥  
 अब प्रभु मोहि कृपा यह करिये । गिरिवर धर गिरि धरपर धरिये ॥  
 सुनि विनती हरि भये सुखारी । तबगिरि करते धरयो उतारी ॥  
 सुरन सहित सुरराज अनन्दे । कामधेनु लै प्रभुपद वन्दे ॥  
 कं०-करत स्तुति जोरि सुरकर, धेनु आगे राखिकै ॥  
 बंदि प्रभुपद पुलकि पुनि पुनि, नाम गोविंद राखिकै ॥  
 जै जै कृपालु मुकुन्द माधव, कृष्ण अगणित गतिहरे ॥  
 गोपपति राजीवलोचन, करज नख गिरिवर धरे ॥  
 वासुदेव ब्रजेन्द्र यदुपति, कंस अरिसुर रंजने ॥  
 हरणि भव भय भार महि, अहिराज विषमद गंजने ॥  
 बक्री तिरणावर्त बत्सासुर, बका अब नाशनं ॥  
 अतिहि दुष्ट अरिष्ट धेनुक, असुर वंश विनाशनं ॥  
 चोरि माखन खात ब्रज घर, भंजि तरु जन दुखहरे ॥

१ भय । २ पटवोजन । ३ पृथ्वीपर । ४ कमलदललोचन । ५ कंसकेशत्रु ।



योगीजन जप तप न पावत, धन्य ब्रज जन वश करे ॥  
 धन्य गोकुल धन्य यमुना, धन्य ब्रज वृन्दावने ॥  
 धन्य गोपी गोप यशुदा, नंद गिरि गोवर्द्धने ॥  
 फिरत चारत धेनु निज पद, पद्मफणि अहिप्रति धरे ॥  
 शकट भंजन भक्त रंजन, रास निरत गुणभरे ॥  
 जनक सुरसरि शिवसनकधन, श्रीनहीं छांडत घरी ॥  
 परसते पद भयो पावन, जयाति जै जै जै हरी ॥  
 दोहा-करिप्रस्तुति मन हर्षि अति, परयो शक्र प्रभुपांय ॥  
 द्वै प्रसन्न सुरधेनु युत, विदा कियो यदुराय ॥  
 सो-पुनि पुनि प्रभुपद वन्द, सुरलोकहि सुरपति गयो ॥  
 ब्रजजन परमानन्द, चकित विलोकत श्यामतन ॥  
 कहत गोप सब आपसमाहीं । इन सम और जगतकोडनाहीं ॥  
 सात वर्षको बालक जोई । ताहि इतो बल कैसे होई ॥  
 हूये पारब्रह्म भगवाना । करत चरित्र देह धरि नाना ॥  
 दैत्य किते छल करि करि आवे । ते सब इन कौतुकहि नशाये ॥  
 इन्द्र मेदि गिरिवरहि पुजायो । तामें निजस्वरूप प्रगटायो ॥  
 इन्द्र प्रलय पन दियो पठाई । सात दिवस ब्रज वरषे आई ॥  
 अति विस्तार बड़ो अति भारी । लीन्हो गिरिवर कर पर धारी ॥  
 एक बूंद ब्रजमें नहि आई । लीन्हो सब ब्रज लोक बचाई ॥  
 हारि मानि सुरपति भय पाई । आन परयो चरणन शिरनाई ॥  
 कामधेनु देवनकोल्यायो । ताहि अभय करि फेरि पठायो ॥  
 अचरज बात जात नहि वरणी । मानुषसों यह होय न करणी ॥  
 परे गोप हरि चरणन आई । कहत धन्य तुम कुँवर कन्दाई ॥  
 दोहा-हम तुमको जानैं नहीं, हौ तुम त्रिभुवन राय ॥  
 ब्रजवासिन सुख देनको, ब्रजमें प्रगटे आय ॥

१ पिता । २ गंगा । ३ सुरभीगौ ।



सो०-तुम करलेत सहाय, परत जहाँ संकट विकट ॥  
 लीन्हों हमें बचाय, बिषते जलते अनलते ॥  
 करत विचार युवति सब ठाहीं। प्रेम उमँग मन आनँद वाहीं ॥  
 कैसे गिरिवर लियो उठाई। अतिकोमल तनुश्याम कन्हाई ॥  
 लेत धरत जान्यो नहिंकाहू। धन्य धन्य हरिको यह बाहू ॥  
 सातदिवस परलय जलढान्यो। इन्द्रपरतचरणन जब हास्यो ॥  
 करत सखा धनि धन्य गुपाला। कैसे गिरि कर धन्यो विशाला ॥  
 यह करतूति करत तुम कैसे। हम सँग सदा रहत हौ जैसे ॥  
 गाय चरावत हो मिलि हमसों। केतिक बलहै बूझत तुमसों ॥  
 धाय चरणगहि यशुमति मैया। मुख चुंबति अरु लेति बलैया ॥  
 अतिस्नेह नयन भरपानी। तनु पुलकित मुख गदगद वानी ॥  
 कैसे कर लुधन्यो गिरि ताता। अतिकोमल भुज तुम दिनसाता ॥  
 विहँसिमातसों कहत कन्हैया। तेरीसों सुनु यशुमति मैया ॥  
 मैं न उठावतरी श्रमपाथो। नेक लुयो उठि आपुहि आयो ॥  
 दोहा-अब गिरिको पूजो बहुरि, सबसों कह्यो कन्हाय ॥  
 बूझत ते राख्यो उनहिं, कीन्ही बहुत सहाय ॥  
 सो०-यह सुनि हर्ष बढ़ाय, बहुरो गिरि पूज्यो सबन ॥  
 अति हर्षित नँदराय, दिये दान विप्रन विपुल ॥  
 अक्षत रोरी पान मिठाई। पुष्पहार दधि दूध सुहाई ॥  
 यशुमति रोहिणि अरु ब्रजनारी। सजि सजि लाई कंचन थारी ॥  
 हरिको तिलक क्रियो दोउ माता। पुलकि प्रेम परिपूरण गाता ॥  
 बहुतकद्रव्य निछावर कीन्हो। भुजगहिलाय कण्ठसों लीन्हो ॥  
 ब्रजतिय हरिको तिलक बनावै। फूल माल गरमैं पहिरावै ॥  
 इहि मिस अंग परसिसुखपावै। निरखि बदनछबि विधिहि मनावै ॥  
 होहिं हमारे पति गिरिधारी। मनमोहन सुंदर बनवारी ॥  
 यह कामना सकल उरधारी। हरि छबि निरखति गोपकुमारी ॥  
 कह्यो नंदसों तब गिरिधारी। सुनहु तात अब बात हमारी ॥

१ सानेकीथारी ।



गोवर्द्धनको करौ प्रणामा । चलिये अब सब निज निज धामा ॥  
 यह सुनि सवन गिरिहिं शिरनाई । चले ब्रजहि मनहर्ष बढ़ाई ॥  
 आये सदन सकल ब्रजवासी । सहित श्याम सुंदर मुखराशी ॥  
 दोहा-घर घर ब्रज आनंद सब, गावत मंगलचार ॥  
 आये सुरपति जीति हरि, गिरिधर नन्दकुमार ॥  
 सो०-ब्रज मंगल ब्रज मोद, ब्रज आभूषण गिरिधरन ॥  
 नितनव करत विनोद, ब्रजवासी ब्रजदास हित ॥

अथ नन्दएकादशीव्रणलीला ॥

इन्द्रहि जीति श्याम घरआये । ब्रज घर घर आनंद बधाये ॥  
 तादिन दशमी भई सुहाई । कार्तिक शुक्लएकादशि आई ॥  
 भक्ति मुक्तिदायक अतिपावन । पाप शाप संताप नशावन ॥  
 नन्दएकादशि व्रत प्रतिपालें । वेद विदित सब धर्म सँभालें ॥  
 प्रथमहि दशमी संयमकीन्हो । बहुरि एकादशिका व्रतलीन्हो ॥  
 निराहार निरजल दृढनेमा । नारायण पदपंकज प्रेमा ॥  
 और काज कछु मनहि नलायो । भजनकरत सबदिवस वितायो ॥  
 निशि जागरण करण विधिठानी । प्रभु मंदिर लीप्यो निजपानी ॥  
 पाठस्वर वरादिव्य बिछाये । विविध पुनीत सुगन्धसिंचाये ॥  
 बाँधी बन्दनवार सुहाई । सुगन्ध सुगन्ध माल लटकाई ॥  
 चौक चारु बहुरंगन पूरयो । सिंहासन तहँ राख्यो रूरयो ॥  
 शालिग्राम तहाँ पधराये । भूषण बसन विचित्र बनाये ॥  
 दोहा-धूप दीप नैवेद्य करि, प्रभुपर पुष्प चढ़ाय ॥  
 करी आरती प्रेमसों, घंटा शंख बजाय ॥  
 सो०-प्रभु पदनायो माथ, करि परदक्षिण दंडवत ॥  
 तुम त्रिभुवनके नाथ, जोरि हाथ स्तुति करी ॥  
 आदर सहित करी नैद पूजा । प्रेम भक्ति उर भाव न दूजा ॥  
 करत कीर्तन भजन सप्रतीति । तीनियौमयामिनि जब बीती ॥

१ घर । २ रात्रि । ३ प्रहर । ४ रात्रि ।



तवहिं महारि नंदराय बुलाई । कस्यो यशोमति सों समुझाई ॥  
 एकदंडे द्वादशी सकारे । पारन की विधि करो सबारे ॥  
 यह कहिनन्द यशोमति पाहीं । लैझारी धोती कर माहीं ॥  
 गये न्हान यमुनाके तीरा । संगनहीं कोउ तहां अहीरा ॥  
 झारी भरि यमुना जललीन्हो । बाहर जाय देह कृत कीन्हो ॥  
 लैमाटी कर चरण पखारी । अति उत्तम सों करी मुखारी ॥  
 भचमन लै बैठे नंदपानी । बरुण दूत जल बाजत जानी ॥  
 नन्दहि लै गे पकरि पताला । बरुण पास पहुँचे तरकाला ॥  
 जान्यो वरुण कृष्णके ताता । भयो हर्ष मन गुणि यह बाता ॥  
 अन्तर्यामी प्रभु वनश्यामा । नंदलेन ऐहें मम धामा ॥

दोहा-भयो वरुण अति हर्षमन, पुनि पुनि पुलकित गात ॥

नन्दहि ल्याये भृत्य मम, भली भई यह बात ॥

सो०-सो प्रभु कृपानिधान, ऐहें धनि धनि भाग्य मम ॥

जाहि धरत मुनि ध्यान, निर्गमनेतिजिहि गावहीं ॥

हर्ष सहित नंदहि जलैराई । भीतर महलन गये लिवाई ॥  
 सादर विनय वचन बहु भाषे । धीरज दै नीके नंदराखे ॥  
 रानी सबन नंदको देख्यो । जन्म सफल अपनो करि लेख्यो ॥  
 कहत कि धनि धनि भाग्य हमारे । नन्द हमारे सदन पधारे ॥  
 जिनके सुत त्रैलोक्य गुताई । सुर नर मुनि सबहीके साई ॥  
 चितवत पंथ वरुण मन लाये । कहणामय अब आवत धाये ॥  
 यशुमति शोच करत मन माहीं । भई बेर आये नंदनाहीं ॥  
 खबरलेन तब ग्वाल पठाये । यमुनातट नहिं नंदहि पाये ॥  
 झारी धोती तट पर देखी । भये शोच सब ग्वाल विशेषी ॥  
 इत उत खोज ग्वाल फिरि आये । कहत महारि सों नंद न पाये ॥  
 झारी धोती तट पर पाई । सुनत महारि मुख गयो झुराई ॥  
 निशा अकेले आज सिधाये । काहू जलैचर धौं धीर खाये ॥

१ एकघडी । २ दांतन । ३ पिता । ४ नौकर । ५ वेद । ६ वरुण । ७ जलकेजीव ।



दोहा-अति व्याकुल यशुमति भई, उठी रोय अकुलाय ॥

सुनि धाये ब्रज लोग सब, नंदहि खोजत जाय ॥

सो०-यमुना तट वन गांव, नंद नंद ढेरत सबै ॥

ढूँढि फिरे सब ठांव, भये विकल ब्रज लोग सब ॥

सोवतते हरि हलधर भाये । सोवत मात देखि दुख पाये ॥

बृद्धत जननी सो दौड भैया । कतरोवति है यशुमति भैया ॥

बिलखियशोमति वचन सुनाये । यमुनातट कहूँ नंद हिराये ॥

यह सुनि हरि बोले सुनुमाता । अबहीं आवतहैं नंद ताता ॥

मोखों कहि गये अबहीं आवन । मति रोवै मैं जात बुलावन ॥

प्रभु सर्वज्ञ सकलके रक्षामी । जल थल व्यापक अंतर्यामी ॥

जाने नंद वरुणके धामा । वरुण प्रीति पुनिलखि वनस्थामा ॥

वरुणलोक हरि तुरत सिधाये । सुनत वरुण आतुर उठिधाये ॥

देखत दरश परश सुख पायो । चरण सरोज आय शिरनायो ॥

कहत आज धनि भाग्य हमारे । त्रिभुवन पति मम धाम पधारे ॥

पाटम्बर पाँवड़े बिछाये । महलन बंदनवार बँधाये ॥

रत्न जडित सिंहासन धारयो । तापर सादर प्रभु बैठारयो ॥

लुं०-बैठाय सादर प्रभुहिं धोवत, कमलपद निज करगहे ॥

जे पद सरोज मनोज अरि उर, सरसदा प्रफुलितरहे ॥

जे पद पदम पदमालया उर, रहत निज भूषण किये ॥

पायते पद जलज जलपति, प्रेम परि पूरण हिये ॥

दोहा-विविध भांति प्रभु पूजिके, वरुण कह्यो गहिपाय ॥

कृपासिंधु अति कृपा करि, दरश दियो मुहिआय ॥

सो०-मैं कीन्हों अपराध, सो प्रभु उर नहिं आनिये ॥

क्षमा समुद्र अगाध, क्षमा करहु निज जानि जन ॥

जल रक्षक जे दूत कृपाला । ते लै आये नंद पताला ॥

यह कारज मैं उनको कीन्हों । तिन दूतन प्रभु नंद न चीन्हों ॥

१ श्रीशिव । २ लक्ष्मी । ३ चरणकमल । ४ वरुण ।



यदपि कियो उन पातक भारी । हैं वे सकल दंड अधिकारी ॥  
 तदपि दूत वे मो मन भाये । जिनते प्रभुके दरशन पाये ॥  
 देखि नाथ शुभ दरश तुम्हारा । मैं मान्यों उनको उपकारा ॥  
 अब प्रभु हम सब शरण तुम्हारी । राखि लेहु श्रीगिरिधर धारी ॥  
 पाँधन परी आय सब रानी । बड़ भागिन आपनको जानी ॥  
 रानिन सहित वरुण अनुरागे । प्रस्तुति करत जोरि कर आगे ॥  
 धन्य नंद धनि धन्य यशोदा । धनि धनि तुमहिं खिलावत गोदा ॥  
 धनि ब्रज गोकुलके नरनारी । पूरण ब्रह्म जहां अवतारी ॥  
 गुणातीत अविगति अचिनाशी । ब्रज विहार विलसत सुखराशी ॥  
 शेष सहस्र मुख वरणि न जाई । सहज रूपको करत बड़ाई ॥  
 दोहा-करि प्रस्तुति रानिन सहित, पुनि पुनि धरि पदशीश ॥  
 लै प्रभुको नंदराय ढिग, तबहीं गयो जलीश ॥  
 सो०-हरषि उठे नंदराय, देखि श्यामको शशि वदन ॥  
 लखि प्रभुकी प्रभुताय, रहे मुदित चकित चितय ॥

करत मनहिं मन नंद विचारा । यह कोउ आहि बड़ो अवतारा ॥  
 भयो नंद मन हर्ष अपारा । ब्रह्म करत मो सदन विहारा ॥  
 तबहिं कृपा करि जन सुखदाई । वरुणहिं दै जलराज बड़ाई ॥  
 जाय नंदको कर गहि लीन्हो । चलहु तात ब्रज कहि हैं सिदीन्हो ॥  
 कह्यो प्रणाम वरुण सुख पाये । नंद सहित हरि ब्रज गृह आये ॥  
 नंद आय ब्रजको जब देख्यो । तब वह चरित स्वप्न सां लेख्यो ॥  
 देखि नंदको ब्रज नरनारी । गयो दुःख सब भये सुखारी ॥  
 बृक्षत नंदहि गोष सयाने । कितहि गये तुम हम नहिं जाने ॥  
 हारे खोज सकल ब्रजवासी । भये बहुत तुम बिना उदासी ॥  
 नंद महर तब सबसों भाष्यो । काल्हि एकादशि व्रत मैं राख्यो ॥  
 आज द्वादशी थोड़ी जानी । रैन अछत गयो यमुना पानी ॥  
 कटिलौ गयो यमुन जल माहीं । लै गयो वरुण दूत गहिवाहीं ॥



दोहा-वरुण लोकते जायकै, लाये मोहि गोपाल ॥

ये प्रगटे ब्रज आय कोउ, उत्तम पुरुष विशाल ॥

सो०-महिमा कही न जात, कोटि भाँति वरणीवरुण ॥

साँव कहत मैं बात, इनकी नर मति मानियो ॥

भयो अधीन बहुत जलराई । परचो चरण कमलनपर आई ॥  
रानिन सहित धोय पदपूजे । जानि जगतपति भाव न दूजे ॥  
ब्रज नर नारि सुनत यह गाथा । कहत भये सब सकल सनाथा ॥  
यशुमति सुनत चकित यह बानी । कहत कहा यह अकथ कहानी ॥  
प्रभुकी मायामें अरुझानी । कहति नंदसों यशुदारानी ॥  
मो बरजत निशि न्दान सिधाये । कुशल परी पुण्यनते आये ॥  
हरिको चूमि लियो उरलाई । लाये नन्दहि खोज कन्हाई ॥  
विप्रन बोलि दियो बहुदाना । घर घर बटी मिठाई पाना ॥  
गावत मंगल नारि सुहाई । बाजी नंद अवाँस बधाई ॥  
नंद कहत यशुमति सुन बैरी । तू अव कितहि करत मन भैरी ॥  
जाको त्रिभुवन पतिसों ताता । ताहि सदा मङ्गल दिन राता ॥  
कही गर्गमुनि वाणी जोई । प्रगटत जात बात सब सोई ॥

दोहा-इनते समरथ और नहिं, येहें सबके नाथ ॥

ब्रजवासी आनंद सब, सुनि सुनि हरि गुण गाथ ॥

सो०-धनि धनि ब्रज नर नार, कहत हमारे भाग्य सब ॥

हम संग करत विहार, श्रीवैकुण्ठ निवास हरि ॥

अथ वैकुण्ठदर्शन लीला ॥

कहत परस्पर सब ब्रजवासी । हरिहैं श्रीवैकुण्ठ निवासी ॥  
सो वैकुण्ठ अहै धौं कैसो । जन्म मरण भय जहां न ऐसो ॥  
जाको वेद पुराण बखाने । हरिजहैं वसत सदा सुखमाने ॥  
जो हरि हमहिं दिखावैं सोई । तौ बड़भाग्य होई सब कोई ॥  
यह मनसा सबके मन आई । जानि लई भक्तन सुखदाई ॥

१ रात । २ घर ।



तबहि कृपाकरि सब ब्रजलोका । पहुँचाये वैकुण्ठ विशोका ॥  
धर्म धाम जो वेदन गायो । दिव्य दृष्टिदे सबन दिखायो ॥  
देखत भूलि रहे सब ग्वाला । पुर वैकुण्ठ अनूप विशाला ॥  
भूमिवर्ज मणि द्युति छविछाई । परम प्रकाश वरणि नहि जाई ॥  
वापी कूप तडागै अमीके । विविध नगन बांधे तटनीके ॥  
रत्नतकी सोपान सुहाई । जहां देव मुनि रहत लुभाई ॥  
फूले कमल विपुल बहुरङ्गा । करत शब्दखगै गुंजत भृङ्गा ॥

दोहा-कल्पवृक्षके बाग वन, सुमन सुगंध अपार ॥

खग मृग सब तेजोमयी, दिव्य स्वरूप उदार ॥

सो०-मंदिर वरणि न जाहिं, चिंतामणिमय खचित सब ॥

तैसे ताहि लखाहि, जैसी जाकी भावना ॥

सकल चतुर्भुज तहँके वासी । शुद्धसतोष्ण सब सुखरासी ॥  
राम सहित तहँ प्रभु सुख शरीरा । शोभित नव जलदान शरीरा ॥  
भूषण वसन दिव्य परकाशी । सुन्दर सकल सकल अविनाशी ॥  
वदन प्रकाश हास सुखकारी । कोटि चंद्र कीजै बलिहारी ॥  
मणिन जटित शिर मुकुट विराजै । भूषण वसन अनूपम राजै ॥  
दिव्य पारषद चँवर हुलावै । नारद तुम्बर गुण गण गावै ॥  
चकित विलोकित सब ब्रजवाला । जान्यो प्रभु प्रभाव तिहि काला ॥  
चारि भुजा तहँ प्रभुहि निहारी । शंख चक्र गद अँडुज धारी ॥  
द्विभुज कान्हको रूप न देख्यो । मुरली लकुट पाणि नहिं पख्यो ॥  
नाहिं मुकुट शिर मोर पखौवा । कटि काछिनी न गुंज हरौवा ॥  
नहीं भेष नटवर गोपाला । भये विरहवश तब सब ग्वाला ॥  
ब्रजवासी सो रूप उपासी । तास्वरूप विन भये उदासी ॥

दोहा-अकुलाने दृगँ सबनके, देखनको तिहि काल ॥

मोर पंख धर गुंज धर, मुरली धर गोपाल ॥

१ हीराकीपृथ्वी । २ तालाब । ३ अमृत । ४ सीढ़ी । ५ पक्षी । ६ कमल । ७ नेत्र ।



सो०-ब्रज वासिनके ध्यान, नटवर भेष गोपालको ॥

अमित रूप भगवान, तदपि उपासन रूप यह ॥  
 बिरह विवश हरि ब्रजजन आने। तबहीं तुरत सकल ब्रज आने ॥  
 कान्ह देखि सब भये सुखारी। रहे चकित शशिवदन निहारी ॥  
 कहत सदै मन अचरज पाये। कहाँ गये हम कैसे आये ॥  
 देख्यो स्वप्न सबै इकवारा। किधौँ साँच यह करत विचारा ॥  
 यह चरित्र सब मोहन करहीं। पुर वैकुण्ठ दिखायो हमहीं ॥  
 धन्य धन्य हम सब ब्रजवासी। ब्रह्म हमारे संग विलासी ॥  
 हरिके चरण परश सब धाई। करत गोप सब मुखन बढ़ाई ॥  
 हैंसि हैंसि सबसों कहत कन्हाई। रहे कहाँ तुम सकल भुलाई ॥  
 आज कहाँ ऐसो तुम देख्यो। सोकिन मोसों कहत विशेष्यो ॥  
 हम कह देखत नंददुलारे। तुमहीं सकल दिखावन हारे ॥  
 भूतल नाग पताल निहारो। सकल जगत तुम्हरो विस्तारो ॥  
 यह सुनि श्याम मंद सुसकाई। दिये सकल पुनि मोह भुलाई ॥  
 दोहा-करत चरित्र विचित्र प्रभु, ब्रजवासिनके माहिं ॥  
 लखि लखि शिव ब्रह्मादि सुर, सुनि जन जनहिं सिहाहिं ॥

सो०-अति आनंद ब्रज लोग, हरिके नितनव अमितलखि ॥

सबको सब सुख योग, ब्रजवासी ५७ नंदसुत ॥  
 सदा श्याम भक्तन सुखदाई। भक्तन हित अवतार सदाई ॥  
 संकटमें जन जहां पुकारैं। तहां प्रगट तिनको निस्तारैं ॥  
 मुख भीतर जिन सुमिरन कीन्हों। तिनको तहां दूरश हरि दीन्हों ॥  
 सुख दुखमें जो हरिको ध्यावैं। तिनको नेक न हरि बिसरावैं ॥  
 देव दलुंज खग मृग नरनारी। भक्त विवश सबै गिरिधारी ॥  
 चितदै भजै भाव जो जैसे। ताको होत प्रकट हरि तैसे ॥  
 ब्रह्माकीट आदिके स्वामी। प्रभु हैं निरलोभीनिष्कामी ॥  
 वेद पुराण साखि सब बोलैं। भाव वश्य सबके सँग डोलैं ॥



काम भाव ब्रज गोपी ध्यावैं । मन बच कर्म हरिसों मन लावैं ॥  
 इक क्षण हरिको नाहि बिसारैं । भौन काज चित हरिसों धारैं ॥  
 गोरसलै निकसैं ब्रज माहीं । जहाँ श्याम तेहि मारग जाहीं ॥  
 तिमके मनसो प्रीति विचारी । रीझे गोपी जन मन हारी ॥

दोहा-नवसत साज शृंगार तनु, गोरस लै ब्रजनारि ॥

बैचन इहि भग आवहीं, मोसों प्रीति विचारि ॥

सो०-अब इन संग विहार, करौं दान दधि लायकै ॥

यह मन कियो विचार, हरि ब्रज मोहन लाडिले ॥

अथ दान लीला ॥

दधिको दान रचौं इकलीला । भक्तनकी सुखदायक शीला ॥  
 दधिदानी निजनाम धराऊं । ब्रज युवतिन मन सुख उपजाऊं ॥  
 श्याम सखन तब लियो बुलाई । सबसों कहि यह बात सुनाई ॥  
 ब्रज युवती नित गोरस ल्यावैं । या मारगहै बैचन आवैं ॥  
 तिन्हें सिझाय दान दधि लीजै । गोरस खाय जान तब दीजै ॥  
 यह सुनि सखा उठे हर्षाई । भली बात तुम श्याम सिखाई ॥  
 सबहिन मन अति हर्ष बढ़ायो । कहत श्याम दधिदान लगायो ॥  
 तबहिं जाय घेरयो वन घाटा । आवत नित ग्वालनि यहि बाटा ॥  
 कहाँ श्याम सबसों समुझाई । रहो तरुनकी भोट लुकाई ॥  
 जबहीं ग्वालनि दधिलै आवैं । घेर लेहु कोउ जान न पावैं ॥  
 यह सुनि सखा घेर कै बाटा । बैठे डाटउगनको ठाटा ॥  
 उततै बनि बनि ग्वालनि बेली । बैचन दधिहि चली अलबेली ॥

दोहा-हंसत परस्पर आपमें, चली जाहिं जिय मोर ॥

पाय घातमें सघन सब, घेरिलई चहुँ ओर ॥

सो०-देखि अचानक भीर, चकित रहीं चहुँ दिशि चितै ॥

सहमी कलुक शरीर, कितते आये ग्वाल सब ॥

शंकित है ग्वालनि भई ठाढ़ी । मनहुँ चित्रकीसी लिखि काढ़ी ॥

१ मार्ग । २ वृक्षनकी । ३ छिपरहो ।



हाथ पांव अँग भये अडोले । कछु वदन ते वचन न बोले ॥  
 तहँ हँसि ग्वालनि दियो जनार्ह । मति डरपो जिय कान्ह डुराई ॥  
 इहाँ चोर ठग कोऊ नाहीं । अभय कान्हको राज्य सदाहीं ॥  
 आवत जात न भय कुछ कीजै । दधिको दानलगै सो दीजै ॥  
 नाम कान्हको जब सुनि पायो । तब युवतिन मन धीरज आयो ॥  
 बोलीं विहँसि तबहिं ब्रजवाला । कहाँ तुम्हारे प्रभु नँदलाला ॥  
 चोरी करि नहिं पेट अघायो । अब बनमें दधि दान लगायो ॥  
 तब अति बालक हते कन्हार्ह । सही जु कछु कीन्ही लरिकाई ॥  
 होउ जो कछु वा धोखे माहीं । परिहँ समुझि अबहिं क्षण माहीं ॥  
 प्रगट भये तब कुँवर कन्हार्ह । देखि सबस बोले सुसकाई ॥  
 रहि युवती तुम पोच सदाई । करि आई हौ बहुत ढिठाई ॥

दोहा-तबलौं हम लरिकाहुते, सही बात अनजान ॥

सो धोखो अब भेटिकै, छाँड़ि देहु अभिमान ॥

सो०-हम मांगत दधि दान, तुम उलटी पलटी कहत ॥

करत नन्दकी आन, दिये पाइहौ जान सब ॥

तब बोलीं ग्वालनि सुसकाई । अब तुम डर हम तजी ढिठाई ॥  
 नन्दहुते कछु तुम्हें कन्हार्ह । भयो जानिये तब अधिकाई ॥  
 कालिहहि चोरि चोरि दधि खाते । घर घर देखतही भजि जाते ॥  
 रातिहि भयो स्वप्न कछु आई । प्रातहि भई आज ठकुराई ॥  
 भली कही नहिं ग्वालनि बानी । तुम यह बात कछु नहिं जानी ॥  
 पिता चरित धन धाम जुहोई । पुत्र काज आवतहै सोई ॥  
 तुमसी प्रजा बसाई गावहिं । तौ हम ठाकुर क्यों न कहावहिं ॥  
 कछो तबहिं ग्वालनि इहँरार्ह । बात सँभारे कहत कन्हार्ह ॥  
 ऐसो को बहिगयो हमारे । जो परजाहै वसहिं बुम्हारे ॥  
 कंस नृपतिके सब कहचावैं । कहा भयो जु बसत इक गावैं ॥  
 जो तुम याते हौ गहवाने । तौ अब तजि हैं गांव विहाने ॥

१ तमक । २ प्रातःकाल ।



यह तुनि विहँसि कह्यो वनमाली । कहा बात यह कहत गुवाली ॥

दोहा-गांव हमारो छाँड़िके, वसिहौ का पुर माहिं ॥

ऐसो कौ तिहुँ लोकमें, जो भरे वश नाहिं ॥

सो०-का गनतीमें कंस, जाके हम कहवावहीं ॥

देहु दानको अंश, रारि करत बे काजही ॥

बड़ी बात छोटे सुखमाहीं । आप सँभारि कहत ह्यौ नाहीं ॥

तीनि लोक अस कंस भुवाला । भयो तिहारि वश क्यहि काला ॥

यह तुम बात कहौ तिनमाहीं । जो कोउ तुमको जानत नाहीं ॥

हम इन बातन भय नहिं मानैं । जैसैहौ तुम तैसे जानैं ॥

हमसों लीजै दान सवाई । पहिले थैली लेहु मैगाई ॥

पीताम्बर बोझन फटि जैहै । तब पाछे पछितावौ ऐहै ॥

ऐसे कहि ग्वालनि मुसुकानी । तब बोले हरि दधिके दानी ॥

तू ग्वालनि हमको कह जानै । हम नहिं झूठी बात बखानै ॥

झूठी हौ तुमहीं सब ग्वारन । सतर होति हौ बिनही कारन ॥

अजहूं मानि कह्यो किन लेहु । लेखो करो दान भ्रमदेहु ॥

नन्द सौंह यों जान न देहौ । बहुरो छोरि दही सब लेहौ ॥

काहेको अठिलात कन्हाई । छाँड़ि देहु मोहन लरिकाई ॥

दोहा-पहिली परपाटी चलौ, नई चलौ क्यों आज ॥

जानि पाइहैं कंस जो, तौ पुनि होय अकाज ॥

सो०-हँसी धरी द्वैचारि, बीतन लाग्यो याम्युग ॥

वनमें रोंकी नारि, बाँड़ि जाइहै बात पुनि ॥

कहा कंस कहि मोहिं सुनावो । अबहीं वाको जाय बुलावो ॥

लरिका कहि कहि मोहिं बखानत । मेरी लरिकाई नौह जानत ॥

मारि पूतना स्वर्ग पठाई । तृणावर्त महि दियो गिराई ॥

वत्सा बका अवासुर मारयो । गिरि गोबर्द्धन कर पर धारयो ॥

ऐसी है मेरी लरिकाई । जानि बूझि तुम देत भुलाई ॥



तुमहीं हँसी करति हौ ग्वारी । देव देवावति हौ हठि गारी ॥  
 बात जानके भाषत नाहीं । आपहि बैठी हौ बन माहीं ॥  
 चोरी सदा बैचि दधि जाहू । बिनादान क्यों होत निवाहू ॥  
 अबतो आज पकरि मैं पाई । सबदिवसनको लेहुं चुकाई ॥  
 सबै भली तुम करी कन्हार्ई । बधे असुर सो सुनी बड़ाई ॥  
 गिरि धारयो बलखाय हमारी । जानी हम सब बात तुम्हारी ॥  
 मांग लेहु अबहुं दधि खाहू । होत दान सुनि हमको दाहू ॥  
 दोहा-हमैं कहत हौ चोरटी, आप भयो जो साह ॥  
 बड़े भये चोरी करत, अब लूटत हौ राह ॥

सो०-लेहु दही बलिजाउँ, हमको होत अवार अब ॥  
 लिये दानको नाउँ, एक बूंद नहिं पाइहो ॥

यह तुम मोको कहा सुनाई । दधि माखन सब लेहु छिनाई ॥  
 यौवन रूप अंगजो तुम्हरो । ताको दान लेउँगो सिंगरो ॥  
 कंचन भार युवति तुमसिंगरी । आवति जाति हमारी डगरी ॥  
 दही मही मोको दिखरावो । ताहि न यौवन रूप बतावो ॥  
 अंग अंगको दान गिनावो । लेखो करि सब मोहिं चुकावो ॥  
 यह सुनि सब ग्वालनि झहरानी । भये कान्ह तुम ऐसे दानी ॥  
 अंग अंगको दान चुकावत । यौवन रूपहि दीठ चलावत ॥  
 जानि बरी प्रगटी तरुणार्ई । यशुवति सों अब कहिहौं जाई ॥  
 उर आनंद ऊपर रिस करिकै । चलीं सबै मटुकी शिर धरिकै ॥  
 तब हरि पीतांबर कँठिकसिके । धरयो धाय औंचर पट हँसिके ॥  
 रिसकै मटुकी लई लुड़ाई । दधि माखन सब दियो लुटाई ॥  
 गहि गहि भुजा सबन झकझोरी । अँगिया फारि तनीगहि तोरी ॥

दोहा-कहत कह्यो मानत नहीं, ठीठ भई सब आय ॥  
 दान देत झगरो करत, यौवन रूप लदाय ॥  
 सो०-जोकहिहौ घर जाय, जननी नहीं पत्याइहै ॥  
 आवहुगी पछिताय, निबहौगी पुनि कालिहकिमि ॥

१ दिननको । २ कमर । ३ यशोदामया ।



भये कान्ह तुम निपट दुलारे । देखहु फारे बसन हमारे ॥  
 तापर मांगत यौवन दाना । यह अगलों कहूँ सुन्यो न काना ॥  
 दधि माखन सब दियो लुटाई । चलो कहैं यशुमति सों जाई ॥  
 यह कहि ग्वालिचलों सवरिस भरी । अबहि मैगावत हैं तुमको धरि ॥  
 यह सुनि हरि हँसि भौंहसि कोरी । गई उरहनो लै सब गोरी ॥  
 यशुमति सों सब जाय सुनायो । कहा महारि सुतको सिखरायो ॥  
 अतिही कान्ह भये अब ईतर । रोंकत युवतिनको वन भीतर ॥  
 दही दूध सब दियो लुटाई । मांगत यौवनदान कन्हवाई ॥  
 चोली फारि हार सब तोरे । गहि गहि आंचर पट झकझोरे ॥  
 ऐसी को कुल भयो महारिके । यौवन दान लियो जिन अरिके ॥  
 नित उदपात जात सहिनाहिन । कहूँ लगि पीयर वन दै दाहिन ॥  
 कैसे गोरस बेंचन जैये । हरिपै मारग चलन न पैये ॥

दोहा—सुनत ग्वालिनीके वचन, बोली यशुमति मात ॥

मैं जानी तुम सबनके, उर अन्तरकी बात ॥

सो०—आप फिरत इतरात, कहत श्याम ईतर भयो ॥

उरन लाय नख घात, उरहनको दौरी फिरत ॥

दशहि वरषको कहाँ कन्हवाई । कहूँ सब तुम माती तरुणवाई ॥  
 दोष लगावत श्यामाहिं आनी । कैसे धौं कहि भावत बानी ॥  
 हरिपर फिरत सबै मडरानी । यौवन मदमाती इठलानी ॥  
 तुमको लाज लगतिहै नाहीं । जाहु सबै बैठो घर माहीं ॥  
 अहो महारि ऐसी नाहिं कीजै । बिन बूझे गारी नाहिं दीजै ॥  
 सुत ऐसी लग चलन न देहीं । मांगत दान लूटि दधिलेहीं ॥  
 तुमहुं खीझ करत सुतओरी । ऐसे ब्रजमें बसिहै कोरी ॥  
 तजि हैं आजहिं गांवतिहारो । बहुरि न सुनि हौनाम हमारो ॥  
 ऐसे कहा कहत डरपाई । बसत नहीं किन अनतहि जाई ॥



मेरो कहा कछु घटि जैहै । झूठी बात नहीं कोउ सैहै ॥  
 यौवन दिन द्वै सबहिन बोरी । तुम बांधति आकाशहि डोरी ॥  
 मोसों कहति आप तुम जैसी । कोपतियाय बात सुनि तैसी ॥

दोहा-बोलत नहीं सँभारि तुम, सब मिलि भई गँवारि ॥

ऐसी कैसे हरि करैं, वृथा बड़ावति रारि ॥

सो०-महरि मनहि रिसियाय, हम झूठी भाषैं नहीं ॥

जो तुम नहि पतियाय, बूझि न देखो आनसों ॥

तुम सुतके कर्मन नहि जानो । हठकरि टेक आपनी मानो ॥

दश गायन करि कहा बड़ाई । अहिर जाति सब एकहि माई ॥

महाढीठहरि मानत नाही । वनमें झगरत गहि गहि बाहीं ॥

सखा भीर सँग लीन्है डोलैं । वन कुञ्जमें करत कलोलैं ॥

नेकुसकुच शंका नहि आनै । सोई करत जो कछु मन मानै ॥

यह सुनि कहत नंदकी नारी । कहत गैलकी बात इहारी ॥

और चली कह इहां जातकी । मुहिरिस सुनिअनमिलतबातकी ॥

कहां बसत तुम कहां कन्हाई । कंध हरिबाँह गही बन जाई ॥

कहत बात नहि नेकलजाहू । सुनिहैं कहीं तिहारे नाहू ॥

मेरो कान्ह अबहि अति बारो । तुम नहि अपनी ओर निहारो ॥

ऐसी बात कहतिहो आई । झूठो दोष सह्यो नहि जाई ॥

नेकुनहीं डर करत ईशको । मनो भयो हरि वर्ष बीशको ॥

दोहा-धन्य धन्य तुम कहति हौ, मोको आवति लाज ॥

माखन मांगत रोय हरि, दोष दैति बिन काज ॥

सो०-सुनहु महरि तुम बात, हरिसीखे टोना कछु ॥

बनहि तरुण द्वै जात, बालकहे आवत घरहि ॥

एक दिवस किन देखौ जाई । वनमें तरुकी ओट छिपाई ॥

हैं हरि दशकै बीश वरषकै । देखहु अपने नयन निरखिके ॥

जाहु चली मैं सब देख्यो है । एक एक दिन करिलेख्यो है ॥

१ तुम्हारे पति । २ परमेश्वरको ।



दश अरु बीस बनावन आई । ठीठ लगावति है वरमाई ॥  
 जराहिं बराहिं ये आंख तुम्हारी । जो हरिको नहिं सकत निहारी ॥  
 आप करत दिग चरचाजाई । मोको खाखि दिखावन आई ॥  
 अहो महारि कहिये का तुमसों । कहे विलग मानतहौ हमसों ॥  
 सुतबी कानि मानि तुम लीनी । गारी कोटिक हमको दीनी ॥  
 हमें कहा मोहन प्रियनाहीं । जीवहु युग युग हरि ब्रजमाहीं ॥  
 कहा करें जब बहुत खिझावैं । तब हम तुमहिं कहनको आवैं ॥  
 भली बोध हमको तुमकीनों । उलटहिदोष हमारी दीनों ॥  
 सुतको हटकत नेक नमाई । हमहीं सो रिस करतिसदाई ॥

दोहा-कहा करौं तुम आय सब, कहत अटपटी बात ॥

मोको यह भावै नहीं, तरुणिन यहै सुहात ॥

सो०-मन आपन गुणिलेहु, तुम तरुणी हरि तरुण नहिं ॥

समुझि उरहनो देहु, ऐसी मोसों मति कहौ ॥

महारि वचनसुनि ग्वालिनि सगरीं । निर उत्तरहै घरको डगरीं ॥

यह यशुमति गोपिनको झगरो । कृष्ण प्रेम रस सागर स्निगरी ॥

कहत सुनत भक्तन सुखदाई । ब्रजवासी जनजीवनगाई ॥

ब्रज घरघर सबहिन सुनिपाई । मोहन दधिको दानलगाई ॥

सबगोपिनमिलि रुचि उपजाई । जैये दधिलै जहां कन्हाई ॥

यह अभिलाष सबन मनबाढ्यो । राख्यो गुप्त न बाहिरकाढ्यो ॥

श्याम सखन को लियो बुलाई । कह्यो सबनसों यों समुझाई ॥

काल्हि उठहु सबगवाल सबेरे । चलिकै वृन्दावन भग घेरे ॥

प्रातहि यमुनाके तट जाई । तरुचढि चढि सबरहौ लुकाई ॥

ब्रज युवती मिलि आपसमाहीं । नित प्रतिदधि बँचनको जाहीं ॥

राधा चन्द्रावलिको यूथी । ललतादिक नागरी बरूथी ॥

गोरसलै जबहीं सप आवैं । घेरि सबन तब दान चुकावैं ॥

दोहा-सुनि मन हर्षे ग्वाल सब, भली कही हरि बात ॥

१ चली । २ इच्छा । ३ झुंड ।



सांझ भई चलिये सदन, काल्हि उठहिंगे प्रात ॥  
सो०—निज घर घर सब आय, मात पिताको सुख दियो॥  
सोये सुखसों जाय, रुचिसों भोजन खायकै ॥  
प्रात उठे सब गोप कुमारा । जहँ तहँ बोले खुले किंवारा ॥  
सुनी श्याम ग्वालन की बानी । जागतहू सोवत पटतानी ॥  
नंदद्वार बैठे सब आई । आवहु उठि वनश्याम कन्हई ॥  
ग्वाल ढेर सुनि यमुदामाता । दिये जगाय श्याम सुखदाता ॥  
मात वचन सुनि अति अतुराई । उठे सेजते कुँवर कन्हई ॥  
लैपट पीत मुकुट शिरधारी । सुरली करलै चले मुरारी ॥  
सखन सहित यमुनातट आये । कहत सबनसों अति सुखपाये ॥  
भली करी उठि प्रातहि आये । मैं जानत सब तुमनबुलाये ॥  
आवतहैं अब ब्रजभामिनि । घर घरते दधि लै गजगामिनि ॥  
हैंसे सखा सब तारि वजाई । मनमें अतिआनन्द बढ़ाई ॥  
कहत सबनसों हैंसि नँदलाला । जाय द्रुमन सब चढ़ौ गुवाला ॥  
मुहमूंदे सबरहौ छिपाने । जिहि विधि युवति नकोजजाने ॥

दोहा—जबहीं जान्यो युवति सब, आई वनहि मझाय ॥

कूदिपरो तब द्रुमनते, दे दे नंद दुहाय ॥

सो०—शंख शब्द बहराय, कीजै सुरली श्रृंग धुनि ॥

उरन जाहि अकुलाय, जैसे युवती गण सबै ॥

घेर सबन इहि विधि डरपाई । बहुरि तिन्हें कहियो समुझाई ॥  
निताहि हमारे मारग आई । दधिमाखन बेंचत हौ जाई ॥  
हरिको दान मारि नित जावो । आजदिये बिन जान न पावो ॥  
ऐसे श्याम सखन समुझावत । अपने मनकी प्रीति बढ़ावत ॥  
ब्रजबनितन लखिकै सुख पाऊं । तुमसों नाहिन कछु दुराऊं ॥  
यहि मारग बेंचन दधि आवैं । अन्तर गति मोसों हित लावैं ॥  
आवत हैं वन सब बाला । करत बात ऐसे नँदलाला ॥



प्रात उठीं सब गोप किशोरी । +चित्र विचित्र बसन तनु धोरी॥  
अंग अंग आभूषण साजें । केश सँवारि चारुदृग आँजें ॥  
अँगिया अंग अनूप सँवारी । चित्र विचित्र बसन तनु धारी ॥  
वेंदी भाल मांग मोतिनकी । अंग अंगछवि नग ज्योतिनकी ॥  
दर्शनदमक अर्धरन अरुणाई । चिबुकनीलकनकी छबिछाई ॥

दोहा-गोरे तनु मुख छवि सदन, नव यौवन ब्रज नारि ॥

लै लै दधि निकसी सबै, सुखमावढी अपारि ॥

सो०-ब्रजके खेड़े जाय, भई ग्वालि इकठौर सब ॥

निज निज यूथ बनाय, दधि मटुकी शिरपर धरे ॥

वेंचन दही चलीं ब्रजनारी । षट्दश सहस गोप सुकुमारी ॥  
सबके मन मग मिलहि कन्हवाई । कहत न एकहि एक जनाई ॥  
करत जाहि गुणगान विहारी । पगनूपुरकी धुनि अति भारी ॥  
हरि जानी युवती आवत जब । कछो सखन द्रुम जाय चढ़ो अब ॥  
सुनत श्यामके सुखसों बैना । धाय चढ़ी द्रुम बालक सैना ॥  
पथ सहस सखा समुदाई । जहां तहां द्रुम रहे लुकाई ॥  
कछुक ग्वाल सँगराखि कन्हवाई । निकसि गये आपुन अगुवाई ॥  
ठाठे भये घेरि बनवांटी । लैलै करन सुभनकी सांटी ॥  
इहि अन्तर आई ब्रजनारी । देखत बन लाग्यो कछु भारी ॥  
पाछेहींते लई हँकारी । कहत तिन्हें अबहीं तुमहारी ॥  
एकसंग झुरिभई तरुणि सब । इत उत चकित चलीं चितवत सब ॥  
आगे दृष्टिपरे नैदनंदन । मुकुटशीशतलु चित्रित चंदन ॥

दोहा-लिये सखा सँग मग गहे, ठाढ़े यमुना तीर ॥

ठिटुकि रहीं युवती सबै, लखि ग्वालनकीभीर ॥

सो०-भयो हर्ष उर माहि, कहत वचन मुख भय सहित ॥

आगे कैसे जाहि, मगमें ठाढी सांवरो ॥

+ सबकी सुरति श्यामकी ओरी ॥ १ मस्तक । २ दांत । ३ होठ ।

४ ठोड़ी । ५ पांचहजार । ६ फूलकी छड़ी ।



कोऊ कहत चलत क्यों नाहीं । कोऊ कहत घरहि फिरि जाहीं ॥  
 कोऊ कहै काकरै कन्हार्इ । इनहुं सों कहैं जाहि पराई ॥  
 कोऊ बोलि उठी ब्रजवाला । लूटलिई हमैं कालिह गुपाला ॥  
 अतिही ठीठ भयोहै कान्हा । मांगतहै गोरख को दाना ॥  
 सुनि ऐसो मोहन को खवाला । घरको फिरि सकल ब्रजवाला ॥  
 तब हरि ग्वालन सैन बताई । कूदहु विटपन ते झहराई ॥  
 जात फिरि युवती ब्रजगावाहि । धेरिलहु कोउ जान न पावहि ॥  
 तब ग्वालन वनमें चहुँवाई । झर झराय तरु डार हलाई ॥  
 शंख मृदंग मुरलि करतारी । कीने शब्द सबन एक वारी ॥  
 चकित द्रुमन चितई सब बाला । डारन डारन देखे ग्वाला ॥  
 कूदि कूदि तरुतैरते धाई । बेरिलई तरुणी सब जाई ॥  
 कहा नितहि दधि बेचन जाहू । आजपकरि पायो सब काहू ॥

दोहा-दान लगत ह्यां श्यामको, सो सब लेहिं चुकाय ॥

अब तौ देहैं जान तब, तुमको नन्ददुहाय ॥

सो०-दधि लै जात प्रभात, आवति हौ निशि बेचिकै ॥

दान मारि नित जात, भली करत यह बात नहिं ॥

ठाढे यमुना तीर कन्हार्इ । जाहु चलो निज दान चुकाई ॥  
 यहसुनिविहैंसिकहोइकग्वाली । नई बात इक सुनहु रि आली ॥  
 मांगत दधिको दान मुरारी । सिखै पठाये है महतारी ॥  
 सो ये सखा लेन सब आये । यमुना तट ते श्याम पठाये ॥  
 काहेको सब मिलि इतराहू । सूधे अपने मारग जाहू ॥  
 दधि माखन कछु चाहत कोऊ । सूधे मांगिलेत किन सोऊ ॥  
 सूधी बात कहौ सुख होई । बांधत कहा अकाश खरोई ॥  
 दान बजार हाटमें पावो । यह निज कान्हैं जाय सुनावो ॥  
 बोलै सखा सुनहुरी ग्वारी । हमजानी अब बात तुम्हारी ॥  
 गांव बसेकर यह दुख होई । नहिं सकात चीन्हे सों कोई ॥

१ भाजकै । २ वृक्षवृक्षते । ३ दुकान ।



मारग अपनो दान उगाहू । कहत मांगि किन हम पै खाहू ॥  
हाट बाट सब हमहि उगैहैं । अपनो दान तुमहुँ पै चैहैं ॥

दोहा-लेखो करि सब कान्हको, दीजे दान जगोत ॥

चली जाहु सुखसों डगर, फेर कहै कोउबात ॥

सौ०-तुमको कैसो दान, कौन कान्ह मांगत कहा ॥

परिहै अचहीं जान, रोंकत हौ वनमें तियन ॥

आये तबहीं निकट कन्हई । संग सखनकी भीर सुहाई ॥

बोली उठीं लाखि नागरि सगरी । कहा श्याम तुम करत अचकरी ॥

नारिन को रोंकतहौ वनमें । जैहै बात दूरिलों क्षणमें ॥

आजहि दान पहिरि तुम आये । कहा छापिकणि तुमहि पठाये ॥

वैसी चाल चलो नैदलाला । चलत बाप तुम्हरो जिहिचाला ॥

वृथा न रारि करहु वनमाहीं । छाड़ि देहु दधि बेचन जाहीं ॥

कहत कान्ह दधि दान नदैहौ । बिना दान दीन्हे नहिजैहौ ॥

लेहौ छीनि दूध दधि माखन । देखत ही रहिहौ सब आंखन ॥

मात पितालों उघटत बानी । नहि जानत मोको दधिदानों ॥

जात नितहि नित बेच चुराई । सब दिवसनको लेहुँ भराई ॥

मांगत छाप कहा दिखराऊं । काको तुमको नाम बताऊं ॥

ऐसोको मोको नहि जानत । एक नहीं मोको तुम मानत ॥

दोहा-नीके हम जानत तुम्हैं, गोद खिलाये कान्ह ॥

वे दिन अब विसराय सब, भये जगाती आन ॥

सौ०-करहु नहीं लगि बात, जो निवहै सुख पाइये ॥

ऐसी क्यों सहिजात, नितहि हमें दधि बेचनो ॥

अजहूँ मांगिलेहु दधिदैहैं । खाहु सहज में हम सुख पैहैं ॥

दान बेचन तुम हमहि सुनायो । यहै हमें सुनिकै नहिभायो ॥

होत अबार जान अबदीजै । नईरीति मोहन नहि कीजै ॥

गोरसलेत प्रात सब कोई । बहुरि धरयो रहिहै ऐसोई ॥



दान दिये विन जान न पैहौ । जवदेहौ तबहीं सबजैहौ ॥  
तुमसों बहुत लेन है हमको । सो नहिं अर्थाहिं सुनावत तुमको ॥  
नितहिं हमारे मारग आवत । भोको कबहूँ नाहिं जनावत ॥  
दिन दिन को लेखो भरिलेहौं । अबतौ तुम्हें जान तबदेहौं ॥  
ऐसी हठ कह करत सुरारी । वनमें रोकत नारि परारी ॥  
आये दान पहिरि तुम कापै । चलहु न हम सब चलिहैं तापै ॥  
तुम अपने घरहीके राजा । सबको राजा कंस विराजा ॥  
जो कहूँ सुनत नेकुसी पैहै । बहुरि सँभारि अबहिं परिजैहै ॥

दोहा-हम गुहरावैं जाय कहँ, बसत तुम्हारे गांव ॥

ऐसी विधि जो कहत हौं, को रहिहै यहि ठांव ॥

सो०-करत फिरत उत्पात, लिये सखा सँग सेंटके ॥

नाहिंन नेक डरात, कठिन कंसको राज्यहै ॥

यह सुनि कान्ह उठे रिसि याई । लीन्हो कछु दधि दूध छिनाई ॥  
बसन छोर तरु सों उरझाये । कछु दधि भाजन भूमि लुढाये ॥  
कहत जाय कंसहिं गुहरावो । आजहिं मोहिं हुजूर बुलावो ॥  
मारौं एक पलकमें वाही । भोको कहां बतावत ताही ॥  
अब तौ भोसों वैर बढायो । लेहौं दान आपनो भायो ॥  
मेरे हठ क्यों निबहन पैहौ । देखो अब धौं कैसे जैहौ ॥  
तुम देखत रहिहौ हम जैहैं । गोरस बेंचि बहुरि घर ऐहैं ॥  
बोले ज्वाब न तुमको देहैं । नेकहु तुमसे नाहिं डरैहैं ॥  
सुनि गुहते जन एहैं जवहीं । नहिं संभारि सकिहौ हरितबहीं ॥  
एक बूंद गोरस नहिं पैहौ । देखत ऐसेही रहिजैहौ ॥  
धारिकै यशुमतिपै लैजैहैं । तहां श्याम पुनि वचन न ऐहैं ॥  
मानो कह्यो हमारो अबहूँ । हम पै दान न पैहौ कबहूँ ॥

दोहा-गुहजन कहा बतावहु, कंसहिं लेहु बुलाय ॥

देखतही तुम सदनके, पूजा करौं बनाय ॥

१ पराई । २ पुकारैगी ।



सो-जैहौ धौं केहि भाँति, अब देखहुँ गो में तुम्हें ॥

बात कहत अनखाति, सूखे देती दान नहिं ॥

जो मानत नहिं कंसहि राजा । तौ अब भये तुमहिं ब्रजराजा ॥  
 तौ सिंहासन बैठत नाहीं । गाय चरावत कत बनमाहीं ॥  
 मोर पखनको मुकुट उतारो । नृप किरीट माथे पर धारो ॥  
 पहिरत कहा गुंजके हारा । नृप भूषण किन करत श्रृंगारा ॥  
 छत्र चमर शिर ऊपर राजें । तजहु मुरलि अब नौबत बाजें ॥  
 हमहुं यह लखिकै सुखलीजे । संगहि संग काज कछु कीजे ॥  
 झगरत कहा दहीके काजा । लखि हमको उपजतहै लाजा ॥  
 ओछी बुद्धि तुम्हारी तीकी । तुम्हारे चित रजधानी नीकी ॥  
 मेरो दासन दास कहावै । सपनेहुं यह ताहि न भावै ॥  
 कंस मारि शिर छत्र धराऊं । कहा तुच्छ यह साध पुराऊं ॥  
 ब्रजमें मेरो राज सदाई । और इहां काकी ठकुराई ॥  
 तुम कछु राज बड़ो करि मानो । मेरी प्रभुताको नहिं जानो ॥

दोहा-हमहुं जानतहैं तुमहिं, लरिकाई ते कान्ह ॥

काहेको अपने बदन, कीजत बहुत बखान ॥

सो-फिरत चरावत गाय, काँयेकामरि कर लकुट ॥

देखीहै ठकुराय, कत बढि बढि बातें करत ॥

यह कमरी कमरी तुम जानो । जितनी बुधि तितनी अनुमानो ॥  
 यापर वारों चीर पटम्बर । तीन लोककी यह आडम्बर ॥  
 ब्रह्मा भूयो जाहि निहारी । सो कमरी कत निदत ग्वारी ॥  
 कमरीके बल असुर सँहारौ । कमरीते संतन उद्धारौ ॥  
 या कमरीते सब सुख भोगा । जाति पाँति यह मम सब योगा ॥  
 सुनतहैंसौं सब ब्रजकी बाला । यह तुम सांच कही गोपाला ॥  
 धनि धनि यह कामरी तुम्हारी । सब विधि तुम्हें निबाहन हारी ॥  
 यहै ओढ़िकै गाय चरावो । यहैसेजकरि भूमि बिछावो ॥

१ चिरमिटो । २ मालकी ।



याहीते वर्षाकृतु टारो । शिशिरशीत याते निर्वारो ॥  
 याते शीतम घाम बचावो । यहै उठगनी शीश बनावो ॥  
 यहै जाति यह गृह यहटाटी । यहै सिखावत सब परिपाटी ॥  
 हमजो कहन चाहतही तुमसों । कही सो तुम अपने मुख हमसों ॥

दोहा-कहाँजात अपनी प्रगटि, नीके हमैं हैंसाय ॥

तापर मांगत दान दधि, युवतिन रोक कन्हाय ॥

सौ०-कामरि ओढ़नि हारि, तुम्हैं न छाजत पीत पट ॥

कारे तनु पर चारि, कारी कामरि सोहई ॥

मोसों बात सुनो ब्रजतिय सब । सत्य कहत उपमा न जगत सब ॥  
 बालक अरु तिय मुख नहिं दीजे । इनसी बहुत हेतु नहिं कीजे ॥  
 मूढ चढत नेकहि चुचकारैं । जो मनकरे सोई करि डारैं ॥  
 सोई गुण प्रगटत तुम जाहू । कतक कहत में तुम अठिलाहू ॥  
 जानहु कहा हमैं तुम ग्वारी । सदा छँछकी बेचन हारी ॥  
 सुनहु कान्ह हम तुमको जानैं । नंद महरके सुत पहिचानैं ॥  
 धेनु दुहत पुनि तुमको देखे । गाय चरावतहू बन पेखे ॥  
 चोरी करी वही पुनि जाने । खिरिका खोलत फिरत बिराने ॥  
 ये ढंग छांडि भये अब दानी । यहै बात अब सबहित जानी ॥  
 और सुनहु यशुमति जब बांधे । ऊखल सों दोऊ भुजसाधे ॥  
 तब सहाय करि हमहिं बचाये । करके बंधन जाय छुड़ाये ॥  
 जानत यहै रहत ब्रज माहीं । हम ते दूरवसत कछु नाहीं ॥

दोहा-कहत कहा तुम बावरी, हैंसी लगत सुनिवात ॥

कब जनमत देख्यो हमैं, कौन मात को तात ॥

सौ०-कबै चराई गाय, कत चोरी पकर्यो हमैं ॥

कब बांधे हम माय, दुही गाय किन कौनकी ॥

तुमजानहु सुहिं यशुमति जाये । यशुमति नंद कहँते आवे ॥  
 मैं पूरण अविगति अविनाशी । बांधे सब मायाकी फांसी ॥

१ शरदीको । २ गरमीमें ।



यह सुनि हँसों सकल ब्रजबाला । ऐसे उगुण जानत गोपाला ॥  
 जैसे निदयो तुम सब काहू । तैसे निदरत मात पिताहू ॥  
 तुमको यशुमति महर न जाये । तौ तुम कहाँ कहाँते आये ॥  
 घर घर भाखन चोन्यो नाहीं । बांधे मात न ऊखल माहीं ॥  
 हाहा करि हम नाहिं छुडाये । ग्वालन संग न वच्छ चराये ॥  
 नहीं गाय तुम दुही हमारी । येसब बातें झूठ तुम्हारी ॥  
 भक्त हेतु जन्मत जगमाहीं । कर्म धर्मके में वशनाहीं ॥  
 योग यज्ञ मनमें नहिं ल्याऊं । दीन गोहारि सुनत उठि धाऊं ॥  
 भावाधीन रहौं सब पासा । और नहीं कछु मोको नासा ॥  
 ब्रह्मा कीट आदिने ॥ व्यापक हौं समान सब ठाहीं ॥

दोहा-कहाँ कहाँकी बात कहि, डरपावतहौ नारि ॥

स्वर्ग पतालहि एक करि, बांधत बारहिबार ॥

सौ०-इहां सुनावत काहि, जो लायक तो आपको ॥

कोन प्रकृति यह आहि, वनमें रोंकत हौ तियम ॥

केतक दधिको दान कन्हार्ई । जिहि कारण युवती अरुझाई ॥  
 दधि माखन सबही तुमलेहू । सीती जान हमें घरदेहू ॥  
 जो तुम याही में सुख पावो । काहेको बहुबात बनावो ॥  
 दधि माखन कह करौं तिहारो । सकल बणिजको दान निवारो ॥  
 जो जो बणिजनिताहि तुमलावो । लेखो करि सब मोहिं चुकावो ॥  
 अब ऐसे कैसे घर जैहौ । जबलगलेखो मुहिं न बुझैहौ ॥  
 करत बणिज तुम नये बनावे । नित उठि जात जगात बचाये ॥  
 सुनि वाणी हरि नागर नटकी । दैदै सैन युवति सब सटकी ॥  
 मतहीं मन अति हर्ष बढ़ाई । बोलीं हरि सां सब मुसकाई ॥  
 ऐसे कहाँ बणिजको अटके । अबलौं श्याम कहाँ तुम भटके ॥  
 हमहूँ कहि मन मांझ लजाई । कह मांगत दधि दान कन्हार्ई ॥  
 बणिजहेतु रोकी अब जानी । तबहीं क्यों न कही यह बानी ॥



दोहा—हँसि बोली राधा कुँवरि, कहा वणिज हम पास ॥

कहौ श्याम सो नाम धरि, देहि दान हम तास ॥

सो०—भूले कहा कन्हाय, वणिज कहा युवती करत ॥

कामों लियो बुकाय, सो हमको बतलाइये ॥

कहौ तुमहि बूझत कह हमहीं । लै लै नाम बतावो तुमहीं ॥  
तुम जानत मैं हूँ कछु जानौ । तुमते माल सुनाहि छियानौ ॥  
डारि देहु जापर जो लगै । फिर न कछु तुमसों कोउ माँगै ॥  
हतनेहीं को लरत वृथाहीं । देखौ समुझि सबै मन माहीं ॥  
कहत परस्पर ग्वालि ख्यानी । समुझतहौ कछु इनकी बानी ॥  
इनहीं सों बूझौ सब कोऊ । कहा बतावत सुनिये सोऊ ॥  
हरिकी नूट मधुर रस बातें । सुनि सुनि सुख पावत सब जातें ॥  
कोइ काहूको भेद न जानैं । लोक लाज डर सब कोउ मानैं ॥  
मन मन हर्ष भई सख सुंदर । जानैं हरि सब रसिकपुरंदर ॥  
तब बोली हँसिकै ब्रजवाला । कहत नाहि कयों तुमहि गुपाला ॥  
कहा माल देख्यो हम पाहीं । जिहि कारण रोंकी बनमाहीं ॥  
बैल लदाये देख्यो हमको । कहौ हमैं बूझतिहैं तुमको ॥

दोहा—लौंग जायफर लायची, गिरी लुहारी दाख ॥

कहलादे हम जात हैं, सो कहिये किन भाख ॥

सो०—दीजे वणिज बताय, ताकी देहि जगात हम ॥

तुमको नंददुहाय, जो अब वेग कहौ नहीं ॥

कौन वणिज कहि भोहि बतावो । लोन मिरच कहि कहि बहँकावो ॥  
तुमतौ माल गैयंद लदायो । महिष वृषभ कहि भोहि सुनायो ॥  
बड़े मोलकी वस्तु जो होई । कैसे दुरत दुराये सोई ॥  
मो आगे तुम कहा छिपावो । देहौ दान जान तब पावो ॥  
भये चतुर हरि तुम अब जानी । दधिको दान भेटि यह ठानी ॥  
देती दही कछुक हम लोहन । खाते लै ग्वालन लौंग मोहन ॥

१ छिपीभई । २ रसिकनकेइन्द्र । ३ हाथी ।



इन बातन अब खोयो सोऊ । यह कहि युवति हँसी सब कोऊ ॥  
 श्याम कही मैं जानत तुमको । सुधे दान न देहौ हमको ॥  
 दधि माखन तो लेहौ छोरी । उठिकै भुजगहि गहि झकझोरी ॥  
 तब पीताम्बर झटक्यो प्यारी । कहत भये तुम डीठ सुपरी ॥  
 हरि रिसकरि अंकम गहि लीन्ही । इहि मिल भेद भेमकी कीन्ही ॥  
 इटि गई प्यारी उरमाला । तब घेरे युवतिन नँदलाला ॥  
 दोहा—गहि गहि अंकम लेत सब, झगरत रसहि बढाय ॥  
 हँसत सखा सब तारिदै, पकरो गये कन्हाय ॥

सो०—हांक दई नँदलाल, तबहि सखन ललकारके ॥  
 धाय परे सब ग्वाल, लीन्हे श्याम छुड़ाय तब ॥  
 रिसकरि बोले ग्वाल ख्याने । भई डीठ हरिको नहि जाने ॥  
 हम भई डीठ भली तुम कीन्हे । देहौ ज्वाब दई को कीन्हीं ॥  
 बन भीतर रोंकी सब बाला । देखौ हमें कियो जंजाला ॥  
 बात कहनकी एह आवत । बडे सुधर्मा आप कहावत ॥  
 ऐसी लाख सखा की भारि सब । आवहुगे नृपजीत सबै तब ॥  
 जानी बात तुम्हारी सबकी । तजहु ख्याल लरिकाई तबकी ॥  
 ओ युवतिनको हाथ लगैहौ । कियो आपनो तो तुम पैहौ ॥  
 जो यह बात धरन सुनि पैहैं । मात पिता हमको कह कैहैं ॥  
 तोन्यो सुक्ताहार कन्हाई । घरहि कहा कहिहैं हम जाई ॥  
 आपन भई सबै तुम भोरी । हरिको दोष लगावत गोरी ॥  
 जब तुम झपटी पीत पिलोरी । तब उन मोतिनकी लरहोरी ॥  
 मांगत दान श्याम कबसेंती । तुम अठिलात ज्वाब नहि देती ॥  
 दोहा—लेहि छोरि सबते अबहि, देखतही रहिजाहु ॥  
 झक झोरा झोरी करत, नँदनन्दनहि डराहु ॥  
 सो०—को त्रिभुवनके माहि, मोहनकी सरं दूसरी ॥  
 तुम सब जानत नाहि, नँदनन्दन ब्रजराज सुत ॥



कहा बड़ाई इनकी सरमें । इनको जानति नीके कर में ॥  
 नृपति आस वसुदेव निकारे । नंद यशोमतिने प्रतिपारे ॥  
 आयेहैं शुभ घरके माहीं । काहु वदत ताहिते नाहीं ॥  
 पहिले जब उन भुजाझकोरी । तब हम झटकी पीत पिछोरी ॥  
 बाते ठीठ कही तुमको हम । श्यामहि शिरकन हार भई तुम ॥  
 इतने पर मानत नहि हारी । तबते हमें देतहौ गारी ॥  
 बहुत सही हम बात तुम्हारी । वणिज करत अरु झगरत ग्वारी ॥  
 ब्रज ऊपर मन मोहन दानी । अबलौं तुम यह बात न जानी ॥  
 बोलि उठे तब कुँवर कन्हाई । अब नहि छोड़ों नंद दुहाई ॥  
 अब तौ दांव आपनो लेहौं । तबहीं जान सबनको देहौं ॥  
 कौन बात यह कहत कन्हाई । मांगत कहा जान नहि जाई ॥  
 फिरि फिरि करि करि नंद दुहाई । डरपावतहौ हमको आई ॥

दोहा-डरपावहु तुम जाय तिन्ह, जो कोउ तुम्हें डराहि ॥  
 यहैं डरपावत कौनको, तुमते घटि हम नाहि ॥  
 सो०-जैहैं यशुमति पाहि, तोन्योहार भली करी ॥  
 यहौ वनत पै नाहि, इतनो धन कहैं पाइहौ ॥

एक हार मोहि कहा बतावो । सब अँग भूषण काहि दुरावो ॥  
 मोती मांग जराऊ टीको । करणफूल बेसर नगनीको ॥  
 कंठ शिरी हुलरी तिलरीगर । तापर और हार जो चौसर ॥  
 सुभग हमेल बिजोटा वाजू । कंकण पहुँचिन सुंदरिनसाजू ॥  
 कटि किंकिणि नूपुर पग देखौ । जेहरि बिछिया ये सब लेखौ ॥  
 शोभा साज और अँगमाहीं । सबको नाम लेत क्यों नाहीं ॥  
 याहुमें कछु बांट तुम्हारी । अचरज आय सुनोरी भारी ॥  
 भूषण देख न सकत हमारी । याही लिये भयो घटवारो ॥  
 आपनहुँ कछु दई गढाई । महारि यशोमतिके नंदराई ॥  
 आई पहिरि जितो हम याहीं । बाते दूनाहैं घरमाहीं ॥



देखि परत कहु बहुत लुभाने । बनधौं सुनो लखि ललचाने ॥  
बाँटि कहा तो लो सब मेरो । औ लो तुम नहि दान निबेरो ॥

दो०—आभूषणको कह कहत, बहुत वस्तु तुम पास ॥

मानौ मैं जानत नहीं, सो किन कहत प्रकाश ॥

सो०—लेहौ सबको दान, समुझि लेहिगे बाँटि पुनि ॥

पैहौ तबहीं जान, मैं तुमसों सांची कहत ॥

भये श्याम ऐसे रस नागर । युवतिनमें अब होत उजागर ॥

काल्हिहि गाय चरावन जाते । छाक मांगि ग्वालन सँग खाते ॥

कांधे काभरि लड्डयी हाथा । बनमें फिरत बल्लभन साथी ॥

आज पीतपेट कटि कसि आवे । लैकर लड्डयी बड़े कहावे ॥

भये कहु अब नवल सुजाना । मांगत युवतिनसों वह दाना ॥

देहौ दानकि झगरतिहौ तुम । बहुत तुम्हारी बात सुनी हम ॥

प्रथम दान जन जाल निवरिये । तापाछे तुम हमहि निदरिये ॥

कहत कहा निदरेसेहौ तुम । सहजहि बात कहति तुमसों हम ॥

आदिहिते तुमको पहिचानैं । दान कहा सो हम नहि जानैं ॥

ग्वालनि चली सबै रिस करि करि । दधि मटुकी माथे पर धरि धरि ॥

तव हरि गहि अंबर झरकारी । जाति कहां हौरी बनिजारी ॥

इतनो वणिज लिये तुम जाहू । बिना दान क्यों होत निबाहू ॥

दोहा—नाम तुम्हारे वणिजके, सब मैं देहुँ बताय ॥

देहु दान तब मोहि तुम, देखहु सब ठहराय ॥

सो०—सब क्यों छोड्यो जात, एक होय तो छोडिये ॥

तुम विचारि यह बात, देखहु अपने चित्तमें ॥

एती वस्तु लिये तुम जावो । दान देति मेरो खिजरावो ॥

मत्तगंधं तुंगम तुमसों । कैसे दुरत दुराये हमसों ॥

हंस मोर केहरि मृग वारे । कनक कलश मदरससों भारे ॥

चमर सुगंध कपोत कीर वर । कोकिल विहंगम वर्ष धनुष शर ॥

१ पीतांबर । २ हाथी । ३ घोडा । ४ सिंह । ५ कबूतर । ६ तोता ।

७ मूंगा ८ हीरा ।



पेतौ धन खग मृग तुम पाहीं । कैसे निबहत दान बिनाहीं ॥  
 सुनि यह शक्ति कहति ब्रजबाला । कहा बतावत तुम नैदलाला ॥  
 तिनको नामलेत हम पाहीं । जो हम स्वप्ने देख्यो नाहीं ॥  
 कहां तुरंगम गज हम पाथे । कब हम कंचन कलश गढ़ाये ॥  
 मान सरोवर हंस रहाहीं । चमर धनुष शर कहा कहाहीं ॥  
 ये सब हम पै कहा बतावो । जहाँ होय तहँ दान चुकावो ॥  
 इतनो सब तुम्हारे पाहीं । करि विचार देखौ मनमाहीं ॥  
 अपने सब अंग अंग निहारो । यौवनरूप औरहै न्यारो ॥

दोहा-करहु निवेडो वेग सब, काहे करत अघेर ॥

कहो तुम्हें कछु हम कहें, घरको जाहु सबेर ॥

सो-दीजे दान चुकाय, अब जान्यो अपनो वणिज ॥

कहाँ फेरि समुझाय, जो कछु धोखो होय चित ॥

चमर चिहुर भूधनुष सँभारे । शर कटाक्ष मृग दृगकजरारे ॥  
 कंठ कपोत कोकिला बानी । रदहीरा शुकनाक बखानी ॥  
 अधर सधर विद्रुमसो जानो । हैमयूर धुधटपट मानो ॥  
 कंचन कलश उरोज निहारो । यौवन मदसों भरो विचारो ॥  
 कटिकेहरिके रूप सुहाई । हंस गयंद चाल छबिछाई ॥  
 सौरभ अंग सुगंध सुहायो । यौवन रूप न जात बतायो ॥  
 इतनो है सब वणिज तिहारो । होय अंशसो देहु हमारो ॥  
 खरी किये निवहौगी कैसे । लेहौ दान देहुगी जैसे ॥  
 यह सुनिहँसि बोली ब्रजनारी । अब समुझौ हरि बात तुम्हारी ॥  
 मांगत ऐसो दान कन्हार्ह । जानि परी प्रगटी तरुणार्ह ॥  
 याही लालच अंक भरतहौ । पुनि पुनि गहि आंचर झगरतहौ ॥  
 अपनी ओर देखितो लीजै । तापाछे बरियाई कीजै ॥

दोहा-याही लालच फिरत हौ, सखा लिये वन संग ॥

घेरतहो युवतीनको, प्रगट्यो अंग अनंग ॥

१ बार । २ भौह । ३ नेत्र । ४ दांत । ५ स्तन । ६ कमर । ७ सुगन्ध ।

८ कामदेव ।



सो०—बैठ रहौ घर जाय, यह मति चितमें मत धरौ ॥

घटि मर्यादा जाय, ऐसी बातन सों लला ॥

यह सुनि विहँसि कछो वनमाली । कत हम पर रिस करत गुवाली ॥  
 सूखे हम इक बात बखानी । तुमकत शोर करत भनखानी ॥  
 कबहुं घटावति हौ मर्यादा । कबहुं जोइ सोइ करत विधादा ॥  
 प्रातहि ते हजरत बिन काजे । दान निबेर जात नाहिं साज ॥  
 हरि यों कबते भये सयाने । उलटाहिं तुम हम पर सतराने ॥  
 पेटी बहू बड़े घरकी हौ । कत विलंब वनमें करती हौ ॥  
 बुझिय तुमसों हम जो बखाने । सो तुम कह मागे सतराने ॥  
 कहिये मोहन बात बिचारी । कहवावत सर्वज्ञ विहारो ॥  
 परगट ऐसी दान सुनावत । हमरो ब्रज उपदास करावत ॥  
 परै बात महराने जाई । तुमाहिं लाज कै हमहि कन्हाई ॥  
 ब्रजमें जो ये बात सुनैगे । जाति पातिके लोग हँसैगे ॥  
 जान देहु अब हमहि गोपाला । कहियो प्रात फेरि नँदलाला ॥

दोहा—बोलि उठ्यो इक सखा तब, सुनहु ग्वालिनी बात

प्रीति करत नँदलालसों, कत बावरी लजात ॥

सो०—हरि संग करहु विहार, नवल श्याम नवला तुमहुँ ॥

हँसनदेहु संसार, भलो मनावो कान्हको ॥

सुनि बोलौ ब्रजयुवति रिसाई । कहवावत यह बात कन्हाई ॥  
 आपुन यौवनदान बनावत । तापर जोइ सोइ सखन सिखावत ॥  
 वनमें खवन घेरि बैठाई । करत श्याम तुम अति लँगरआई ॥  
 भूलिगये थे दिवस कन्हाई । घर घर माखन खात चुराई ॥  
 खीझतही हगनीर चुचाते । उरंडारत घरको भजिजाते ॥  
 बांधे ऊखल जबहिं यशोदा । हमहिं हुंदाय लिये तब गोदा ॥  
 अब भये बड़े बडी चतुराई । ताते यौवन दान सुनाई ॥  
 लरिकारी की बात बखाने । कैसी भई कहा हम जाने ॥



कब धौं खायो माखन बोरी । मैया धौं बौंध्यो कब डोरी ॥  
बेकहु ताकी सुधि नहि जाने । मान अमान न तब हम माने ॥  
भले बुरेको ज्ञान न होई । अपनो पर कछु समझ न कोई ॥  
खेळत खात धरि हिय मारीं । बालपनके दिवस बिहारीं ॥

दोहा-अपनी सुरति करत नहि, न्हात यमुनके तीर ॥

कदम चढाये सबनके, जब मैं भूषण चौर ॥

सो०-जलमें रहीं छिपाय, बिना वसन नांगी सबै ॥

पुनि पुनि हहा कराय, दिये वसन मैं सबन तब ॥

बिना वसन बाहर खय आई । हाथ जोरि मोहिं विनय सुनाई ॥  
कैसी भांति भई तब सबकी । सो सुधि भूलि गई अब तबकी ॥  
मोको कहति चोरि दधि खायो । ऊखल सो हम जाय छुड़ायो ॥  
भेद बचन जब कहे बिहारी । सुनिकै हँसि सकुन्नी नमनारी ॥  
कहत भये अति मिलज कन्हारी । ऐसी कहत न सकुचत गई ॥  
जाहु खले लोगनके भागे । झूठी बात बनाबन लागे ॥  
करत हैंसी तुम सबन सुनाई । निज निज गृह सब कहिहैं जाई ॥  
झूठी बात कहा हम जानै । हम तो सांझी सदा बखाने ॥  
जैसी भांति भजै मोहिं कोई । मानत मैं ताको तैसाई ॥  
जो झूठो मोको तुम जानौ । तौकत मेरे हित तप ठानौ ॥  
जो तुम अपने मनये ठानी । मैं अन्तर्यामी सब जानौ ॥  
अब क्यों इतौ निडुर मन कीनों । काहि दान जात नहि दीनों ॥

दोहा-दान सुने रिस होतीहै, यह नहि हमैं सुहाय ॥

भली बुरी अरु जो कहो, सो सहिलेहि कन्हाय ॥

सो०-छांड़ि देहु सब जाहिं, सुनिये मोहन लाल अब ॥

भई बेर वन मारि, मात पिता खिझिहैं हमैं ॥

काहे को नम करैत अवारी । दधि बेकहु घर जाहु सवारी ॥  
मैं कह करौ तुम्हें यह भावत । लेखो करि नहि दान बुकावत ॥  
शुद्ध सुभाव समुझि सब कोई । लेखो करिदेहौ मोहिजोई ॥



तब सोइ तुमसों मैं लै लेहौं । तबहीं तुम्हें जान पुनि देहौं ॥  
 काहेको हम सों हरि लागत । जानि न परत कहा तुम मांगत ॥  
 बातन कछु जनावत नाही । लेखो कहा करत हम पाहीं ॥  
 निपटहि परे हमारे ख्याला । इन बातन कह पाव तलाला ॥  
 अब तुम निपट करी बहुताई । सुनि हैंसिहैं ब्रजलोग लुगाई ॥  
 मारग जानि रोंकहु हम जाहीं । घरते लीजो दान उगाहीं ॥  
 अबलौं यह कीयो तुम लेखो । हम तुम्हरो विचार सब देखो ॥  
 मोको ऐसी बुद्धि सिखावत । कर कंकण दर्पणहि दिखावत ॥  
 तुम्हरी बुद्धि दान हमलेहैं । काहेन तुम्हें जान हम देहैं ॥

दोहा—आप भईहौं चतुर सब, मोको करति गँवार ॥

उग्रहत फिरिहैं दान हम, ठाढ़े बै हैं द्वार ॥

सो०—तुम्हें देहुं घर जान, फेरि कहो पाऊं कहां ॥

जो नहिं पैहौं दान, नृपहि ज्वाब कह देउंगो ॥

भली भई नृप मान्यो तुम हूं । चलिहैं कंसहिपै अब हमहूं ॥  
 तबतेलेन कहत हैं दानहि । नन्द महरकी करिकरि आनहि ॥  
 हमहूँ अबलौं ऐसी जानी । भये श्याम घरही ते दानी ॥  
 अब जान्यो तुम कंस पठाये । नृपते दान पहिरि तुम आये ॥  
 सुनि हरि ये गोपिनके बयना । हँसे कछु तिरछे करिनयना ॥  
 सो छवि निरखि कहत सबनारी । कहा हँसे सुखमोरि मुरारी ॥  
 सोई कहो मनहिं जो आई । तुमको यशुमति महरि दुहाई ॥  
 और सौह तुमको गोधनकी । सांची बात कहो तुम मनकी ॥  
 हँसे कहा हमसों कछु रीझे । कैधौं कछु मनही मन खीझे ॥  
 यह सुनि अधिक हँसे गोपाला । कहत सुदामासों नंदलाला ॥  
 यह अचरज इनको तुम हेरो । कहत कहा तुम हैंसि सुखफेरो ॥  
 ऐसी बातन सौह दिवावत । ताते अधिक हँसी मोहि आवत ॥

दोहा—तब श्रीदामा तियनसों, बोलि उख्यो सुसकाय ॥



हँसत श्याम तुम समझके, बूझत सौंह दिवाय॥  
सो०--हम न दिवावें आन, हँसहु तुमहु निज संग मिलि॥

यहै आन सी बान, थोरेमें खिसियात तुम ॥  
सहज हँसत नाहिन सज्जुचैये । नाहिन लोगन सौंह दिवैये ॥  
वैहै दानी प्रभु सबहीके । देहु दान मांगत कबहीके ॥  
हम जानत वे कुँवर कन्हारै । प्रभु तुम्हरे मुख अब सुनिपाई ॥  
होति नहीं प्रभुता इहि भांती । दही महीके भये जगाती ॥  
वै ठाकुर तुम्हरी सेवकाई । जाने प्रभु अरु सब प्रभुताई ॥  
दधि खाये अरु भूषण तोरे । छाडि देहु अब दर्शनहोरे ॥  
जो कछु बचो सोऊ अब लीजै । वेगहि जान हमें धरदीजै ॥  
तब हँसि बोले श्याम सुजाना । तुम घर जाहु देइ कै दाना ॥  
आयो हौं पठयो मैं जाको । देउँ कहा लैके पुनि ताको ॥  
अबहीं पठवै मोहि बुलाई । तब ताके सन्मुखको जाई ॥  
तुम सुख करौ जाय घरमाहीं । नृपकी गारि मारको खाहीं ॥  
जब नृपवर मोको अटकावै । तब पुनि तुम विन कौन छुड़ावै ॥  
दोहा--लेत नाम मुख नृपतिको, जा मुख निदरयो जाहि॥

आपुन तो नृप नृपनके, अब कह समुझे ताहि ॥  
सो०--लियो कंसको नावँ, ऐसी तुम्हें न बूझिये ॥  
भले श्याम बलि जावँ, जिहि निंदिये तिहि वंदिये॥

जब हम कंस दुहाई दीनी । तब तो नृप पर अति रिस कीनी ॥  
अब कहा नृपकी सुधि आई । जो तुम ऐसे डरे कन्हारै ॥  
कहाकह्यो कछु जान न पायो । कब हम कंसहि शीश नवायो ॥  
कब हम नाम कंसको लीनो । कंस त्रास कबधौं हम कीनो ॥  
निपट भई तुम ग्वारि गवारी । वसत हमारे गाँव मँझारी ॥  
कितक कंस जाको हम जानै । कहा त्रास ताको उर आनै ॥  
तुम्हरे मनै बात यह आवत । कंस नृपतिके हम कहवावत ॥  
तो तुम कहौ कौन नृप जाके । आपुन कहवावत हौ ताके ॥



ताको नाम हमहु सुनिपावैं । हमहुं पुनि ताके कहवावैं ॥  
 या संसार लोक वष भारी । दुजो कंस नृपति ते नाहीं ॥  
 सो नृप वसत कहां सोड जावैं । तौ हम सब ताहीको मानैं ॥  
 यह सुनि हम अब अति डर पायो । कै धौ झूठहि हमहि डरायो ॥  
 दोहा-जा नृपके हमहैं अरी, कोनहि जानतताहि ॥

जड चेतन नर नारि सब, तिहूं भुवन वश जाहि ॥

सो०-वसत सुमनपुर माहि, कहैं लगि तिन्हें प्रशंसिये ॥

सब मानतहैं जाहि, तिन पठयो मुहि पानदै ॥

सुनत गूढ मोहनकी बानी । बोलैं ब्रज सुन्दरी सयानी ॥  
 जाति तुम्हारे नृपकी पाई । अब लौं राखी कहूं छिपाई ॥  
 जैसे तुम तैसे बोज हैं । एक रूप गुणके दोऊ हैं ॥  
 यह अनुमान कियो मनमें हम । एक दिन जन्मे दोऊ तुम ॥  
 जैसी प्रजा तैसई राजा । नन्यो भलो अब संग समाजा ॥  
 चोरी ठगी निपुण गुण दोऊ । यापटतर को और न कोऊ ॥  
 बोलत नाहिं बात सँभारी । उगति फिरति उगती तुम सारी ॥  
 भई ठाठ नहि नेकु विचारौ । भावत मुख सोई कहि डारौ ॥  
 अपने गुण औरन पर डारी । जाति जनावत वैदै भारी ॥  
 हम भई ठगिनी अरु बटपारी । तुम भये कान्ह सुधर्मा भारी ॥  
 अपने नृपको यहै सुनावो । ऐसिय जुगुली जाय लगावो ॥  
 राजा बड़े जान यह पाई । ल्यावहु हम पर भौंस चढ़ाई ॥

दोहा-तुमतो ठग आछे वने, वनमें रोंकी नारि ॥

हमैं कहाँ काको ठग्यौ, को हम डान्यो मारि ॥

सो०-तुमहीं जानत श्याम, यंत्र मंत्र टोना ठगी ॥

ठगत फिरत सब वाम, आपन टंग औरन कहत ॥

मौन गद्दौ बातें सब पाई । यहै जानि हम पर चढ़ भाई ॥  
 जो चाहो सोई कहि डारो । हम नहि मानहि बिद्वग तिहारो ॥

१ पुष्पपुर । २ बड़ाईकरिये । ३ नारी ।



तुम मोहींकी दोष लगायो । मैं तो नृपको पठयो आयो ॥  
 यौवनरूपलिखे तुम इतहीं । आवत हो इहि मारग नितहीं ॥  
 लोचन दूतन जाय सुनायो । तब नृप रिख करि मोहि बुलायो ॥  
 शैशव महलनते नृप राई । बैठ्यो सिंहासन तरुणारै ॥  
 सुरतहिं मोहि दान पहिरायो । देवीरा तुम पास पठायो ॥  
 तिनको नाम अनंग भुवाला । उनको दान देहु ब्रजवाला ॥  
 तिनकी धानि कहत हों कीने । पैहाँ जान दानके दीने ॥  
 सुनि यह मोहनकी मुख बानी । प्रेम सिंधु सुवर्ती मगनानी ॥  
 काम नृपतिकी फिरी दुहाई । अटक्यो यौवन रूपहि आई ॥  
 को हम कहां रहति कहैं आई । यह सुधि बुधितलु दशा भुलाई ॥

दोहा-बसित भई उर मदनके, नयन मूँदि धरि ध्यान ॥

कहत कान्ह अब शरण हम, लीजै सरवसदान ॥

सौ०-ऐसे कहि मन माहि, देह दशा भूली सबै ॥

लेहु श्याम बलि जाहि, यह धन तुम हित संचियो ॥

यौवन रूप नाहि तुम लायक । सङ्कुचत तुम्हें देति ब्रजनायक ॥  
 नवल किशोर रूप गुण आगर । अहो श्याम सुन्दर घर नागर ॥  
 यह यौवन धन तुमडिग पेसे । जलधि निकट जलकणिका जैसे ॥  
 ध्यान मग्न इहि विधि ब्रजनारी । मनहीं मन विनवत बनसारी ॥  
 अंतर्प्राप्ति हरि सब जानैं । मनहीं की करणी सब मानैं ॥  
 मनहीं सबन मिले सुखदाई । तलुकी सुरति खनन तब आई ॥  
 खुलि गये नैन ध्यान ते तबहीं । देखे मोहन सन्मुख सबहीं ॥  
 सब जान्यो हम वनमें ठाढ़ी । सङ्कुचि गई अति अचरज बाढ़ी ॥  
 कहति परस्पर आपस माहीं । कहां हती हम जानत नाहीं ॥  
 श्यामविना यह चरित करैको । ऐसी विधि करि मनहि हारैको ॥  
 रहीं अकित सी सब ब्रजनारी । बोलि उठे सब कुंजबिहारी ॥  
 कहा ठगीसी हो ब्रजवाला । परयो कहा उर शोच विशाला ॥

दोहा-करयो दान लेखो कछु, रहीं जहां तहँ शोच ॥

१ बालक अवस्था । २ कामदेव । ३ समुद्र ।



प्रगट सुनावो सो मुहीं, दूरि करौ संकोच ॥  
 सो०—बहुरि न रोंकै कोय, यावनमें कोऊ तुम्हें ॥  
 निशि बासर भय खोय, सुख सों आवहु जावनित ॥  
 हमैं और रोंकै सो कोहै । रोंकन हार सुवन नंदकोहै ॥  
 टोना डारत शीश हमारे । आप रहत ठाढेहै न्यारे ॥  
 जाके काम नृपतिको जोरा । ठगत फिरत युवतिन बरजोरा ॥  
 सुनहु श्याम बृझिय नहिं ऐसी । तुमको बानि परी यह कैसी ॥  
 कैसेहू अब कृपा करो हरि । जाहि सब अपने अपने घरि ॥  
 दान मान धरको सब जाहू । बहुरि न मैं रोंकौंगो काहू ॥  
 मैं हूं जानत हों कछु लेखो । तुमहूं आप समुझि मन देखो ॥  
 पिछिलो देहु निबेर आज सब । आगे पुनि दीजो जानौ जब ॥  
 अब मैं भली कहत हों तुमको । जो मानौ ग्वालिन तुम हमको ॥  
 को जानै हरिचरित तुम्हारे । अहो रसिक बर नंददुलारे ॥  
 हमरो सर्वस मन अपनायो । अजहूं दान नहीं तुम पायो ॥  
 लेखो करि लीजो मन भायो । खाहु कछु दधि हम सुखपायो ॥  
 दोहा—सदमाखनलाये तुम्हें, सखन सहित मिलिखाहु ॥  
 सुख पावैं हम देखिकै, लीजै दान उगाहु ॥  
 सो०—अब दधिदानी नाउँ, तुम्हरो प्रकट बखानिहैं ॥  
 खाहु दही बलि जाउँ, ल्याई हम तुम्हरे लिये ॥  
 तब हरि हैंसि सब सखन बुलाई । बैठे रचि मण्डली सुहाई ॥  
 दोना बहु पलाशके लाये । शोभित सबके करैन सुहाये ॥  
 सुन्दरहरि सुन्दर सब ग्वाला । सुन्दर दधि परसति ब्रजवाला ॥  
 भक्त भावके हाथ विकाने । ग्वालन संग खात रुचिमाने ॥  
 निज निज मटुकिनते सब ग्वारी । देति करति उर आनँदभारी ॥  
 श्याम पतूखिनमों सुखनावैं । निरखि २ ग्वालिन सुखपावैं ॥  
 धन्य धन्य आपुनको जान्यो । सफल जन्म सबहिन करिमान्यो ॥  
 कहत धन्य यह दधि अरु माखन । खात कान्ह जाको अभिलाषन ॥



जो हम साथ करतही मनमें । सो सुखपायो हरिसंग वनमें ॥  
अति आनंद मगन सब ग्वारी । नंद नंदन पर तनमनवारी ॥  
प्यासीसों माखन हरि मांगत । देखों तुम्हरो कैसो लागत ॥  
औरनकी मटुकीको खायो । तुम्हरे दधिको स्वाद न पायो ॥

दोहा-श्रीवृषभानु कुमारी तब, दधि ल्याई मुसकाय ॥

अपने कर अधरन परस, दीनो विहंसि खवाय ॥

सो०-प्यासीको दधि खाय, अल्पचितै मोहनविहंसि ॥

मधुरे कह्यो सुनाय, मीठोहै यह सबनते ॥

गोपिनके हित माखन खाहीं । प्रेम विवश नहिं नेक अघाहीं ॥  
वैखिय गोरस भरी कमोरी । परसत सबै होत नहिं थोरी ॥  
ग्वालन सहित श्याम दधिखाहीं । परम हर्ष सबके मन माहीं ॥  
हँसत परस्पर सखा सयाने । मीठा कहि कहि स्वाद बखाने ॥  
हरि हँसि सबके चितहि चुरावैं । परमानंद सबन उपजावैं ॥  
विलसत ब्रज विलास बनवारी । दधिदानी प्रभु कुंजविहारी ॥  
सुरगण तियन सहित नभ माहीं । निरखि ३ मनमाहिं सिंहाहीं ॥  
धनि २ ब्रजकी युवति सभागी । खात ब्रज जिनते दधि मांगी ॥  
जाकारण शिव ध्यान लगावैं । शेषसहस मुख जाको गावैं ॥  
मन बुधि वचन अगोचर जोई । जाको पार न पावै कोई ॥  
नारदादि जाके गुण गावैं । निगमनेति कहि अंत न पावैं ॥  
गुणातीत अविगति अविनाशी । सो प्रभु ब्रजमें प्रकट विलाशी ॥

छं०-प्रकटे सो प्रभु ब्रजमें विलासी, जाहिमुनिजनध्यावहीं

योग जप तप नेम संयम, करि समाधि लगावहीं ॥

रूप रेख न वरण जाके, आदि अंत न पाइये ॥

भक्त वशसो ब्रह्म पूरण, गोप बल्लभगाइये ॥

कोटि कोटि ब्रह्मांड जाके, रोम प्रति श्रुति गावहीं ॥

कीट ब्रह्म प्रयंत जल थल, आप सब उपजावहीं ॥



आप कर्ता आप हर्ता, आपही पालन करें ॥  
 खातसो मधु दान दधि लै, गोपिकनके मन हर्न ॥  
 धन्य ब्रज धनि गोप गोपी, धन्य वन पावन मही ॥  
 धन्य मोहन दान मांगत, दूध दधि माखन मही ॥  
 धन्य ब्रज एक पलकको सुख, और यह त्रिभुवननहीं ॥  
 कहत सुर मुनि हरषि पुनि २, सुमन सुंदर वर्षहीं ॥  
 कान्ह गोपी ग्वाल दैनहि, एकही बहुतनुधरे ॥  
 भक्त जनहित विरद जाको, अभित लीला विस्तरे ॥  
 ब्रजविलासहुलास हरिको, नित्यनिगमागम कहै ॥  
 दास ब्रजवासी सदा यह, गाय आनंद पद लहै ॥  
 दोहा-दान चरित गोपालको, अति विचित्र रसखान ॥

वेद भेद पावें नहीं, कवि किमि करै बखान ॥  
 सो०-गावत सुनत सुजान, दधि दानी लीला रुचिर ॥  
 प्रेम भक्तिको दान, ब्रजवासी जन पावहीं ॥

ब्रज ललना यों हरिहि सुनावैं । दूध दही माखन अह लावैं ॥  
 मटुकिनते लैलै हमदेहैं । खाहु श्याम तुम हम सुखलेहैं ॥  
 गोरस बहुत हमारे घर घर । लीजैं दान पाछिलो भर भर ॥  
 यह गोरस जो तुमने खायो । सो तो दान आजको आयो ॥  
 लेहु सबै अपना करि लेखो । फिर न पायहौ मांगि सेखो ॥  
 श्याम कही अब भई हमारी । मनहिं भई परतीत तुम्हारी ॥  
 प्रीति भई हमसों तुमसों अब । लेहैं मांगि चाहिहैं जन सब ॥  
 निधरक अब बेचहु दधि जाई । घाट बाट कछु डर नाहिं राई ॥  
 ग्वालिन भई श्याम वश माहीं । घरको जात बनतहैं नाहीं ॥  
 चकित रहीं सब ब्रजकी नारी । कहत एकसों एक विचारी ॥  
 सुनहु सखी मोहन कहकीनी । दान लिया कै मन हरिछीनी ॥  
 यह तो हम नाहिं बदी सयानी । नूझो यों इनसों यह बानी ॥



दोहा-बूझनको उमंगी सबै, मोहनसों यह बात ॥

निकट जात रहि जात पुनि, सकुच मगन है जात ॥

सो०-मनही मन सकुचात, कहिये कैसे श्यामसों ॥

कहत बनत नहि बात, प्रेमविवस तरुणीसबै ॥

तुनौ बात मोहन एक हमसों । ठीठो बहुत कियो हम तुमसों ॥

क्षमा करो सो चूक हमारी । अहो श्याम हम दासि तुम्हारी ॥

हैंसि हैंसि कही कटुक हम बानी । तुम्हें खिझावत हित मन मानी ॥

कछु हमारे घरसों नाहीं । अति आनंद तुमसों मन माहीं ॥

दधिको दान और जो जान्यो । सबै तुम्हारो कर हम मान्यो ॥

कहौ श्याम तुम यह कह कीन्हों । दान लियोकै मन हारि लीन्हों ॥

हम तुमसों कछु भेद न राख्यो । कीनों सबै तुम्हारो भाष्यो ॥

यह करनी तुमहीं अब जानौ । भली बुरी जो कछु करि मानौ ॥

जो जासों अंतर नहि राखै । सो तासों क्यों अंतर भाखै ॥

नंदनंदन तुम अन्तरजानी । वेद उपनिषद साखि बखानी ॥

तुनहु बात सुवती सब भेरी । तुमहित करि राख्यो मुहि घेरी ॥

तुमते दूरदोत मैं नाहीं । रहत तुम्हारे निकट सदाहीं ॥

दोहा-तुम कारण वैकुण्ठ तजि, प्रकटतहीं ब्रज आय ॥

वृन्दावन तुम्हरो मिलन, यह नबिसारयो जाय ॥

सो०-एक प्राण है देह, अंतर कहूं न जानिहो ॥

यह न नयो अब नेह, कत भूतल ब्रज वास बसि ॥

अब घर जाहु दान मैं पायो । जानत यह लेखो निबटायो ॥

हैंसि हैंसि जो भावत बनवारी । कहत भई तब ब्रजकी नारी ॥

घरतन मनहि बिना कित जाई । करत कहा मोहन चतुराई ॥

सब तन पर मनहीहै राजा । जो कछु करै होय सो काजा ॥

सोतो मन राख्यो तुम गोई । घरको जान कौन विधि होई ॥

हृन्दिष्य गण मनके आधीना । चलत नहीं पगनैन विहीना ॥

जो तुम प्रीति करी मनमोहन । तो दुविधा क्यों लाई मोहन ॥

यह सौ तुम जानी ब्रजनाथा । घरहम जाहि देहु मन साथा ॥



मन भीतरमें बास बनायो । तुमहींलै मोहिं तहां छिपायो ॥  
 कहत कहा यह दोष तुम्हारे । अजहूं तजौ होहुं मैं न्यारो ॥  
 लेहु आपनो मन घर जाहू । लोक लाज डर जो पछताहू ॥  
 तौ अब हमैं छाडि किन देहू । हम करिहैं अंतर निजोहू ॥

दोहा-जाते घटती होय निज, तजि दीजै सो बात ॥

दीनों मनमें बास तब, अब मनको पछितात ॥

सो०-जब मन दीनो मोहिं, तबहीं लीनो मोहितुम ॥

जो लेहौ मन खोहि, तौ मैहूं जैहौ अनत ॥

तुनहु श्याम ऐसी नहिं कहिये । सदा हमारे मनमें रहिये ॥  
 तुमहिं बिना धुकमन अरु धुकघर । तुमबिन धुक कुलकान लाज डर ॥  
 एक तुम प्रेम बिनापितुमाता । तुमबिहीन धुक सुत पितु आता ॥  
 एक जीवन तुमबिन संसारा । धुक सुख तुमबिन नंदकुमारा ॥  
 एक रसना तुम गुण नहिं गावै । धुक श्रुत तुम्हरी कथा न भावै ॥  
 एक लोचन जिन तुम न निहारे । धुक विचार जो तुम न विचारे ॥  
 एक दिन रात तुम्हैं बिन जाई । धुक श्वासा तुमबिनाविहाई ॥  
 सो सब धुक जामें तुम नाहीं । तब धन मन तुमबिनावृथाहीं ॥  
 ऐसे कहि तनु दशा बिसारी । भई सनेह मगन सब ग्वारी ॥  
 कबहुं धरतन जान विचारैं । कबहुं हरिकी ओर निहारैं ॥  
 इधि भाजन लै शिरपर धारैं । कबहुं धरणी फेर उतारैं ॥  
 पीती मटुकिनमें कछु नाहीं । कबहुं विचार रहत मन माहीं ॥

दोहा-बिहंसिकह्यो तब साँवरे, जाहु धरन ब्रज नारि ॥

सकुचतपिछिले दानको, मैलेहौं निरवारि ॥

सो०-ऐसे वचन सुनाय, सखन सहित हरि वनगये ॥

लैगये चित्त चुराय, युवतिन दान बनायकै ॥

इति श्रीब्रजविलासे ब्रजवासीदासकृते पूर्वाह्न समाप्तम् ॥



श्रीगणेशाय नमः ।

## अथ उत्तरार्द्धम् ।

अथ गोपिनके प्रेमकी उन्मत्त अवस्था लीला ॥

रीती मटुकी शिरपर धारी । चलीं सबै उठि गोपकुमारी ॥  
 एक एकको सुधि कछु नाहीं । जानति नहीं कहाँ हम जाहीं ॥  
 जड़ चेतन कछु नहीं पहिचानै । बन गृह कछु विचार न मानै ॥  
 लोक वेद मर्यादा दोऊ । आप सहित भूलीं सब कोऊ ॥  
 बंचत दधि वनहींमें डोलैं । लेहु दही कबहुं कहि बोलैं ॥  
 कहत द्रुमन बोलत क्यों नाहीं । लेहौं दधिकै हम फिरि जाहीं ॥  
 तरु तरु सों पृच्छत यहि भांती । वनमें फिरत प्रेम रस भांती ॥  
 मिलत परस्पर विवश निहारी । कहति फिरत क्यों वनमें नारी ॥  
 तिन्हें कहति अपनी सुधि नाहीं । सो कछु नाहि ससुझत मन माहीं ॥  
 दधि भाजन रीते शिर धारै । भरी प्रेम तनु दशा बिसारै ॥  
 कबहुं यमुनाके तट जाहीं । फिरति कबहुं कुंजनके माहीं ॥  
 कबहुं वंशीबटतट आवैं । ठाढ़ी है तहँ हरिहि बुलावैं ॥

दोहा-लीजै गोरसदान हरि, कहँ धौं रहे छिपाय ॥

डरन तुम्हारे जात नहि, तुम दधि लैत छिनाय ॥

सो०-लेहु आपनो दान, पुनि रिस करि उठि धायहौ ॥

हमैं न देहौ जान, वनमें हम ठाढ़ी सबै ॥

बैठ गई मटुकी धरि सबहीं । जानति घरसे आई अबहीं ॥  
 सखा संग लीने हरि पहुँचै । दधि माखनको दान चुकैहै ॥  
 दधिहि दुरावत अंचर तरिकै । दाठ गई मटुकिनमें परिकै ॥  
 रीती मटुकी सबन निहारी । गई भभरि उरमें सब नारी ॥  
 जहां तहां कह उठीं गुवाली । गोरस ढरकायो कहूँ आली ॥  
 कोउ कोउ कहत कान्ह ढरकायो । कोउ कहै सखन संग हरि खायो ॥  
 भई सुरति कछु तब तनु माहीं । गई धरहि हम तबते नाहीं ॥



सकुच भई कछु गुरु जन डरते । प्रातहिते हम भाई घरते ॥  
 रही कहाँ तबते वन माहीं । यहतो सुरत हमें कछु नाहीं ॥  
 जब हरि सखन संग दधि खाई । गये बहुरि वन कुँवर कन्हाई ॥  
 तब लौंकीतो सुधि हम पाहीं । भई कहा पुनि जानति माहीं ॥  
 जानपरी हमको तो योंरी । डारि गये शिर श्याम उगोरी ॥

दोहा-श्याम बिना यहकौ करै, लायो दधिको दान ॥

तनु सुधि भुली तबहिँते, वाकी मृदु सुसकान ॥

सो०-मन हरिलीन्यों श्याम, ताबिन निबहैकौनविधि ॥

ऐसे कहि सब बाँम, घरको चलन विचारही ॥

मन हरिखों तनु घरहि चलावैं । ज्यों गज मत्त चलन छबि पावैं ॥  
 श्यामरूप रत्नमदखों भारयो । कुलमरयाद महावत टारयो ॥  
 कर्मनेहबंधन सों तोरयो । सुरै न लाज कुंजको मोरयो ॥  
 गुरुजन अंकुश जो सुधि भावै । तब तनु घरको पाँव चलावै ॥  
 ऐसे गई सदेन ब्रजवाला । नहिं भावत क्षण बिन नैदलाला ॥  
 बृद्धत गुरुजन जब कछु जिनसों । औरै बात बतावति तिनसों ॥  
 गारी दैत सुनत नहिं कोऊ । श्रवण शब्द हरि पुरे दोऊ ॥  
 मात पिता बहु बास दिखावैं । नेक नहीं सो उरमें द्यावैं ॥  
 बार बार जननी समुझावति । काहेको तुम हमहिं हँसावति ॥  
 जहाँ तहाँ काहे तुम जाओ । नहिं अपनी कुलकानलजाओ ॥  
 दधिबेचौ घर मूधे आवो । काहे इतनो बिलम लगावो ॥  
 बूझे जबाब दैति तुम नाहीं । बसी कहा तुम्हरे मन माहीं ॥

दोहा-ऐसे सिखवत मात पितु, सो नकरति कछुकान ॥

लागतहैं तिनके वचन, उरमें बाण समान ॥

सो०-तिन्हें कहत मन माहि, धृक् २ इनकी बुद्धिको ॥

जिन्हें श्याम प्रिय नाहि, तिन्हें बनें त्यागे भले ॥

जिनको हरिकी प्रीति न भावै । तिनको सुख जानि विधि दिखावै ॥



ऐसे विनय करति विधि पाहीं । शुरु जनको निंदति मन माहीं ॥  
 नेक नहीं घरसों मन लागत । विसरत श्याम न सोचत जागत ॥  
 नयन श्याम दूरशन रस अटके । श्रवण वचन रसते नहि मटके ॥  
 रसना श्याम बिना नहि बोलै । मन चंचल संगहि सँग डोलै ॥  
 नासा अंग सुगंध लुभानी । सुरत श्यामके रूप समानी ॥  
 चरण चलत चाहत दिशि तेही । जिहि दिशि सुंदर श्याम सनेही ॥  
 लोक लाज कुल कान मिटाई । बैंगी श्यामके रंग सुहाई ॥  
 प्रात चली दधि लै व्रज माहीं । इंद्रियगण मन बुधि वशनाहीं ॥  
 तहुलै निकसीं वचन गोरस । रसनासों मटक्यो हरिको यस ॥  
 दधिको नाम भूलि गई बाला । कहत लेहु कोऊ गोपाला ॥  
 भीजरह्यो मनमोहनको रस । व्याप गई उर माहि दशोदिस ॥  
 दोहा-फँसी सबै खग वृन्दज्यों, हरि छवि लटकनचाल ॥  
 तरफरात तामें परी, निकसि सकति नहि बाल ॥  
 सौ०-बोलत मुख न सँभार, पान किये जिमि बारूणी ॥  
 बिथुरी अलकलिलार, पग डगमग जित तितपारै ॥  
 दधि वेचत व्रज बीथिन डोलैं । अलबल वचन बदन ते बोलैं ॥  
 गोरस लेन कुलावत जोई । तिनकी बात सुनत नहि कोई ॥  
 क्षणकलु चेत करत मन माहीं । गोरस लेत आज कोउ नाही ॥  
 बोल उठत पुनि लेहु गोपालाहि । अटक रह्यो मनवाहरी ख्यालाहि ॥  
 लेहु लेहु कोऊ वनमाली । गलिन गलिन यों बोलति ग्वाली ॥  
 कोउ कह श्याम कृष्ण वनवारी । कोउ कह लाल गोवर्द्धनधारी ॥  
 कोउ कह उठति दान हरि लायो । कबहुं भई कि तुमहि चलायो ॥  
 देह भेदकी सुरति बिसारी । फिरति शीश मदुकी दधि धारी ॥  
 जाहि देहकी सुधि कलु होई । दधिको नाम लेत तब सोई ॥  
 इहि विधि वेचतही सब डोलैं । आप बिकानी बिनहीं मोलैं ॥  
 श्याम बिना कलु और न भावै । कोऊ कितनो कहि समुझावै ॥



हरिदरशन विन मति भइ भोरी । अंतर लागि सुरतकी डोरी ॥  
 दोहा—पकरयो पूरण नेह उर, जित देखें तित श्याम ॥  
 समुझाई समुझत नहीं, सिख दै थाक्यो ग्राम ॥  
 सो०—ज्यों दीपक घर माहिं, बाहर नहिं देख्यो परै ॥  
 गुप्त होत सो नाहिं, जब तृण लू दावाभयो ॥  
 इहिविधि मगन सकल ब्रजनारी । कृष्ण प्रेम रस मद मतवारी ॥  
 सकल प्रेमकी सुरति पूरी । कोऊ तिनमें नाहिं अधूरी ॥  
 एकदशा सबहीकी जानो । कहँलगि सबको प्रेम बखानो ॥  
 तिनमें श्रीवृषभानु दुलारी । सकल शिरोमणि हरिकी प्यारी ॥  
 नेक नहीं हरिते सो न्यारी । तिनकी कथा कहत विस्तारी ॥  
 दधि भाजन माथेपर धारै । लेहु श्याम कहि वचन उचारै ॥  
 बृझति तिन्हें और ब्रजनारी । बचत कहा फिरत तू ग्वारी ॥  
 प्रातःहिंते लीन्हें दधि डोलै । सुखते नाम कान्हको बोलै ॥  
 कहा करत यह हमें बतावो । कछु हमको निजबात सुनावो ॥  
 उफनत तक्रं चुबत अँगमाहीं । ताकी सुरति तोहिं कछु नाहीं ॥  
 इतसे उत उतते इत जाई । बुधि मर्यादा सब मिटाई ॥  
 में जानी यह बात बनाई । तेरो मन हरि लियो कन्हाई ॥  
 दोहा—तिन्हें कहत मुहिं नंदधर, कहाँ सुदेहु बताय ॥  
 जहां बसत वह साँवरो, मोहन कुँवर कन्हाय ॥  
 सो०—हैधौंयाही गाँव, कैधौं कहुँ अन्तर बसत ॥  
 कान्हर जाको नाँव, में खोजत वाको फिरौं ॥  
 बहुत दूर ते हों मैं आई । मोहिं देहु नंद सदन बताई ॥  
 नंदहिके द्वारेपर ठाढ़ी । बृझत अति संभ्रमता बाढ़ी ॥  
 लोक लाज कुलकी सब नासी । मन बँध गयो प्रेमकी फाँसी ॥  
 तब यक सखी परम हितकारी । हरिकी प्यारीकी अति प्यारी ॥  
 प्यारीको निज ढिग बैठाई । शिक्षा वचन कहत समुझाई ॥

१ दावानल । २ छछ । ३ घर ।



अहां राधिका कुंवरि सयानी । क्यों ऐसी अब भई अयानी ॥  
 ऐसे प्रकट प्रेम नहिं कीजै । देखि विचारि धीर उरदीजै ॥  
 हैंतिहैं लखि सब ब्रज नरनारी । एकहि बार लाजतैं डारी ॥  
 ऐसा कहा फिरत विततानी । मात पिता गुरुजनहिं भुलानी ॥  
 जा पै कृष्ण प्रेम धन पैये । राखि गुप्त नहिं प्रकट जनैये ॥  
 ऐसी तोहिं बूझिये नाहीं । समुझ देख अपने मनमाहीं ॥  
 अजहं चेत बात सुन मेरी । कहत कुंवरि तेरे हितकरी ॥

दोहा-कृष्ण प्रेम धन पायके, प्रकट न कीजै बाल ॥

राखिय उर यों गोयैकै, ज्यों भणि राखत व्यालै ॥

सो०-तू अति नागरि नारि, पायो नागर नेह जो ॥

तो कत देति उधारि, कहिहैं तोहि गँवारि सब ॥

मैं जो कहति सुनति कै नाहीं । देहै ज्वाब कछु मो पाहीं ॥  
 कहिहै वचन कि मौनहि रहै । घर अपने जैहै किन जैहै ॥  
 लगन सुख सुनिहैं पितु माता । ब्रजमें प्रकटी है यह नाता ॥  
 मानेगी मम वचन कि नाहीं । कै किरिहै ऐसेहि ब्रजमाहीं ॥  
 जो यह प्रीति श्याम सां जोरी । लाज किये है है कद थोरी ॥  
 ध्यान श्यामको धरि उर माहीं । लाज छांडि कत भ्रमत वृथाहीं ॥  
 सुख तौ खोल सुनहुँ तुव बानी । कैसी कहति परै कछु जानी ॥  
 कहा कहत मोसां तुम आली । मन मेरो लीनो वनमाली ॥  
 तबते मोको कछु न सुहाई । जित देखौं तित कुँवर कन्हाई ॥  
 अबलौं नहि जानत मैं कोही । कहा कहत है अबतैं मोही ॥  
 कहां गेहको पितु अरु माता । कहैं दुर्जनको गुरु जन भ्राता ॥  
 कहां लाज कहैं कान बडाई । तू कह कहत कहां ते आई ॥

दोहा-बार बार तू कहत कह, मैं नहिं समुझत बात ॥

मेरे मनमें घर कियो, वा यशुमतिके तात ॥

सो०-रहत न मेरी आन, अपनी सों में करथकी ॥



तूतो बड़ीसुजान, कहा देत सखि दोष मोहिं ॥  
 मेरे हाथ नहीं मन मेरो । सुनै कौन सखि सिखवन तेरो ॥  
 इन्द्रिय गण मनकी अनुगामी । सब इन्द्रियको मन यह स्वामी ॥  
 सोमन हरिलीनो ब्रजनाथा । इन्द्रिय गई सबै मन साथी ॥  
 अब मेरे बशमें कोउ नाहीं । रहीं जाय सब हरिके पाहीं ॥  
 नयन दरशके लोभ लुभाने । श्रवण शब्दके माहिं समाने ॥  
 अब ये फिरत न मेरे फेरे । कहा होत सिखये सखि तेरे ॥  
 मेरे हाथ हाथमें माहीं । कौन करै घूँघुट पटछाहीं ॥  
 अबतौ प्रकट भई जग जानी । वा मोहनके हाथ बिकानी ॥  
 मन मान्यो मोहन सों मेरो । जग उपहास करै बहुतेरो ॥  
 मेरे मन अब बस्यो कन्हारि । कैलघुंता कै होहु बड़ाई ॥  
 मैं अपनी मन हरिसों जोन्यो । नाच कछयो तब घूँघुट छोन्यो ॥  
 अब तो मेरे मन यह मानी । मिलौं श्याम सों ज्यों पैयपानी ॥

दोहा—मेरो मन हरि संग बस्यो, लोक लाज कुलत्याग ॥

और ताहि सूझे नहीं, भो जहाजको काग ॥

सो०—ऐसे सखिहि सुनाय, मौन गही पुनि नागरी ॥

देह दशा विसराय, मगन भई रस श्यामके ॥

जाय न्यो मन बाही ख्यालहिं । बोल उठी कोउ लेहु गोपालहिं ॥  
 कहत सखीसों तुको आली । कहँ वह दधिदानी वनमाली ॥  
 नंद सदन सखि मोहिं बताओ । नंदनंदन मिय बेगि मिलाओ ॥  
 विरह विवश अति व्याकुल वाला । मन हरि लीनो नंदके लाला ॥  
 दधि मटुकी लीने शिरडोलै । द्वारे आय नंदके बोलै ॥  
 इत उत जाय तहीं फिरि आवै । लेहु कान्ह दधि डेरि सुनावै ॥  
 भ्रम भ्रम विवश भई सब ग्वाली । चली वनहिं खोजन वनमाली ॥  
 वंशीवट यमुना तट जाई । कहत दान दधि लेहु कन्हारि ॥  
 फिरत विकल वन वन दधि लीन्हे । तन मन हरिको अर्पण कीन्हे ॥

१ कान । २ तुच्छता । ३ दूधपानी ।



कीन्हो दिनेकर प्रेम प्रकाश । लोक लाज डर तमकर नाश ॥  
तलुकी दशा घरणि नहि जाई । रोम रोममें रहे कन्हाई ॥  
प्रेम अधिक ब्रज गोप कुमारी । गावत वेद पुराण पुकारी ॥

दोहा—कृष्ण राधिकाके चरित, अति पवित्र सुखखान ॥

कहत सुनत भवभयहरण, रसिक जननके प्रान ॥

सो०—रसिक शिरोमणि राय, गोपी जन मनके हरण ॥

कहाँ सु अब सुखदाय, रसलीला जो ब्रज करी ॥

देखि दशा राधाकी ग्वाली । शिक्षा करति हती जो आली ॥

चकित रही मनमांझ विचारी । या शिर श्याम ठगौरी डारी ॥

गई सखी सो हरि पै धाई । कहत सुनतु प्रभु कुँवर कन्हाई ॥

हँदति फिरति तुम्हें इकनारी । अति सुन्दरी नखल लुकुमारी ॥

पहिरै नीलाम्बर अति खोहै । मुख द्युति चंद्र निरखि मनमोहै ॥

प्राप्तहिते लीने इधि डोलै । लेहु गोपाल वदनते बोलै ॥

भ्रमत भ्रमत अति बिकल भईहै । बंसीदटकी ओर गईहै ॥

मन वच कर्म जान में पाई । तुममें वाको प्राण कन्हाई ॥

साहि मिलो कबहुं सुखदाई । कहत सखी करिके चलुराई ॥

तुम बिन विरह बिकल अति बाला । मिलहुवेनि ताको नैदलाका ॥

सुनत श्याम मन हर्ष बढ़ायो । सांची प्रीति जानि सुखपायो ॥

हरिहँसि विदा सखीको कीन्हो । आप दरश प्यारीको कीन्हो ॥

दोहा—परमहर्ष दोऊ मिले, राधानंद कुमार ॥

कुंज सदन मोहति मनो, तनु धरि छवि शृंगार ॥

सो०—दयामा अरु वनश्याम, कोटि कामरति द्युति हरण ॥

ब्रजवासी उर धाम, युगुल किशोर बसो सदा ॥

सोहत कुंज कुटी सुखरासी । पिय वनश्यामवाम चपलासी ॥

धिरह तापतहु दूर निवासी । बौली मोहन साँ तब प्यारी ॥

कदा कहाँ तुम साँ सुन्दर वन । कहत लजातनाम मनही मन ॥

१ सूर्य । २ अन्वकार । ३ संसार । ४ बिजलीसी ।



होत चवाव सकल ब्रज माहीं । सुनत श्रवण सहि जात सुनाहीं ॥  
 जा दिन तुम गैया दुहि दीनी । हाहा करि दुहनी मैं लीनी ॥  
 सहजगही बहियां तुम मेरी । मैं हँसि तनक बदन तन हेरी ॥  
 तादिनते गृह मारग जित जित । करत चवाव सकल ब्रजजननित ॥  
 यहै कहै ब्रजमें सब कोऊ । राधा कृष्ण एक हैं दोऊ ॥  
 यह सुनि घर गुरु जन दुख पावैं । कटुक वचन कहि नास दिखावैं ॥  
 निकसत द्वार जबहिं तुम आई । रहत सबै तब देखि लुगाई ॥  
 निंदत तुमको मोहि सुनाई । सो मोपै हरि सखो न जाई ॥  
 कहत मनहिं सबको तजि दीजै । इनविमुखनको संग न कीजै ॥

दोहा-धृक धृकते नर नारि हरि, जिन्हें न तुम पद प्रेम ॥  
 हित करि तुम जाने नहीं, कहा निबाहे नेम ॥  
 सो०-मैं लीन्हों दृढ़ नेम, सुनहु श्याम सुन्दर सुखद ॥  
 तुम पद पंकज प्रेम, यहै पतिव्रत पारिहौ ॥

हरि तुम बिन यह कासों कहिये । ब्रजवसकाके बोलन सहिये ॥  
 ताते विनय करति तुम पाहीं । वा पैड़े तुम आवहु नाहीं ॥  
 जो आवो तो मुहि न जनावो । सुरली धुनि मोको न सुनावो ॥  
 सुरली धुनि सुनि सुनहु कन्हाई । बिन देखे मुहि रख्यो न जाई ॥  
 प्रेमाकुल सुनि प्रियकी बानी । बोले बिहँसि श्याम सुखदानी ॥  
 सांच कहत ब्रजके नरनारी । तुमनेकहु मोते नहिं न्यारी ॥  
 कहन देहु गुरु जन कह जाने । वै अपने सब सुरत भुलाने ॥  
 प्रकृति पुरुष एकै हम दोऊ । तुम मोते कछु भिन्न न कोऊ ॥  
 उभय देह लीला हित ठानी । यहै भेद नहीं कछु पानी ॥  
 जल थल जहां तहां तनु धारों । तुम तज कहूं रहत नहिं न्यारों ॥  
 देह धरेको यहै विचारा । मानिय कुल कुटुम्ब व्योहारा ॥  
 लोक लाज गृह छाँड़ि न दीजै । मात पिता गुरुजन डर कीजै ॥



दोहा-प्रीति पुरातन राखि उर, जाहु प्रिया अब धाम॥

प्रकट न कीजै बात यह, कहत विहंसिकै श्याम॥

सो०-सुनत श्यामके चैन, हर्ष भई मन नागरी ॥

भयो हिये अति चैन, प्रीति पुरातन जानि जिय॥

अति आनन्द भई मन प्यारी । तब जान्यो हरि पति में नारी ॥

भूलि गई काहे पछितानी । यह महिमा हरिकी जिय जानी ॥

युग युग प्रभु लीला विस्तारी । जान लई वृषभानु तुलारी ॥

हरिमुख अल्पचितै मुसकानी । रही परम आनंद उर मानी ॥

कहत सुनहु प्रिय अन्तर्यामी । तुम कर्ता हौ जगके स्वामी ॥

मात पिता गुरु जन हित भाई । कहा नाथ यह नई सगाई ॥

जो कर्ता औरै सुनि पाऊं । तौहौं प्रभु तिनको पतिबाऊं ॥

अरु परतीत जगतकी जानौ । तौ परमित छूटत उर मानौ ॥

जो जाको सो तेहिको जानै । कैसे औरनको मन मानै ॥

अब नाहिं तजौ कमल पद पासा । मन मथुंकर कीनो जब वासा ॥

यह सुनि हरि प्यारी उरलाई । बहु विधि करि प्रबोध समझाई ॥

तनु धरि लोक वेद विधि कीजै । प्रीति रीति उनमें धरि लीजै ॥

दोहा-कहत श्याम अब जाहु घर, तुमको भई अचार॥

प्रीति पुरातन गोप उर, करिये जग व्यवहार ॥

सो०-परम प्रेम उरलाय, घर पठई हरि भावती ॥

चली संग सुख पाय, फिर फिर चितवत श्यामतन ॥

चलीसंग सुख लूट किशोरी । लखत अंग मरगजी पटोरी ॥

गजैगति जाति भवन सुखपाई । रहेरीझिछबि मिरखि कन्हाई ॥

प्यारीमन आनंद बड़ाये । सुख भर चली लूटसीपाये ॥

मनहिं कहत अति उमँग उछाहू । यह धन प्रकट करौ नहिं काहू ॥

सखियनहू नहिं भेद जनाऊं । कृष्ण प्रेमधन गुप्तदुराऊं ॥

श्याम कस्यो सोई उरधरिहौ । प्रीति पुरातन प्रगट न करिहौ ॥



ऐसे मनहिं बिचारति जाहीं । तहैं इकलखी मिली मगमाहीं ॥  
 अंग अंग छवि लखि लुसकानी । कहति बिहँसि प्यारी सों बानी ॥  
 कह फूलीसी आवतिराधा । आज रूपकछु अंग अगाधा ॥  
 बदन सिंकोरति मोरति भौहैं । कहति कछु मनहीं मनमौहैं ॥  
 देखियतकछु अंगरस भीने । सुलभ मनोरथ हरिसँग कीने ॥  
 हमसों सो सब बात उधारी । दुरत नगंध दुरावन दारो ॥

दोहा—फिरतहती व्याकुल अवधि, जिनके दर्शन लाग ॥

कहां मिले नैदन्द सो, धनि धनि तेरो भाग ॥

सो०—नहिं पावतहैं जाहि, योगीजन जप तप किये ॥

वश करि पायो ताहि, तैं कैसे कहु नागरी ॥

कहा कहति सखि भई बाधरी । करन कछु चाहत बबाधरी ॥  
 तूहँसि कहत सुने जो कोऊ । सोतो साधि मानिहै सोऊ ॥  
 चकित होति सुनि अचरजतेरो । है बभाव पुनि घर कहँमरो ॥  
 ऐसे होय कहति तू जैसे । गुरजनमें निबहौं पुनि कैसे ॥  
 कहा भेद कछु तोसों ओसों । मैं दुराव करिहौं सखितोसों ॥  
 कौनैद नंद कहति तू जिनको । मैं कबहूँ देख्यो नहिं तिनको ॥  
 कै मोरे कै वरण सांवरे । रहत ब्रजहिं कै अनत गांवरे ॥  
 मैंतौ नहिं जानति वे जैसे । तू बहु बात मिलावति कैसे ॥  
 जाहि चली जानी मैं तोको । कहा भुलावतिहै तू मोको ॥  
 अबहीं फिरति हसी नौराई । आजहि पढ़ि लीनी चतुराई ॥  
 याही ब्रज हम तुम भर बौड़ । दूर नहीं जोहै कहँ कोऊ ॥  
 परिहौ कबहूँ फंद हमारे । करिहैं तबहिं जुहार तुम्हारे ॥

दोहा—निपुण भई उनके मिले, वह सुधि गई भुलाय ॥

आवतिहै वन कुंजते, बातें कहति बनाय ॥

सो०—रीझें इयाम सुजान, कहं देति अँगकी पुलक ॥

मोसों करत सयान, सगिर्बाग रही सनेह जल ॥

हँसत कहत कैधौं सत बानी । तेरी सों मैं कछुअ न जानी ॥

+ सफल । १ प्रणाम । २ चतुर । ३ भीजरही ।



कह्यो कदा मुहि बहुरि सुनावै । तोहि सोंह मेरी जु दुरावै ॥  
 कबहुं कछु भाव यह पायो । तैदेख्यो कै किनहु सुनायो ॥  
 ऐसी कहत और जो कोऊ । सुनती मोपै उतर न सोऊ ॥  
 मूझत मोहि लगावत ताही । सपनेहुं देख्यो नहिं जाही ॥  
 ऐसी मोहि कहौ जिनकोई । झूठी बातनि पर दुखहोई ॥  
 उच्यताये वैहै कछुमोखों । बहुरि नहीं बोलोंगी तोखों ॥  
 तोते और काहि हितपैहों । जति हितकी बात जनैहों ॥  
 यह परतीत नतो को होई । मैं राखति तोते कछुगोई ॥  
 चतुरसखी मनमें जब जानी । मोतें तौ कछुनाहि छिपानी ॥  
 बास भई याके मनमाहीं । ताते बातकहत यह नाहीं ॥  
 लख यह कही हँसत मैं तोखों । जिन मनमें दुख मानै मोखों ॥

दोहा-मानी तेरी बात अब, कहैं तू कहैं वे श्याम ॥

हमहुं उन्हें जाने नहीं, बसत कौन धों गाम ॥

सी०-हम आगेकी आइ, भई सयानी लाड़िली ॥

हँसत कह्यो घर जाइ, तैनहिं हरि कबहुं लखे ॥

सकुचसहित वृषभालु दुलारी । गई सदन गुरु जन डर भारी ॥  
 जननी कहत कहां हति प्यारी । डोलति फिरति अजहुं है बारी ॥  
 घर तुहिं तनक देखिबत नाहीं । दधिछै जात फिरत वन माहीं ॥  
 श्याम संग बैठति है जाई । आज तोहिं धिरवत हो भाई ॥  
 काहे को उपहास करावति । दधिहिं बेच सूधेकिन आयसि ॥  
 वृथा करति मैयारिख मोखों । को अब बात कहैरी तोखों ॥  
 ऐसी को बहिगई विधाता । श्याम संग फिरिहै सुनु भाता ॥  
 कौने बात कही यह तोखों । ताको नाम लोहि किन मोखों ॥  
 धन्य भ्रात धनि धनि तू भाई । ऐसी बात कहति मुहिं लाई ॥  
 तू पर घर क्षण क्षण कित जाई । मैं बरजति नहिं नेकु डराई ॥  
 श्यामा श्याम सकल ब्रज माहीं । है रहे लाज लगति तुहि नाहीं ॥



बड़े महारकी सुता कहावति । काहेको पितु मात लजावति ॥  
 दोहा-खेलनको मैं जाऊँ नहिं, कहा कहतिरी मात ॥  
 माँपै जात सही नहीं, यहै अनोखी बात ॥  
 सो०-घर घर खेलन जात, गोपनकी सब लरकिनी ॥  
 तू मोहीं रिसयात, तिनके मात पिता नहिं ॥  
 मनहीं मन समझति महतारी । अबहींतो मेरी है बारी ॥  
 कहा भयो तनु बाढ भई है । लडकाई अबहीं न गई है ॥  
 झूठहिं बात उड़ी यह सारी । श्यामा श्याम कहत नर नारी ॥  
 खेलत देखि कहत सब कोऊ । अब हों तो बालकहैं दोऊ ॥  
 सुनत सुता मुख रित्तकी बानी । मनहीं मन कीरति मुसक्यानी ॥  
 तब गहि उर लाई चुचकारी । परबोधति उरसों रिसटारी ॥  
 खेलहु संग लरकिनिन माहीं । खेलनको मैं बरजत नाहीं ॥  
 श्याम संग सुनि होत दुखारी । झूठहि लोग लगावत गारी ॥  
 जाते कुलका दूषण होई । सुनि प्यारी कीजै नहिं सोई ॥  
 अब राधा तू भई सयानी । मेरी सीख लेहि जिष मानी ॥  
 जननीके मुखकी सुनि बानी । श्रीवृषभानु सुता मुसकानी ॥  
 मन मन चिन्तय करत हरि पाहीं । सुनहु श्याम तुम सब घट माहीं ॥  
 दोहा-मात पिता मानत मनहिं, लोक लाज कुलकान ॥  
 नहिं जानत तुमको सुखद, जगत ईश भगवान ॥  
 सो०-लेत तुम्हारी नाव, सकुचति हों इनके निकट ॥  
 यह समझत पछताव, तुमविमुखनमें क्यों रहौं ॥  
 तुम मोहिं कब्यो कानि कुल राख्यो । क्यों विषखाय सुधाजिन चाख्यो ॥  
 जिन्हें नाथ तुम पद दृढ प्रेमा । कैसे तिनसों निबहत नेमा ॥  
 अहो श्याम मैं मन क्रम बानी । नाथ तिहारे हाथ बिकानी ॥  
 ऐसे कृष्ण हृदयमें आनी । बोली जननी सों हँसि बानी ॥  
 तू अब कहति कहा मोकोरी । अकथ बात है माँ कछु तोरी ॥



अब हरि संग न खेलौं जाई । जा कारण तू मोहि सुगाई ॥  
आचनदे बाबा घर माहीं । यह सब बात कहौं उन पाहीं ॥  
देति गारि मोहिं श्याम लगाई । ऐसे लायक भये कन्हाई ॥  
रांकी मोको काल्हि गलीमें । साखिन संगमें जाति चली मैं ॥  
लागे कहन बैसुरिया मेरी । तू लै गई चुराय सो देरी ॥  
छाटि आठैं मोसोंहै जिनसों । मोहिं लगावतिहै तू तिनसों ॥  
सुन सुन कर राधाकी बानी । सुखनिरखत जननी मुखकानी ॥

दोहा-कहति मनहिं मन अबहिलौं, नहींगई लरिकाय ॥

बारेहीके ढंग सबै, अपनी टेक चलाय ॥

सो०-अब जैहै मचलाय, कापै जाय मनाय पुनि ॥

हारि मानि रहि माय, बालक बुधि जिय जानिकै ॥  
बोलि लई हँसिकै दुलराई । पुनि पुनि कहि मेरी रिसहाई ॥  
कंठ लगाय लई अति हितसों । रही चकित शोभालखि चितसों ॥  
चतुर शिरोमणि हरिकी प्यारी । परम चतुर वृषभानु दुलारी ॥  
बातनहीं माता वहराई । नीके राखि लई चतुराई ॥  
कृष्ण प्रेम धन पायछिपायो । संग सखी तिनहूँ न जनायो ॥  
जैसे कृष्ण महा धनपावै । धरत दुराय न प्रगट जनावै ॥  
सखी मिली जो मारग माहीं । कह्यो जायतिन सखियन पाहीं ॥  
सुनहु सखी राधाकी बातें । कैसी आज करी उनधातें ॥  
वृन्दावन ते अबहीं आई । हर्ष सहित मैं लखि मँग पाई ॥  
औरै भाव अंग छविछाई । श्यामहि मिली भई मन भाई ॥  
मोको देखतही हँसि दीनो । मैंहूँ हर्ष मनहिं मन कीनो ॥  
जब मैं कही मिले हरि तोसों । तब रिस करि केन्यो मुख मोसों ॥

दोहा-मोसों तब लागी कहन, कोहरि काको नांव ॥

कै गोरे कै साँवरे, बसत कौनसे गांव ॥

सो०-मैं तो जानत नाहि, लेत नाम तू कौनको ॥



लखे न सपनेहुं माहि, सांच कहति कै हँसति मुहि ॥  
 ऐसे कहि ठेही करि भौहैं । चितईनेकु न मोतन सौहैं ॥  
 वह निधरक मैं खकुच गईरी । और कहाँ तौ करत खईरी ॥  
 तब मैं यह कहि घर पठईरी । मैं सूंठी तू सांच भईरी ॥  
 दोऊ एक भये अब आई । हमहुं सों यह बात चुराई ॥  
 घर धौं जाय कहा अब कैहै । कैसी धौं तहैं बुधि उपजैहै ॥  
 सुनिकै बात सखी मुसुकानी । प्यारिहि देखनको भतरानी ॥  
 कहत सबै जवहीं हम जैहैं । तबहीं जाय प्रगट करिदैहैं ॥  
 कहारहै यह बात छिपानी । दूध दूध पानी सों पानी ॥  
 आंखिन देखतही लखि जैहैं । कैसे हमसों बात छिपैहै ॥  
 अपनो भेद नहीं वह कैहै । सुनिहों कैसे गाल बजैहै ॥  
 लखहु चरित्र जाय तुम बाको । राधा कुँवरि नामहै जाको ॥  
 मैं बूझ्यो करि बहु चतुराई । नेकहु थाह न बाकी पाई ॥  
 दोहा-बड़े गुरुकी बुद्धि पढि, कहूं नहीं पतियात ॥  
 एकौ बात नमानिहै, सौ सौ सौहैं खात ॥  
 सौ०-रहिहैं सब पछिताय, सुनत वचन बाके वदन ॥  
 अब जैहै रिसियाय, बातन बैर बढाइ हो ॥  
 कहा बैर हमसों वह करिहै । बातन कैसे हमहि निदरिहै ॥  
 औरनसों जो करती डारी । तोहमहुं जानती सयारी ॥  
 बाकी जाति भले हम पाई । हमहों सों यह बात चुराई ॥  
 परिहै जब मेरे फंद आई । दूरि क्यों बाकी लंगराई ॥  
 जो नहि हमसत्तन भेद कहैगी । तौ पुनि कैसेकै निवहैगी ॥  
 हमसों बैर किये कह पैहै । बहुरि लिये मटकी शिर ऐहै ॥  
 बलौ सबै देखें बरताको । है निधरक कैधों डर बाको ॥  
 बूझे बात कहा धौं कैहै । हम सों मिलि है कै दूरि जैहै ॥  
 रित करि है कैधों हंसि बोलै । बात छिपावैं कैधों खोलै ॥



सहज स्वभाव किधौं गरवानी । यह कहि चली अली सब स्थानी ॥  
गई निकट राधे के जगहीं । जान गई नागरि मन तषहीं ॥  
ये सब मोपर रिस करि आई । तब इक मनमें बुद्धि उवाई ॥

दीहा-काहूकी कीनी नहीं, आदर करि चतुराई ॥

मौन गही बोलत नहीं, बैठि गई निहुराई ॥

सो०-लखि सब सखी सुजान, बैठि गई ढिन आपई ॥

औरै बात बखान, आपसमें लागीं करन ॥

राधा चतुर चतुर सब आली । चतुर चतुरकी भेंट निराली ॥

उन तौ गही मौन निहुराई । इन लखि लई तासु चतुराई ॥

सुहां चहीं आपसमें कीन्हीं । याकी बात सबै हम चीन्हीं ॥

कहा भेद हमसों यह भाषै । उलटे हमहीं पर रिस राखै ॥

बूझहु याहि सुनट करि कोई । कहा आज इन मौन लघोई ॥

हम सों कहा ओट इन लीन्हीं । साह खई हमहीं कर दीन्हीं ॥

एक सखी तब बिहँसि सुनायो । कहा मौन ब्रत किन सिखरायो ॥

धनि वह गुरु मंत्र जिन दीन्हीं । कान लगतही ऐसो कीन्हीं ॥

कालिह और परभातहि औरै । अर्वाह भई कछु और कि औरै ॥

सुनि यह बात सबै हम धाई । अकित भई देखन तोहि आई ॥

कहा मौन को फल भन कहिये । सुनै कछु सो हम हूं गहिये ॥

इक सँग सबै भई तरुणाई । मंत्र लियो तब हम न तुलाई ॥

दीहा-अब तुमहींको हम करें, गुरु देहु उपदेश ॥

हमहूं राखें मौन व्रत, करें तुम्हें आदेश ॥

सो०-हमको कियो अजान, चतुर भई तू लाडिली ॥

कहँसीख्यो यह ज्ञान, ऐसी विधि लागी करन ॥

रहत एक सँग हम तुम प्यारी । आजहि चटक भई तू न्यारी ॥

कहा भयो तोहि किनहि सिखाई । नई रीति यह कहाँ चलाई ॥

हम तो तेरे हित की करि हैं । और कहै तासों सब लरि हैं ॥



सुनत कुँवरि सखियन की बानी । बोली करत सबै यह जानी ॥  
 गुणगारि नागरी सयानी । बोली सहित निदुरई बानी ॥  
 तुम प्रीतम कै बैरिनि मेरी । वृद्धति तुम्हें कहो सखि हेरी ॥  
 बाको कहति जुगैल मिलीरी । नहीं कही उन मोहिं भलीरी ॥  
 कहाँ मोहिं तुम श्याम मिलेरी । मैं चकरही सोंह मोहिं तेरी ॥  
 मेरे अँगलबि और बताई । तब मैं भई बहुत दुखहाई ॥  
 जिनको मैं सपने नहिं जानो । फिरि फिरि तिनकी बात बखानो ॥  
 मेरो कछु दुराव है तुमसों । तुमहीं कहौ सखी सब हमसों ॥  
 कहाँ रहति मैं कहाँ कन्हाई । घर घर करत चवाव लुगाई ॥

दोहा-और कहै तो मोहिं कछु, नहिं व्यापहि मनमाहिं ॥  
 तुमहीं कहौ जो बात यह, तौ दुख होयकि नाहिं ॥  
 सो०-तुमपर रिस मो गात, ताते आदर नहिं कियो ॥  
 सुन प्यारीकी बात, रहीं सबै मुखतन चितै ॥

बोली एक सखी तिनमाहिं । हम तौ तोहिं कहाँ कछु नाहिं ॥  
 ताही पर होती रिस आई । जिन यह तोसों बात चलाई ॥  
 प्रथमहिं हमें प्रकट यह करती । हमहूँताहीं सों सब लरती ॥  
 क्यों सखि प्यारियदोष लगावै । झूठी बातन वैर बढ़ावै ॥  
 तेरे श्याम कहाँ इन देखे । काहं को सपने हूँ पेखे ॥  
 भेदहिं भेद कहत सब बातें । दैदैं सैन करत सब घातें ॥  
 प्यारी सबके मनकी जानै । सबसों रूखे वचन बखानै ॥  
 कौन कौन को मुख सखि गहिये । जाको जो भावै सो कहिये ॥  
 मनते गहि गहि बात बनावै । झूठीको सांची उहरावै ॥  
 बिना भीतही चित्रित करो । बातन गहि आकाशहि फेरो ॥  
 नेक होय तौ सबहीं सहिये । झूठी सबै सुनत उर दहिये ॥  
 आवत बोल न सुनि सुनि बातें । रहियत मौन सबनते तातें ॥

दोहा-वृथा झेर मोसों करत, कहि कहि झूठी बात ॥

१ गुणको घर ।



भलो नहीं उपहास यह, मैं सकुचत दिन रात ॥  
सो०-मिलै सखी जो श्याम, और कहा याते भली ॥

सुनियतहै अभिराम, नंद महरको सुवन अति ॥  
कैसेहैं वै कुँवर कन्हारि । जिनको नाम लेत यह माई ॥  
नयनन भरि मैं देखे नाहीं । सुनियत सदा रहत ब्रज माहीं ॥  
कहति लजाति बात इक तुमको । इक दिन मोहिं दिखावहु उनको ॥  
देखहुँ धौं कैसेहैं तिनको । तुम सब मोहिं कहति हौं जिनको ॥  
सुनि कृषभानु सुताकी बानी । हँसीं सबै गोपिका सचानी ॥  
सुनुप्यारी तैं सीख हमारी । कहन देहि कहि करै कहारी ॥  
तोको झूठ कहे कह पैहैं । आपन को वै पाष कर्महैं ॥  
यह काहु पै जात छपायो । नेक सुगन्ध न दुरत दुपायो ॥  
तैं काहेको काम्हहि देख्यो । खरक दुहावनहुं नाहिं देख्यो ॥  
सुनहु सखी राधाकी बानी । कहत कछु यह भकथ कहानी ॥  
रहति सदा ब्रज गांव मझारी । इन नाहिं देखेरी गिरिधारी ॥  
जो हम सुनी रही सो नाहीं । ऐसेहि वायु नही ब्रज माहीं ॥

दोहा-सुनु प्यारी अब तोहिं हम, दिखरैहैं नंदनन्द ॥  
तब वदिहैं यह राखिहौ, देखि उन्हें छलछन्द ॥  
सो०- जब ऐहैं इत श्याम, तब हम तोहिं बतायहैं ॥

ताहि देखिहैं बाम, है उनहुं अभिलाष अति ॥  
तब तू चीन्ह लीजियो उनको । कहति नहीं देखे मैं जिनको ॥  
हैं कैसे कारे कै गोरे । सुन्दर चतुर किधौं अति भोरे ॥  
तोहिं देखि ओऊ सुख पैहैं । तेरे हित बांसुरी बजैहैं ॥  
नाना भाव करैगे जबहीं । हम सब तोहिं कहैंगी तबहीं ॥  
तुमहौ चतुर राधिका जैसे । वेऊ श्याम चतुरहैं तैसे ॥  
हँसति कहति सब गोपकिशोरी । चिरजीवहु यह सुन्दर जोरी ॥  
कबहुं तौ फँद परिहौ आई । तबहीं देहिं चिन्हाय कत्ताई ॥

१ सुंदर । २ पुत्र । ३ पवन ।



सुनत व्यंग सखियनकी वानी । मन मन बिहँसत कुँवरि सय नी ॥  
चतुराई नीके गहि राखी । सखियनसों हैंसि ऐसे भाषी ॥  
जो तुम जियमें औरै जानी । मेरी बात प्रतीत न मानी ॥  
जो अब मोहिं श्याम सँग पावो । तब कीजो अपनो मन भावो ॥  
कान्ह पीतपट बेसर मेरी । लीजो छोरि तबहिं गहिपरी ॥  
दोहा-यह सुनिकै सब हैंसि उठीं, प्यारी बदन निहारि ॥

आईही अति गर्ब करि, चलीं सखी वर हारि ॥  
सो०-कहति परस्पर जात, निडर भई अति राधिका ॥

कबहुं तौ हम बात, परिहैं दोऊ आयकै ॥  
तीसहु दिन जो चोर चोरैहैं । साहसु पकरि कहू दिन पैहैं ॥  
बोली एक सखी तब तिनसों । भेद लियो चाहति तुम उनसों ॥  
दूर धरो मनते यह भाई । बैठि रहो अपने घर जाई ॥  
अति बड़ बोल गई कह कीन्हों । कैसी निडर भई कछु चीन्हों ॥  
वह नहिं फन्द तुम्हारे आवै । छन्द बन्द वाके को पावै ॥  
वह सबहिनमें बड़ी सयानी । मेरी बात लेहु तुम मानी ॥  
बोली अपर सखी सुन मोसों । लीक खेंचि भाषत मैं तोसों ॥  
फेर फार देखो हम धरिहैं । ऐसे कैसे हमहिं निदरिहैं ॥  
अबतो भेद कियोहै प्यारी । हमहुं को यह रिसहै भारी ॥  
तब लगि मनमें भीर न लैहैं । जबलग चोरी पकरि न पैहैं ॥  
निशि वासर अब हम सब कोऊ । श्यामा श्याम देखिहैं दोऊ ॥  
आही दिन तिनसों हम लरिहैं । जा दिन नीके पकरि निदरिहैं ॥  
दोहा-सब ब्रज गोपिनके बसी, बात यहै मन आन ॥

हरि राधा दोऊ मिलैं, निशि वासर यह ध्यान ॥  
सो०-सबहिन मुख यह बात, और कछु चरचा नहीं ॥

नन्दमहरको तात, सुता नहर वृषभाजुकी ॥  
यहै चचाव करति सब गोपी । हमसों बात राधिका लोपी ॥

१ विश्वास । २ दूतरी । ३ बेटी ।



लरिकाईते हम सब जाने । कीन्ही प्रीति श्याम सों याने ॥  
 तबसतभाव न हती झुटाई । अब हरि संग सिखी चतुराई ॥  
 आज मौन धरि कियो दुराड । सदा होत किहि भाति बचाड ॥  
 दिन द्वैचार और अब टारो । रहौ स्वभाव शर जनि पारो ॥  
 करन देहु इनको लँगराई । आपुहि बात प्रगट है जाई ॥  
 तब इकसखी कही यों यानी । कहा कहत तुम बात अयानी ॥  
 तुम जु कहति वह जानति नहीं । हैं हम सब वाके नखमाहीं ॥  
 सात बरसते प्रीति लगाई । तुमतो आज जानि है पाई ॥  
 बाकी चतुराई किन जानी । भीन कबहिधौं पोवत पानी ॥  
 हरिके ढंग सिखी सब बोझ । हैं बारह बानी वै दोझ ॥  
 देखहु कालिह केहु पतियानी । फिर आई हम सब खिसियानी ॥

दोहा—ऐसे सब ब्रज सुन्दरी, मिलिकै कराते चवाव ॥

राधा हरि उरमें बसे, और न बात सुहाव ॥

सो०—यह रस जान अनूप, ब्रजवासी प्रभु प्रेमको ॥

करिकै कृष्ण स्वरूप, होय रहीं ब्रजकी तरुणि ॥

श्रीराधा प्रातहि तहँ आई । जहाँ जुरी सब सखिन अयाई ॥  
 आवतिलखि सब रहीं चुपाई । पेखत बदन गई सकुचाई ॥  
 करति हुती उनहीं की बातें । सकुच गई तरुणी सब तातें ॥  
 भवि आदर करिकै बैठारी । कही कहाँ तू आई प्यारी ॥  
 कहा हमारी लुधि तैं लीन्हीं । बड़ी कृपा कछु हमपर कीन्ही ॥  
 मैं कह आज अनोखे आई । तुम जु करति आदर अधिकारी ॥  
 पहुनी करि करिये पहुनाई । भैंतो आवति जाति सदाई ॥  
 कैसी कहति बात तू प्यारी । बैठनको नहि कहै कहारी ॥  
 तू आई करि कृपा हमारे । हमहूँ कहा मौन ब्रत धारे ॥  
 तबहँसि बोली कुँवरि सयानी । करी तर्क भोसों तुम जानी ॥  
 तादिनको बदलो यह कीनों । मोसों दौब आपनो लीनों ॥

१ देखत ।



यह सुनि हैंसीं सकल ब्रजनारी । कहन लगीं सब सुनुरी प्यारी ॥  
 दोहा-दांव घात जानति तुमहिं, हमतौ शुद्ध स्वभाव ॥  
 तोहिं मान आई सदा, तैसे मानति भाव ॥  
 सो०-तुम राखी मन लाय, तादिन बात भई जु वह ॥

हम डारी बिसराय, मानलई तेरी कही ॥  
 चोर सब चोरी करि जानै । ज्ञानी सब मन जानहिं मानै ॥  
 सुनि यह कुँवर मनहि मुखकानी । कछो सखी यह सांच बखानी ॥  
 जैसी जाके मनमें होई । बात कहति मुख तैसी सोई ॥  
 मैं तो सांच कही तुम पाहीं । कैसे धौ हरि जानत नाहीं ॥  
 हरषि सखिन तब उर सों लाई । कहत कहा तू रिस भरि आई ॥  
 हैसति कहति तोसों हम प्यारी । तू मति मानै विलग कहारी ॥  
 तुमहीं उलटी पुलटी भाषौ । तुमहीं रिस करि उरमें राखौ ॥  
 तुमहीं हरिको नाम बखानौ । तबमें सुन्यो कछु तुम मानौ ॥  
 जब हरि संग मोहिं कहूँ लहियो । तब मन भावे सो कछु कहियो ॥  
 अब कैसेहुँ स्नान चलौगी । कैमोसों कछु फेरि लरौगी ॥  
 वहै बात गठ बन्धन कीन्हों । नहिं भूलिहौ जानि मैं लीन्हों ॥  
 गहि गहि सबकी भुजा उठाई । चलहु न्हान कबकी मैं आई ॥

दोहा-यहि विधि हास हुलास करि, सखिन संग सुकुमारि ॥

चली न्हान यमुना नदी, श्रीवृषभानु कुमारि ॥

सो०-सकल रूपकी रास, नव नागरि मृग लोचनी ॥

भरी अनंद हुलास, कृष्ण प्रेममें एक मति ॥

अथ स्नानलीला ॥

चली यमुन सब नवलकिशोरी । कर्नक वरण तनु कोमल गोरी ॥  
 करत परस्पर सब सुकुमारी । हास बिलास कुतूहलभारी ॥  
 गई यमुनतट गोप कुमारी । सँग सोहति वृषभानु दुलारी ॥  
 देखि श्याम जल लहरि सुहाई । पैठों सलिल न्हान अतुराई ॥

१ सुवर्ण । २ घुसी ।



श्यामा सहित न्हात सबनारी । विहरत जल विहार सुखकारी ॥  
 कण्ठ प्रमाण नीरमें ठाहीं । छिरकत जल अतिआनंद वाहीं ॥  
 करति विविध विधि हास बिलासा । एक एक गहि करति हुलासा ॥  
 लैलै कर सों नीर उछारैं । निरखि परस्पर सुख पर डारैं ॥  
 भानों शशि सेना सजि आयें । लरत जलजल अस्त्र बनायें ॥  
 सुनि तहँ श्याम युवति मनरंजन । आयें कोटि काम युति भंजन ॥  
 निरखत तट ठाढ़े छवि भारी । यमुना जल विहरत ब्रज नारी ॥  
 कबहुँ मधुर कल वेणु बजावैं । नान्हें सुरन माहिं कलु गावैं ॥  
 दोहा-काछे नटवर भेषवर, चित्रित चन्दन अंग ॥

ठाढ़े उमंगि कदम्बते, कीने अंग त्रिभंग ॥  
 सौ०-तब वन सुन्दर श्याम, ब्रजतियमन चातकसुखद ॥  
 नख शिख अति अभिराम, ध्यान काम पूरण सकल ॥

पदनख इन्हुँ प्रभा युतिहारी । चरण कमल शीतल सुखकारी ॥  
 जालु जंघ अति सुभग सुहाई । करभरम्भलखि रहत सदाई ॥  
 कटि पटपीत काछनी काछे । केसर कमलन पटतर आछे ॥  
 क्षुद्रावली कनकछवि छाई । नाभिगँभीर वरणि नहि जाई ॥  
 मनहुं मराल बालकी भ्रंभी । सरँ समीप सोहति सुखदेनी ॥  
 बडे बडे मोतिनकी माला । बिचरोमावलि झलकि विशाला ॥  
 मनहुं गंग बिच यमुना आई । चली धार मिलि तीन सुहाई ॥  
 बाहुदंड दोउ तट कमनीया । चन्दन अंग रेत रमनीया ॥  
 बनमाला तर तीर सुहाये । फूलि रहे पचरँग छवि छाये ॥  
 कम्बु कण्ठ त्रय रेख सुहाई । तीनि भुवन शोभा जनु छाई ॥  
 चिहुँक चारु गाढो मन मोहै । मुख छवि सिन्धु भँवर जनु सोहै ॥  
 अधरदशन युति वरणि न जाई । तडितविम्ब कहँ वह छवि छाई ॥  
 दोहा-शुकें नाशा खंजन नयन, भुकुटि काम कोदंड ॥

१ चंद्रप्रभा । २ केला । ३ हंस । ४ पांति । ५ सरोवर । ६ शंख ।

७ ठोड़ी । ८ बीजरी । ९ कुंदरु । १० तोता ।



मणिकुंडल रवि छवि हरत, सोहत शीश शिखंड ॥  
 सो०-उपमा गई लजाय, निरखि इयामको रूपवर ॥  
 जहँ तहँ रहीं छिपाय, पटतरको पहुँची नहीं ॥  
 उपमा हरितन देखि लजानी । दुरी भूमि कोड बन कोउपानी ॥  
 कोटि मदन अपनो बलहारे । मुकुट लकुट भ्रूमटक निहारे ॥  
 कुंडल निरखि भ्रमतरबिरहहीं । तपन हृदय क्षण धीर नगहहीं ॥  
 अलक नाशिका कर पद नयनन । अलिशुक कमल मीन खंजनगन ॥  
 लखि सकुचाय रहत बन माहीं । कहत हमैं कवि कहत वृथाहीं ॥  
 दशन दमकदामिनिलजानी । क्षण प्रकटत क्षण रहत छिपानी ॥  
 समुझत सधर अधर अरुणार्द्र । विद्रुम बंधू बिम्बलजाई ॥  
 गगन रह्यो शशि वदन निहारी । घटत घटत नित शीघ्रत भारी ॥  
 चारुकंठ लखि अति सकुचानो । रहत शंख जल मांझ छिपानो ॥  
 बाहु देखि अँहि विवर समाने । केहरि कटि लखि वनहिपराने ॥  
 गज गति गुलफ निरखि सरमाई । झंझी आंख न सकत उठार्ई ॥  
 निज इच्छा छविहरि बहु धारी । दीनी पटतर भेटि मुरारी ॥  
 दोहा-अनुपम छवि कवि क्यों कहै, बिन उपमा आधार ॥  
 ब्रजतिय मोहन मनहरण, सुन्दर नंदकुमार ॥  
 सो०-अधर मनोहर वेन, मन्द मन्द बाजत मधुर ॥  
 उपजावत मन मैत्र, ब्रजसुन्दरि नव नागरिन ॥  
 जल विहार करि गोप किशोरी । निकरि चली तटको सब गोरी ॥  
 जानु जंघ जललों सब आई । जुवत नीर अचरन छवि छाई ॥  
 परे दृष्टि मोहन तट माहीं । ठाढ़े कदम बिटपकी छाहीं ॥  
 प्यारी निरखत रूप लुभानी । पंगु भई मति गति बहरानी ॥  
 इतहि लाज सखियनकी आई । दरशन हानि न उत सहिजाई ॥  
 मनाई ज्ञान करियह अनुमानी । लेहैं आज सखी सब जानी ॥

१ मोरपच्छ । २ भौरा । ३ मृगा । ४ दुपहरियाको फूल । ५ कुंदुरु ।

६ आकाश । ७ सर्प । ८ सिंह ।



जानि गई यह अली सयानी । जानि बूझि सब भई अयानी ॥  
 बहुरो न्दान लगीं सब पानी । रहीं इतैं करि आना कानी ॥  
 प्यारी कबहुं श्याम तनुहेरैं । कबहुं दृष्टि सखिन ते फेरैं ॥  
 जानी सबै न्हात जल माहीं । मेरी दिशि चितवत कोउ नाहीं ॥  
 तब मनमें यह बात विचारि । देखिलेहुं अब छवि गिरिधारी ॥  
 यह दरशन कबधौं फिरि होई । ललकि लगीं अँखियां हठिदोई ॥  
 दोहा-निरखति श्यामा श्याम छवि, पार निमेषन मोर ॥

नैन बदन शोभित मनो, दैशशि चारु चकोर ॥  
 सो०-करत मुदित दोउ पान, रूप माधुरी अभियरस ॥

तूत न क्यों हूँ मान, विवश भये मन दुहुँनके ॥  
 यद्यपि सकुच सखिनकी गाढी । तद्यपि रुकी न चितवन बाढी ॥  
 उमँगि गई सरिताकी नाहीं । सन्मुख श्याम सिंधुके माहीं ॥  
 भरी सलिल अनुराग अथाहा । भँवर मनोरथ लहर उछाहा ॥  
 कुल मर्याद करार ढहाये । लोक सकुचतरु तीर बहाये ॥  
 धीरजनाब गही नहिं जाई । रहे थकितपल पथिक डराई ॥  
 इकटक घोर अखंडित धारा । मिली श्याम छवि सिंधु अपारा ॥  
 कहति सखी सब आपस माहीं । नयनसैन दैदैं मुसकाहीं ॥  
 देखहुरी प्यारी उत अटकी । नाजानिये कौन अँग लटकी ॥  
 काल्हि हमहिं कैसे निदरी है । मेरे चित अब छुटक परीहै ॥  
 बात कहत भेलै मुख तुलसी । देखहु अब देखत किमि हुलसी ॥  
 सुन्दरि पियके रूप लुभानी । वे बातें अब सबहिं भुलानी ॥  
 इकटकरही नेक नहिं मटकी । कोजानै काहूके थटकी ॥

दोहा-भई भाव भोरे कछु, देखतही सुखदाय ॥  
 चित्र पूतरी सी रही, देहदशा बिसराय ॥

सो०-उत वे रहे लुभाय, नागर नवलकिशोर बर ॥  
 प्यारी मुख दगलाय, नैन नहीं मटकत कहूँ ॥



औरै भाव भई सखि प्यारी । बहयो प्रेम अंकुर तरुभारी ॥  
 गई तासु जर सप्तपताला । पहुँच्यो अंतर शिखर विशाला ॥  
 वचनपत्र अवलोकन शास्त्रा । सब जग छांह छई अभिलाषा ॥  
 गुणविधि सुमन सुगंधि निकाई । लगीजाइ आनंद सुहाई ॥  
 पूरण आसनवनि भरभारा । फललाग्यो बर नंदकुमारा ॥  
 रहे रीझ तन मन धनवारै । अरस परस दोउ खूबनिहारै ॥  
 तब इकसखी कह्यो सुसकाई । प्यारी देखे कुँवर कन्हारै ॥  
 वैईहै सुन्दर सुखदाई । जिनकी ब्रजमें होत बड़ाई ॥  
 हमैं कहतही मोहिं दिखावहु । देखिलेहु अब मन सुखपावहु ॥  
 बहुत लालसाही मनतेरे । ताहीते हरि आय नरे ॥  
 पूजी आशदरश अबपाये । हमहीं इनको बोलि पठाये ॥  
 राखौ चीन्हि इन्हें अबनीके । ये मनभावनहैं सबहीके ॥

दोहा-भले शकुन आई इहां, भयो तुम्हारी काज ॥  
 अब कलु हमको देहुगी, मिले तुम्हें बजराज ॥  
 सो०-भयोनागरिहिशोच, सुनि सुनि सखियनकेवचन ॥  
 कहत करी मैं पोच, इन जानी अब बात सब ॥

मैं हरितन लखि रूपलुभानी । लोये देखि सबै सुसकानी ॥  
 कालिहकही इनसों मैं वैसे । देखी आज मोहिं इन ऐसे ॥  
 इन आगे मोवात नशानी । अबये करत मोहिं बिनपानी ॥  
 मोहीं पर मेरी चतुराई । परी उलटि उरअति सकुचाई ॥  
 कहत सखिनसों ज्वाब न आयो । तब मनमें हरि पियको ध्यायो ॥  
 भहो श्यामसुन्दर सुखदानी । मैं प्रभु तुम्हरे हाथबिकानी ॥  
 अब सहाय सुंदर तुमकीजै । मेरी बात नाथ रखलीजै ॥  
 ऐसा उत्तर देहु जनाई । जाते मेरी पति रहिजाई ॥  
 ऐसा हरिको सुमिरि सयानी । तबइक बात मनहिं मनडानी ॥  
 डरमें भयोबुद्धि परकाशा । तबकीन्हो मनमाहिं हुलासा ॥



सखि कह्यो अवसर चल प्यारी । भई यमुनतट बहुत अवारी ॥  
कवकीन्हात इहां हम आई । ऐसे कहि कहि सब पछिताई ॥  
दोहा-कियो दरश तुम श्यामको, वर चलिहौ कै नाहि ॥  
चीन्हिरहौ मिलियो बहुरि, यह कहि सब मुसकाहि ॥

सो०-तब सखियनके साथ, चली सदनको नागरी ॥

उरमें धरि ब्रजनाथ, प्रेम भगन बोली नहीं ॥  
हैंसि बृक्षति इक गोपकुमारी । कहो श्याम कैसे हैं प्यारी ॥  
भायेरी तेरे मनमाहीं । हैं सुन्दर कछु कैंधों नाहीं ॥  
कै हमसों फिरि बात लुं कैहौ । कै अब मनकी सांच जनैहौ ॥  
हम वरणो जैसे तुहि पाहीं । कहु तैसे हरि हैं कै नाहीं ॥  
कहति मनहि वृषभाजु दुलारी । मेरे ख्याल परों सब ग्वारी ॥  
बातन बातन करति उधारी । ये चाहति अवहीं निरवारो ॥  
मोहूं ते ये चतुर कहावैं । मोको बातन मांझ मुलावैं ॥  
ऐसे इनसों बचन बखानो । इनको चातुरता गहिमानो ॥  
मेरे शिर समरत्थ कन्हाई । कह करि हैं मोसों चतुराई ॥  
प्यारी पियके गर्वगहेली । अङ्ग अङ्ग सुख पुंज भरेली ॥  
मन्द मन्द गति हंस सुहाई । पगद्वै चलत ठठकि रहिजाई ॥  
भगन श्यामरस मुख नाहि बोलै । धरणी चरण नखन करि छोलै ॥

दोहा-चितवत सूधे नैकनहि, काहू तन अनखाय ॥

रही गर्वपिय श्यामके, गरबीली गरवाय ॥

सो०-सखिन कह्यो मुसकाय, क्यों प्यारी बोलत नहीं ॥

कै हमसों अनखाय, लियो मौनव्रत आज पुनि ॥

कै कछु बात कही नहि जाई । कै तेरो मन हन्यो कन्हाई ॥  
कबहुं जान पहिचान न तेरी । देखतही दृगति नहि ठरेरी ॥  
सांची बात कहौ अब प्यारी । शौच पन्यो मन तोहि कहारी ॥  
कहा रहीही हरिहि निहारी । इकटक नैन निमेष विसारी ॥



सुनि सुनि सब लखियनकी बानी । बोली हरि आवती सयानी ॥  
 कहा कहति तुम बात अलेखे । मोसों कहति श्याम तुम देखे ॥  
 मैं देखे कैधों नाहि देखे । तुमतौ बार हजारकपेखे ॥  
 तुमहीं हरिको रूप बतावो । मो आगे सब कहि समुझावो ॥  
 कैसे वरण भेष हैं कैसे । अङ्ग अङ्ग वरणौ तुम तैसे ॥  
 तब इक सखी कह्यो सुस्तकाई । हमतौ ऐसे लखे कन्हाई ॥  
 छंद वंद कछु हमहिं न आवै । सांची बात सबनको भावै ॥  
 देखे हम नैदनंदन जैसे । वरणि बतावहुँ तुमको तैसे ॥

दोहा-श्याम सुभग तनुपीतपट, चढकीलौश्रुति कारि ॥

शोभित धन पर दामिनी, मनु चपलई विसारि ॥

सौ०-मंद मंद सुखदात, गर्जत मुरली मधुर ध्वनि ॥

चितवत अरु सुसकात, वर्षत परमानंद जल ॥

बिबिध सुमन दल उरमें माला । इंद्र धनुष मनु उदित विशाला ॥  
 सुक्तावली बीच मनमोहैं । बाल मराल पांति जलु सोहैं ॥  
 अंग अंग छवि रूप सुहाई । कदमतरे शोढे सुखदाई ॥  
 देखत मोहन वदन विभागा । उपजत है अँखियन अनुरागा ॥  
 लोचन नलिने नये छवि छाजैं । तामधि पुतरी श्याम बिराजैं ॥  
 मनहुँ पुगल अलि भाग निबारे । पियत मुदित मकरंद सुखारे ॥  
 तामहैं चितवनमें जु सुहाई । गूढ भाव सूचित सुखदाई ॥  
 अधर बिम्ब जनु दाडिमदाना । शुक नासिका देखि ललचाना ॥  
 भुकुटी धनुष तिलक शिरधारी । मानहुँ मदन करत रखवारी ॥  
 मोर चन्द्र शिर सुमन सुहाये । काम शरन मनु पक्ष लगाये ॥  
 गडत आनि युवतिन मन माहीं । निकसत बहुरि निकासे नाहीं ॥  
 वारिजवदन मनोहर बानी । बोलन मनहुँ सुधारस सानी ॥  
 दोहा-कुंडल झलक कपोल छवि, भ्रम सीकरके दाग ॥

मानहुँ मनसिजमकरमिलि, क्रीडत सुधातडाग ॥



सो०—भरे रूप रस राग, ऐसे शोभाके उदधि ॥

चिन अँखियनकोभाग, अवलोकत हरिकोवदन ॥

अँग अँग सब छबिके जाला । हम देखे इहि भाँति गोपाला ॥  
 कछु छल छिद्र नहीं हम जानैं । जो देखें सो साँच बखानैं ॥  
 साँचहि झूठ करै जो कोई । तो वह झूठ आपही होई ॥  
 हम इतननिमें नहीं दुराऊ । कहत यथार्थ सब सतभाऊ ॥  
 यामें जो कोउ झूठी मानैं । ताकी बात विधाता जानैं ॥  
 हम तौ श्याम निहारे ऐसे । तोहि लगै प्यारी कहु कैसे ॥  
 तुम देखे मैं साँच न मानौं । अपनी सी गति सबकी जानौं ॥  
 जिनको बार बार कछु नाहीं । द्वै अँखियन देखे किमि जाहीं ॥  
 जो तुम सब अँग अँग निहारे । धनि धनि तो ये नैन तिहारे ॥  
 मैं तौ लखि इक अँग भुलानी । भरि आयो दोउ अँखिन पानी ॥  
 कुंडल झलक कपोलन छाहीं । रही चकित उतनेके माहीं ॥  
 रुंधे नीर नैन टकलाई । पहिचाने नहिं नेक कन्हाई ॥  
 दोहा—मैं तबते अपने मनहिं, यहै रही पछिताय ॥

देखनकोछवि श्यामकी, चाहियत नयन निकाय ॥

सो०—अतिछवि अँखियांदोय, उमँगि चलत तापर सलिल ॥

कैसे दरशन होय, सखी श्यामके रूपको ॥

द्वै लोचन तुम्हरे द्वै भरे । तुम देखे हरि में नहिं हेरे ॥  
 तुम भति अँग विलोकन कीन्हों । मैनीके एकौ नहिं चीन्हों ॥  
 काहू को षटरस नहिं भावै । कोउ भोजन को दुखपावै ॥  
 अपने अपने भाग्यनिकाई । जो बाँधे सोइ लुनै बनाई ॥  
 जैसे रंक तनक धन पाये । होत निहाल आपने भाये ॥  
 मोहिं तुम्हैं अंतर है भारो । धनि तुम सब हरि अँगनिहारे ॥  
 तुम हरिकी संगिनि ब्रजबाला । ताते द्रश देत नँदलाला ॥  
 सुनहु सखी राधा चतुराई । आपहि निंदति हमहिं बड़ाई ॥

१ समुद्र । २ नेत्र । ३ प्रत्येक अँग ।



आपुन भई रंक हरि धनको । हमैं कहति धनवंत सबनको ॥  
हम हरिकी संगति सब ग्वारी । आपुहि निर्मल होत नियासी ॥  
धनि धनि धनि लाडिली पियारी । धुक धुक धुक धुक बुद्धि हमारी  
तू पूरण हम निपट अधूरी । हमहि असंत संत तू पूरी ॥

दोहा--धनि धनि तेरे मात पित, धन्य भक्ति धनि हेत ॥

तैं पहिचान्यो श्यामको, हम सब ग्वारि अचेत ॥  
सो०--धनि यौवन धनि रूप, धनि धनि भाग सुहागतव ॥

तू मोहन अनुरूप, चिरजीवहु जोड़ी अचल ॥

जैसे तैं हरि रूप बखान्यो । हैतैसोई यह हम जान्यो ॥  
देखन को हरि रूप उजैरी । आंखि चाहिये जैसी तेरी ॥  
तैं जु कहत लोचन भरि आये । सो हरि तेरे नयन समाये ॥  
अति पुनीत स्थल शुभ जानी । करी श्याम अपनी रजधानी ॥  
कियो बासहरि तुव दग माहीं । और बात दूजी कछु नाहीं ॥  
ऐसे श्याम संग ब्रजवाला । कहति परस्पर गुण गोपाला ॥  
तहां अचानक हरि पुनि आये । कटिकछनी नट भेष बनाये ॥  
मुरली अरुण अधर पर राजै । कल ध्वनि मन्द मनोहर बाजै ॥  
आप गये तिरछे मन माहीं । भावा धीन सकत रहि नाहीं ॥  
तहतमाल तनु तरुण कन्हारै । ठाढ़े भये आय सुखदारै ॥  
थकित भई सब ब्रजकीबाला । लगिं विलोकन नँदकोलाला ॥  
दोहा--रत्न जटित पग पाँवरी, नूपुर मन्दरसाल ॥

चरण कमल दल निकट मनु, बैठे बाल मराल ॥

सो०--उदितचरणनख चंद, जनुमणिग्योम प्रकाशकरि ॥

सुर नर शिवमुनि वृन्द, विरहताप ब्रजतियहरण ॥

जानु काम शत लबिन सँवारे । युवतिन करि मन बुद्धि विचारे ॥

युगल जंघ छबि परम पुनीता । रंभो खंभ मनहुँ विपरीता ॥

१ जोड़ी । २ हंस । ३ सूर्य । ४ केरा ।



ठाढे धरणि एक पगलाये । कंचन दण्ड एक लपटाये ॥  
 तनु त्रिभंगकी लटक सुहाई । अटकिरही युवतिन मन भाई ॥  
 ब्रज युवती हरि पद मन लाये । निरखति मुनि दुर्लभ सचुपाये ॥  
 कुलिशाकुश ध्वज चिह्न निकार्ई । इकटक रहीं चितै चितलाई ॥  
 अरुण तरुण पङ्कज दल चारू । मानहु सुखमा करत विहारू ॥  
 कटिकेहरिकी काटिहि लजावै । सूक्ष्म सुभग कहति नहि आवै ॥  
 तापर कनकमेखला सोहै । मणिन जटित सुन्दर मनमोहै ॥  
 मनहुं बालकन सहित मराला । बैठे पंगति जोरि रसाला ॥  
 किधौं मदनके सदन सुहाई । बांधी बंधन वारि बनाई ॥  
 ब्रजतिय निरखि २ सुख लेहीं । नैनन पलक परत नहि देहीं ॥

दोहा-शोभित नाभि गँभीर अति, मानहुँ मदन तड़ाँग ॥

रोमावलि तटपर लसत, रस शृंगारको बाग ॥

सो०-ब्रजतिय रहीं निहारि, शोभा नाभि गँभीरकी ॥

मन नहिं सकतिनिवारि, पर्योजाय गहरे खसकि ॥

उदर उद्गार वरणि नहिं जाई । रोमावलि तापर छबि छाई ॥  
 रही अटक छबि तासुनिहारी । परखत वनत न निरखत नारी ॥  
 कोऊ कहति कामकी सरनी । कोऊ कहति योग नहिं बरनी ॥  
 कहति एक अलि बालक पांती । जुरि बैठे सब एकहि भांती ॥  
 कोऊ कह नीरह नील सुहाई । सूक्ष्म धूम वार छबि छाई ॥  
 एक कहति यह रँविकी जाई । मरकत गिरि उर से प्रगटाई ॥  
 उदर भूमि शोभित सोइ धारा । जाति नाभि हृद अगम अपारा ॥  
 दुहुँ दिशि फेन स्वाति सुँत माला । उपजत सुखमय लहर विशाला ॥  
 शोभा वरणि सकति ब्रजनारी । रहीं विचारि विचार विचारी ॥  
 उर मुक्तनकी माल विराजै । तामधि कौस्तुभ मणिछविछाजै ॥  
 निर्मल नभ मानहु उर्बुराजी । शशिहि घोरि बैठी छवि साजी ॥

१ वज्र । २ अंकुश । ३ कंधनी । ४ तालाव । ५ बादर । ६ यमुना । ७ मोती ।

८ तारागणनकी पंक्ति ।



भृगु पद देखि श्याम उर माहीं । मनहुँ भेव भीतर शशि छाहीं ॥  
 दोहा-पीत हरित सित अरुणरँग, चटकीली वनमाल ॥  
 प्रफुलित है छबिकी बँवरि, मानहु चढी तमाल ॥  
 सो०-छवि बरणी नहिं जाय, कंठु कंठ मणि कंठकी ॥  
 ब्रजतियरहीं लुभाय, हरि उरवर शोभा निरखि ॥  
 वृषभ कंध भुज दण्ड सुहाई । निंदत अहिगजशुंडि निकाई ॥  
 कर पल्लवन मुद्रिका सोहै । बाहु विभूषण लखि मन मोहै ॥  
 जलु शृंगार विटपकी डारी । फूल रही उपजतछवि भारी ॥  
 हरि मुख निरखत गोपकुमारी । पुनिपुनि प्रणम करतिबलिहारी ॥  
 कहति परस्पर अति मन लोभा । देखहु सखी मदनकी शोभा ॥  
 चिबुक चारु अधरन अरुणाई । पान रेख तापर छवि छाई ॥  
 मंद हँसन न्युति दशन निकाई । उपमा कापै जात बताई ॥  
 अनुपम छविचित लेत चुराये । जगमोहनी हमारे भाये ॥  
 गोल कपोल अमोल नवीने । मानहुँ सुकुरै नील मणि कीने ॥  
 बाजत मुरली करकी फेरन । चंचल नयन चपलकी हेरन ॥  
 मणिन जाटत कुंडलकी डोलन । प्रतिविम्बत सब सुकुर कपोलन ॥  
 सो छवि कापै जात बखानी । लखि ब्रज तिय बिन माल बिकानी ॥  
 दोहा-सुभगनाशिका चपलदृग, कुटिल भुकुटिकीरेख ॥  
 जनु युग खंजन बीचशुक, उडि न सकतचनदेख ॥  
 सो०-धुंधुरारैकच श्याम, वारिजँमुख टिग भ्रमरजनु ॥  
 शीश सुकुट अभिराम, कोटि काम शोभाहरन ॥  
 रूप सुधानिधि वदन विराजै । दुहुँ कर अधर मुरलिका बाजै ॥  
 मानहुँ युगल कमल पद माहीं । लेत भराय सुधा शशि पाहीं ॥  
 हरि मुख निरखत नयन भुलाने । इकटकरहै तृप्ति नहिं माने ॥  
 योषकुमारि लखति नंदनन्दन । श्याम सुभगतनु चित्रित चन्दन ॥  
 कनक वरण पटपीत विराजै । देखि सखी उपमा यह रँजै ॥

१ शंख । २ सर्प । ३ वृक्ष । ४ दर्पण । ५ तोता । ६ वार । ७ कमल । ८ छाजे ।



निर्मल गगन शरद वनमाला । तापर स्थित दामिनि जाला ॥  
 अंग अंग छविपुञ्ज सुहाये । निरखति युवती जन मन लाये ॥  
 कोऊ भाल तिलकछवि अटकी । मुकुट लटक छवि परकोउलटकी ॥  
 कोऊ अलक लखति चितलाई । कोउ लखि भुकुटि सुरति विसराई ॥  
 कोउ लोचन छवि लखिललचानी । चितवनमें कोऊ उरझानी ॥  
 कोऊ कुंडलझलक लुभानी । कोउ कपोलद्युति निरखि बिकानी ॥  
 कोउ नाशा कोउ अधर निकाई । कोउरद चमकनि मांझ भुलाई ॥  
 दोहा-कोउ बोलति कोउ मृदु हँसति, कोउ मुरली ध्वनिलीन  
 कोउ मुरली पर ग्रीव कोउ, लटकन पर आधीन ॥  
 सो०-चारु चिबुक दर ग्रीव, कोऊ गडि तामें रहीं ॥  
 हरि मुख शोभा सीव, थकीं निरखि जहँ सो तहां ॥  
 कोउ सुंदर उरबाहु विशाला । निरखि थकीं कोउ भूषण वाला ॥  
 कोउ कटि कोउ पट पीत निहारी । जंघ मुल्लपर कोउ बलिहारी ॥  
 युगल कमल पदनखकी शोभा । ब्रजवासी जन मनकी लोभा ॥  
 हरि प्रति अंग निरखि ब्रजनारी । देहगेहकी सुरति विसारी ॥  
 अति आनन्द भगनमन भूली । शशिमुख लखि जल कुमुदिनि फूली ॥  
 किधौं चकोर रहे टकलाई । पियत सुधा छवि शीतलताई ॥  
 कैरवि कुंडल छविहि निहारी । विकसत कमल मदन बरनारी ॥  
 कैचकई गण मन सुखमानी । निरखिरहीं अति रति हर्षानी ॥  
 कैधौं नव वनतन छवि देखी । भये चातकी मुदित विशेषी ॥  
 किधौं मृगी मुरली ध्वनि मोही । श्याम लखति युवती द्रुम सोही ॥  
 हरि छवि अरुझनिमें अरुझानी । सुरझन सकति युवति बिततानी ॥  
 रूप राशि सुखराशि कन्हाई । प्रेम राशि जनके सुखदाई ॥  
 दोहा-छविसागर सुखकी अवधि, गुण मंदिर रसखान ॥  
 मोहि लियो मनतियनकी, रसिक नरेश सुजान ॥  
 सो०-मुरली मधुर बजाय, प्यारी प्यारी नाम कहि ॥



अनुपम छवि दरशाय, गये सदन आनंदधन ॥  
 रहीं ठगीसी गोपकुमारी । मन हरि लेगये नवल विहारी ॥  
 पुनि पुनि कहति भई सुख भारी । धनि धनि राधा कुँवारी सयानी ॥  
 बड़ भागिनितोसों नहि प्यारी । तेरेही वशरी गिरिधारी ॥  
 धनि धनि श्याम धन्य तू श्यामा । धनि जोरी धनि प्रीतिललामा ॥  
 एक प्राण द्वैदेह तुम्हारे । तुमबिन रहि न सकत हरि न्यारे ॥  
 तोको देखि बहुत सुख पावैं । मुरलीमें तेरे गुणगावैं ॥  
 तेरी प्रीति साँच हरि जाने । ताते तेरे हाथ बिकाने ॥  
 मन वच क्रम निर्मल तू प्यारी । दुराचारनी हम सब नारी ॥  
 जैसे घट पूरण नहि डोलै । होय अवधिलौ सोढकढोलै ॥  
 परमसुजान नारि हैं धीरा । राख्यो परखि हृदय हरि हीरा ॥  
 धनी न अपने धनहि बतावैं । धरतछिपाय न प्रकट जतावैं ॥  
 धन्य सुहाग भाग्य तुव प्यारी । कृष्ण सदा पति तूहै नारी ॥  
 दोहा-सुनि सुनि वाणी सखिनकी, प्यारी जिय अनुराग ॥  
 पुलकि रोम गद्गद हियो, समुझि आपनो भाग ॥  
 सो०-वचन कह्यो नहिजाय, प्रीति प्रकट चाहत कियो ॥

हरि उर रहे समाय, बाहर करत प्रकाश नहि ॥  
 सुनहु सखी तुम करति बड़ाई । सुनि सुनि मेरो मन सकुचाई ॥  
 मोहि कहति श्यामहि तैं जान्यो । हरिको भले परखि पहिचान्यो ॥  
 तबते यही शोच मन माहीं । कैसे हरि पहिचाने जाहीं ॥  
 नयन दोय छवि अमित अगाधा । तापर पलक करतिहै बाधा ॥  
 क्षणहीं भरि आवत पानी । श्याम स्वरूप परै किमि जानी ॥  
 रोम रोम अँग लखिये कोई । पलक परत औरै छविहोई ॥  
 क्षण क्षणमें शोभा पलटावै । कहौ सखी उर कैसे आवै ॥  
 देखनको दृगँ अति अकुलाहीं । प्रगट लखत पहिचान न जाहीं ॥  
 यह सखि नहीं परति कछु जानी । विरह सँयोग लाभ कै हानी ॥





कै दुख सुख कै समरस होई । सुहिं समुझाय कहौ सखि साई ॥  
 घृतते होम अग्नि रुचि जैसे । मिटति नहां नयननिगति तैसे ॥  
 उत छबिखानि नई छविवाने । इत लोभी दृग तुम नमाने ॥  
 दोहा-बिन पहिंचाने कौन विधि; करौं श्याम सों प्रीति ॥

नहिं वह रूप न भाव वह, क्षण क्षण औरै रीति ॥  
 सो०-यह जानी मैं बात, हैं आनंदकी खानि हरि ॥  
 पहिंचाने नहिं जात, कहा करौं द्वैलोचननि ॥

बड़ो क्रूर विधना यह आली । समझ परी देखत वनमाली ॥  
 कर पद उदर ग्रीव कटिकीनी । मुखरद श्रुति नाशा शुभ दीनी ॥  
 भाल शिखर नख केश बनाये । अधर जीव अरु वचन सुहाये ॥  
 रचि पक्षि रुचिर अंग सब कीनि । रोम रोम प्रति नयनन दीने ॥  
 जो ब्रज दीनो जन्म हमारो । देखन को मनमोहन प्यारो ॥  
 तौ कत नयन दिये शठदोई । विधि ते निठुर और नहिं कोई ॥  
 जो विधना को वशकर पाऊं । तो अब पद्धति और चलाऊं ॥  
 रोम रोम प्रति नैन बनावैं । इकटकरहैं पलक नहिं लावैं ॥  
 तौ कछु बनै कहौ सखि तेरो । होय मनोरथ पूरण मेरो ॥  
 हरि स्वरूप लखि जानि न जाई । वह छवि द्वै लोचन न समाई ॥  
 मैं पचिह्वारि रही बहुतेरो । एकहु अंग न नीके हेरो ॥  
 जो देखौं तौ प्रीति करोरी । देखन हीकी साधन गोरी ॥  
 दोहा-दुरत दुराये कौन विधि, सखि तुम सों यह बात ॥

देखे बिन नंदनन्दके, धीरज धरत नगात ॥  
 सो०-उड़यो फिरत दिनरात, इन नयननके संग लगे ॥  
 क्षण नहिं मग ठहरात, आकरुई जिमि वात वश ॥  
 सुबुरी सखी वशा यह मेरी । जबते हरि मुरति मैं डेरी ॥  
 संगहि फिरौं दरशनहि पाऊं । मनहीं मन पुनि पुनि पछिताऊं ॥  
 जब मैं अपने जिय यह आनों । निकट जाय हरि छवि पदचानों ॥  
 तब प्रतिबंध मेरोई आई । होत तहां मोको दुखदाई ॥



मेरे मन हरि मूरति भावै । सन्मुख दृष्टि तहां यह आवै ॥  
 मेरिय देह होत मुहि बैरी । कितौ दुरावति दुरत न हैरी ॥  
 मैं अंतर तजि लखत कन्हाई । यह अति अंतर देत बढाई ॥  
 सखी दोष नहि काहू केरो । करत श्याम यह सब झकझरो ॥  
 नीके दरशन कबहुं देहीं । नइ नइ छवि करि मन हरि लेहीं ॥  
 चपला हूते चपल बनेरी । दशन चमक चौंधत है षरी ॥  
 कबहुं अंगन सुकुरे बनावैं । कबहुं कोटि अंग लजावैं ॥  
 कैसे सब छवि देखि जुपड़ेये । कौन भाति यह साध पुरइये ॥  
 दोहा-भगन दरशरस लाड़िली, पुनि पुनि पुलकित गात ॥

तृप्त नमानति देखि छवि, कहत लखे नहि जात ॥  
 सो०-लीनो सखियन जान, हरि रंग राती लाड़िली ॥

सुंदर श्याम सुजान, रोम रोम याके रमे ॥  
 कहति धन्य प्यारी बड़भागी । नीके तूहरि सँग अनुरागी ॥  
 तूहै नवल नवलहरि ओऊ । रूप अगाध सिन्धु तुम दोऊ ॥  
 हम जानी यह बात अगाधा । तू हरिकी भर्झनिनि राधा ॥  
 मिले तोहि करिकृपा कन्हाई । दिये सकल दुख दूर मिटाई ॥  
 कहुप्यारी हमसों अबसांची । कहेबने यह बात नकांची ॥  
 छांड़िदेहु अब यह चतुराई । कहां मिले कहु तोहि कन्हाई ॥  
 खरकमिले कै कुंजन माहीं । कै दधिबेचन जात जहांहीं ॥  
 कै जब उरंग डसमते बाची । कहु कैसे तू हरि रंगराची ॥  
 सुनि सखियन की बात सयानी । बोली परम नागरी वानी ॥  
 कबरी श्याम मिले नहि जानौ । सुनहु सखी मैं सांच बखानौ ॥  
 गृह बन कुंज सुरति नहि मोहीं । दधि बेचन कै खरकबिमोहीं ॥  
 आजकै काल्हि कहैं कह आली । कियो बास उरमें वनमाली ॥  
 दोहा-नयननते क्षण टरत नहि, नीके लखे न जात ॥

कहा कहौं तुमसों सखी, यह अचरजकी बात ॥

१ दांत । २ दर्पण । ३ काम । ४ सर्प ।



सो०—मिले मोहिं जबदयाम, सुनो सखी तुमसों कहौं ॥

करिकै उरमें धाम, तबते मन मेरो हरयो ॥  
 मैं यमुना जल भरन सिधार्ह । औचकहरि तहँ परे लखाई ॥  
 मोतन चितै रहे सुसकाई । कहा कहौं सखि नैन निकाई ॥  
 जीत आपने बल जनुकीनी । शरद सरोजनकी छविहीनी ॥  
 जीते सकल रूप गुण जाती । नीलकोकनद भरु सत पाती ॥  
 पैनिशि मुद्रित दिवस प्रकाशे । क्षण प्रति होत मलिन युतिनाशे ॥  
 वै आनंद कंद सुखशूले । रहत दिवस निशि छबिसों फूले ॥  
 निरखि नयनमें दशा भुलाई । उम सुसकान मोहनी लाई ॥  
 शिथिल अंग भये जैसे पानी । तबहीं ते उम हाथ बिकानी ॥  
 सुये मारग गई भुलाई । ज्यों त्यों करि पहुँची घरआई ॥  
 तादिनते आँखियां ये मेरी । सुख दुख भूलिभई हरिचरी ॥  
 बसों जाय वा चितवनमाहीं । अब वह छवि क्षण बिसरत नाहीं ॥  
 कै इन नैननि आय समानी । यह चितवनकछु जात न जानी ॥  
 दोहा—नहिं जानत हरि कह कियो, मंदमधुर सुसकाय ॥

मनसमुझतरीझतनयन, सुखकलकह्योनजाय ॥  
 सो०—तबते कछु न सुहाय, कासों कहियेबात यह ॥  
 अमल परयोदग आय, अवलोकनहरिविधुवदन ॥  
 निकसे सखी एकदिन आई । द्वार हमोर कुँवर कन्हाई ॥  
 मैं ठाढीही अजिर अकेली । देखिरही छवि यह अलवेली ॥  
 चंचल नयन चितै चितचोरै । सुभग अकुटि बिबचंक मरोरै ॥  
 कोटि मदन तनुयुति संगबाहीं । फरत कमल कमलकर माहीं ॥  
 मोहित लागि भये तहँ ठाढे । कियो भाव कछु आनंद बाढे ॥  
 लेकर कमल भाव सों लायो । पीताम्बर निजशीशफिरायो ॥  
 मैं गुरुजन उर शंका आनी । बोलि न सकी कछु सुखबानी ॥  
 प्रेमसहित तेरे हरि आये । वैसहि उनको फेरि पठाये ॥

१ शरदको कमल । २ रात्रि । ३ चंद्रवदन । ४ आंगन ।



मेरे मन हरि मूरति भावै । सन्मुख दृष्टि तहां यह आवै ॥  
 भेरिय देह होत मुहि बैरी । कितौ दुरावति दुरत न हैरी ॥  
 मैं अंतर तजि लखत कन्हाई । यह अति अंतर देत बढाई ॥  
 सखी दोष नहिं काहू केरो । करत श्याम यह सब झकझरो ॥  
 नीके दरशन कबहूँ देहीं । नइ नइ छवि करि मन हरि लेहीं ॥  
 चपला हुते चपल बनेरी । दर्शन चमक चौधत है परी ॥  
 कबहूँ अंगन मुकुरें बनावैं । कबहूँ कोटि अँग लजावैं ॥  
 कैसे सब छवि देखि जुपड़ेय । कौन भांति यह साध पुरइये ॥  
 दोहा-भगन दरशरस लाडिली, पुनि पुनि पुलकित गात ॥  
 तृप्त नमानति देखि छवि, कहत लखे नहिं जात ॥  
 सो-लीनो सखियन जान, हरि रँग राती लाडिली ॥  
 सुंदर श्याम सुजान, रौम रौम याके रमे ॥  
 कहति धन्य प्यारी बड़भागी । नीके तूहरि सँग अनुरागी ॥  
 तूहै नवल नवलहरि ओऊ । रूप अगाध सिन्धु तुम दोऊ ॥  
 हम जानी यह बात अगाधा । तू हरिकी अर्द्धनिनि राधा ॥  
 मिले तोहिं करिकृपा कन्हाई । दिये सकल दुख दूरि मिटाई ॥  
 कहुप्यारी हमसों अबसांची । कहेबने यह बात नकांची ॥  
 छाँड़िदेहु अब यह चतुराई । कहाँ मिले कहु तोहिं कन्हाई ॥  
 खरकमिले कै कुंजन माहीं । कै दधिबेचन जात जहाँहीं ॥  
 कै जब उरँग डसनते बाची । कहु कैसे तू हरि रँगराची ॥  
 सुनि सखियन की बात सयानी । बोली परम नागरी वानी ॥  
 कवरी श्याम मिले नहिं जानौ । सुनहु सखी मैं सांच बलानौ ॥  
 गृह बन कुंज सुरति नहिं मोहीं । दधि बेचन कै खरकबिमोहीं ॥  
 आजकै कारिह कहौं कह आली । कियो बास उरमें वनमाली ॥  
 दोहा-नयननते क्षण टरत नहिं, नीके लखे न जात ॥  
 कहा कहौं तुमसों सखी, यह अचरजकी बात ॥

१ दांत । २ दर्पण । ३ काम । ४ सर्प ।



सो०—मिले मोहिं जबदयाम, सुनो सखी तुमसों कहौं ॥

करिकै उरमें धाम, तबते मन मेरो हरयो ॥  
 मैं यमुना जल भरन सिधार्ह । औचकहरि तहँ परे लखाई ॥  
 मोतन चितै रहे सुसकाई । कहा कहौं सखि नैन निकाई ॥  
 जीत आपने बल जनुकीनी । शरद सरोजनकी छविहीनी ॥  
 जीते सकल रूप गुण जाती । नीलकोकनद भरु सत पाती ॥  
 पैनिशि मुद्रित दिवस प्रकाशे । क्षण प्रति होत मलिन युतिनाशे ॥  
 वै आनंद कंद सुखमूले । रहत दिवस निशि छबिसों फूले ॥  
 निरखि नयनमें दशा भुलाई । उम सुसकान मोहनी लाई ॥  
 शिथिल अंग भये जैसे पानी । तबहीं ते उम हाथ बिकानी ॥  
 सूखे मारग गई भुलाई । ज्यों त्यों करि पहुँची घरआई ॥  
 तादिनते अँखियां ये मेरी । सुख दुख भूलिभई हरिचरी ॥  
 बसों जाय वा चितवनमाहीं । अब वह छवि क्षण बिसरत नाहीं ॥  
 कै इन नैननि आय समानी । यह चितवनकछु जात न जानी ॥  
 दोहा—नहिं जानत हरि कह कियो, मंदमधुर सुसकाय ॥

मनसमुझतरीझतनयन, सुखकलकह्योनजाय ॥  
 सो०—तबते कछु न सुहाय, कासों कहियेबात यह ॥  
 अमल परयोदग आय, अवलोकनहरिविधुवदन ॥

निकसे सखी एकदिन आई । द्वार हमोर कुँवर कन्हाई ॥  
 मैं ठाढीही अजिर अकेली । देखिरही छवि यह अलवेली ॥  
 चंचल नयन चितै चितचोरै । सुभग अकुटि बिबचंक मरोरै ॥  
 कोटि मदन तनुयुति सँगबाहीं । फरत कमल कमलकर माहीं ॥  
 मोहित लागि भये तहँ ठाढे । कियो भाव कछु आनंद बाढे ॥  
 लेकर कमल भाव सों लायो । पीताम्बर निजशीशफिरायो ॥  
 मैं गुरुजन उर शंका आनी । बोलि न सकी कछु सुखबानी ॥  
 प्रेमसहित तेरे हरि आय । वैसहि उनको फेरि पठाये ॥

१ शरदको कमल । २ रात्रि । ३ बंदवदन । ४ आंगन ।



तू तौ चतुरहुती अतिनारी । सेवा कछु करी नहिं प्यारी ॥  
 गुप्त भाव तोसों हरिकीनों । बातनभुरें नहीं क्यों लीनो ॥  
 काहे कमल भावसों छायो । काहे पीताम्बरहिं फिरायो ॥  
 तैं कछु उत्तर तिन्हें जनायो । घर आये केहि विधि बिसरायो ॥  
 दोहा—कहाकरौं गुरुजन सखी, भये मोहि दुखदाय ॥  
 सकुचिरहीतिन कीसकुच, मुखकछु वचनबनाय ॥  
 श्री०—इतनो कियो सयान, मैं तब बैठी कर परशि ॥  
 उरलाई हित मान, सन्मुख करि करि आरसी ॥  
 अन्तर्यामी चतुर कन्हई । जानि लई मेरी चतुराई ॥  
 आपन हँसि उत पाग सँवारी । रहे कमल हिरदय पर धारी ॥  
 रहे चितै अतिहित चितलाई । मोते सखी न कछु बनि आई ॥  
 कहा करौं कछु दोष न मेरो । नयो नेह उत गुरुजन घेरो ॥  
 रही देखि मन आनंद धरिकै । दियो कमल उर आसन करिकै ॥  
 आंचर फेरि निछावरि कीनों । अर्घ्य सलिल आंखिन सों दीनों ॥  
 उमैंगि कलशकुच प्रगट भयेरी । टूटि टूटि कुच बंद गयेरी ॥  
 अब मनहोत लाज अति भारी । सखी ससुझि करणी वहसारी ॥  
 ऐसी मेरी मति अज्ञानी । प्रभु सों मंगल करि मैं मानी ॥  
 अति सुख मान गये सुखदाई । तवते मोमन कछु न सुहाई ॥  
 कहति सखी राधा सुनि मेरी । सेवा मान लई हरि तेरी ॥  
 अब काहे पछितात अनेरी । तोहित श्याम जात करि फेरी ॥  
 दोहा—नीके कीन्हे भाव सब, तू अति नागरि वाम ॥  
 उन लीन्हे सब जानिकै, चतुर शिरोमणि श्याम ॥  
 सो०—भावहिको सन्मान, गुरु जनके मधि चाहिये ॥  
 गये श्याम हित मान, अब प्यारी चाहति कहा ॥  
 तेरे वशहि भये दधिदानी । हम यह बात भले करि जानी ॥  
 तैं वेंदी उन पाग सँवारी । उनको तुम उन तुमहि जुहारी ॥  
 मिली आरसी में तुम उनको । उन उरधरी कमल मिस तुमको ॥

१ बढेनमें । २ प्रणाम ।



जाने कहा भेद यह कोऊ । एक प्राण है तनु तुम दोऊ ॥  
 सुनहु सखी मोहन सुखराशी । अँखियां रहति दरशकी प्यासी ॥  
 निकसत जब सुन्दर इत आई । कमल नयन करवेणु सुहाई ॥  
 नाजानिये सखी तिहि काला । सब तनु श्रवण विलोचन जाला ॥  
 सुरत शब्द प्रति रोमन माहीं । नख शिख ज्यों चख देख्यो चाहिं ॥  
 इतने पर ससुझत नहिं बैना । चितै रहत ज्यों चित्रित मैना ॥  
 सुनहु सखी यह सांचकि सपनो । कै दुख सुख कै संभ्रम अपनो ॥  
 कहा करों गुरुजन डर मानो । मन भेरो उन हाथ बिकानो ॥  
 जयते द्वार दरश मोहिं दीनों । तबते मन अपनो करिछीनों ॥

दोहा-भाग्य दशा आये सदन, मेरे श्याम सुजान ॥  
 मैं सेवा नहिं करीसकी, गुरुजनको डरमान ॥  
 सो०-यहै चूक जिय जान, मोहन मन हरि लैगये ॥  
 अब लागी पछितान, फेरि कौन विधि पाइये ॥

जयते प्रीति श्याम सां कीनी । तबते नौंद दगन तजि दीनी ॥  
 फिरत सदा चित चक्र चढयोसो । रहत हिये अति शोच बढयोसो ॥  
 मिलहि कवन सिधि कुँवर कन्हई । यहै विचार विचारत जाई ॥  
 यह दुख सखी कौनसां कहिये । पशु वेदन ज्यों आपहि सहिये ॥  
 सुन प्यारी तू हरि रँगराची । बात कहैं तोसां हम सांची ॥  
 तोते चतुर और नहिं कोऊ । तुम अरु श्याम एक भये दोऊ ॥  
 बाकी नहीं कछु अब बांची । कहाँ बात मैं रेखा खांची ॥  
 ऐसी भई आप तू भोरी । उनको मनतैं नाहिं लियोरी ॥  
 तैं उनको मन प्रथम चुरायो । तब उन तेरोहू अपनायो ॥  
 अब काहेको करत स्यानी । नंद नँदन वर तू पटरानी ॥  
 तोसी और कौन बड़भागी । तेरे संग श्याम अनुरागी ॥  
 विलसौ श्याम संग सुख मानी । अब कत बृथा रहत बौरानी ॥  
 दोहा-श्याम करी मोहिं बावरी, मन करि लियो अधीन ॥



बंशी ज्यों वाकीपलक, अटके मोहग मीन ॥  
 सो०—अब मोहिं कलु न सुहाय, मन मेरो मेरो नहीं ॥

लियो श्याम अपनाय, रूप ठगोरी डारि शिर ॥  
 बार बार मैं तोहि सुनाई । तेरे मन यह बात न आई ॥  
 अपनीसी बुधि जानत मेरी । मैं पाई इतनी कहँ एरी ॥  
 देखतही हरि रूप लोभानी । मोते सुधि बुधि सबहि हिरानी ॥  
 ऐसे कहि प्यारी अनुरागी । गद्गद वचन श्याम रस पागी ॥  
 पुनि पुनि कहति यहै सुख बानी । मन हरि लियो छैल दधि दानी ॥  
 तब इक सखी सखीसों बोली । तू कत होति जानकै भोरी ॥  
 यह पुनि पुनि मनको निदरानी । मुम बात तिन प्रगट बखानी ॥  
 तुम जानत श्यामा है छोटी । है यह ज्ञान बुद्धिकी मोटी ॥  
 रहत सदा हरिके सँग माहीं । हमसों कहत करति सो नाहीं ॥  
 किये रहति हमसों हठ ओटी । बात कहत सुख चोटी पोटी ॥  
 भये श्याम याहीके वश अब । देखि छकैं बेदी छोटी छब ॥  
 भली बनी सुन्दर अब जोटी । वे खोटे उनते यह खोटी ॥  
 दोहा—कहति सखी यह कहा तू, निपट गँवारी बात ॥

को प्यारी सम दूसरी, जाके वशबलभ्रात ॥  
 सो०—रूप शील गुणधाम, यह सबमें ब्रज आगरी ॥  
 दृढ व्रत लीन्हो श्याम, धन्य न याते और कोड ॥

प्रीति गुप्त ही की है नीकी । कहो बात सखिअपने जीकी ॥  
 मैं रीझी या पर अति भारी । क्यों खोटी जो कृष्ण पियारी ॥  
 जो हरि कोटि मदन मन मोहैं । सो मोहन याको सुख जोहैं ॥  
 जैसे श्याम नारि यह वैसी । भेद करै सो सखी अनैसी ॥  
 नागरि नवल नवलके नागर । सुन्दर यह जोरी छविसागर ॥  
 सुनहु सखी ऐसे पै राजैं । एक प्राण द्वैतलु सुख काजैं ॥  
 एकहु पलक कबहुँ नहि न्यारे । सोवत जागत जान हमारे ॥

१ लोहकोकांठो जासों मच्छीपफरे हैं । २ कृष्ण ।



पूरन नेह नयो वह नाहीं । देखहु सखी समुझि मन माहीं ॥  
मेरो कह्यो मानि यह लीजै । इनसों भाव प्रीति करिकीजै ॥  
इनकी प्रीति प्रीतिके माहीं । बिना प्रीति ये जान न जाहीं ॥  
जब लग इनसों प्रीति न मानै । तब लग इनकी प्रीति न जानै ॥  
इनकी प्रीति लख्यो जो जाहौ । तौ करि इनसों प्रीति निबाहौ ॥  
दोहा—सखी वचन सुनि सखिनके, भयो हिये अति चैन ॥

धन्य धन्य ताको सबै, कहति सप्रेम सुबैन ॥  
सो—धनि धनि तेरो ज्ञान, तैं इनको जानेउ भले ॥

हम सब निपट अजान, बात कहत औरै कहु ॥  
हम इनको ऐसे नहि जाने । ये ब्रज आय गुप्त प्रगटाने ॥  
श्यामा श्याम एक हैं घरी । तैं इतने उपहास सहेरी ॥  
वे दोउ एक दूसरी तूरी । तेरिहु प्रीति श्यामसों पूरी ॥  
इनसों तेरी प्रीति पुरानी । तबते प्रीति पुरातन जानी ॥  
धन्य श्याम धनि धनि तुव श्यामा । हम सब वृथा भई बिन कामा ॥  
श्याम राधिका सहज सनेही । सहज एक दोऊ हैं देही ॥  
सहज रूप गुण पूरण कामी । सुन्दर सहज सहज बन धामी ॥  
देखि दुहुँनकी प्रीति विशाला । भई विवश सब ब्रजकी बाला ॥  
श्यामा श्याम रंग रस पागी । सोवत ते मानहुँ सब जागी ॥  
उपजी प्रीति दुहुँनकी सांची । दूरि गई दुविधामति कांची ॥  
भई दुर्गल रस बश सब गोपी । लाज शंक मर्यादा लोपी ॥  
सबके नैन रूप रस अटके । श्रीश्यामावर नागर नटके ॥

छं०—नवल नागर श्याम श्यामा, प्रेम मन सबके फँसे ॥  
नयन नासा श्रवण रसना, अंग प्रति दोऊ बसे ॥  
उठत बैठत चलत सोवत, जात निशिबाँसर घरी ॥  
नहीं विसरत ध्यान कबहुँ, सकल ब्रजकी सुन्दरी ॥  
दोहा—गई सकल निज निज सदन, युगल प्रेम रस लीन ॥

१ राधा कृष्णके । २ रात दिन ।





विछुरत नहि एकौ घरी, जैसे जल अरु मीन ॥  
सो०—रहे श्याम उर छाये, बिन देखे दृग कल नहीं ॥

गृहकारज न सुहाय, गुरुजन चास न सुरति कछु ॥  
वे कछु कहैं करैं कछु औरैं । सासुननंद तब मारन दौरैं ॥  
कहैं यहै पितु मात सिखायो । ऐसोई हंग तुम्है बतायो ॥  
कहा तुम्हारे मन यह आई । अपनी सुधि बुधि कहां गँवाई ॥  
तुम कुल बधू लाज नहि आवैं । कहैं लगी कोउ तुम्हें समझावैं ॥  
कबकी यमुना न्हान गई हौ । ऐसी अब तुम निडर भई हौ ॥  
तुम राधाको संग करति हौ । हरिके पाछे वही फिरति हौ ॥  
बड़े महरकी सुता कहावैं । यह सब बात उन्हें बनिआवैं ॥  
उनको सब उपहास उठावत । ब्रज घर घर प्रति यही कहावत ॥  
ऐसे तुमहूँ नाम धरै हौ । ब्रज लोगनमें हमैं हँसै हौ ॥  
हम अहीर ब्रज पुरके वासी । ऐसे चलो होय नहि हँसी ॥  
लोक लाज कुलकानिहि करिये । फूँकि फूँकि धरणी पग धरिये ॥  
ऐसे कहि गुरु जन समझावैं । लाज काज मर्याद सिखावैं ॥  
दोहा—सुनि युवती गुरुजन वचन, विहँसि रहौ धरि मौन ॥

हरि राधा उपहासकी, महिमा जानै कौन ॥  
सो०—कहत तैसिये बात, जैसी मति जाके हिय ॥

सुख उलूकही रात, रविको तेज न मानही ॥  
विषको कीट विषहि रुचि मानै । कहास्वादरसस्वादहि जानै ॥  
ये अहीर इनको प्रिय गोधन । नन्द नंदन सुर श्रुतिशिवकोमन ॥  
तिनकी महिमा कह ये जानैं । जिनके गुण सुनि गर्गबखानैं ॥  
धनि धनि राधा कुँवरि सयानी । श्यामहि मिली कर्म मन बानी ॥  
श्याम कामके पूरण हारैं । पूरण करि तिनको उर धारैं ॥  
धन्य धन्य श्यामावनवारी । यह रस लीला ब्रज विस्तारी ॥  
ऐसे गोपी गण करि ध्याना । करत श्याम श्यामा गुणगाना ॥



श्याम रूप श्यामा अनुरागी । रोम रोम ताही रँग पागी ॥  
 गई सदेन मन लागत नाहीं । मन मोहन बिन क्षण युग जाहीं ॥  
 मनही मन गुरु जन पर खीजै । इन बिमुखनको संग न कीजै ॥  
 कौन भाति करि इन सों छूटौ । क्यों वह द्रश सरसमुख लटौ ॥  
 बार बार जिय अति अकुलाई । कैसेहुँ हरिबिन रह्यो न जाई ॥  
 दोहा-धृक गुरुजन कुलकानि धृक, धृक लज्जा धृक धाम ॥  
 धृक जीवन बहु दिननको, बिनु सुन्दर धनश्याम ॥  
 सो०-पलक कल्प सम जाय, ब्रजवासी प्रभु द्रश बिन ॥  
 सदन न नेक सुहाय, मन हरि लीन्हो सांवरे ॥

अथ बाटके मिलनेकी लीला ॥

आवृषभालु कुँवरि वर गोरी । कृष्ण प्रेम उनमन किशोरी ॥  
 तनु सिद्धल मन हरिके पासा । दुरत न हृदय प्रेम परकाशा ॥  
 चली यमुन जल आप अकेली । रूप राशि गुण राशि नबेली ॥  
 दृगन श्याम द्रशनकी आसा । मनहीं मन यह करति हुलासा ॥  
 चितको चोर अवाहि जो पाऊँ । तौ उरको संताप नशाऊँ ॥  
 राखौ बांधि हृदय सों लाई । भुजकी दृढ करि दाम बनाई ॥  
 जैसे लियो ओरि मन मेरो । तैसे लेउँ छोरि उनकेरो ॥  
 छौँडौं नाहि करै जो कोरी । ऐसे जान विचारति गोरी ॥  
 इतते प्यारी यमुनहिं जाई । उतते आसत बरहिं कन्हाई ॥  
 नीलजलजस्तनु शोभित आले । नटवर भेष काछनी काछे ॥  
 दूरिहिते देखतही जान्यो । जीवन प्राण तुरत पहिचान्यो ॥  
 रही मनोहर बदन निहारी । कोटि मदन जापर बलिहारी ॥  
 दोहा-मन आनंद हुलस्यो हियों, रोम पुलक दृग बारि ॥  
 बोली गद्गद वचन मुख, तनु विह्वल संभारि ॥  
 सो०-चित चोर कहँ जात, मैं हँडति तबते तुमहि ॥  
 कहँ सीखी यह बात, अहो नंदके लाडिले ॥

१ वर । २ रस्सी । ३ मेघ ।



जानत जैसे माखन चोरी । तब वह बात हती कछु औरी ॥  
 बालकहते कान्ह तब तुमहूं । भोरी सहज हुती मनहमहूं ॥  
 मुख पहिंचान मान सुख लेती । यशुमति कान जान तब देती ॥  
 बसौ बास सब ब्रज इक ठौरी । गोरख काज कान नहिं तोरी ॥  
 अब भये कुशल किशोर कन्हाई । भईसजग हम सब तरुणार्ई ॥  
 माखन ते अब चितकी चोरी । लागे श्याम करन बरजोरी ॥  
 नख शिख अँग चित चोर तुम्हारो । लीन्हो मन धन छानि हमारो ॥  
 सो अब जात कहां तुम लीन्हो । भुजाषकरि ठाढे हरिकीन्हो ॥  
 तुमको नीकै करि हम चीन्हो । बनिहै अब भरो मन दीन्हो ॥  
 ब्रजमें ठीठ भये तुम डोलत । मोखां सुधे वचन न बोलत ॥  
 अब तौ मोहिं बूझि घर जैहौ । बिना दिये मन जान न पैहौ ॥  
 प्यारीयों झगरति पिय पाहीं । देहगेहकी सुधि कछु नाहीं ॥  
 दोहा-बीच करी कुल लाज तब, सम्मुख आई धाय ॥  
 बखसि नागरी चूक यह, मोहिं कह्यो समझाय ॥  
 सो०-चितलै गयो चोराय, चूक परी हरि ते बड़ी ॥  
 छाँडिदेहु डरपाय, बड़े महारिकी कुँवरि तुव ॥  
 कुलकी लाज अकाज कियोरी । कहा करौं अति जरतदियोरी ॥  
 तबयों कहति पीयसों प्यारी । सुनहु प्राणपति गिरिवरधारी ॥  
 देखे बिना तुमहिं दुख पाऊं । सो यह तुम बिन काहि सुनाऊं ॥  
 गुप्त रहन मोको तुम भाप्यो । सो आयसु मैं शिर धरि राख्यो ॥  
 नहिं सुहात तुम बिन दिन राती । प्राणनाथ तुमहित सब भांती ॥  
 तुमतेबिमुख जननके माहीं । रख्यो जात मोपै प्रभु नाहीं ॥  
 मात पिता अति त्रास दिखावैं । निंदत मोहिं नेक नहिं भावैं ॥  
 भवन मोहिं माटीसों लागे । इक क्षण शोच नाहिं उरत्याने ॥  
 कहैं लगि अपनी विपति बताऊं । तुम बिन सुखको अंत न ठाऊं ॥  
 सुंदर श्याम कमल दल लोचन । करहुकुसंगतिको दुखमोचन ॥



अब यह विनय श्याम सुनि लीजै । चरणन ते न्यारी नहिं कीजै ॥  
 कुलकीकानि कहां लगि मानो । यह मन मोहन तुमहिं लुभानो ॥  
 छंद-मन लुभानो तुमहिं मोहन, और तेहि भावै नहीं ॥  
 विनलखे गिरिधरण सुंदर, कहूं सुख पावै नहीं ॥  
 लोक डर कुल लाज गुरु जन, कानि कहँलौ कीजिये ॥  
 सिंह शरण कृपालु जंबुक, त्रास क्यों सहिजीजिये ॥  
 दोहा-निरखि श्याम प्यारी वदन, सुनिकै वचन सिहाय ॥  
 प्रेम अधीन विलोकि अति, हर्षि लई उरलाय ॥  
 सो०-शीतल पंकज पान, परश हरयो तनु विरह दुख ॥  
 प्रेम विवश भगवान, बोले प्यारी सों हरषि ॥  
 कत दुख पावतिहौ तुम प्यारी । यह लीला तुमहित विस्तारी ॥  
 बसत सदा मैं तुम मन भाहीं । तुम मम उरते बाहर नाहीं ॥  
 श्रीवृन्दावन घन सुखकारी । हैविहार थल तुम्हरो प्यारी ॥  
 शीतल खघन कुंज छवि धामा । हम तुम संगमिलैं तहँ भामा ॥  
 दीजौ सैन मोहिं कहँ आई । तब तुम पै ऐहाँ मैं धाई ॥  
 अब गृह जाड आईहैं कोऊ । यों संकेत बढ्यो हित दोऊ ॥  
 ब्रज यमुना मग विच दोउ ठाढे । प्रेम सकोच अतिहि मन बाढे ॥  
 बिलुरत वनत न रहत तहांहीं । चितवत सखिन चपल चहुँबाहीं ॥  
 तबहिं युवति ब्रजते कहु आई । कछु यमुनाते ब्रजमें जाई ॥  
 दुहुँदिशि तरुणिन आवत जानी । मनहीं मन राधिका लजानी ॥  
 चले तुरत हैंसि कुँवर कन्हई । मिलेहाँकदै ग्वालन जाई ॥  
 रहे कहां तबते सब ग्वाला । ऐसे ढेरि कह्यो नँदलाला ॥  
 दोहा-गये भाव करि श्याम यह, लियों नागरी जान ॥  
 कहिहैं यहै सखीन सों, कीन्हो यह अनुमान ॥  
 सो०-देखि सखी मोहिं संग, अबहिंआय सब बूझि हैं ॥  
 जानति इनको रंग, मन मन शोचति लाडिली ॥



उन युवतिन मोहनको देख्यो । जात राधिका ढिगते पेर्यो ॥  
 कहन लग्यो आपसमें बातें । देखहु सखि प्यारीकी बातें ॥  
 बात करति मिलि संग विहारी । हमहिं लखत दीन्हें दारी ॥  
 बूझतही कछु बुद्धि उपैहै । सांची एकहु नाहिं जनैहै ॥  
 इतहु उतहुते आई नारी । कहति कहां तू जाति पियारी ॥  
 अबहिं लखे तुवढिग वनवारी । कहां गये पछितात कहारी ॥  
 कहा दुराव बनत अब कीन्है । हमहुंते तबहीं लखि लीन्है ॥  
 कान्ह कहा बूझतहै तुमको । सांची बात कहो तुम हमको ॥  
 मन लै गये तुम्हारे चोरी । सोपायो अपनो तुम गोरी ॥  
 श्यामहिं मिलि अपनो मन लीन्हो । देखतहमैं टारिख्यो दीन्हो ॥  
 सदा चतुरई फरतिउ नाहीं । अबतौ आइपरी फँद माहीं ॥  
 हमहिं बहुत तुम निदरि रहीहौ । कहां रहत हरि कित निबहीहौ ॥  
 दोहा—कहत रही जब तबहिं तुम, हरि संग देखहु मोहि ॥  
 तब कहियो जो भावही, लीन्होबेसरि खोहि ॥  
 अब हम लेहिं छिनाय, बेसरिदेहौ कै नहीं ॥  
 कीकरिहौ चतुराय, और कछु हमसों अबहुं ॥  
 तब हँसि कह्यो नागरी प्यारी । तुम सब भई अजान कहाँरी ॥  
 मैं मूरख तुम चतुर बडेरी । ऐसेहि बेसरिलैहौ मेरी ॥  
 यही कहन मोको तुम आई । इतउतते मिलि उठि तुम धाई ॥  
 बेसरि एक लेहुगी कोको । पीताम्बर दिखरावहु मोको ॥  
 पीताम्बर अरु बेसरिलीजै । प्रगट जाय तब ब्रजमें कीजै ॥  
 तारी एक वजति कर दीऊ । इतनो ज्ञान करो सब कोऊ ॥  
 सुनु राधा तोसों हम हारी । धन्य धन्य तेरी महतारी ॥  
 तेरे चरित कहा कोउ जानै । बस कीन्हो वनश्याम सुजानै ॥  
 अबहीं टारि पटायो तिनको । हम देखे तेरे ढिग उनको ॥  
 तापरनिदरतिहै तू हमसों । कहत न बनत हमैं कछु तुमसों ॥



अँग अँग चिरचि कपट चतुराई । निज कर विधना तोहि बनाई ॥  
 इतनी बुद्धि श्यामके नाहीं । जितनी है प्यारी तो माहीं ॥  
 दोहा-श्याम भले अरु तुम भली, राज करहु घर जाय ॥  
 बेसरि छोरति हैं सखी, बिन काजै उठि धाय ॥  
 सो०-जान्यो तुम्हरो ज्ञान, दौरि परीं मोपर सबै ॥

जो तुम हती सुजान, गहती बाँह दुहूनकी ॥  
 कहु प्यारी सांची अब हमसों । कछु तो श्याम कहत हैं तुमसों ॥  
 हाहा बात कहो सो प्यारी । भेद करो तो सौँह हमारी ॥  
 तुष ढिगते मोहन हम हेरत । गये उतै ग्वालनको ढेरत ॥  
 तू क्यों ठठुकिरही मग माहीं । कहा कछो मोहन तुव पाहीं ॥  
 सहज होय हमसों यह भाषो । उर में कछू रोष मति राखो ॥  
 मैं यमुना तट जात रहीरी । ब्रजते आवत तुम्हें लखीरी ॥  
 परखन लगी तुमहि मगमाहीं । तिरछे आय गये हरि पाहीं ॥  
 मैं तुमहीं तन रही निहारी । उन पूछो भविं ग्वाल कहाँरी ॥  
 मैं सुनि सन्मुख दीठि न खोली । हां नाहीं कछु मुख नहि बोली ॥  
 ग्वालन ढेरत गये कन्हाई । तुम मेरी बेसरि को धाई ॥  
 सुनि यह बात युवति सकुचानी । कछु तो परति सांचसी जानी ॥  
 ग्वालन ढेरत गये कन्हाई । यह तो हमहुँ श्रवण सुनि पाई ॥  
 दोहा-तब हैंसिकै सखियन कछो, सुनु लाडिली सुजान ॥

हम मानी तेरी कही, तूमति रिस जिय आन ॥  
 सो०-लीन्ही कण्ठ लगाय, अति निर्मल तू लाडिली ॥  
 झूठहि करत चवाय, ब्रज घर घर तेरो सबै ॥  
 अब चलिये यमुनाके धामा । संग चलैं हमहुँ सब श्यामा ॥  
 चूक परी हम सों यह तेरी । नाम लियो बेसरि को परी ॥  
 अहो सखी तुम निपट अनैसी । जानति हौ मोहि आपहि जैसी ॥  
 झूठहि धाई दोष लगावन । अब लागीं मोको दुलरावन ॥

१ क्रोध । २ दृष्टि । ३ प्यार ।



क्षणक बुद्धि तुम्हरी धों कैसी । हौ तुम बड़ी पेटकी जैसी ॥  
 यह सुनि हँसत चली ब्रजनारी । गई यमुन ते गृहको प्यारी ॥  
 ऐसे सखियन को बहरायो । कृष्ण सनेह न प्रगट जनायो ॥  
 नागरि श्यामा श्याम सनेही । चतुर श्याम श्यामाके तेही ॥  
 श्यामा श्याम बसत तनु माहीं । बसत श्याम श्यामा मन माहीं ॥  
 नंद संकेत गये घर दोऊ । मात पिता कछु जान न कोऊ ॥  
 कैसे हूँ करि दिवस बितायो । निशिनिघटे रस विरह सतायो ॥  
 अति आतुर दोऊ मन माहीं । क्यों हूँ नींद परति है नाहीं ॥  
 दोहा-विरह नदी निशि तम सलिल, पैरतथके निहारि ॥  
 बूझौमणि तमचर कह्यो, मिल्यो पार भिनसारि ॥  
 सो०-सुनितमचर की ढेर, अति आनंद दुहून मन ॥  
 आतही उठे सबेर, लगी चटपटी मिलनकी ॥

अथ संकेतकेमिलनेकी लीला ।

श्याम उठतलखि जर्ननी जागी । हरि मुख कमल निरखि अनुरागी ॥  
 बूझति मात जाउँ बलि प्यारे । आज कहा तुम उठे सचारे ॥  
 उत्तम जल भरि दीनी झारी । अतिआतुर हरि करी सुखारी ॥  
 विवस श्याम प्यारी रस लाके । मगन ध्यान वृषभालु सुताके ॥  
 उत वृषभालु सुता लुकुमारी । उठी मात वह भाव विचारी ॥  
 प्रीतोंसों मोती लर तोरी । आंचर बांधि मात की चोरी ॥  
 यह व्याज अपने उर धारयो । कुंज धाम बन जान विचारयो ॥  
 आंगन गई भवन फिर आई । गई भवन ते फिरि अँगनाई ॥  
 जात बनै न रह्यो नहि जाई । इत उत फिरत भवन बितताई ॥  
 मनहि कहत कब मिलहु कन्हवाई । कालिगये वनधाम बुलाई ॥  
 मात कह्यो क्यों उठी सवाँरी । जाति कहाँ प्रातहितू प्यारी ॥  
 आज कहा इत उत तू डोलै । सुखते कछु वचन नहि बोलै ॥

१ कृष्णराधिका । २ पानी । ३ मुर्गा । ४ यशोदा । ५ दातून । ६ राधिका-  
 जीके । ७ गर्दन । ८ सबेरे । ९ टहलत ।



दोहा-अति नागरि मोती लरी, राखी प्रथम डुराय ॥  
 ताहीमिसि करिके सकुच, बोलति नहीं डुराय ॥  
 सो०-पुनि पुनि चितई मात, लखी ग्रीव भूषण विना ॥  
 तब जानी यह बात, खोई कहूँ मोती लरी ॥  
 जननी भई तबहि रिसहार्ह । कंठ लरी तैं कहां गँवाई ॥  
 मोतिनको गजरा छबिलायो । बड़े मोलको परम सुहायो ॥  
 तेरे लिये महर बनवायो । मैतोंको हित करि पहिरायो ॥  
 कौने लियो कहाँतें गयो । कालहि तेरे तौ गर हेरयो ॥  
 बूझे तोहिं जवाब न आवै । कह शोचति किन बेग बतावै ॥  
 सुनि राधिका मातकी बानी । मन विहँसत ऊपर भय मानी ॥  
 बोलति नहीं हृदय हरषाई । कहति भली बुधि मोको आई ॥  
 अबहीं मोको खीज पठैहै । यामिसि भेंट श्याम पैहैहै ॥  
 कहत मातसों तब भय मानी । मोहिं नहीं सुधि कहां हिरानी ॥  
 कालिह सखिन सँग यमुना न्हाई । तहां कहूँ धौं तिनहिं डुराई ॥  
 कैधौं गिरी कतहुँ जल माहीं । यहतौ मैं कछु जानति नाहीं ॥  
 कालिहिते शोचति पछिताई । तेरे डरते कह्यो न जाई ॥  
 दोहा-नेकु नींद नहिं निशि परी, तेरी सों सुनि मात ॥  
 याही डरते आज हौं, उठी बड़ी परभात ॥  
 सो०-सुनत सुताके बैन, महिरिं चकित मुख लखिरही ॥  
 कृष्ण प्रिया गुणैँन, कोऊ पार न पावई ॥  
 तब जननी करि क्रोध कहीरी । मैं बरजति तोहिं हार रहीरी ॥  
 फिरति नदी बन डगरन माहीं । काहूकी शंका तोहिं नाहीं ॥  
 बहुत तात तोहिं लाडलडाई । नोखी सुता महरकी जाई ॥  
 बरजति मैं जुकरति तू सोई । भली करी मोतिन लर खोई ॥  
 एक एक नग परम सुहायो । लाखटकादै मैं जुमँगायो ॥

१ अतिबतुर । २ छिपाय । ३ माता । ४ पितावृत्तमानु । ५ देखरही ।

६ राधिका । ७ गुणोंकागेह । ८ थाह ।



जाके हाथ परोसो देहै । घर बैठे निधि पाय गवैहै ॥  
 भरि भरि नयन लेति है माता । मुखते कष्ट न आवति वाता ॥  
 रीतो गरो निहारति जबहीं । हियो उमैंगि आवत है तबहीं ॥  
 कहा करो जो खोह गईरी । तू कित खीजत विकल भईरी ॥  
 लेहों और मैं गाय बबासों । देति नहीं क्यों और डिबासों ॥  
 करिहै कहा सेति जो राखै । तादिनतेहि कित कथों माखै ॥  
 रोषति कहा औरहै नाहीं । दैनिकासि पहिरो गर माहीं ॥

दोहा-सुन राधा तेरो नहीं, अब पतियारो मोहि ॥

चौकी हार हमेल कछु, नहि पहिराऊं तोहि ॥

सो०-लाखटकाकी हानि, करी आज तैं लाड़िली ॥

अब नहि देहों आनि, जबलों वह लावै नहीं ॥

अबतौ घर बैठन जब पैहौ । जलज सरोज खोजलै ऐहौ ॥  
 जाधों देखि कहूंजो पावै । तबहीं तोहिं भलाई आवै ॥  
 यमुना गई संग तबकोही । बृझति नहीं जाय किन ओही ॥  
 कौन कौनको तोहिं बताऊं । कहैं लग सबके नाम गनाऊं ॥  
 चंद्राबलि ललतादिक नारी । इतों सकल ब्रज गोपकुमारी ॥  
 देखहु जाय यमुन तट हरी । जहां राखि मैं न्हाति रहीरी ॥  
 युवती एक रही टकलाई । पूछि देखिहों वाको जाई ॥  
 जैहै कहां जलज लरि भेरी । तिनही लई भली सुधिपरी ॥  
 आज अंबर लोगी मोहीं । दूढोंगी ब्रज घर घर ओहीं ॥  
 ऐसे करि माता मति भौरी । हरषि चली वृषभानु किशोरी ॥  
 निधरक चली सदन ते प्यारी । मन अटक्यो मन कुंजबिहारी ॥  
 मनहीं मन यों शोचति जाई । कैसे हरि सों देहु जनाई ॥

दोहा-बार बार नैदनंद इत, आतुर जोहंत राह ॥

प्यारी मुख शशि उदैकी, नैन चकोरन चाह ॥

सो०-भरे विरह रस माहि, क्षणमें घर द्वारे क्षणक ॥

१ कौन २ बी । २ हार । ३ बहलाकर । ४ राधिका । ५ गृह ।

६ कृष्ण । ७ देखत ।



फिर फिर आवहिं जाहिं, लगी चटपटी प्रेमकी ॥

जननी करति रसोई आतुर। लखि लखि जात श्यामवन चातुर ॥  
 कहा अवेर करति तू मैया। भूख लगी मोहिं कहत कन्हैया ॥  
 यशुमति कह्यो तात बलिजाई। अब विलंब नहिं बैठहु आई ॥  
 सखा संग सब लेहु बुलाई। बोलि लेहु अरु हलधर भाई ॥  
 सादर कह्यो श्याम बल भैया। दाऊजी जेवनको अइयो ॥  
 मोझो अबहिं नहीं रुचि मैया। सखन संग तुम खाहु कन्हैया ॥  
 संग सखन लै तब मन मोहन। जेवनको बैठे सब मोहन ॥  
 खटरस व्यंजन सरस सँवारे। परसि धरे रोहिणि पनवारे ॥  
 श्याम सखनको आयसुदीनो। आपुनिहूँ कर कौरहि लीनो ॥  
 तबहीं कोकिलके समवानी। बोलि उठी राधा सुखदानी ॥  
 नंद महारि पिछवारेहि आई। झूठहि ललताको गुरहारी ॥  
 बुन्दावन मग जाति अकेली। आवहु वेगि तुमहुँ सँग हेली ॥  
 दोहा-बिन जेये मोहन उठे, करते कौर गिराय ॥

जैवतही छांडे सखा, चले वनहिं अतुराय ॥

सो-देखि चकित दौड मात, चौक रहे सिंगरे सखा ॥

कहति कहा चले जात, अति आतुर गोपाल तुम ॥

अबहीं ग्वाल गयो कह मोही। वनमें गाय बियानी लोई ॥  
 मैं जेवन बैठों बिसराई। सो छुधि मोहिं अबहिं द्वै आई ॥  
 तुम जेवहु मैं देखहुँ जाई। करी श्याम तिनसाँ चतुराई ॥  
 लोही मेरी गाय बियानी। यह कहि चले हर्ष उर आनी ॥  
 हँसत सखा सब मन मन माहीं। नहीं गाय बछरा हों नाहीं ॥  
 है प्यारी रानी हों राधा। हम जानी यह बात अगाधी ॥  
 जननी नहीं कहू यह जानी। बार बार कहिके पछतानी ॥  
 भूखे श्याम मये उठि जाई। राज करौ यह गाय बिसाई ॥  
 दई सैन दे वन श्रीश्यामा। पहुँचे जाय तहाँ वनश्यामः ॥

१ भोजनकाने । २ दडीगुस्तर-अथाह ।



देखत हर्ष भये मन दोड़ । फूले अंग समात न कोड़ ॥  
 मिले धाय गहि अंकम माला । कनक वेलि जुनु लगी तमाला ॥  
 मिलि बैठे दोउ कुंज सुहाई । कोटि काम रति छविहि लजाई ॥  
 दोहा-नवल कुंज नवनागरी, नव नागर नंदनन्द ॥

प्रेमसिंधु मर्याद तजि, मिले उमंगि आनन्द ॥  
 सो०-विलसत मदन विलास, कोटि मदन गणके मथन ॥

युगल रूपकी रास, नित्य विलास विलासनिधि ॥  
 नागर श्याम नागरी श्यामा । शोभित कुंज कुटी छवि धामा ॥  
 चितवत दूर दूर नैन लजोहैं । सो छवि वरणसकै कवि कोहैं ॥  
 रीझे श्याम नागरी छविपर । नागरि निरखत श्याम शुभगवर ॥  
 देह दशाकी सुरति बिसारैं । अरश परस दोउ रूप निहारैं ॥  
 शोभित बदन महाछवि छाये । सिथल अंग श्रमबिंदु सुहाये ॥  
 इंद्रिय बर राजीव कमल जुनु । फूलि रहे मकरन्द भरे मनु ॥  
 बैठे कुंजद्वार, सुखदाई । कोमल किसलय सेज सुहाई ॥  
 लटकति चहुँ दिशि कुसुमितवेली । फूलि रही तरुडार नवेली ॥  
 हरित भूमि छवि वरणि नजाई । बहत समीर सुखद पुरवाई ॥  
 आये उमहि मेघ सुखकारी । परत बूंद शीतल श्रमहारी ॥  
 भीनत सुरैंग चूनरी सारी । मन सकुचत लखि रसिकविहारी ॥  
 बूंद बरावत मोहन पातन । हँसि हँसि करत प्रेमकी बातन ॥  
 दोहा-भीजे रस रंग प्रेम सुख, जल भीजे दोउ गात ॥

भीजे अम्बर कुंज गृह, श्यामा श्याम सुहात ॥  
 सो०-यह अचरजकी गाथ, को मानै को कहिसकै ॥

गोपसुताके साथ, रमत ब्रह्म द्रुम कुंजतर ॥  
 इहविधिकरिविलास वन माहीं । कह्यो श्याम श्यामाके पाहीं ॥  
 अब गृह जाहु सांझ निरवाई । मात पिता करिहैं दुचिताई ॥  
 यह रस रीति शुभकी नीकी । तुम प्यारी अति मेरे जीकी ॥

१ दौरकर-पकड़ाश्रीमदेवरति। ३ सुखसागर। ४ प्रखेदकण। ५ रस। ६ वायु। ७ राधिका।



करते कौर डारि में आयो । तुमरो बोल सुनत उठि धायो ॥  
मेरे प्राण बसत तुम पाहीं । इक क्षण तुमको बिसरत नाहीं ॥  
सुनि सुनि बातें पियकी प्यारी । करति मनहि मन आनंद भारी ॥  
अति सनेह बोली सकुचाई । सुनहु प्राण प्रीतम सुखदाई ॥  
कहा करौं पग जात न थरको । मन अटकेयो नहि मानत डरको ॥  
हैग तुमको देखत सुख पावैं । गृह गुरु जन मोहि नेकु न भावैं ॥  
बरजहु अपनी चितवन तुम हरि । और मंद सुसकन मनोहरि ॥  
तुमरीनेकु सहज यह बानी । सहियत हैं हम सर्वसहानी ॥  
वशीकरण हैं इनके माहीं । बिसस भयो मन मानत नाहीं ॥  
दोहा-ऐसी विधि परगट करत, दंपति निज अनुराग ॥

भये परम आनन्द रस, वदन आपने भाग ॥  
सो०-श्याम लई उरलाय, प्रिया बोधि पठई घरहि ॥

चले आप सुख पाय, सुन्दर घन सुखके सदन ॥  
करति जननि अवसर विशाला । पहुँचे सदन श्याम त्रिदिकाला ॥  
लीने धाय लाय उर मैया । कहति लालकी लेंहुँ बलैया ॥  
करते कौर डारि उठि भागे । सुनत गाय व्यानी अनुरागे ॥  
लोही गाय आपनी व्यानी । ताते प्रीति अधिक उर आनी ॥  
वह तौ नाहिन मेरी मैया । वृन्दावन भरम्यों सुन मैया ॥  
गोवर्द्धन यमुना तट सारो । वृन्दावन हूँत सुब हारो ॥  
कोऊ सखा संग तहूँ नाहीं । फिरयो अकेलो वनके माहीं ॥  
युवती एक मिली धौं कोही । सो पहुँचाय गई घूर मोही ॥  
सुनि यशुदा मन अति अकुलानी । धोये पदलै तातोपानी ॥  
तुरत श्यामको भोजन दीनो । निरखि मुखारविंद सुख लीनो ॥  
लीलासागर कुँवर कन्हाई । सदा सदा भक्तन सुखदाई ॥  
ब्रजवासी प्रभु सब गुण आगर । नंदनंदन सुन्दर सुखसागर ॥  
दोहा-अति श्रीकीरति नंदनी, रूप राशि गुण खान ॥

१ हाथ । २ तुम्हारे प्रेममेल गरह्यो । ३ आंख । ४ आपस । ५ राधिका ।

६ रूपका समूह-अत्यंत रूपवती ।



चली श्याम सुखदै भवन, नागरि नवल सुजान ॥  
 सो०-लई खोलके हाथ, आंचरते मोती लरी ॥  
 सखी मिली इक साथ, बूझत कह तू लाडिली ॥  
 तासों व्योरा कहि समुझायो । गई हती यह काज बतायो ॥  
 कह्यो सखी तब सुनरी प्यारी । ऐसी निधरकभई कहारी ॥  
 ब्रज घर घर तू फिरति अकेली । संग नहीं कोउ सखी सहेली ॥  
 मोको संग बोलि नहि लीनी । ऐसी तैं करनी यह कीनी ॥  
 प्रातहि गई अवहि तू आई । बीतो दिवस निशा निथराई ॥  
 पायो हार किधौं पुनि नाहीं । देखहु मोहिं साद मन माहीं ॥  
 चतुर सखी मनमें यह जानी । मिलवतिहै यह झूठी बानी ॥  
 यह तौ गई श्यामके पाला । आवतिहै करि भोग विलासा ॥  
 कह प्यारी किन हार चुरायो । कैसे जाय कहांते पायो ॥  
 ब्रजयुवतिन सबहिन में जानौं । कहौ तौ सबके नाम बखानौं ॥  
 ताको नाम लेहि किनलीन्हों । प्यारी तेरे गुण में चीन्हों ॥  
 जोर तुम्हारो कुँवरकन्हारै । तिनसों जाय विलैस तू आई ॥  
 दोहा-रस वश कीन्हे श्यामतैं, कहा बनावति बात ॥  
 कहे देत रस रँग भरे, अरु सौहैं सब गात ॥  
 सो०-कहवहकावति मोहिं, कहां हार कहँ ग्वालानी ॥  
 तबते जानति तोहिं, जबतैं तैं हरि संग कियो ॥  
 इन बातनि कछु पावति हैरी । तोहिं यहै नितभावति हैरी ॥  
 देखत मोहिं अकेली जवहीं । नई बात उपजावति तबहीं ॥  
 बिनही देखे झूठ लगावै । नाहक मोसों वैर बढ़ावै ॥  
 सोह दिखे बूझति में तोहीं । जोर कहतिकै देख्यो मोहीं ॥  
 जब जानी प्यारी विहँझानी । तब वह चतुर सखी मुसकानी ॥  
 तब हँसि कह्यो जाहु घर प्यारी । तू जीती में तोसों हारी ॥  
 चली भवन वृषभालु डुलारी । अति अवसर कहत महतारी ॥

१ व्यवस्था । २ रस । ३ सौगन्ध । ४ अनखानी । ५ चिता ।



गई प्रात राधा नहि आई । दिवस गयो निशियामँ विहाई ॥  
 हार काज मैं त्रासँ दिखाई । ताते रुखरही कहँ जाई ॥  
 हैहै धौं काके घर माहीं । कहां जाउँ मैं हूँदन ताहीं ॥  
 जाहु हार यह कहि पछिताई । सुता सनेह अधिक अकुलाई ॥  
 सुनि है बात मँहर कहँ जवहीं । मोपर अति रिसकरि है तवहीं ॥  
 दोहा-शोचति जननी विकल अति, मन न लहति विश्राम ॥

उर डराति ताही समय, गई कुँवरि निज धाम ॥  
 सो०-देखतिही उठि धाय, हरषि लई उर लायके ॥

सुता माय उरलाय, शोच भिटयो धीरज भयो ॥  
 लैरी मात हार मैं पायो । जाकारण मोहि त्रास दिखायो ॥  
 मनहीं मन कीरति सजुचाई । पोच करी मैं याहि रिसाई ॥  
 अति पुनीत राधिका प्रवी नी । कृष्ण मिलनहित यह प्रति कीनी ॥  
 अगमअगोचर है प्रभु जोई । ब्रज वनितनवश कीने सोई ॥  
 जो प्रभु शिव सनकादिक ध्यावे । ब्रज गोपिन सँग सो सुख पावै ॥  
 हरिकी कृपा अगोचर सारी । निगमन हूँते अगम न भारी ॥  
 प्रीति विवस सबते गिरिधारी । राजा रंक पुरुष कहँ नारी ॥  
 देवकि उदर प्रीति वश आये । प्रीतिहिते यशुमति पय प्याये ॥  
 प्रीतिविवस वन धेनु चराई । प्रीतिविवस नंद कुँवर कन्हाई ॥  
 प्रीतिहिके वश दही चुरायो । प्रीतिविवस ऊखल बँधवायो ॥  
 प्रीतिविवस गोवर्द्धनधारी । प्रीतिविवस नटवर वनवारी ॥  
 प्रीतिविवस गोपिन सँगकामी । प्रीतिविवस वृन्दावनधामी ॥  
 दोहा-श्याम सदा वश प्रीतिके, तीन भुवन विख्यात ॥

विना प्रीति नहि पाइये, नंदमहरको तात ॥  
 सो०-प्रीति करहु चित लाय, ब्रजवासी प्रभुपदकजल ॥  
 कहत सुनत श्रुति गाय, प्रभु रीझत हैं प्रीतिको ॥

१ एकपहरात्रि । २ डर । ३ वृषभानु । ४ श्रुति । ५ बतुर । ६ जाननेयो-  
 ग्यनहीं-अदेख । ७ वेर ।



अथ प्यारीके घर मिलनेकी लीला ॥

भये श्याम नागरिवश ऐसे । फिरति छांह संगहि संग जैसे ॥  
वदनकमलरस रूप लुभाने । रहत मिली मुख जो भडराने ॥  
वचन नादरस भृंग जो गीधे । नैन कटाक्ष बंक शर बीधे ॥  
कबहुँ श्याम यमुनातट जाहीं । विन प्यारी देखे अकुलाहीं ॥  
कबहुँ कदम चढ़ि मगँ अवलोकैं । कबहुँ जाय वन कुंजविलोकैं ॥  
गृह वन लगत कहूँ मन नाहीं । मिलन प्रकार चहत चितमाहीं ॥  
तय वृषभानु पुरातन आवैं । मुरली मधुर बजावैं गावैं ॥  
प्यारी प्रगट श्याम गति देखी । मनहीं मनहि सिहात विशेखी ॥  
अति अनुराग भरे दोउ नागर । गुण सागररस रूप उजागर ॥  
अरस परस दोउ चाहत ऐसे । शशि चकोर अँबुज अँलि जैसे ॥  
चली यमुन वृषभानु दुलारी । शोभित संग नवल ब्रजनारी ॥  
देखे नंद सुवन तेहि खोरी । व्याकुल प्रेम विकल मति भोरी ॥

दोहा-सखिन संग लखि नागरी, मन डरपी सकुचाय ॥

श्यामपरे फँद कामके, कौन कहै समुझाय ॥

सो०-सखियनके संकोच, बोल सकत नहि मुख वचन ॥

हृदय भयो अति शोच, देखि विरह व्याकुल हरिहि ॥

इतहि सखिनसों बात बनावैं । उतहि श्यामको भाव जनावैं ॥  
मुख मुसकाय सकुच पुनिलीने । सहज अलक निरवारन कीने ॥  
एक सखी यमुनासों आवति । ताहि भँटि यों वचन सुनावति ॥  
मेरे सदन आइयो आली । हर्षभये यह सुनि वनमाली ॥  
प्यारी गुप्त भाव जो कीनो । श्याम सुजान जानसो लीनो ॥  
हर्षि गये तब निज गृह मोहन । प्यारी चली सखिनके गोहन ॥  
चतुरसखिन मनमें लखि लीनो । भाँव कछु हरिसों इन कीनो ॥  
हरवै आपुसमें बतरानी । हरितनलखि कछु यह मुसकानी ॥

१ राधिका । २ हरिण । ३ रस्ता । ४ देखें । ५ प्यार । ६ कमल ।

७ भौरा । ८ लाज । ९ साथ । १० प्रेम ।



पुनि मुसकाय कमल मुख फेयो । सदन बुलाय सखीको डेयो ॥  
 गये श्याम उत हर्ष बढ़ाई । ये अति चतुर करी चतुराई ॥  
 और भाव कैसो गन कोऊ । आजरौनि मिलि हैं ये दोऊ ॥  
 लै यमुना ते जल अतुराई । सखिन संग प्यारी घर आई ॥  
 दोहा-भाव दियो निशि आयहैं, मेरे मोहन आज ॥

अति हर्षित अंगन सजित, भूषण वसन समाज ॥  
 सो०-सहज रूपकी खान, अंग शृंगारत लाडिली ॥

कोकरिसकै बखान, त्रिभुवनपति हरिवल्लभा ॥  
 अंगसंगार कियो हरिप्यारी । बेणी रचि निज पाणि सँवारी ॥  
 मोतिन संग जराऊ ठीको । कियो बिंदु बंधनको नीको ॥  
 लोचन अंजन रेख बनाई । श्रवणन तरवनकी छवि छाई ॥  
 नासानथ अतिही छवि छाजै । नागबेल रँग अधरन राजै ॥  
 शुभग अंग सब नौसत साजै । सुरँग सुगंध वसन शुभ आजै ॥  
 मनमोहनको पंथ निहारै । कबहुँकि उत्कंठा जिय धारै ॥  
 भयो बालशशि अस्तनिहारी । कहति आज ऐहैं गिरिधारी ॥  
 आवन पैहैं कैधौं नाहीं । कैआवत हैहैं मग माहीं ॥  
 कैधौं तात मात भय करिहैं । कै आवत मेरे घरडरिहैं ॥  
 आवेंगे कैधौं हरि नाहीं । यों शोचति प्यारी मन माहीं ॥  
 कबहुँ रचि रुचि सेज सँवारे । हरि ऐहैं मन हर्ष विचारे ॥  
 सुर्मन सुगंध सेज पर धारै । पुनि पुनिकर अभिलाष निहारै ॥  
 दोहा-आवैं कबहुँ अचानकहुँ, जो मो गृह घनश्याम ॥

डारति अति अनुराग भरि, सुभग पांवडे धाम ॥  
 सो०-प्रगटे कृपानिधान, यों अभिलाषा करत हीं ॥

को कहिसकै बखान, भयो जुसुखलखिदुहुँनगन ॥  
 वह छवि कापै जाति बखानी । वहरसझिझक मंद मुसकानी ॥  
 वह मृदु मधुर मंद मुसकानी । वह संयोग प्रेम सज्जुचानी ॥

१ गृह । २ रात्रि । ३ नयन । ४ नाक । ५ ओष्ठ । ६ फूल ।



वह शोभा वह चितवन बांकी । वह रस प्रेम सुभग दुहुँ धांकी ॥  
 वह सुख श्रीराधा माधवको । जो कहिसकै आहि जग कविको ॥  
 जाकी महिमा वेद न जाने । कविताको केहि भांति बखाने ॥  
 श्यामा श्याम सेज परसोहैं । अरस परस दोऊ मन मोहैं ॥  
 गुण आगर छवि सागर दोऊ । कोटि काम रतिसम नहि सोऊ ॥  
 मत्त प्रेमरस विवस बिहारैं । युगल परस्पर अंग सँवारै ॥  
 लटपटि पाग सँवारति प्यारी । अलक सुधारत श्रीगिरिधारी ॥  
 रसविलास दोऊ अनुरागे । आलिंगन चुंबन रस पागे ॥  
 हास विलास विविध रसरती । इह सुखरैनियो मन्त्रयवीती ॥  
 अतिरसमत्त युगल अलसाने । पुनिपौढ़े दोऊ लपटाने ॥

दोहा-निशि निवटी नमतामिटी, उडुंगणज्योतिमलीन ॥

गये कुसुमकुम्हिलायके, भई दीप छवि छीन ॥

सो०-विकसै सरस सरोज, भयो पवन शीतल सुरभि ॥

धरी उतारि मनोज, पनच आपने धनुषते ॥

सरसवचन बोली तब प्यारी । जागहु प्राणनाथ वनवारी ॥  
 भयो प्रातको समय कन्हार्ई । प्राचीदिशि पीरी पर आई ॥  
 चंदन मलिन चिरइचुहचानी । अलिछूटे कुसुदिन सकुचानी ॥  
 बोलेतमंचर जहँ तहँ वानी । मिले कोक कोकी सुखमानी ॥  
 उठहु प्राणपति सदन सिधारौ । हैब्रज घर घर वेर हमारौ ॥  
 लगी रहति पंखति ब्रजनारी । जागहिं जिन गुरुजनभय भारी ॥  
 सुनत उठे मोहन मुसकाई । चले सदन अपने अनुराई ॥  
 गृहतें निकसत सखियन जानी । देखिदरशतनु दशा भुलानी ॥  
 प्रगट दरशदै गये कन्हार्ई । यह उनकी मनसाध पुराई ॥  
 शीश मुकुट मोतिनकी माला । पीत वसन कटि नैन विशाला ॥  
 श्याम वरन तनु सुन्दरताई । अंग २ छवि वरणि न जाई ॥

१ संसार । २ हिलमिल । ३ दोनों । ४ तीनप्रहरात्रि । ५ नक्षत्रगण ।

६ फूले । ७ कमल । ८ भौरा । ९ मुर्गी ।



देखि रूप मन रख्यो लुभाई । निकस गये गृह कुँवर कन्हवाई ॥  
 दोहा-बार बार जिय लाड़िली, यह शोचति पछितात ॥  
 गये श्याम आलस भरे, नेकु न सोये रात ॥  
 सोठा-देखे जिन सखि कोय, श्याम गये मोसदनते ॥  
 मैं राख्यो है गोये, अबलागि यह रससखिनसों ॥  
 देखौं जाय पवँरिहै प्यारी । जहां तहां ठाढ़ीं ब्रजनारी ॥  
 सकुच गई चिता उपजाई । बार बार मन मन पछिताई ॥  
 हरिसों प्रीति गुप्तही भेरी । सो इन आज प्रगट करिहेरी ॥  
 निकसे श्याम हमारे घरलों । इन जान्यों हैहै अटकरिसों ॥  
 नितही नित बूझति ये आई । मैं निदरचो इनको सतराई ॥  
 अबतौ श्याम प्रगट इन देख्यो । करिहै मोलों बहुत परेख्यो ॥  
 यह तौ दौब भलों इन पायो । अब कैसे करि जाय छिपायो ॥  
 अबहीं बूझाहिगी सब आई । कहकारिहों उनसों चतुराई ॥  
 प्रगट करांतो होय अनीती । राखन गुप्त कछो हरि प्रीती ॥  
 शोच परचो कछु बात न आवै । बार बार मन प्रभुहि भनावै ॥  
 प्राणनाथ हरि होउ सहाई । जाते भेरी पति रहिजाई ॥  
 जैसे बोध सखिनको होई । दीजै नाथ बुद्धि अब सोई ॥  
 दोहा-ऐसे शोचति लाड़िली, कबहुं प्रभुहि बनाय ॥  
 कबहुं प्रभुको सुख समुझि, प्रेम मग्न हैजाय ॥  
 सो०-भयो बोध उर आय, सुमिरतही मनभावनों ॥  
 कहिहौं सखिन बुझाय, मन मन हरषी नागरी ॥  
 परम कुशल राधे हरि प्यारी । रच्यो सखिनको बोध विचारी ॥  
 अति आनंद पुलकितहु आयो । शोच मोह उरैते बिसरायो ॥  
 जो छवि सुन्दर कुँवर कन्हवाई । गये प्रात सखियन दरशाई ॥  
 उनसों सोई रूप बखान्यों । यह विचार प्यारी उर आन्यों ॥  
 प्यारी पियके गर्व गहेली । अंग अंग छवि पुंज भरेली ॥

१ छिपाय । २ ज्ञान । ३ हृदय । ४ देखाय ।



दैठी सदन विराजतरूरी । श्याम सनेह सुधारस पूरी ॥  
 कहति परस्पर सखि परहासा । कहति चलौ राधाके पासा ॥  
 हैहै निधरक धरमं वैसी । देखहि चलौ बदन छवि कैसी ॥  
 कैसे अंग अभूषण कैसे । कछु बदले कैधौहैं वैसे ॥  
 आज रैनि हरि सां रति मानी । कहिहै कहा सुनैं चलि बानी ॥  
 राधा गृह गवनी ब्रज नारी । गई जहां वृषभानु डुलारी ॥  
 देखि नागरी मुख नहि बोली । जान्यों आई करत ठोली ॥  
 दोहा-सहज रही बोली नहीं, कछु बदन सां वैन ॥

निकट बुलायो सखिनको, नयननहीकी सैन ॥  
 सो०-इतलीनों इन जान, परमचतुर आली सवै ॥

यह कछु रच्यो सयान, देख हमैं बोली नहीं ॥  
 अपना भेद कछु नहि दैहैं । कहा बोध रचिकै धांकैहैं ॥  
 अपनि जांच बल चीर चुरावैं । कैसेहुं प्रगट न काहु जनवैं ॥  
 निधरक भई श्याम संग पाई । भूलहु मति याकी लरिकई ॥  
 निरखौ भुक्कुटी तयोर निहारी । कहै कहा धौं बात सँवारी ॥  
 राखति गर्व तुमहुं सब कोऊ । देखहु बोल नहीं किन कोऊ ॥  
 कछो बिहँसि तब इक ब्रजनारी । सुनौ अहो वृषभानु कुमारी ॥  
 आज कहा मुख मूंद रहीहै । कापररिसकरि मौनै गहीहै ॥  
 हमसां कहति नहीं सो एरी । हम तौ संग सखी हैं तेरी ॥  
 कै देवनको ध्यान धरोरी । कै सुभाव कछु यहै परचोरी ॥  
 जब आवति हम तेरे प्यारी । तब तब यहै धरन तैं धारी ॥  
 तुम डुराव कित राखति हमसां । हमहूँ कछु राखति हैं तुमसां ॥  
 ऐसो शोच कहा मन माहीं । जो जवाब तोहि आवत नाहीं ॥  
 दोहा-कछु दिन ते तेरी प्रकृति, अरी परी यह कौन ॥

निठुर भई हमसां रहति, जब तब साधे मौन ॥  
 सो०-अपने मनकी बात, कछु हमसां भाँपति नहीं ॥

१ मुख । २ सखी । ३ मत । ४ भुपसाधीहै । ५ स्वभाव । ६ कहतिनहीं ।



ऐसे कहि सुसकात, प्यारीसों सब नागरी ॥  
 मनही मन जानति सब प्यारी । मोसों हँसी करति ब्रजनारी ॥  
 परम प्रवीन सकल गुनखानी । बोली मधुर मनोहर बानी ॥  
 सुनहु सखी बृझत कह हमसों । कहा बुझाय कहों मैं तुमसों ॥  
 आज प्रात इक चरित नयोरी । जात इतै कछु दृगन लह्योरी ॥  
 नीके नेकु न देखन पाई । तबहीते मन रह्यो लुभाई ॥  
 कै वनैश्याम कि श्याम कन्हवाई । यहै शोच उर रह्यो समाई ॥  
 बकपंक्ती कै हैं गज मोती । पीत दुकूलकि दामिन जोती ॥  
 इन्द्र शरीसन कै वनमाला । शीश मुकुट कैधों अरि व्याला ॥  
 मन्द मधुर जलधरकी गाजन । कैधों पग नूपुर ध्वनि बाजन ॥  
 देखे आज श्याम जबहीते । परयो यहै धोखो तबहीते ॥  
 कहा कहों हारिकी चपलाई । ऐसो रूपगयो दरशाय ॥  
 भरी श्यामरस कुँवरि सयानी । कहति सखिनसों निधरकबानी ॥  
 दोहा-सखी कहति सब आपुसैं, सुनहु न याकी बात ॥  
 प्रगट करन आई जु हम, आपुहि प्रगटति जात ॥  
 सो०-हम देखे जिय श्याम, तैसीही इनहं लखे ॥  
 दोष देति विन काम, यह सूधी हमहीं कुटिल ॥  
 इतनहि रहौ और जिन भाखौ । जो चाहौ अपनी पति राखौ ॥  
 इनसों तुम चाहति हौ जीतौ । मनते गर्व करौ यह रीतौ ॥  
 यह हरिकी प्यारी पटरानी । को याकी बुधि सकै बखानी ॥  
 हम याकी दासी सरिनाहीं । देखहु सखी समुझ मनमाहीं ॥  
 हम देखत कछु और सुभाऊ । यह देखति हरिको सतभाऊ ॥  
 याकी प्रस्तुति कहा बखाने । इनहीं भले श्याम पहिचाने ॥  
 तब हँसिकह्यो सखिन सुनिप्यारी । तैं जो लखे सु हैं वनचारी ॥  
 प्रातहिं ते जो आज निहारे । गये कान्हवे मेघनकारे ॥  
 मोर मुकुट शिरभोरन होई । कटि पटपीत न दामिन सोई ॥

१ परमचतुर । २ आखन । ३ कालेबादल । ४ श्रीकृष्ण ।

५ बिजुली । ६ धनुष ।



सुकुमाल बनमाल सुबेसू । नहिं वकपाँति न धनुष सुरेसू ॥  
 पगनुपुरध्वनि गर्जन नाहीं । मत राखौ धोखो मनमाहीं ॥  
 देखे तैं प्रातहिं गिरिधारी । काहेको शोचति मन प्यारी ॥  
 दोहा-धनि धनि ब्रजकी नागरी, हरि छवि लखति अनूप ॥

मोहिं होत धोखो तबहिं, जब देखति वह रूप ॥  
 सो०-तुम देखति हरि गात, कैसे दृग ठहराय सब ॥

मोपै लख्यो नजात, करिहारी के तौ यतन ॥  
 तुम दर्शन पावति री कैसे । मोहू श्याम दिखावहु तैसे ॥  
 वे तौ अतिछवि चपल कन्हाई । तुम कैसे देखति ठहराई ॥  
 कैसो रूप हृदयमें राख्यो । मोसों सखी सांच सब भाख्यो ॥  
 मैं देखत पावति हरिनीके । रहति सदा अभिलाषा जीके ॥  
 धनि धनि तू वृषभानु डुलारी । धनि तुम पिता धन्य महतारी ॥  
 धनि सो दिवसरैनि सो वारा । जब तैं लीनो री अवतारा ॥  
 धनि तेरे वश कुंजविहारी । धनि तैं वश कीने गिरिधारी ॥  
 भाव भक्ति मति रति धनसोऊ । एक सुभाव धन्य तुम दोऊ ॥  
 तोहि श्याम हम कहा दिखावैं । तू हरिको हरि तोको भावैं ॥  
 एक जीव द्वैदेह तुम्हारी । वे तो मैं तू उनमें प्यारी ॥  
 उनकी पटतरैको तू दीजै । तेरी पटतर उनको लीजै ॥  
 सुधा सुधागुण क्यों बिलगाई । गूगेको गुरु कह्यो न जाई ॥  
 दोहा-तू उनके उरमें बसी, वे तेरे उर माहिं ॥

अरस परश ज्यों देखिये, दर्पण दर्पण छाहिं ॥  
 सो०-कही कौनपै जाहिं, तुम दोउ निर्मल गात अति ॥

वे तेरे रँग माहिं, तू उनके रँगमें रंगी ॥  
 नीलाम्बर श्यामा छवि तेरे । तुम छवि पीतवसन उनकेरे ॥  
 वन भीतर दामिनी बिराजै । दामिनि वनके चहुँ दिशि राजै ॥

१ उपमाराहित । २ चतुर । ३ समानता । ४ हृदय । ५ शीशा । ६ पीलेवस्त्र ।

७ बादल । ८ बिजुली ।



तुम अनूप दोऊ समजोरी । नदनैदन वृषभालु किशोरी ॥  
 सुनि राखियनके मुखवानी । बोली राधाकुँवरि सयानी ॥  
 सुनि ललतासांची कहिमोसां । भैं बूझति सकुचतहाँ तोसां ॥  
 मोसां मानत नेह कन्हार्इ । मेरीसां कहि मोहि सुनार्इ ॥  
 तुमतौ रहत श्यामसँग नितही । मिलति जाय उनसों जित तितही ॥  
 उनके मनकी सब तुम जानौ । हाहा मोसां साँच बखानौ ॥  
 सुनि राधा इतरात कहारी । तोते और कौन है प्यारी ॥  
 तेरे वश नैदनन्दन ऐसे । रहत पवन पंखा वश जैसे ॥  
 ज्यों चकोर शशिके वश माहीं । है शरीरके वश परछाहीं ॥  
 नाद विवस मृग देखिय जैसे । मन मोहन तेरे वश तैसे ॥  
 दोहा-भिली खिरक तू श्यामको, दर्ई धेनु तुहि तोहि ॥  
 तेरे वश हरि तबहिते, कहा भुरावति मोहि ॥  
 सो०-वरणों कहा सनेह, नेकहु तुम न्यारे नहीं ॥  
 हौ तुम एकहि देह, वे दक्षिण तुम वाम अँग ॥

अथ गर्वव्याजविरह लीला ॥

सुनि प्यारी ललता मुख बानी । मैं ऐसी जिय में यह आनी ॥  
और नहीं कोऊ मो सरस्वी । हों राधा आधा अँग हरिकी ॥  
अपनेही वश पिय को करि हों । अनत जात देखहुँ तो लरिहों ॥  
ऐसे गर्व कियो जिय प्यारी । घर घर गई सकल ब्रजनारी ॥  
इह अन्तर आये गिरिधारी । गर्भ विभंजन जन सुखकारी ॥  
हरि अन्तर्यामी अविनासी । जानी प्यारी गर्व उदासी ॥  
उझकि झाँकि प्यारी तन हेरयो । प्यारी देखतही सुख फेरयो ॥  
कह्यो कान्ह तुम मानत नहीं । उझकत फिरत घरत ब्रज भाहीं ॥  
मिसही मिस युवतिन को हेरो । नेक नहीं छाँड़त धन धेरो ॥  
कोउ जैसे तैसे अपने घर । तुम आवत मानत नहीं डर ॥  
ऐसे प्रेम गर्व करि प्यारी । प्राणनाथ तन नाहिं निहारी ॥



जान्यो द्वारे लगे कन्हाई। बैठि रही अभिमान जनाई ॥  
 दोहा-हृदय श्याम मुख धाममें, राख्यो गर्व बसाय ॥  
 ठौर तहां पायो नहीं, रहे श्याम सकुचाय ॥  
 सो०-जहाँ रहत अभिमान, तहाँ बास मेरी नहीं ॥

सो राधा उरजान, आप लगे पछितान हरि ॥  
 तुरतहि गमन तहांते कीनों। नहीं दरश प्यारीको दीनों ॥  
 चकित भई प्यारी मनमाहीं। यहां श्याम आये क्यों नाहीं ॥  
 आपन आप द्वार पुनि देख्यो। तहां नाहि नैदलालहि पेख्यो ॥  
 झांकतही फिरगये कन्हाई। मनहीं मन श्यामा पछिताई ॥  
 मोते चुकपरी अति भारी। ताते मोहन मोहि बिसारी ॥  
 एक तौ बैठि रही गर्वानी। दूजे मैं हरि सों झहरानी ॥  
 मेरी बुद्धि जानि कै हीनी। मोसों श्याम निदुरता कीनी ॥  
 वे बहुनायक कुंज बिहारी। मोसों उनके कोटिकनारी ॥  
 कासे कहौं हरिहि को लावै। को अब मोको हरिहि मिलावै ॥  
 भई विरह व्याकुल अकुलाई। बदन सरोजगयो कुम्हलाई ॥  
 तब आपुनको निदुर कहावै। सुमिरि प्रीति उर भरि २ आवै ॥  
 नेकु नहीं धीरज सर धारै। नैन सरोजनसों जल ठारै ॥  
 दोहा-भई विकल अति नागरी, विरह व्यथाकी पीर ॥

खान पान भायै नहीं, सुधि बुधि तजी शरीर ॥  
 सो०-घर बाहर न सुहाय, सुख सब दुखदायक भये ॥  
 रह्यो शोच उरछाय, ब्रजवासी प्रभु मिलनको ॥  
 राधा सदन सखी पुनि आई। देखि दशा मन अति भरमाई ॥  
 अति व्याकुल तब बदन मलीना। नीरे बिहीन मीन जिमिदीना ॥  
 कर गहि ३ वृत्तति ब्रजनारी। कहा भयो तोकहरी प्यारी ॥  
 ऐसे विवस भई तू जाहै। हमै सुनाय कहत नाहि काहै ॥  
 अति प्रसन्न देख्यो तौहि तबहीं। क्यों मुरझाय गईरी अबहीं ॥

१ घमंड । २ पानी । ३ मछरी ।



बहुरि लखेधौं कतहु कन्हाई । उनहु तोहि ठगौरी लाई ॥  
श्याम नाम सुनि श्रवणन जागी । जान्यो हरि आये अनुरागी ॥  
आनुर सखी कंठ लपटानी । चूक परी मोति कहि बानी ॥  
अब अपराध क्षमो रिसत्यागी । करुणा करि मोहि करहु सभागी ॥  
चकित रहौ सब ब्रजकी नारी । रहौ शोचि राधिकहि निहारी ॥  
शीतल जलसों मुख पखरोयो । पोछि आँचरन वचन सुनायो ॥  
आज भई कैसी गति तेरी । परम चतुर ब्रजमें तू हैरी ॥  
दोहा-भयो अलिनके वचन सुनि, कछू चेत उर आय ॥

तब जानी एतौ सखी, गई हृदय सकुचाय ॥  
सो०-क्यों तुम वदन मलीन, काहे तू ऐसी भई ॥

कहु प्यारी परवीन, बार बार बूझति सखी ॥  
बोली तब सखियन सों प्यारी । तुमसों कहो दुराव कहारी ॥  
मैं तो हरिके हाथ बिकानी । उन मोहि तजी कुटिलमतिजानी ॥  
अपनी कथा श्यामकी करनी । प्रगट कहों तुमसों सब वरनी ॥  
बैठीही मैं सदन अकेली । झाँके आय द्वार हरि हेली ॥  
मैं मनमें कछू गर्व बढ़ायो । आदर करि नहिं भवन बुलायो ॥  
उन मेरे मनकी सब जानी । अन्तर्यामी सारंग पानी ॥  
कमलनैन वे गर्व प्रहारी । जाति रहे सखि मोहि विसारी ॥  
तबते विरह विकल अति कीनो । अहंकार यह फल मोहि दीनो ॥  
चित नरहै कितनो समझाऊं । अब कैसे करि दरशन पाऊं ॥  
भयो भवैन वन मो कहँ आली । नहीं सुहात बिना वनमाली ॥  
सुनहु सखी लागति मैं पाऊ । अब हरि मिलैं सो करहु उपाऊ ॥  
बिन मनमोहन ऊँवर कन्हाई । भये सुखद सब मो दुखदाई ॥  
दोहा-गिरिकन्यार्पति तिलककर, दाहत अनल समान ॥  
शिवसुत बाहन भखनको, भयो हलाहलपान ॥

१ कानन । २ धुलाया । ३ सखिन । ४ घर । ५ कृष्ण ।

६ महादेव । ७ अग्नि ।



सो०-जलधि सुतासुत हार, भयो इंद्र आयुध सखी ॥

मलयज मनहुँ अंगार, शाखामृगरिपु वसनवर ॥

सखी दशा मेरी यह हैरी । भयो काम अब मोको बैरी ॥

वारिज भव सुत प्रियकी चाली । अब नहि हरिसों करिहौं आली ॥

ऋतु विचारि जो मानहि करिये सोउ जरि जाहु न उरमें धरिये ॥

अब सुभाव रहिहौं हरि साथा । मोहि मिलावहु सखि ब्रजनाथा ॥

सुनि राधे करनी यह तेरी । हमसों भेद क्रियो तैं एरी ॥

उनके गुण जैसे नहि जाने । अबहींते ऐसे ढंग ठाने ॥

एकहि बार मिली तू धाई । नहि राखी मर्याद बड़ाई ॥

तैंहीं उनको मूंड चढ़ायो । तब नहि हमको भेद जनायो ॥

अवन विपिन सँग डोलन लागी । वे बहु तरुणि रवण अनुरागी ॥

निज कर अपनो महत नैवायो । परवश परि कौने सुखपायो ॥

मेरो कल्ला अजहुँ मन माहीं । हित करि मानेगी धौं नाहीं ॥

धीरज धरि कत भरत वृथाही । तूहू मान करति क्यों नाहीं ॥

दोहा-वात आपनी आपने, कर है देखु विचार ॥

भई कहा ऐसी विवस, एरी एकहिवार ॥

सो०-पुरुष अवैरजियजान, भोगी बहुत प्रसून को ॥

बिना किये बहु मान, कौने पिय निज वश किये ॥

कहुति सखी तुम तौ यह बाता । कंप होत सुनि मेरे गाता ॥

मैंतौ मान श्यामसों कीनो । ताते इतनो दुख मोहि दीनो ॥

अबतौ भूलि मान नहि करिहौं । श्याम मिलाहि तौ पाँयन परिहौं ॥

विनती करि करि उनहि सुनाऊ । यह अपनो अपराध क्षमाऊ ॥

चूकपरी मोते मैं जानौं । उनको यह अपराध न मानौं ॥

वे आवतिहैं मेरे नीके । मैंहीं गर्वधरयो सखि जीके ॥

मेरे गर्वते कहा सरचोरी । मिट्यो हृदय सुख दुःख भयोरी ॥

जति हानि आपनी होई । कहौ सखी कीजै क्यों सोई ॥

१ मोती । २ अश्व । ३ चंदन । ४ बंदर । ५ गर्व ।



मानविना नहिं प्रीति रहैरी । प्रगट देखि मोहिं कहा कहैरी ॥  
 धाय मिलेकी गति तेरीसी । भई अधीन फिरति चेरीसी ॥  
 अपनो भेद उन्हें तैं दीनो । तब दुराव हमहूँ साँ कीनो ॥  
 भयविन प्रीति होति नहिं प्यारी । सच मानहिं सखि सीख हमारी ॥  
 दोहा-पुनि पुनि सिखवति तुम सखी, मान करनको मोहिं ॥

मन तौ भरे हाथ नहिं, मान कौन विधि होहि ॥  
 सो०-उमगभरत दिनरात, श्यामगुणन अभिलाष करि ॥

मन नहिं मानत बात, मानसजों कैसे सखी ॥  
 मन मोसों अब बाम भयोरी । कहा करौं हरि संग गयोरी ॥  
 अब अपनो हित उनाहिं न जानौं । मुदित मूढ अपमान न मानौं ॥  
 इन्द्रिय सब स्वारथ रस पागी । गई संग मनहीके लागी ॥  
 घर फूटे क्यों रह्यो परैरी । मनहिं बिना को मान करैरी ॥  
 अब कोऊ भरे सँग नाहीं । रही अकेली मैं तनै भाहीं ॥  
 तापर भयो काम अब वैरी । बिरहें अग्नि तनु जारत हैरी ॥  
 इतने पर तुम मान करावति । कहाँ कौन सखि यह कहनावति ॥  
 मैं तौ चूक आपनी मानी । मोहिं मिलावहु श्यामहिं आनी ॥  
 अबतौ क्योंहूँ मान न करिहौं । ऐसी बात कहै तिहि लरिहौं ॥  
 आली मोहिं नैदानदन भावै । सोइ हितू जो आनि मिलावै ॥  
 अब जो मिलहिं श्याम बड़भागी । फिरति रहौं संगहिसँग लागी ॥  
 ऐसे कहि प्यारी अनुरागी । दारुण बिरह बिथा उर जागी ॥  
 दोहा-देखि दशा सहि नहिं सकी, अली उठी अकुलाय ॥  
 हम राधाकी प्रिय सखी, रचिये बेगि उपाय ॥

सो०-कहैं श्यामसों जाय, ऐसी चूक परी कहा ॥  
 दीजै याहि मिलाय, झुरि झुरि अति पीरी परी ॥  
 सखिन कह्यो तब सुनरी प्यारी । मतिहि होय व्याकुल तुकुमारी ॥  
 अबहिं जाय हम श्यामहि लावैं । नेकु धीर धरु तौहिं मिलावैं ॥

१ देह । २ विछोहव्यथा । ३ मुर्झाये ।



पटसों पोंछि बदन बैठाई । तरक बात बहु भाषि सुनाई ॥  
 नेकु नहीं धीरज उर धारै । बार बार मुख कान्ह उचारै ॥  
 सावधानकरि सखी सयानी । दौरी गई यह अतुरानी ॥  
 लखि हरि मुख ललतामुसकानी । हरि लखि हँसे दुहुँ मन जानी ॥  
 तब हरि ललतासों मुसकाई । बूझत चितवत नैन चुराई ॥  
 अति आतुर आई कत धाई । काहे बदन गयो मुरझाई ॥  
 बोली ललता तब मुसिकाई । सुनहु चतुर नैदंनद कन्हारी ॥  
 आज एक अचरज लखि पायो । परम विचित्र न जात बतायो ॥  
 अतिही अद्भुत रचना जाकी । वर्णत बनत भांति नहिं ताकी ॥  
 रीझरही मैं ताहि निहारी । रीझौगे लखि कुंजविहारी ॥  
 दोहा-मैं आई तुमसों कहन, चलहु दिखाऊं नैन ॥

देखि परम सुख पायहौ, जो मानौ मोवैन ॥  
 सो०-एक अनूपम बाग, स्वर्ण वर्ण नहिं जाय कहि ॥  
 उपजत लखि अनुराग, अतिविचित्र बानकवन्यो ॥

युगल कमल अति अमल विराजै । तापरराजहंस छवि छाजै ॥  
 द्वै कदली तरु तापरसोहैं । बिनदल फल उलटे मन मोहैं ॥  
 तापर मृगपति करत बिहारू । मृगपति पर सरवर इकचारू ॥  
 द्वै गिरिवर सरवर परराजै । तिन पर एक कपोत विराजै ॥  
 निकट सनाल कमल द्वै फूले । शोभितते अधिदिस कौझले ॥  
 फूल्यो पुनि कपोत परनीको । एक सरोज भावतो जीको ॥  
 तापर एक अमीफल लाग्यो । कीर एक तापर अनुराग्यो ॥  
 तहां एक कोयल द्वै खंजन । तिनपर धनुष शुभगमन रंजन ॥  
 धनुषर शशि द्वै नागिनकारी । मणि धरि एक नागिनी भारी ॥  
 ऐसो अनूपम बाग सुहायो । घटत नेहजल कछु कुम्हलायो ॥  
 चलि घनश्यामसो दीजै । शोभा देखि सफल दृग कीजै ॥

१ अद्भुत । २ जिसकी उपमा नहोय । ३ प्यार । ४ प्राण । ५ छाती । ६ गला ।

७ कमल । ८ धुकुटी ।



करि विचार देखो मनमाहीं । बनी ललित सब अंगनिमाहीं ॥  
 दोहा—सुनहु कान्ह सुंदर नवल, छैल छबीले श्याम ॥  
 तुम्हें मिलनको नवल वह, अति व्याकुल है वाम ॥  
 सो०—कहा भयो जो मान, कियो प्रेमके लाडते ॥  
 अति सुंदरी सुजान, प्यारी जीवन जीयकी ॥  
 वरणौ श्रीवृषभानुदुलारी । चित दे सुनौ लाल गिरिधारी ॥  
 कहो प्रथम वेनी रुचिराई । ललित पीठ पाछे छवि छाई ॥  
 अहिनी मनहुं कुटिल गति त्यागी । शशिमुख सुधा चुरावन लागी ॥  
 रेखा अरुण सिंदूर सुहाई । शोभित शीश न जाति बताई ॥  
 मामहु किरण लाल रविकेरी । तिमिरसमूह बिदारि उजरी ॥  
 शोभित कुटिल धुकुटि अतिनीकी । मन हरिलेति भावती जीकी ॥  
 जगत जीत करि निजवशचारी । मनहुं मदन धनुधरे उतारी ॥  
 केसर आड ललाट सुहाई । मनहु रूपकी बाड बँधाई ॥  
 चपल नैन बिच नाक सुहाई । शोभित अधरनकी अरुणाई ॥  
 मनौ युगल खंजन शुक शोभा । देखि एकविवाफल लोभा ॥  
 दशन कपोल चिबुक दरग्रीवा । वरणि नजाति महाछबिसीवा ॥  
 शुभग अंग सब भूषण सोहैं । कोटिकाम तिय निरखत मोहैं ॥  
 दो०—अति कोमल सुकुमारतनु, सकल सुखनकी सीर ॥  
 तुम विन मोहन लाल पिय, व्याकुल अधिक शरीर ॥  
 सो०—भरि भरिलोचन नीर, श्याम श्याम मुख कहि उठति ॥  
 चलहु हरहु यहपीर, मैं आई लखि धायकै ॥  
 प्यारी विकल सुनत सुखदाई । सहि नहिं सके उठे अकुलाई ॥  
 चले बिहँसि ललताके साथ । प्रेमहिके वश श्रीब्रजनाथा ॥  
 प्रेम बिवस प्यारी पहुँ आये । देखि दैशा मन अति पछताये ॥  
 परी विकल तनुदशा बिसारी । प्यारी मुख देखत गिरिधारी ॥  
 नीलांबर निज करते टारी । लीनों सन्मुख बदन सुधारी ॥  
 जलदपटल मानहु बिलगाई । दियो चंद निकलंकदिखाई ॥

१ राधिका । २ कुंदरु । ३ व्यवस्था ।



भयो चेत परसत पियपानी । सन्मुख दृष्टि परतसकुचानी ॥  
 लई उमँगिभर अंक कन्हार्ह । विकल देखि अँखियां भरिआई ॥  
 युगल परस्पर लखि सकुचाये । इतनेहि विरह दोउ मुरझाये ॥  
 कंचन बेलि तमाल सुहायो । मनहु प्रेमबश सुधासिचायो ॥  
 हरषि दुहुँदिश मुसकन फूले । परमानंद फलन करिझले ॥  
 मुरछन विरह तुरत विसराई । लखि यह मिलन सखी हरषाई ॥  
 दोहा-वह चितवन वह हँसि मिलन, वह शोभा सुख भार ॥

भई विवस ललता निरखि, इकटक रही निहार ॥  
 सौ०-रहे परस्पर देख, अति आतुर दोऊ छबिहि ॥  
 परन नदेत निमेष, तूत न क्योंहूँ मानहीं ॥  
 ललता कहत सखिनसों बानी । देखहु सखि राधा अतुरानी ॥  
 कैसे अंग अंग छवि देई । मिले श्याम मन धीर न लेई ॥  
 तृषावंत जिम अचवतनीरा । सोऊ तौ धारत पुनि धीरा ॥  
 यह आतुर छबिलै उर धारै । नेक न दृग इत उतको टारै ॥  
 ज्यों चकोर चंदहिटकलावै । याकी सर सोऊ नहिं पावै ॥  
 होम अग्नि घृतगति है जैसी । याकी दशा देखिये तैसी ॥  
 यदपि श्याम श्यामा सँग प्यारी । छवि निरखत अति आनंद भारी ॥  
 हाव भाव करि पियमन मोहै । विविध विलास वदन छबिसोहै ॥  
 विरह विकल मति तदपि भ्रमावै । मिलेहु प्रतीति न उरमें आवै ॥  
 तृषामध्य जिमि खलिलहि देखी । उपजति अधिकै प्यास विशेषी ॥  
 चितवत चकित रहत चितमाही । स्वप्रकि सत्य ईश यह आही ॥  
 बुधि वितंक बहु भांति बनावै । देखहु अन देखे ठहरावै ॥  
 दोहा-कवहुँ कहति हों कौनहों, को हरि करत विचार ॥  
 यह सुख आवत कौनको, सकुचित रहत निहार ॥  
 सौ०-निपट अटपटी बात, समुझि परत नहिं प्रेमकी ॥  
 उरझि सुरझि उरझात, उरझनहीं में सुरझ अति ॥



उत हरि रूप इतै दृग प्यारी । लखि सखि मनहुँ करत हैरारी ॥  
 अति अहंकार भरे भट दोऊ । नेकहुहारि न मानत कोऊ ॥  
 इति सुदृष्टि करिकामसुहाई । सेना सजि सजि दृगन चलाई ॥  
 उत अति भूषण जाल अपारा । अंग अंग रचिव्यूह सँवारा ॥  
 इतहि कटाक्ष बाण अति चोखे । बारीहि वार हनत रण रोखे ॥  
 उत नहि वदन बिधा अतिसूरे । पुलकि अंग मानहुसरि पूरे ॥  
 इत अनुराग उतहि छवि छाई । क्षण क्षण अधिक २ अधिकाई ॥  
 छवि तरंग सरिता अधिकाणी । लोचन जलनिधि तप्त नसानी ॥  
 उत उदार छवि अंग श्यामके । इतलोभी अति नेम बामके ॥  
 ललता संग सखिनको लीने । दंपति सुख देखत दृग दीने ॥  
 लखि यह मिलन सखी अनुरागी । कहति कि धनि २ दोउ बड़भागी ॥  
 धन्य नवल नवला यह जोरी । धनि २ प्रीति नहीं रुचिथोरी ॥

दोहा-धन्यमिलन धनि यहलखन, धनि २ धनि अनुराग ॥  
 धनि सुख लूटत परस्पर, धनि धनि भाग सुहाग ॥  
 सो०-धनि २ पुनि २ भाषि, हरषि चली सिंगरी अली ॥  
 युगल रूप उर राखि, एकहि थल राखे युगल ॥

अथ परस्पर अभिलाषलीला ॥

शोभित श्याम राधिका जोरी । अरस परस निरखत तृणतोरी ॥  
 हरिरीझे प्यारी छवि देखी । भये विवस उर हर्ष विशेषी ॥  
 कबहुँ पीत पट डारत वारी । कबहुँ मुरलि वारत गिरिधारी ॥  
 कबहुँ माल सुकनकी वारैं । कबहुँ तनमन वारि निहारैं ॥  
 कबहुँ सिंहांत देख मनमाहीं । राधा सम शोभा कहुँ नाहीं ॥  
 इनको पलक ओट नहिंकीजै । रूप सुधा नैननिपुट पीजै ॥  
 कबहुँ निरखि सुख हरि सजुचाहीं । कोटि काम जिनके वश माहीं ॥  
 चपल नैन दीरघ अनियारै । हाव भाव नाना गतिभारे ॥  
 कोटि कुरंग कमल बलिहारी । खंजन मीन डारिये वारी ॥

१ मोतियोंकीमाला । २ सकुचत । ३ अरुण ।



भयो चेत परसत पियपानी । सन्मुख दृष्टि परतसकुचानी ॥  
 लई उमँगिभर अंक कन्हारै । विकल देखि अँखियां भरिआई ॥  
 युगल परस्पर लखि सकुचाये । इतनेहि विरह दोउ मुरझाये ॥  
 कंचन बेलि तमाल सुहायो । मनहु प्रेमबश सुधासिचायो ॥  
 हरषि दुहुँदिश सुसकन फूले । परमानंद फलन करिझले ॥  
 मुरछन विरह तुरत बिसराई । लखि यह मिलन सखी हरषाई ॥  
 दोहा-वह चितवन वह हँसि मिलन, वह शोभा सुख भार ॥  
 भई विवस ललता निरखि, इकटक रही निहार ॥  
 सो०-रहे परस्पर देख, अति आतुर दोऊ छबिहि ॥  
 परन नदेत निमेष, तृप्त न क्योंहूँ मानहीं ॥  
 ललता कहत सखिनसों बानी । देखहु सखि राधा अतुरानी ॥  
 कैसे अंग अंग छवि देई । मिले श्याम मन धीर न लेई ॥  
 तृषावंत जिम अचवतनीरा । सोऊ तौ धारत पुनि धीरा ॥  
 यह आतुर छबिलै उर धारै । नेक न दृग इत उतको दारै ॥  
 ज्यों चकोर चंदहिटकलावै । याकी सर सोऊ नहिँ पावै ॥  
 होम अग्नि घृतगति है जैसी । याकी दशा देखिये तैसी ॥  
 यदपि श्याम श्यामा सँग प्यारी । छवि निरखत अति आनंद भारी ॥  
 हाव भाव करि पियमन मोहै । विविध विलास वदन छबिसोहै ॥  
 विरह विकल मति तदपि भ्रमावै । मिलेहु प्रतीति न उरमें आवै ॥  
 तृषामध्यजिमि सलिलैहिदेखी । उपजति अधिकै प्यास विशेषी ॥  
 चितवत चकित रहत चितमाही । स्वप्रकि सत्य ईश यह आही ॥  
 बुधि चितकै बहु भांति बनावै । देखहु अन देखे ठहरावै ॥  
 दोहा-कवहुँ कहति हौं कौनहौं, को हरि करत विचार ॥  
 यह सुख आवत कौनको, सकुचित रहत निहार ॥  
 सो०-निपट अटपटी बात, समुझि परत नहिँ प्रेमकी ॥  
 उराझि सुराझि उरझात, उरझनहीं में सुराझ अति ॥



उत हरि रूप इतै दृग प्यारी । लखि सखि मनहुँ करत हैरारी ॥  
अति अहंकार भरे भट दोऊ । नेकहुहारि न मानत कोऊ ॥  
इति सुदृष्टि करिकामसुहाई । सेना सजि सजि दृगन चलाई ॥  
उत अति भूषण जाल अपारा । अंग अंग रचिव्यूह सँवारा ॥  
इतहि कटाक्ष बाण अति चौखे । बारीह बार हनत रण रोखे ॥  
उतनहि वदन बिधा अतिसूरे । पुलकि अंग मानहुसरि पूरे ॥  
इत अनुराग उतहि छवि छाई । क्षण क्षण अधिक २ अधिकाई ॥  
छवि तरंग सरिता अधिकानी । लोचन जलनिधि तप्त नसानी ॥  
उत उदार छवि अंग श्यामके । इतलोभी अति नेम वामके ॥  
ललता संग सखिनको लीने । दंपति सुख देखत दृग दीने ॥  
लखि यह मिलन सखी अनुरागी । कहति कि धनि २ दोउ बड़भागी ॥  
धन्य नवल नवला यह जोरी । धनि २ प्रीति नहीं रुचिथोरी ॥

दोहा-धन्यमिलन धनि यहलखन, धनि २ धनि अनुराग ॥  
धनि सुख लूटत परस्पर, धनि धनि भाग सुहाग ॥  
सो०-धनि २ पुनि २ भाषि, हरषि चलीं सिंगरी अली ॥  
युगल रूप उर राखि, एकहि थल राखे युगल ॥

अथ परस्पर अभिलाषलीला ॥

शोभित श्याम राधिका जोरी । अरस परस निरखत तृणतोरी ॥  
हरिरीझे प्यारी छवि देखी । भये विवस उर हर्ष विशेषी ॥  
कबहुँ पीत पट डारत वारी । कबहुँ मुरलि वारत गिरिधारी ॥  
कबहुँ माल सुकूनकी वारैं । कबहुँ तनमन वारि निहारैं ॥  
कबहुँ सिहांत देख मनमाहीं । राधा सम शोभा कहूँ नाहीं ॥  
इनको पलक ओट महिकीजै । रूप सुधा नैननिपुट पीजै ॥  
कबहुँ निरखि सुख हरि सजुचाहीं । कोटि काम जिनके वश माहीं ॥  
चपल नैन दीर्घ अनियारे । हाव भाव नाना गतिभारे ॥  
कोटि कुरंग कमल बलिहारी । खंजन मीन डारिये वारी ॥

१ मोतियोंकीमाला । २ सकुचत । ३ अरुण ।



लोचन नहि ठहरात श्यामके । काहू अँग सुख रंग बामके ॥  
 भये श्याम प्यारी वश ऐसे । फिरति गुड़ी डोरी वश जैसे ॥  
 इकट्ठकनैन अंग छवि सोहै । भये विवस लखि रूप विमोहै ॥  
 दोहा-उठे उठत हैं तुरतही, बैठे बैठत पास ॥

चले चलत संग वामके, ज्यों तनु छाँह बिलास ॥  
 सो०-रही सुरति कछु नाहि, देह दशा भूली सबै ॥

अभिलाषा मन माहि, प्यारीही के रूपकी ॥  
 मगन श्याम श्यामा रस माहीं । निजस्वरूपकी सुधि कछु नाहीं ॥  
 राधारूप देखि सुख पावैं । पुनि २ मन अभिलाष बढ़ावैं ॥  
 मांगलेति भूषण प्रिय पाहीं । अपने अंग सँवारत जाहीं ॥  
 सजितरवन कुण्डलहि उतारैं । बेसँरलै नाँसा पर धारैं ॥  
 बेनी गूँथ मांग पुनि करहीं । शीश फूल अपने शिर धरहीं ॥  
 बेदी भाल सँवारत तैसी । जोभित है प्यारीकी जैसी ॥  
 प्यारी दृगंतें अंजन लेहीं । अति हित करि अपने दृग देहीं ॥  
 भूषण वसन सजत सब वैसै । प्यारी अंग विराजत जैसे ॥  
 प्यारीको पियकी छवि भावै । हाहा करि यों वचन सुनावै ॥  
 कुण्डल मुकुट पीतपट पाऊं । मैं प्रिय तुमरो रूप बनाऊं ॥  
 हँसतहि हँसत मांग सब लीनों । पियको भेष नागरी कीनों ॥  
 गोरे कान्ह सौवरी राधा । बिखि परस्पर पूरत साधा ॥  
 दोहा-कबहुँ मुरलिलै नागरी, अधर धरति मुसकाय ॥

मंद मंद पूरति सुरन, रिझवति पियहि बजाय ॥  
 सो०-कबहुँ बजावत श्याम, अरस परस अधरन धरत ॥

पूरत है मन काम, सकल काम पूरण युगल ॥  
 हरिको अपने रूप निहारी । आपहि हरि स्वरूप लखि प्यारी ॥  
 यह अभिलाषा उर तब धारी । कहति सुनो पिय गिरिवर धारी ॥  
 तुम बैठौ माननि दृढ व्रैके । तुमहि मनाऊं मैं पद द्वैके ॥

१ राधा । २ नयनी । ३ नायिका ।



मोको यह अभिलाष विशेषी । सुख पैहाँ नैननि यह देखी ॥  
सुनत श्याम मन मन मुसकाई । मुरि बैठे करि मान रुलाई ॥  
तव प्यारी मन अति अनुरागी । हरिखों मान छुड़ावन लागी ॥  
कहति मानतजि प्राण पियारी । मोते चूक परी कह भारी ॥  
कहतिहिमें तुम रिस कर मानी । कहा प्रकृति लुव परी सयानी ॥  
वृथा हठीली मान न कीजै । अबकारि कृपा मोहिं सुख दीजै ॥  
बार बार कर गहि गहि भाखे । शीश नवाय चरणपर राखे ॥  
आनन आनन जोरि निहारे । पुनि पुनि वचन अधीन उचारे ॥  
क्यों इतनी हठ करत नबेली । बोलत क्यों नहिं गर्व गहेली ॥

दोहा-श्याम कियो हठ जानिके, यह विचारठहराय ॥  
प्यारीके उर रसविरह, नेकु देहुं उपजाय ॥  
सो-बैठिरहे निठुराय, नहिं बोलत मानत नहीं ॥  
पुनि २ परसति पाय, हाहा करि २ लाड़िली ॥

नहीं हँसति नहिं झुलतन जावे । बार बार नख भूमि करोवे ॥  
लखि यह चरित हँसति मन प्यारी । चकित रहत हँसिबदन निहारी ॥  
कहति सुनहु पिय अब हँस बोलो । तजहु मान यह बूबट खोलो ॥  
मोहन अब यह खेल मिठावो । कोटि चन्द्र छबि बदन दिखावो ॥  
नागरि हँसति हृदय सुख भारी । सूधे नहिं चितवत गिरिधारी ॥  
लखि त्रिवरूप पीयको प्यारी । बदन विलोकति चकृत भारी ॥  
अपनी रूप पुरुषको देखी । भई मगन रस विरह विशेषी ॥  
मैं नारी वे पुरुष विहारी । किधौं पुरुष मैं हीं वे नारी ॥  
बढी विरह संभ्रमता भारी । भई विकल तनु दशा बिसारी ॥  
निरखत श्याम विरहकी शोभा । बोलत नाहिं अधिक मनलोभा ॥  
कबहुं कहत यह ख्यालन त्यागत । मान करत नीके नहिं लागत ॥  
कबहुं अंक भरि उरसों लावति । कबहुं फिर पर पाँयमनावति ॥  
दोहा-कबहुं पाछे है रहति, कबहुं आगे जाय ॥  
कबहुं उठति बैठति कबहुं, कबहुं कलेति बलाय ॥



सो०—कबहुँ कहति है पीय, कबहुँ प्यारी कह कहति ॥

धीरज धरत नहीय, भई समीपहि विरहवश ॥

भई विरह व्याकुल जबबाला । हर्षि हँसे तब पिय नँदलाला ॥

लई तुरत प्यारी उरलाई । कहति ख्यालहीमें अकुलाई ॥

तुमहीं मान करत मोहि भाख्यो । भई विवसकत धीरज राख्यो ॥

मैं तो तुमको भाव बतायो । तुम कोहे मनमें डरपायो ॥

देखि विरह व्याकुल मुरझाई । बार बार हरि अंकमलाई ॥

अमिय वचन कहि शीतल कीनी । विरह ताप उरते हरिलीनी ॥

तब नागरि मन लखि सुखपायो । मिथ्यो विरह मन हर्ष बढ़ायो ॥

कहति भलो पियमान दिखायो । मेरे मन अभिलाष पुरायो ॥

त्रियके रूप श्याम छवि देखी । पुनिःपुलकितमुदित विशेषी ॥

दंपति हर्ष मनहि मन कीनो । तब नव कुंज चलन चित दीनो ॥

प्यारी मुकुर पाणि लै देख्यो । नटवर रूप आपनो पैख्यो ॥

हँसतहि हँसत भेटि सब डान्यो । सहज रूप अपनो पुनि धान्यो ॥

दोहा—चलै हर्षि वन कुंजको, युगल नारिके रूप ॥

इक गोरी इक साँवरी, शोभा परम अनूप ॥

सो०—अंग अंग छवि जाल, अति विचित्र भूषण वसन ॥

श्रीराधा नँदलाल, शोभा अवधि विलास निधि ॥

जात चले ब्रज वीथिनँ दोऊ । लखि नहिंसकत नारिनर कोऊ ॥

नंदनँदन त्रिय छवितनु काले । शोभित हैं राधा सँग आले ॥

बार बार पिय रूप निहारी । मनहीं मन रीझतिहै प्यारी ॥

कहति सखी देखे जिन इनको । बूझैत कहिहौ कह तिनको ॥

तिहूँ भुवन शोभा सुखकी निधि । करिहौ तिनको गोपकवनविधि ॥

पगनूपुर विछियां छवि छाजैं । गजगति चलत परस्पर बाजैं ॥

श्याम गौर सुंदर सुख जोरी । मर्कत मणिकंचन छवि थोरी ॥

भुज भुज कंठ परस्पर राजैं । या छविकी उपमा नाहि छाजैं ॥

१ शीशा । २ उपमारहित । ३ ब्रजकी गलियां ।



जात युगल वनको सुखपाई । उतते चंद्रावलि सखि आई ॥  
दूरहिते लखि रही निहारी । इकटकनैन निमेष निवारी ॥  
पुनि पुनि मन विचार कर जोहै । एक राधिका दूसरि कोहै ॥  
ब्रज युवतिन इकरकर जानै । यह धौ कौन नहीं पहिचानै ॥  
दोहा-और गांवते यह कहूं, आई है ब्रज माहि ॥

अतिहि सलोनी सांवरी, अबलौं देखी नाहि ॥  
सो०-राधे मन सकुचाय, चंद्रावलि आवति निरखि ॥

रही श्याम मुख चाहि, ब्रजहीको फेरतिहरिहि ॥  
कहति जाहु पिथ फिर मुख वार्हीं । करते कर छूटत है नाहीं ॥  
उत आवति लखि सखिहिलजानी । इतहि श्यामके नेह भुलानी ॥  
दुख सुख हर्षन हरि रस माती । उत चंद्रावलि इन रंगराती ॥  
कहति निकट देखहुधौं जाई । बूझौं याहि कहांते आई ॥  
देख श्याम मुख छवि मुसकानी । करी चतुरई इन पहिचानी ॥  
इनतेनिधरक और न कोऊ । कैसी बुद्धिरची इन दोऊ ॥  
ये दोऊ अति चतुर सयाने । निज करि इन्हें विधाता जानै ॥  
और कहा इनको कोउ जानै । मोसों नहीं परत पहिचानै ॥  
सकुच छांड़ि अब इनहि जनाऊं । जान बूझ काहे निदराऊं ॥  
जो इनको मैं दोकत नाहीं । जैहैं जीत मनहि मन माहीं ॥  
यह चतुरई चले छवि दोऊ । प्रगट करौं इनके गुणसोऊ ॥  
ऐसे बहुरि इन्हें नहि पाऊं । आज प्रगट कहि लाजलजाऊं ॥  
दोहा-कहु राधे यह कौनहै, संग सांवरी नारि ॥

कबहुं इन्हें देख्यो नहीं, अति सुन्दरि सुकुमारि ॥  
सो०-कोहै इनको नाथ, कौन गोपकी ये सुता ॥  
भलो बन्योहै साथ, जैसी यह तैसी तुमहुं ॥  
मथुराते यह आजुहि आई । है इनते कछु प्रीति सगाई ॥  
एक दिनाललता संग माहीं । दधि बेचन हम गई तहांहीं ॥



उनहीके सँग भई चिन्हारी । तबहीकी पहिंचान हमारी ॥  
 वही सनेह जानिकै आई । ऐसीशील स्वभाव सुहाई ॥  
 मैं गृहते इत आवन लागी । येऊ सँग आय अनुरागी ॥  
 सुनिराधा यह सहज सुहाई । शील सनेह रूप अधिकाई ॥  
 इनको ब्रजमें क्यों न बुलायो । अपनेनिकटहि आन बसायो ॥  
 कैवृषभानु पुराकै गोकुल । राखहु इनहिं बुलाय सहित कुल ॥  
 तुमहौ नवल नवलहैं येऊ । दोऊ मिलि श्यामहिं सुखदेऊ ॥  
 ऐसीहै यह नारि सुहाई । और नारि मनलेति चुराई ॥  
 हमहूँ को अब इनहिं मिलावो । नीके इनके वदन दिखावो ॥  
 हमहिं देखि सकुचतकत प्यारी । हमसों घुंघट करत कहारी ॥  
 दोहा-ऐसे कहि चंद्रावली, गह्यो श्याम कर जाय ॥

यह कहूँ अबलौं नहि सुनी, तिय सों तिय सकुचाय ॥

सो-आपहि वदन उधारि, घुंघट पट हातौ कियो ॥

मुख छवि रही निहारि, माने करि लोचन सफल ॥

बारहि बार कहति मुसकाई । चितवतक्यों नहि वदन उठाई ॥  
 मथुरामेंहै वास तुम्हारे । कहा नाम मुख वचन उचारो ॥  
 कियो राधिका यह उपकारो । दुर्लभ दर्शन भयो तिहारो ॥  
 कछु इक मैं पहिंचानत तुमको । काहे को सकुचतिहौ हमको ॥  
 कबहुँचिबुक गहि वदन उठावैं । कबहुँ कपोल परम सुखपावैं ॥  
 कबहुँ चुटकि कहति मुख फेरौ । नैन उठाय नेकुइतहेरौ ॥  
 नैन नैन सों हरि नहि जोरैं । रहेलजाय भावसों भोरैं ॥  
 चंद्रावली देखि मुसकानी । हँसि बोली राधासों बानी ॥  
 ऐसी सखी मिली ये तुमको । तौकाहेन विसारौ हमको ॥  
 जबसों इनसे प्रीति लगाई । बहुत भई तुमको चतुराई ॥  
 अबलौं इनको कहां दुरायो । हमसों कबहुँ नाहि जनायो ॥  
 त्रिभुवनकी सुखमा सब गुणनिधि । एकहि इन्हैं बनाईहै विधि ॥

१ पास । २ हाथ । ३ मुख । ४ आँखें । ५ ठोड़ी । ६ गाल ।



दोहा-तुमहूँ कुशल यह कुशल, क्यों न प्रीति दृढ़ होय ॥

जानेहों चले जाहुवन, आप स्वारथी दीय ॥

सो०-दंपति कियो विचार, सुनि चंद्रावलिके वचन ॥

यासों नाहि उबार, हर्षि मिले उरलाय तब ॥

चले कुंजगृह हरषि विशाला । उभय बामविच मदनगुपाला ॥

वाम भाग प्यारी को लीने । दक्षिण भुजा सखी पर दीने ॥

दिवि दामिनिविचनवचन मानौ । रतिसमेत लखि मदन लजानौ ॥

कैधों कंचन लता सुहाई । ललित तमाल विटप लपटाई ॥

गये कुंजवन घन छबिछाई । सुमन पुंज अलि गुंज सुहाई ॥

वर्ण वर्ण कुसुंमित तरु नाना । करती कोकिल मंगल गाना ॥

बहुत समीरै त्रिविध सुखदाई । पावन मंगल भूमि सुहाई ॥

लखि छवि पुंज कुंज अनुरागे । सहचरि सहित युगल बड़े भागे ॥

नव दल कुसुम तुल्य कमनीया । बैठे नवल रमण रमणीया ॥

करत बिलास विविध मन माने । कोटि कोटि रति काम लजाने ॥

शोभित गौर श्याम शुभ जोरी । निरखत छविहसखी तृण तोरी ॥

सने रसिक दोऊ रसकाई । बसेनिशावन कुंज सुहाई ॥

दोहा-तैसोइ विपिन सुहावनो, तैसिय पवन सुगन्ध ॥

तैसिय निर्मल चांदनी, तैसोइ मुख संबन्ध ॥

सो०-तैसोइ कुंज निवास, तैसोई यमुना पुलिन ॥

सकल सुखनकी रास, तैसेइ रंग भीने युगल ॥

बनहिं धाम सुख रैनि विहाई । उठे प्रात दोउ छवि अधिकाई ॥

बैठे युगल रंग रस भीने । आलस युत अंगन भुज दीने ॥

अरस परस दोउ छविह निहारैं । रीझ परस्पर तन मन वारैं ॥

अरुण नैन नख रेख सुहाई । बिन गुण माल हृदय छवि छाई ॥

लट पटि पाग रस मसी भौहैं । कुंडल झलक कपोलन सोहैं ॥

प्रिया बदन छवि श्याम निहारत । उरझिलट मुक्तन निरवारत ॥

१ दोनोंके । २ फूलेहुये । ३ वायु । ४ रात ।



आलस नैन सुरति रस पागे । नंदनंदन पिय सँग निशि जागे ॥  
 टूटे हार मरगजी सारी । नख शिख सुन्दर पिय अरु प्यारी ॥  
 चले कुंज ते युगल विहारी । ब्रजवासी लखि लखि बलिहारी ॥  
 सुन्दर श्याम सुन्दरी श्यामा । जीते सुन्दर रतिपति कामा ॥  
 सुन्दर अवलोकनि मृदु बोलनि । सुन्दर चालि डगमगी डोलनि ॥  
 सब विधि सुन्दर सुख निधि दोऊ । सुन्दर उपमाको नहिं कोऊ ॥  
 दोहा-अति विचित्र नंदलालकी, लीला ललित रसाल ॥

जो सुख दुर्लभ शिव सनक, सोबिलसत ब्रजवाल ॥  
 सो०-गये युगल ब्रज धाम, सखी सहित निशि रस बिलसि  
 बसत प्रिया उर श्याम, श्याम हृदय प्यारी सदा ॥

अथ शृंगारभूषण वर्णन लीला ॥

बैठी भवन शृंगार किशोरी । बहुरो अंग शृंगारत गोरी ॥  
 मानहु सबन देति पहिराये । रति रणजीति पियासों आये ॥  
 कटि तटि किकिणि बसन बचीने । बाजूबंद भुजन को दीने ॥  
 कर कंकण उर हार सुहाये । तरुनि चारु श्रवण पहिराये ॥  
 नकंवेसर अंजन दृग दीनों । बेंदाललित भाल पर कीनों ॥  
 रची भांग सम भाग सुहाई । तामधिरैख सिंदूर बनाई ॥  
 प्रभु सों बिमुख जानिके कादर । बांधति कुच मनौ किये निरादर ॥  
 दियो बिहँसि अधरनको वीरा । सन्मुख रहे प्रहारसधीरा ॥  
 शोभित सदन शृंगार सुहाई । श्रीवृषभालु कुँवरि छबि छाई ॥  
 नख शिख कुसुमबिशिखकी सैना । किये कान्ह वश पंकज नैना ॥  
 शीशफूल शिर अति छवि छाजै । मनहुँ भाग मणि प्रगट बिराजै ॥  
 सुभी जराब फूल अरुणाई । हरति प्रात रविकी छवि ताई ॥  
 दोहा-चंद्रवदन मृगशिशुनयन, भुकुटी कुटिलकलंक ॥

अलक झलकछविदेति जनु, शोभित रजनी अंक ॥

सो०-कुन्दकली समदाँत, तिल प्रसून नाशा शुभग ॥

१ कामदेव । २ नयनी । ३ भौंह । ४ तिलपुष्प ।



जीव बन्धुकी भांत, अधर अनूपम चिबुक तिल॥  
 लखि कलकंड केपोतलजाहीं । पीकलीक झलकति जेहि माहीं ॥  
 बाहु मृणाल लाल छवि छाये । कोमल पाणि सरोज सुहाये ॥  
 कुच युग चक्रवाक जनु नीके । लसत रोमावलि तटर नीके ॥  
 त्रिवली तरल तरंग सुहाई । अति गति नाभि मनोहरताई ॥  
 कृष्णकटिकिकिणियुत छवि छाई । पृथु नितंब शोभा अधिकाई ॥  
 रंभेखंभ युग जंघ निकाई । पग नूपुर झनकार सुहाई ॥  
 चाल विलोकि कामगज लाजै । मधुर मधुर ध्वनि पायल बाजै ॥  
 वरणे को पद पंकज शोभा । हरि मन भ्रमर रहत जहँ लोभा ॥  
 निगमनेति नित गावत जाको । राधा वश कीनोहो ताको ॥  
 ज्यों चकोर चंदाको आलुर । त्यों नागरि वश गिरिधर चालुर ॥  
 देखे चिन क्षण रह्यो न जाई । सदा प्रेम वश त्रिभुवन राई ॥  
 उझकिझरोखा झकि आई । करति शृंगार प्रिया मन भाई ॥  
 दोहा—अंग अंग भूषणवसन, रुचि रुचि सकल शृंगारि ॥  
 लै दर्पण देखति छबिहि, श्रीवृषभानु दुलारि ॥  
 सौं—दीठ झरोखालाय, रहे श्याम इकटकनिरखि ॥  
 उर आनंद बढ़ाय, देखत प्यारीकी छबिहि ॥  
 इककर दर्पण इककर अँचरा । पुनि पुनि हगैन सवँरतकजरा ॥  
 कबहुँ शिशके फूल सँवरें । कबहुँ कुटिल अलक निरवारें ॥  
 कबहुँ आड रचति केसरिकी । कबहुँ छवि देखति विसरिकी ॥  
 कबहुँ रचति सुमन सों वेणी । कबहुँ मांग सुकनकी श्रेणी ॥  
 कबहुँ रिस करि भौंह सिकोरै । कबहुँ नैन नैन सों जोरै ॥  
 इकटक दर्पण ओर निहारै । नेकु बदन इत उत नहि टारै ॥  
 निरखि आपनी छवि सुकुमारी । रही विवस प्रतिविंब निहारी ॥  
 अति आनंद भई मति भोरी । विसरी सुरति देहकी गोरी ॥  
 कहति मनाहि मन अति सकुचाई । यह सुंदरी कहाते आई ॥

१ कवूतर । २ केला । ३ आंखन । ४ छाया ।



करते मुकुर दूरि नहिं टारैं । कछु रोषकरि हृदय विचारैं ॥  
 कहूं श्याम देखे जोयाहीं । तुरत हांय याके वशमाहीं ॥  
 जो मोहन यासो अनुरागे । कहा चले मेरी या आगे ॥  
 दोहा-यह आई किहि लोकते, अति सुंदर वर नारि ॥

ब्रजमें तौ ऐसी नहीं, कोऊ गोपकुमारि ॥  
 सो०-कोऊ ल्यायो याहि, कैधौ आई आपही ॥

सो वैरी मम आहि, जो लाई याको ब्रजहि ॥  
 सुनी कहूं इन हरिकी शोभा । आई है ताहीके लोभा ॥  
 जैसे सुन्दर कुँवर कन्हाई । तैसी सुन्दरि यह ब्रज आई ॥  
 मनहीं मन पुनि २ पछिताई । पूछति प्रतिबिंबहि सकुचाई ॥  
 तूहै कौन कहाँते आई । यहां कौन तोको लै आई ॥  
 नाम कहाहै सुन्दरि तेरो । तुम जहँ रहत कौनसो खेरो ॥  
 कहौ न मुख ते वचन सुनाई । मति सकुचौ कहि सौंह दिवाई ॥  
 हम तुम दिनेनि एकहै गोरी । तू कछु रूप अधिकनहि थोरी ॥  
 इहां अकेली तू क्यों आई । काहू संग और नहिं लाई ॥  
 सुन्यो नहीं अन्याव इहांको । ऐसे कहि डरपावति ताको ॥  
 करत कान्ह ब्रजमें बरजोरी । लेति तियनके भूषण छोरी ॥  
 जो अपनी पति चहत सयानी । तौ घर जाहु मानि मम बानी ॥  
 लेहुवसै नते अंग छिपाई । देखैं नहिं कहूँ श्याम कन्हाई ॥  
 दोहा-तेरे हितकी कहतिहौं, मानचहै मतिमान ॥

आईहै ब्रज आजही, तू उनको कह जान ॥  
 सो०-ऐसो ठीठ न आन, त्रिभुवनमें कोऊ कहूं ॥  
 जैसा ब्रजमें कान्ह, मनभायो सबसों करत ॥  
 नेक नहीं काहू डरमाने । मथुरापति जेहि रहति सकाने ॥  
 उनके गुणनिके मैं जानों । तोसों अपनी दर्शा बखानों ॥  
 हम मथुरा दधि बेचन जाहीं । घेरि लई उन भगके माहीं ॥

१ मेरा । २ आयु । ३ वस्त्र । ४ व्यवस्था ।



गोरस लियो छोरि बरिआई । हार तोरि दीने बगराई ॥  
हम अनेक तू एक किशोरी । ताते जाहु वेगि गृह गोरी ॥  
सुनि सुनि श्याम प्रियाकी वानी । मनही मन विहँसत सुखमानी ॥  
प्यारी चकित रूप निज देखी । श्याम चकित सुन वचन विशेषी ॥  
जान दूसरी तिय प्रिय पाहीं । जात निकट मोहन सकुचाही ॥  
पुनि पुनि दृग ठहराय निहारै । बोलत नहिं उर हर्ष विचारै ॥  
देखत मुकुर प्रिया कर माहीं । अंकमलेव को ललचाहीं ॥  
प्यारीके रसवश गिरिधारी । लेति दृगन भर भर छवि भारी ॥  
सुनि २ वचन हृदय सुख पावै । पुलकि अंग आनंद बढ़ावै ॥  
छंद-वचन सुन आनंद अति मन, निरखि छवि सुख पावहीं ॥  
धनि धन्य राधा रूप धनि, हरि नैन इकटकलावहीं ॥  
धन्य वह प्रतिबिंब धनि छवि, धन्य मुकुर निहारहीं ॥  
धन्य भ्रम धनि प्रेम पूरण, धन्य तन मन वारहीं ॥  
धन्य सुख जेहि लागि राधा, कान्ह ब्रज तनु धारहीं ॥  
रमा सहित विलास नित, वैकुण्ठ वास विसारहीं ॥  
मिलन विछुरन सुख विरह रस, क्षणाहिं प्रति उपजावहीं ॥  
ब्रज विलास दुलांस हरिको, नित नयो श्रुति गावहीं ॥  
दोहा-नवल प्रीति नित नवल सुख, नित नवरूप रसाल ॥  
नित नवरस बिलसत नवल, श्रीराधा नंदलाल ॥  
सौ०-कहत रसीली बात, ज्यों ज्यों तिय प्रतिबिंबसों ॥  
त्यों त्यों सुनि हरषात, ब्रजवासी प्रभुरस भरे ॥  
प्यारी निज प्रतिबिंब निहारै । भई विवस नहिं सुरति सँवारै ॥  
बारबार पृथति तापाहीं । क्यों सुन्दरि तू बोलति नाहीं ॥  
हँसे हँसति हेरति है हेरे । फेरति भौंह भौंहके फेरे ॥  
करति परस्पर हम सों हांसी । अपनो नाम न कहत प्रकासी ॥

१ दर्पण । २ गोद ।



परमचतुर तुमको मैं जानी । हमसों तुम कछु करत सयानी ॥  
 अतिही सुन्दर रूपतिहारो । देखि होत मन मुदित हमारो ॥  
 शोभित बेसरि नाक सुहाई । अति अनूप अधरन अरुणाई ॥  
 दर्शन दमक दामिनिहिं लजावति । चिबुकनीलकण अति छबिपावति  
 काहे ऐसे मुख की वानी । हमैं सुनावति नाहि सयानी ॥  
 कहौ वचन काकी हौ घरनी । काकी सुता सहज मन हरनी ॥  
 कैरिस कै रस कै इत हेरति । मेरे सन्मुख लोचन जोरति ॥  
 कछु रिस कछु धरको मनमाहीं । धीर धरत नागरि जिय नाहीं ॥  
 दोहा-यह तौ बोलतिहैं नहीं, अति गरवीली वाम ॥

देखत ही यहि रीझिहैं, छैल छबीले श्याम ॥  
 सो०-भई सौति यह आय, अब हरि याके वश भये ॥  
 योंवियोग उपजाय, उपजायो उर विरह दुख ॥  
 रहीदीठ दर्पणाहिं लगाई । टरति नहीं छबिकी अधिकाई ॥  
 उरमें भयो विरह दुख भारी । देखि दशा रीझे गिरिधारी ॥  
 कबहुँ चलत तिय डिगहि कन्हाई । कबहुँ रहत लखि छविहिमुलाई ॥  
 औचकि पाछे ते सुखदाई । मूंदे नयन कमल कर आई ॥  
 चौकि चकित भइ मनमें प्यारी । जाने आये छैल बिहारी ॥  
 डरतिरही मनमें मैं जाको । मिले आय सुंदर हरि ताको ॥  
 तब कछु सुरति भई मनमाहीं । वह तोहैं मेरी परछाहीं ॥  
 सकुच दुराव करति पिय पाहीं । मनहीं मन दोऊ सुसकाहीं ॥  
 जान बूझके पिय घनश्यामहिं । लेति विपुल सखियनके नामाहीं ॥  
 श्याम प्रिया लोचन करि लायो । अति हित वेनी कर परसायो ॥  
 शोभा कहा कहै कवि कोऊ । मेचक मणि सुमेरु अँग दोऊ ॥  
 ताबिच मनहुँ पन्नगी आई । रही कनक गिरिसों लपटाई ॥  
 दोहा-वेष्टित भुज मूदे करन, दीरघ खंजन नैन ॥  
 जनु भख लीनो धाय अहि, नहिंसमात फणिऐन ॥

१ उपमारहित । २ दांत । ३ स्त्री । ४ छिपाव । ५ सर्पिणी ।

६ सुवर्णका पर्वत ।



सो०—करति सखिन सों रोष, मन हर्षत खीतइ वदन॥

भरी चतुरई कोष, लूटति मनकामन फलन ॥  
अति आनंद भरे दोउ राजें । उपमा कहत कवीश्वर लाजें ॥  
मर्कत मणि कुंदन सँग जोरी । किधौं लिये वन तडित अकेली ॥  
कैशोभा सुख तनु धरि सोहै । ब्रजवासीभक्तन मन मोहै ॥  
कोमल कर तिय नैन कन्हवाई । रहे मूँदि छबि वरणि न जाई ॥  
अतिहि विशाल चपल अनियारे । नाहि समात प्रिय पाणि पसारै ॥  
खिन खोलत खिनढकत बिहारी । सुख रिस मन मुसकात पियारी ॥  
ज्यों मणिधर मणि प्रगट कन्हवाई । फिरि फिरि फणतर धरत छिपाई ॥  
श्याम उँगरियन अंतर माहीं । चंचल नैन दुरे दरशाहीं ॥  
मर्कत मणि पिंजरा में मानौं । तरफरात बिब खंजन जानौं ॥  
करकपोल ढिग तरलतरोना । शोभा सहज सुभाय करोना ॥  
मनोयुग कमल मिलन शशि आये । विवरविषंग सहायकलाये ॥  
कुँवारे नागरी नागर नायक । उपमा काहि कहौं को लायक ॥

दोहा—अपने कर प्रिय कर पकरि, लीने नैन छुडाय ॥

रवि शशि चार सरोज जनु, द्वैचकोरामिलिभाय ॥

सो०—कीन्हे सन्मुख आन, पाणि पकरिके लाड़िली ॥

भले भलेजू कान्ह, मैं सखियन धोखे रही ॥

भले आय औचक बिन जाने । मूँदि रहे दृग अतिहि पराने ॥  
कैसे दोरि पैठि गृह आये । नेकहु आवत जान न पाये ॥  
तुमहौ तिय मन हरन कन्हवाई । तुम्हरी गति कछु जानि न जाई ॥  
तब हरि हर्षि प्रिया उर लाई । मुकुर कथा सब भाषि सुनाई ॥  
सुनि नागूरि हरि तन मुसकानी । चितैनयन कछु मनहिं लजानी ॥  
मैं तौ अपने मन्दिर माहीं । सहज लखत दर्पणमें छाहीं ॥  
तुम्हरी महिमा पियको जाने । इक सुंदर अरु परम सयाने ॥  
हँसत चले तब कुँवर कन्हवाई । रसिक पुरंदर जन सखदाई ॥

१ राधिका । २ प्रभाव ।



हर्षित गये सदन नँदलाला । इत नागरि उर हर्ष विशाला ॥  
जब प्रतिबिंब सुरत जिय आवै । समझ लुट्टि सकुच तब पावै ॥  
तिहि अंतर सँग सखिन लिवाई । चंद्रावलि राधा ढिग आई ॥  
लाखि प्यारी अति आदर कीनो । तुरतसवनको बैठक दीनो ॥

दोहा-सादर सन्मानी सबै, दिये हर्षि कर पान ॥

पिय सँग सुख चाहतकरन, रहति सकुच पुनि मान ॥  
सो०-गद्गद सुर मुख बैन, बार बार भाषति हरषि ॥

झलक प्रेम जलनैन, पुलकि गात पूरे सबै ॥

कहत सखी सुन राधा गोरी । आज कहा अति हर्षकिशोरी ॥  
हम तेरे नितही प्रति आवैं । इतनो आदर कबहुँ न पावैं ॥  
पायो आज परचो कछु तैरी । कैधौ मिले श्याम कहुँ हैरी ॥  
उमग्यो प्रेम हर्ष उर माहीं । हमें सुनावति है क्यों नाहीं ॥  
सुनि सखियनके वचन सयानी । बोली पिया हर्षिके वानी ॥  
आये आज सखी हरि मेरे । कहे जात नाहि गुण उन केरे ॥  
जैसी भांति मिले हरि हमसों । सोहित कहाँ सुनहु सखि तुमसों ॥  
मैं अपने सब अंग श्रृंगारति । लिये मुकुरकर वदन निहारति ॥  
पाले आनि भये हरिटाढे । चतुर शिरोमणि छविसों बाढे ॥  
भाव एक भोरे मैं साजा । ताहि कहत सखि आवत लाजा ॥  
लाखि अपनो प्रतिबिंब भुलानी । जानि औरतिय मनाहि डरानी ॥  
पाले ते यह जान कन्हाई । मृदे नैन औचकहि आई ॥  
दोहा-तबहीं चौंकि चकृत भई, मैं समझी निज भोर ॥

लगी देन उरहन तुम्हें, भई फिरतिहौं चोर ॥

सो०-सुनि राधा मुख बात, हिय हर्षी सब गोपिका ॥

पुलकि प्रकुलित गात, कहत धन्य तू लाडिली ॥  
श्याम संग सुख लूटति हैरी । अब उनसों नाहि लूटति हैरी ॥  
श्याम भये तेरे अनुरागी । भली भई तू हरि रसपागी ॥

१ घर । २ लजा । ३ हाथमेंदर्पणलिये । ४ गद्गद । ५ प्रेक्षी ।



अब हरि तोते अति रति माने । तेरो अन्तर हित पहिचाने ॥  
 आवत जात रहत घर तेरे । क्षण नहि रहत तोहिं बिनहेरे ॥  
 चतुर रूप गुण तुम दोउनोके । परम भावतेहौ सबहीके ॥  
 आज लाल मेरे गृह आये । बड़े भाग्य मैं हितकरि पाये ॥  
 देख दरश नैनन सुख पायो । करौ आज आनंद बधायो ॥  
 यह उपकार तुम्हारे आली । मोहिं मनायदिये वनमाली ॥  
 तुरत लाय हरि मोहिं मिलायो । मैं अपने अपराध क्षमायो ॥  
 नंदनैदन पिय नैन समाये । भावत नहीं नेक बिसराये ॥  
 सुनि यह राधाकी रसवानी । देति अशीष सखी हरषानी ॥  
 नंद नैदन वृषभानु किशोरी । चिरजीवहु सुन्दर यह जोरी ॥

दोहा-प्रेम भरे छबिसों भरे, भरे अनंद हुलास ॥  
 युगल माधुरी रस भरे, ब्रजमें करत विलास ॥  
 सो०-करत अनेक विहार, रूप रसिक गुणनिधि युगल ॥  
 राधानंद कुमार, ब्रजवासी जन सुख करत ॥

अथ नयनअनुराग लीला ॥

हरि अनुराग भरीं ब्रजनारी । लोक सकुच कुलकारने विसारी ॥  
 लासु ननैद गारी दै हारी । सुनत नहीं कोउ कहत कहारी ॥  
 सुत पति नेह जगत यह छोरयो । ब्रज तरुणिन तिनकासम तोरयो ॥  
 वेद लोक भयादा डारी । ज्यों अहिकेंचुरि फिरत निहारी ॥  
 ज्यों जलधार परै तृण नाहीं । जैसे नदी समुद्रहि जाहीं ॥  
 जैसे सुभट खेत चढ़ि धावै । जैसे सती बहुरि नांह आवै ॥  
 जैसे भजे नन्दनन्दनको । नेकहुडर पुनि नांहि गुरु जनको ॥  
 तैसइ प्रेम विवस गिरिधारी । ज्यों गज पंकज सकाहि निहारी ॥  
 ब्रज वनिता मन नाहिं बिसरावै । क्षण प्रति तिन्हें देखि सुखपावै ॥  
 आये पुनि तेहि ओर बिहारी । सखिन सहित बैठी जहँ प्यारी ॥  
 भीर देखि सकुचे मन माहीं । ताते निकट गये हरिनाहीं ॥

१ श्रीकृष्णराधिका । २ लाज । ३ कमल ।



ताही मग निकसे सुखदाई । सुंदर नटवर रूप दिखाई ॥

दोहा-शीश मुकुट कुंडल श्रवण, उर चटकीली माल ॥

पीत वसन कटि काछिनी, तनु द्युति श्याम तमाल ॥

सौ०-चलत लटकनी चाल, बंके विलोकनि मृदु हंसनि ॥

अंग अंग छवि जाल, रसिक नवल नागरि छयल ॥

औचक देखि श्याम ब्रजनारी । भई चकित तनुदशा बिसारी ॥

जात चले ब्रज खोरि अकेले । कोटि कामकी छवि परहेले ॥

पगढ़ै चलत बहुरि फिरिहैरें । कमल सनाल कमल कर फेरें ॥

मृगमंद तिलक अलैंक धुंधरारी । तन वन धात चित्र रुचि कारी ॥

मृदु मुसकाय मरोरत भौहैं । नैन सैन दैदैं मन मोहैं ॥

निरखत ब्रज युवतीं विथकांनी । दुखसुखव्याकुलमन अकुलानी ॥

गये कल्पतरु छांह कन्हई । रूपठगौरी तियन लगाई ॥

लागीं कहन परस्पर वानी । लोचन मन अनुराग कहानी ॥

सुनहु सखी यह नंददुलारो । हाठ कर यह मनलेत हमारो ॥

क्षण २ प्रति छवि और बनावै । शोभा कछू कहत नहि आवै ॥

मनतौ इनहीं हाथ विकानो । हम सखि यह कछु भेद न जानो ॥

नैननिसाट करी नैननिसो । कियो मोल सैननि वैननिसो ॥

दोहा-बेचि दियो मन आपुही, मृदु मुसकन धन पाय ॥

परी रही हौं बीचही, नयना बड़ी बलाय ॥

सौ०-भये श्यामको जाय, अब रुचि मानी मनहि मन ॥

मैं पचिहारि बुलाय, फेरि नहीं इतको फिरे ॥

अब मनहित हरिहीसों कीनो । भेद हमारो सब कहि दीनो ॥

मनतौ गयो नैनहैं भरे । तिनहूं बोलि किये हरिचरे ॥

अब यह रहत वहां सब जाई । सोई करतजु कहत कन्हई ॥

जितहि चलत वे तितही जाहीं । हरिके सन्मुख रहत सदाहीं ॥

भये वे जाय गुलाम श्यामके । रहे नकाहू और कामके ॥

१ टेढी । २ कस्तूरी । ३ वालोंकीलट । ४ थकितभई ।



ताको कछु अपमान न जाने । फूले रहत अधिक सुखमाने ॥  
 जग उपहास सुनत बहु तेरो । लाज शंक दीनो सब डेरो ॥  
 आरज पथ मर्याद बडाई । लोकवेद कुलकान गँवाई ॥  
 मैं ससुझाय रही बहुतेरो । नेकहु कछो सुनत नहि मेरो ॥  
 ललित त्रिभंगी छविपर अटके । मोसों तोरि सगाई सटके ॥  
 हरि अब छोडत तिनकों नाहीं । बैठे रहत आप तिन माहीं ॥  
 राखे बांधि अलक की डोरी । भाज जाहि मति कबहुँक दौरी ॥  
 दोहा-अब ये लोचन श्यामके, सखी हमारे नाहि ॥

बसे श्याम रस रूपये, श्याम बसे इन माहि ॥  
 सो०-कहा करैं सखि श्याम, नैननहीको दोष यह ॥

हठ करि भये गुलाम, तनक मंद मुसकान पर ॥  
 बोली अंपर एक ब्रजनारी । सखिलोचन लोभी अति भारी ॥  
 जबहिं लखत कमनीय कन्हाई । तबहिं संग लागत उठि धाई ॥  
 मेरो हठक्यो नेकुनमानै । लखत जाय वह छबिललचानै ॥  
 ज्यों खँग छूटत फंद वधिकते । भागचलत उड़ि वेग अधिकते ॥  
 पाछो फेरि न किरत डराई । जाय सर्वेन वन मांझ समाई ॥  
 त्यों दृगमोते छूटि पराने । हरि छवि विन घनजाय समाने ॥  
 अब वे इतको नाहि निकारें । वह छवि निरखि हरषिउरधारें ॥  
 यदपि सुधाछवि पियत अघाई । तदपि तृप्ति नाहि मानतराई ॥  
 भई सखी नैनन गति ऐसी । भरे भवैन तस्करकी जैसी ॥  
 देखि श्याम छबितन अधिकाई । अति लालची रहे ललचाई ॥  
 लेत न बने तजो नाहि जाई । चकित भयेनिज सुधिविसराई ॥  
 रहे विचारहि मांझ भुलाने । नाहि कछु लियो न त्याग पराने ॥  
 दोहा-नैन चार हरि मुख सदन, छवि धन भांति अनेक ॥

तजतवनतनहि एकहु, लेत बनत नहि एक ॥  
 सो०-सखि ये नैना चोर, हरि मुख छवि चोरन गये ॥

१ दूसरी । २ पक्षी । ३ बहेलिया । ४ गह्वर । ५ सर्ववस्तुपूर्णगृह । ६ चोर ।



बांधे अलकनिडोर, हरिकी चितवन पाहल ॥  
 अली भई हरि इनाहि बंधायो । निदरि गये तैसोफल पायो ॥  
 ये नहि मानत कह्यो हमारो । सखि इनहीं सब काज बिगारो ॥  
 कहति और इक गोप कुमारी । सखि ये नैनकिधौं बटपारी ॥  
 कपट नेह हमसों करि भारी । करीहमैं गुरुजनते न्यारी ॥  
 श्याम दर्श लाइ कर दीनो । हमैं आपने वश करलीनो ॥  
 प्रेम उगौरी शिर पर छाई । फिरति संगही संग लगाई ॥  
 विरह फांस गरडारि हमारे । करी विकल नहि अंग सँभारे ॥  
 कुल लज्जा संपदा हमारी । सो इन लूटि लई सखि सारी ॥  
 कहैरति परी मोह बन माहीं । लगन गांठ दग छूटत नाहीं ॥  
 क्योंहु नेह जीव नहि जाई । सुमिरि नैन गुण मन पछितार्ई ॥  
 कासों कहैं सखी यह वाता । भये नैन हमको दुखदाता ॥  
 हमको विरह दुसह दुख देहीं । आप सदा दर्शन सुख लेहीं ॥  
 दोहा—इहिविधि निदरति दगनको, भरी प्रेम ब्रजनारि ॥  
 होत मग सुख विरह रस, नयननिश्यामनिहारि ॥  
 सौं—यही भजन यह ध्यान, श्याम रूप रस गुण कथा ॥  
 नहि जानति कछु आन, निशिदिन ब्रजकी सुंदरी ॥  
 कोऊ कहति नैन खग मेरे । फँसे अलक फंदा हरि केरे ॥  
 छबि कण चासलखिललचाने । फंद गये चितवन लपटाने ॥  
 हरि छबि अटकि परे दग आई । अतिहि विलाप भये विवसाई ॥  
 रहत दीन सन्मुख टकलाये । दुख सुख समुझ सबै विसराये ॥  
 कहवावत हैं बड़े सयाने । वह छबि लेन गये अतुराने ॥  
 सोतो, कछू हाथ नहि आयो । आपन यों इन जाय बंधायो ॥  
 ऐसोको त्रिभुवन जो जाई । आवै सखी समुद्र अथाई ॥  
 द्वार जीत ये नैन न जानैं । मान पमान कछू नहि मानैं ॥  
 परे रहत शोभाके द्वारे । नेकहु लाज नहीं उर धारे ॥

१ ठग । २. बेचैन । ३. तलफति । ४. अड ।



जाकी नान परी सखि जैसी । धरी टेक उरमें तिन तैसी ॥  
 इन अँखियन यह टेक परीरी । लुँध तज्यों कमलन भ्रमरीरी ॥  
 जो शुक नलनीके वश आई । जिमि कपि मुठी छोड़ि नहिं जाई ॥  
 दोहा-लोभै वश जिमि मीन मृग, आप बँधावत आय ॥

रूप लालची नैन तिन, भये श्याम वश जाय ॥  
 सो०-सकै न काहू छिधु, लोकलाज कुलकानगिर ॥

श्याम सलाने सिधु, मिले त्रिवेनी द्वै नयन ॥  
 सखी नैन अब हरि सँग लागे । मन क्रम वच उनसे अनुरागे ॥  
 सन्मुख रहत सदा सुख पाये । भूल गये मग दहने बाये ॥  
 ज्यों मणि देखि उरग सुख पायें । ज्यों चकोर चंदहिं लटकायें ॥  
 सुदित रंक जैसे धन पाई । तैसी इनकी गति अब माई ॥  
 अब ये नैन फिरत नहिं फेरे । किये सखी हम यत्न बनेरे ॥  
 देखे सुभग श्याम इन जबते । निदुर भये हमसों ये तबते ॥  
 जब मैं वृषट पटहि धरेरी । तबये शिशुकी अरन अरेरी ॥  
 हरि अँग सँग लागि उठि धाये । मनहुँ उनाहि प्रतिपालकराये ॥  
 मृदु मुसकन रस पाय मिठाई । क्षणहीं प्रति गति बिसराई ॥  
 अति हठ परे न नेक बिसारै । निमिष रुदन बल धारन धारै ॥  
 लाज लकुट उरमें डर पाये । बेसखि एकहु डर न डराये ॥  
 फिरेन मैं बहु भांति बुलाये । गये तनक हरिके फुसलाये ॥  
 दोहा-अब हम तलफत उन बिना, भरत यही अफसोस ॥

अथ खोटो सखि आपनो, कहा पारखहि दोस ॥  
 सो०-प्रेम विवस त्रिय वृन्द, ऐसे दोषति दगनको ॥  
 तबहिं छैल ब्रजचन्द, डेर सुनाई बाँसुरी ॥

अथ मुरली लीला ॥

कृष्ण प्रेमरस पूरण तातें । करत हुती नयनकी बातें ॥  
 परी श्रवणं इहि अंतरजाई । हरिकी मुरली डेर सुनाई ॥

१ लोभित । २ भौंगी । ३ मछली । ४ हरिण । ५ कान ।



भई चकित सुनिसब ब्रजगोरी । परी आय जनु शीश ठगोरी ॥  
 भूलि गई सुधि अखियन केरी । हैगई मानौ चित्र लिखेरी ॥  
 दुख सुख मनलो वरणि नजाई । इकटकरहीं पलक बिसराई ॥  
 देह दशा सब तुरत भुलानी । स्वेद चलयो बहि मानहुँ पानी ॥  
 भई विवस मतिकी गति भूली । प्रेमहि डोरि गोपिका बूली ॥  
 कबहुँ सुधि कबहुँ सुधिनाहीं । कबहुँ मुरलीनाद सुनाहीं ॥  
 कछुकसँभारि धीर उरधारी । कहति परस्पर गोपकुमारी ॥  
 अखियनते मुरली हरिप्यारी । भै बैरिन यह सौत हमारी ॥  
 ब्रजमें धौ कितते यह आई । भई कठिन हमको दुखदाई ॥  
 आवतही ऐसे ढँग जाके । भये श्याम तुरतहि वश ताके ॥

दोहा-जारसको हम तप कियो, षट्क्रतु सब ब्रजवाम ॥

सोरस मुरलीलति अब, सहजहिवशकरि श्याम ॥

सो०-गावत मीठी तान, मुरली संग अधरन धरे ॥

अब याके वश कान्ह, और न विवस करी वही ॥

ऐसी विभुवन कीन सयानी । जो नमोहि सुनि याकी बानी ॥  
 यहतौ भलीनहीं ब्रज आई । नई सौति हरिके मनभाई ॥  
 अब याके वश गिरिवरधारी । नेक अधरैते करत न न्यारी ॥  
 याहीके अब रंगैगेरी । मधुर वचन सुनि रीझगयेरी ॥  
 करपल्लवन माहि बैठाई । रहत ग्रीव तापर लटकाई ॥  
 बारहि बार अधररस्त प्यावै । तासां अति अनुराग जनावै ॥  
 देखहुरी याकी अधिकाई । पियत सुधारस हमहि दिखाई ॥  
 परी रहत बनमें धौकैसी । भई ठीठ आवतही ऐसी ॥  
 दिनही दिन अधिकात जातरी । सखी नहीं यह भलीबातरी ॥  
 आवतही हमरो धनलीनो । चाहत और कहा धौ कीनो ॥  
 मैं जो कहत सुनौरी गोरी । सजगरहौसब नवल किशोरी ॥  
 मुरली दूरिकराये वनिहै । कछु दिननमें हमें न गिनिहै ॥

१ आपसमें । २ स्त्री । ३ ओष्ठ । ४ अंगुरी । ५ ठोड़ी ।



दोहा-फिरिहैं याके संग लगी, लोक लाज गृह त्याग ॥

जब जब जहँ यह बाजिहै, मोहनके मुँह लाग ॥

सो०-करिहैं नानारंग, यह जानति टोना कछु ॥

यामुरलीके संग, देखहु हरि कैसे भये ॥

यह सुनि कहत एक ब्रजनारी । सखी बात यह कहति कहारी ॥

अब यह दूरि होति है कैसे । जाके वश नैदनन्दन ऐसे ॥

एक पांय ठाढे ता आगे । रहत विभंग अंग अनुरागे ॥

अधर सेजपर शयन कराई । करपल्लवन पलोदतपाई ॥

कबहुँकमिल गावतहैं तासों । होति विवस पुहुमी सबजासों ॥

मुरली अति मोहनको भावै । ताके गुणन सखी को पावै ॥

जानत रागरागिनी जेते । हरिसँग मिलि गावतिहैं तेते ॥

नाना विधिकी गतिन बजावै । तान तरंग अमित उपजावै ॥

जैसेही रीझत मन मोहन । तैसिय भातिरिझावत गोहन ॥

रहति सदा मुखहीसाँ लागी । अधर पियूष स्वाद रसपागी ॥

मधुर मधुर कल वचन सुनाये । पुनि पुनि हरिके मनहिं बुराये ॥

ऐसा को अब हरिके करते । दूरकरै याको निज वरते ॥

दोहा-अब मुरली छूटे नहीं, याके वश भये श्याम ॥

प्रगट कियो सब जगतमें, मुरलीधर निजनाम ॥

सो०-हरिको करि वश माहिं, मुरली लूटे अधररस ॥

उर डर मानति नाहिं, हम सबते बोलति निठुर ॥

निठुर वचन अब हमहिं सुनावै । हरिको मन हमते उचटावै ॥

भारजपथ कुल कान छुडावै । हम सबहिनको निलज करावै ॥

ऐसे ढँग मुरलीके आली । हमते निठुर किये बनमाली ॥

यह तौ निठुर काठकी जाई । प्रगट किये अपने गुण आई ॥

अपनोही स्वारथ यह जानै । कपट राग हरिके संग गाने ॥

मुरली निठुर किये बनवारी । मुरली ते हरि हमहिं विसारी ॥



वनकी व्याधि कहां यह आई । ऐसे कहि कहि सिख पछताई ॥  
 कहा अयो मोहन मुखलागी । अबनी प्रकृति नहीं इन त्यागी ॥  
 एक सखी बृक्षत भई ऐसे । मुरली प्रगट भई यह कैसे ॥  
 कहां रहत काकीहै जाई । कौन जात कैसे इत आई ॥  
 मात पिताहैं याकि कैसे । जैसी यह तेऊहैं ऐसे ॥  
 बोली अरु इकतिया सयानी । अबलों तुम यह बात न जानी ॥

दोहा-सखि तुम अबलों नहिं सुन्यों, मुरलीको कुलधर्म ॥  
 सुनो सुनाऊं मैं तुम्हें, याकि जात अरु कर्म ॥

सो०-तुमसों कहाँ बखान, मैं जानति याँके गुणन ॥  
 सुनि मुख पैहौ कान, या मुरलीकी कुलकथा ॥

वनमें रहति बांस कुल जाई । यह तौ याकी जात सुहाई ॥  
 जलधरपिता धरणिहै माता । तिनके गुणन करौं विख्याता ॥  
 वनहुँते तिनको घर न्यारो । निपटहि जहां उजाड अपारो ॥  
 गुणन एकते एक उजागरि । मात पिता अरु मुरली नागरि ॥  
 पर अकाज विश्वास न जानै । येहैं इनके कुलहिबखानै ॥  
 ना जानिये कौन फल आली । कृपा करी या पर बनमाली ॥  
 सुनहु सखी याके कुल धर्मा । प्रथम कहाँ मेघनके कर्मा ॥  
 वेवर्षत जल सब जगमाहीं । गिरि वन सर सरिता सब ठाहीं ॥  
 चातक सदा रहत करि आसा । एक बूँदको मरत पियासा ॥  
 धरणी सबहीको उपजावै । आपन सदा कुमारि कहावै ॥  
 उपजत पुनि बिनशत जाहीमें । सो कछुछोहनहीं ताहीमें ॥  
 ताकुल सुता मुरलिका जानौं । अब आगे गुण प्रगट बखानौं ॥

दोहा-तनुहीते प्रगटत अनल, ऐसी याकी झार ॥

प्रगट भई जा वंशमें, करति जारि तिहिं छार ॥

सो०-ऐसे गुणकी आहि, यह मुरली सखि बांसकी ॥

१ स्वभाव । २ पैदाकीहै । ३ स्वातीका । ४ लडकी । ५ अग्नि । ६ राख ।



आई निज कुल दाहि, और कौन याते निठुर ॥  
 याकी जाति श्याम नहि जानी । बिन जाने कीनी पठरानी ॥  
 कहिये चलौ श्याम सों जाई । सुनत तजैंगे कुँवर कन्हारै ॥  
 सखी कहा यह बात बखानो । श्यामहि कहा भलो तुम जानो ॥  
 निज कुल जारत बिलस न लाई । हैहैतासों कौन भलाई ॥  
 जाको हम यद कहु तपकीनो । सोफल तुरत मुरलि यह दीनो ॥  
 जेसन्मुखते विमुख कहावैं । विमुख तुरत उत्तम फल पावैं ॥  
 घरके वन वनके घर कीन्है । कपटी परम श्यामको चीन्है ॥  
 एक अंगकी प्रीति हमारी । वे कपटी बहुरूप विहारी ॥  
 ज्यों चकोर चन्दा हित मानैं । चन्द्र नहीं नेकहु उर आवैं ॥  
 जलके तीर मीन तहु त्यागै । जलको तनक दूषा नहि लागै ॥  
 ज्यों पतंग उड़जोति जरैरी । जोति नहीं कहु कृपा करैरी ॥  
 चातक एक भेषको जानैं । वह कहु ताकी प्रीति न मानैं ॥  
 दोहा-इन सबहिनते हरि निठुर, तैसिय मिली सहाय ॥  
 अब मुरली अरु श्यामकी, जोरी बनी बनाय ॥  
 सो०-ये अहीर वह वैन, काहेन प्रीति बढावहीं ॥  
 दुहुँअनको मन ऐन, जैसे वे तैसी बढ ॥  
 मुरलीने हरिको पहिचान्यो । हरिको मन मुरली सों मान्यो ॥  
 निठुर निठुर मिल बात बनावैं । याहीके बल धेनु चरावैं ॥  
 वाहीकी लकुटी कर धारी । वाही की वंशी अति प्यारी ॥  
 हम सों वैष सदा हरिकीनों । दधिले मारगजान न दीनों ॥  
 पुनि भेदाहिमन हन्यो हमारो । कीनो कुल कुटुंबते न्यारो ॥  
 बहुरि बोलिअँखियनको लीनी । तापर सौति मुरलिया कीनी ॥  
 सुनि सजनी विन काज जरौरी । कर्म करे सो कोउ न करोरी ॥  
 यह महिमा करता सब करई । कौने विधि धौं का पर परई ॥  
 हम तपकर इतनो पचिहारी । सो घर कुलते भई नियाँरी ॥

१ जराय । २ छडी । ३ अलग ।



वनकी घास इतो सुख पावे । श्याम अधर शिर छत्र धरावे ॥  
 भये नृपति हरि मुरली रानी । और नारि हरिको न सुहानी ॥  
 बनते लाय सुहागनि कीन्ही । जाति पांति कुल कछु न चीन्ही ॥  
 दोहा-तप तीरथ जो पूरवहि, कठिन किये हरि हेत ॥  
 अब मुरली ताकष्टको, बैठि अधर फल लेत ॥  
 सो०-मेढत पिछलो दाग, जो तप करितायोतनहि ॥

धनि २ मुरली भाग, अब गरजति अधरन चढ़ी ॥  
 मुरली कौन सुकृत फल पायो । सब कलंक हरि परशिगँवायो ॥  
 तनु कठोर मन जड़ रस हीनी । अंतर सूनी सार विहीनी ॥  
 लघुता अंग न कछु गरबाई । बाँस वंश कछु नाहि निकाई ॥  
 छिद्र विशाल विपुल तनु छाये । हरिहि परशि सब भये सुहाये ॥  
 विधिते प्रबल भई यह मुरली । हरि मुख कमल वरासन जुरली ॥  
 चार वेद विधि श्रुति मति भाखे । नीति सहित जड चेतन राखे ॥  
 आठ बदन मुरली कहि नादाँ । उलटि दई हरिकी मर्यादा ॥  
 जडन चेत चेतन जडकीने । थिर चर कर चर थिर कर दीने ॥  
 एकबार श्रीपति सिखरायो । तबते ज्ञान विधाता पायो ॥  
 याको तो नैद सुवन कन्हाई । लगे रहत हैं कान सदाई ॥  
 याते को अरु अबल प्रवीना । कियो सकल जग निज आधीना ॥  
 कहिये काहि औरको ऐसी । भई श्याम सँग मुरली जैसी ॥  
 दोहा-अति सुर नर मुनि सूर शशि, खग मृग सलिल समीर

या मुरलीके वश सबै, ध्वनि सुनि धरत न धीर ॥  
 सो०-रही विश्वभर जीति, मोहन मुख लागि बांसुरी ॥  
 भेदि सकल श्रुति नीति, रीति चलावति आपनी ॥

सखि मुरली को दोष न देहां । करि विचार अपने मन लेहां ॥  
 हरि हित इन श्रमकीनो जोई । सो श्रम और कौन पै होई ॥

१ उत्तमकर्म । २ पाप । ३ देहकडी । ४ मूढ । ५ अल्पदेह । ६ शब्द ।

७ निर्जीवकोसजीव । ८ सजीवकोनिर्जीव । ९ चलअचल ।



जो अकुलीन तऊ बड़ भागी । कियो कठिन व्रत हरि हित लागी ॥  
 जब अति दृढ़ याको हरि जान्यो । तब बन भीतर ते गृह आन्यो ॥  
 जब याकी करतूत सुनोगी । तब धनि २ करि याहि गनोगी ॥  
 जन्मत हीते करमति गाढी । बनमें रही एक पग ठाढी ॥  
 शति उष्ण वर्षा सह लीनी । नेकहु मनसा मलिन न कीनी ॥  
 कसकी नहीं नेक जब काटी । पत्र मूल शाखा जब छांटी ॥  
 राखी डार धाम में आनी । शोच शोच सब देह सुखानी ॥  
 मुरचो न मन तन अंगद गाये । बिधे बेहूँ अँग अँग करवाये ॥  
 ताय सुलाख परखि हरि लीनी । तब मुरली पटरानी कीनी ॥  
 मुरली सही इती कठिनाई । तब पाई ऐसी ठकुराई ॥

दोहा—मुरली तप फल भोगवै, वृथा करत तुम आर ॥

निज गुण रिझये श्याम उन, गुणियन गुणी पियार ॥

सो०—तुम ते यह नहिं होय, जो करनी मुरली करी ॥

ताकी सम नहिं कोय, अति श्रम करि हरि वश करे ॥

परम पुनीत प्रीत जब जानी । तब मुरली हरिके मन मानी ॥  
 देखहुरी याकी अधिकाई । कहँ लगि याकी करहिं बड़ाई ॥  
 जबहीं श्याम अधर को परसै । तब अति हर्षि नादरसवरसै ॥  
 तान तरंग रंग उपजावै । अति आनंद सब जगत जनावै ॥  
 जियत श्याम अधरामृत पाई । छूटत मौन रहत मुरझाई ॥  
 क्यों नहिं श्याम करै हित ताको । अधरामृत जीवन है जाको ॥  
 मुरली जो हरि हित तप कीनी । परम चतुर पूरण तप लीनी ॥  
 तब लगि हरिको नहिं पतियानी । सहे कष्ट बोली नहिं वानी ॥  
 जब लग जीवन करि नहिं पायो । अधरामृत रस मनको भायो ॥  
 जबहरि सों वांछित फल पायो । तब सबपर अधिकार जनायो ॥  
 या सम और चतुर को आली । जिन वश किये श्याम बनमाली ॥  
 क्यों नहिं त्रिभुवन को मन मोहै । जाके वश पति त्रिभुवन को है ॥



दोहा-मुरलीकी सर मत करौ, कह्यो हमारो मान ॥

धनि धनि ताहि बखानिहै, सुनताको यश कान ॥

सो०-अधरामृत करि पान, अमर भई अब मुरलिका ॥

तिहुँ पुर होत बखान, शारदादि यश गावहीं ॥

हमहंसबमिलके तप कीनो । ताको फल हम को हरि दीनो ॥

लीने भूषण वसन चुराई । युवतिन लाज छुड़ाय बुलाई ॥

तब अम्बर दे धन्य बखानो । हम भोरी इतनोइ सुखमानो ॥

अपनो अपनो भाग्य सखीरी । मुरली सों विनकाजखिजौरी ॥

अब मुरली सों हेत करौरी । नहि जीतौगी मतहि लरोरी ॥

मुरली हम ते तप अधिकारि । मुरलीके वश कुँवर कन्हारि ॥

तनक आश दरशन की हैरी । सोऊ पुनि करते जेहैरी ॥

हैं बहुतेरी रवण कन्हारि । यहू मिली इकतिनमें आई ॥

मुरली को जिन डाह करौरी । तुम नहि अपने प्रेम द्यौरी ॥

प्रेमहि ते हरि मानरहेंगे । बेसुजान सबजानिरहेंगे ॥

सब तजि भज्यो जन्मते ताहि । तज्यो जात कैसे अब वाही ॥

मुरली सों का काज हमारो । जीवहु मोहन नन्ददुलारो ॥

दोहा-हम हित कीनों श्यामसों, भेटि लोक कुल कान ॥

ताही सों हित चाहिये, जासों है पहँचान ॥

सो०-हमकोहै वह आश, वैहें अंतर्यामि हरि ॥

करिहैं नाहि निराश, उर अंतरकी जानिकै ॥

कहा भयो मुरली हरि राखी । अपने कर सों ताहि सुलाखी ॥

गुणके काज क्षणक दुख पाई । दे अधरामृत तुरत जिवाई ॥

हम ते अधिक कियो उन नाहीं । करि विचार देखहु मनमाहीं ॥

वर्ष पांच सातक के जबते । कियो सनेह श्याम सों तबते ॥

पुनि षट् ऋतु तपसों मन लायो । अबलों विरहानल तनु तायो ॥

कैसे ये सब फलन फलेंगे । क्यों नहि हमसों श्याम मिलेंगे ॥

१ वख । २ प्रीति । ३ विरहकाग्नि ।



तब यों कह्यो एक ब्रजनारी । मुरली श्याम अधरपर धारी ॥  
जो अवगुण होतो या माहीं । तो याको हरि छुवते नाहीं ॥  
सुनो सखी यहहै इहलार्यक । अतिही भली श्रवण सुखदायक ॥  
तुमको कहति वृथा जोई सोई । जैसी यह ऐसी नाहि कोई ॥  
जो यह भली बुरी गुण केरी । तो याको हरि श्याम मिलेरी ॥  
काहिन प्रीति करे हरि ऐसी । है यहतिहूँ भुवन में जैसी ॥  
दोहा—एक युवति अरु गुण भरी, बोलति मधुरे वैन ॥

श्रवण सुधाप्यावततहूँ, क्यों हरि अधर धरैन ॥  
सो०—हरि बरजों मतिकोय, देहु बजावन बाँसुरी ॥  
विरह विरससे होय, रसकीने रस होत है ॥  
भाष भले तौ जगत भलोई ; नातर सखी भलो नाहि कोई ॥  
मुरली लगी श्यामके मुखरी । तोहूँ है हमसों सन्मुखरी ॥  
सुनहु कान दे कहति कहारी । श्रीराधा श्रीराधा प्यारी ॥  
तुम जानति हरि हमहि बिसारी । तुम हरिसों नाहि नेक नियारी ॥  
जब जब मुरली श्याम बजावै । तब तब नाम तुम्हरोई गावै ॥  
मुरली भई सौति जो आई । तो हरितेरिहि टहल कराई ॥  
तू अर्द्धगिन वह है दासी । मेरे मन यह बात प्रकासी ॥  
मुरली तुम्हरो नाम बतावै । वाके मुखहरि तुमहि बुलावै ॥  
तुम प्यारी हरि हरि तुम प्यारे । मुरली यह यश कहत पुकारे ॥  
हर्षी सकल सुनत यह वानी । हम मुरली ऐसी नाहि जानी ॥  
वृथा वैर यासों हम मान्यो । याको शील भवै हम जान्यो ॥  
मुरलीसों ऐसे सुखपाई । करति सकल ब्रज नारि बड़ाई ॥

दोहा—धनि धनि वंशी बाँसकी, धनियाके मृदुबोल ॥  
धनिल्याये गुणयाँचिकै, वनते श्याम अमोल ॥  
सो०—धनि धनियाको वंश, धनि मुरली हरि मुखलगी ॥  
सखिन सहित परशंस, श्रीमुख श्रीराधा कह्यो ॥

१ योग्य । २ मधुरवचन । ३ परख । ४ जिसकी कीमत नहीं ।



मुरली श्री मुरलीधर केरी । महिमा कापै जात निवेरी ॥  
 जाको यश गुण गँधरव गावैं । वेद भेद जाको नाँह पावैं ॥  
 सुनत नाँद त्रिभुवन मन मोहै । देव दनुज नर खग मृग जोहै ॥  
 वाणी ललित श्रवण सुखदाई । बाजति हरि मुख लाग सुहाई ॥  
 ब्रह्मादिक मनमोह करावै । शिव सनकादि समाधि भुलावै ॥  
 माया योग कृष्णकी जोई । शोभित अधर मुरलिका सोई ॥  
 हरिकी श्वास जाँसुकी बानी । ताके गुण कोसकै बखानी ॥  
 जब मुरली नैदनंद बजावैं । ब्रज ललना सुनिकै सुखपावैं ॥  
 चकित होत तनु दशा भुलावैं । प्रेम विवस सुधि बुधि बिसरावैं ॥  
 जकी थकी जहँ तहँ रह जाहीं । मानहुँ लिखी चित्रकी आहीं ॥  
 कबहुँ दुख कबहुँ सुख मानैं । कबहुँ निदाहि कबहुँ बखानैं ॥  
 ऐसी दशा होत घट घट की । बाजति मुरली जब नटवरकी ॥

छं०—जबहि मुरली श्यामकरगहि, अधरराखिचजावहीं ॥  
 तरलतानत रंग अगणित, गति अमित उपजावहीं ॥  
 रहत सुनि ध्वनि मगन जल थल, जीवजहँसोतहँसहीं ॥  
 कहत ब्रह्मानंद जासों, पाय संग पूजत नहीं ॥  
 सब सयान समान ज्ञान, गुमानतवहींलै अहैं ॥  
 लोक वेद म्रयाद पतिव्रत, चार फल जबलों चहैं ॥  
 तबहि लौं मन चपल बुधिवल, सकल रुचि धन धर्मकी ॥  
 सुनी स्वप्नेहु नाहि जबलों श्रवण मुरली श्यामकी ॥

दोहा—धनि धनिते नरनारि जग, धनि धनि तिनकेभाग ॥  
 ब्रजवासी प्रभु वाँसुरी, जिनके मनमें लाग ॥  
 सो०—राखत हैं यह आश, जन ब्रजवासी दासहं ॥  
 करहु हिये मम वास, मुरलीधर मुरली धर ॥



## अथ रासलीला ।

वंदौ युगल चरण सुखदायक । श्रीरस रास नायका नायक ॥  
 नन्द नन्दन वृषभानु नन्दनी । सुर नर मुनि ब्रह्मादि वन्दनी ॥  
 रास रासिक रस रास बिलासी । नित्य धाम वृन्दावन वासी ॥  
 रूपराशि आनन्द निधाना । मंगलप्रद सुन्दर भगवाना ॥  
 बहुरि रासपति पद शिरनाऊं । रास चरित मंगल अब गाऊं ॥  
 वेदन्यास जो रास बखानो । सो गन्धर्व व्याह विधि जानो ॥  
 ब्रज गोपिन हरि हित तप कीनों । श्याम हाँय पति यह व्रतलीनों ॥  
 नन्दनन्दन तिनको वर दीनो । चीरहरण लीला तब कीनो ॥  
 करिहैं तुम्हरे मनकी भाई । शरदरेनि शुभ लग्न धराई ॥  
 सो जब शरद सुखद ऋतु आई । राकाँ रजनी परम सुहाई ॥  
 भक्त मनोरथ पूरण कारी । गावति विरद विदित श्रुतिचारी ॥  
 गये श्याम वृन्दावन माहीं । जहँ बसंतऋतु रहत सदाहीं ॥  
 दोहा—श्री वृन्दावन धामकी, शोभा परम पुनीत ॥  
 वर्ण सके कवि कौन विधि, मन बुधि वचन अतीत ॥  
 सो०—सब चैतन्य स्वरूप, भूमिलता द्रुम गुल्म तृण ॥  
 धारि रह्यो जड रूप, सुन्दर श्याम विहार हित ॥  
 जाकी महिमा शिव मुनि गावैं । ब्रह्मादिकरज छुवन न पावैं ॥  
 जाकी महिमा श्रीमुखवानी । संकर्षण प्रति श्याम बखानी ॥  
 चिंतामणिप्रय शशि सुहाई । कोमल विमल रम्य सुखदाई ॥  
 सकल सुमंगलकी जननीसी । कृष्ण चरण पंकज रमणीसी ॥  
 फिरत श्याम जहँ नागे पायन । चरण चिह्न अंकित सब टायन ॥  
 पावनहूकी पावन कारी । ब्रजवासी प्रभुकी अति प्यारी ॥  
 नर्प नर्ण वर विरूप सुहाये । परम अनूपम जाहि बनाये ॥  
 सदा सुमन फल संयुत सोहैं । अमित सुगंध स्वाद मन मोहैं ॥  
 नवपल्लव दल परम सुहाये । जगमगात नग जोतिलजाये ॥

१ दोनोचरण । २ श्रीकृष्ण-राधिका । ३ निर्मलरात्रि । ४ अत्यंत-  
 पवित्र । ५ बलदेवजी । ६ वृक्ष । ७ पुष्प । ८ नवीनपात-डार ।



विपुल कांति शोभित बहु रंगा। अति विचित्र छवि उठति तरंगा॥  
 परमप्रकाश दशहु दिशि माहीं। कोटि सूर शशि पटतर नाहीं॥  
 पत्र पत्र प्रतिविंब श्यामको। मोहति लखि मन कोटि कामको॥  
 दोहा-ठौर ठौर शोभित परम, तैसिय लता वितानि॥

वृन्दावन तरु वेलि सब, नख शिख छविकी खानि॥  
 सो०-और सकल सुखधाम, वैकुण्ठादिक श्यामके॥

यह विहार विश्राम, ताते अति सुंदर सुखद॥  
 विपुल कुंज मंजुल छवि छाई। जिन्हें सँवारत काम सदाई॥  
 बहत समीर धीर सुखदाई। शीतल परम सुगंध सुहाई॥  
 चित्र विचित्र विहंग मृग नाना। बोलत डोलत विविध विधाना॥  
 गुंजत भृंग लुब्ध मकरंदा। अति छवि पुंज मंजुवन वृन्दा॥  
 तैसिय यमुना परम सुहाई। पुलिनि पुनील वरणि नहि जाई॥  
 देति० महाछवि झलकनरेती। मानहुँ परम कांतिकी खेती॥  
 फूले वनज विपुल बहु रंगा। गुंज करत मधुमाते भृंगा॥  
 श्रीवृन्दावन छवि समुदाई। सम्यंक वरणि कौन पै जाई॥  
 जाकी पटतरको नहि आनी। वन अनूप अद्वैत बखाना॥  
 ऐसी कष्ट परतहै हेरी। है अमूल्यपुषं प्रभुकेरी॥  
 गोपीजन इन्द्रियगण तामें। है चैतन्य आप हरि जामें॥  
 नित्य धाम ताही ते गायो। यह पटतर मेरे मन भायो॥  
 दोहा-सुखनिधि रसनिधि रूपनिधि, वृन्दाविपिन उदार॥

शारद नारद शेष शिव, वर्षत विधि श्रुति चार॥  
 सो०-सुखद नकोऊ आन, वृन्दावन सम दूसरी॥

सकल विश्व सुखदान, सुख पावत मोहन जहां॥  
 तहँ वितस्तिइक शंख सुहायो। मणिमय शुभन श्रुतिनमं गायो॥  
 तापर अद्भुत कमल विराजै। षोडश पत्र चक्र सम राजै॥

१ समान। २ पक्षी। ३ भौरा। ४ पुष्परस। ५ सम्पूर्ण।

६ दूसरा। ७ देही। ८ अलौकिक।



योजन पंच तालु परमाना । रास स्थान सुवेद बखाना ॥  
 मध्य करणिका अति रमणीया । बैठे तहां कान्ह कमनीया ॥  
 शोभा अभित नेलि श्रुति वानी । ताते गिरा कहति सकुचानी ॥  
 कोमल श्यामल अंग सुहाये । निरखि कोटि शत कामलजाये ॥  
 नटवर तेरे साजन सब साजे । अंग अंग भूषण छवि छाजे ॥  
 सखीशिखंड मनोहर माथे । बीच बीच मुक्तामणि गाथे ॥  
 जलजमाल वनमाल सुहाई । कुंडल अलक झलक छवि छाई ॥  
 कटि पट पीत काछिनी कालि । ललित शृंगार झुभा तनु आले ॥  
 मणिन जडित नूपुर पग नीके । चरण कमल भापत जन जीके ॥  
 रवि शशि थादिक छुतिधर जेते । नख धपमा पूजत नांह तेते ॥

दोहा-अति अद्भुत लावण्य निधि, श्रीवृन्दावन चन्द ॥

निगम नेति किमि वरणिथे, रसिक नवल नंदनन्द ॥

सो-जेहि गावत श्रुति चार, ब्रह्म पूर्णानन्द हरि ॥

सो पूरण अवतार, वृन्दावन रस रास पति ॥

देखि श्याम वन धाम कन्हाई । तैसिय शरदरैनि छविछाई ॥  
 प्रफुलित कुसुदिनि वन चहुँपासा । ललित मालती करत सुवासा ॥  
 जैसोइ यमुना पुलिनि सुहायो । तैसोइ पूरण शशि छवि छायो ॥  
 तैसिय जग भग ज्योतिर्द्रमनकी । तैसिय ललित सुगंध सुमनकी ॥  
 लखि बन सुख समुदाय कन्हाई । हर्षि रास रुचि मन उपजाई ॥  
 तब कर लई सकल गुण जुरली । ललित योग मायासी मुरली ॥  
 नाद ब्रह्मकी उत्पत्ति जासो । निगम अगम उपजै पुनि तासो ॥  
 विश्वविमोहन मंत्र कलासी । हरि मुख कमल लसति कमलासी ॥  
 राग रंग रस रास विलासी । सकल गुणनिमें आनंद रासी ॥  
 श्याम अधर धर ताहि बजाई । त्रिभुवन मन मोहन ध्वनि छाई ॥  
 धरणि पताल जीव सब मोहे । नभ सुरगण सुर सुनत विमोहे ॥  
 चकिल चंद मृग मारग भूले । वर्षत अमृत कनक अनुकूले ॥



दोहा-शिव विरंचि सनकादि मुनि, तजि तजि ब्रह्मसमाधि ॥

भये नाद मुरली मगन, चकित श्रवण रहे साधि ॥

सो०-रहे सबै मन भूल, सिध चारण गंधर्व सुर ॥

तनु सुधि रही न मूल, सुनि मुरली नंदनन्दकी ॥

थकित पवन गति गवन भुलानी । रह्यो प्रवाह नदिन थकि पानी ॥

झरना झरहि पषाण कठोरा । नाचि उठे चहुँदिशि वन मोरा ॥

थकित विलोकैत मृग सब ठाढे । खग रहे मौन मनहुँ लिखि काढे ॥

रही धेनु दृण गहि मुख माहीं । थकित वत्स पर्य पीवत नाहीं ॥

सरकि सकत नहिं अहि ध्वनि मोहै । उकठे विपट रहत सब सोहै ॥

तहँ बेली सब चंचल पाता । नव अंकुर दल प्रफुलितगाता ॥

सुनि ध्वनि शेषनाग अकुलाने । नाग सकल सोवतते जाने ॥

जड चेतन गति भइ विपरीता । हरि मुख मुरली सुनत पुनीता ॥

जो नर नारि तिहुँ पुर माहीं । भये नाद वश तनु सुधि नाहीं ॥

सुनि ध्वनि चकित भई अति भारी । जे ब्रज सुन्दरि गोपकुमारी ॥

यदपि मुरलि ध्वनि त्रिभुवन परशी । तदपि यथा विधि तिनहीं दरशी ॥

यारसकी तेई अधिकारी । नंदनंदन प्रियकी अति प्यारी ॥

दोहा-सुनतहि बौरीसी भई, विसरी सबी सयान ॥

लगी ठगौरीसी मनहुँ, मुरलीकी ध्वनि कान ॥

सो०-रह्यो न उरमें धीर, बाजी बाजी कहि उठीं ॥

आकुल विकल शरीर, सुनि मुरली ब्रजकी तरुणि ॥

षट्दश सहस गोपिका गोरी । मुरली सुनत भई सब भोरी ॥

कोउ धरणी कोउ गर्गन निहारै । कोउ मनहीं मन बुद्धि विचारै ॥

घर घर तरुणि सबै बिततानी । आरज पैथ गृहकाज भुलानी ॥

लै लै तिनके नाम बजावै । मुरलीमें हरि सबन बुलावै ॥

रहित सकी ध्वनि सुनि अकुलाई । जो जैसे तैसे उठि धाई ॥

१ चलना । २ पत्थर । ३ देखत । ४ हरिण । ५ पक्षी । ६ दूध । ७ वृक्षबेल ।

८ निर्जीवसजीव । ९ सोरह । १० आकाश ।



लोक लाज गुरु जन डर डारयो॥ चलीं सकल गृह काज बिसारयो  
काहू दूध उफनते छोंडे । काहू दधिहि जमावत भांडे ॥  
काहू करति रसोंई त्यागी । कोऊ पतिहि जिमावत भागी ॥  
बालक गोद सँभारन लीनो । दूध पियावतही तजि दीनो ॥  
कोउ भृंगार करति उठि धाई । उलटे भूषण वसन बनाई ॥  
बाजूबंद पगनसों बांधे । लै मंजीर उरनमें सांधे ॥  
किकिणि डारि लई गरमाहीं । हार लपेटत करसों जाहीं ॥

दोहा-शीशफूल कर्णनधरे, कर्ण फूल धरे भाल ॥

चलीं सकल सुरली सुनत, भ्रमते ब्रजकी बाल ॥

सो०-अंजन करि दृग एक, एक रह्यो अंजन विना ॥

रह्यो न कछू विवेक, भई विवस सुरली सुनत ॥

सुरलीसों हरि डेर बुलाई । उपजी प्राति सकल उठि धाई ॥  
सुरली ध्वनि मारैग गहि लीनो । और कछू उर शोच न कीनो ॥  
प्रेम स्वरूप सकल ब्रजनारी । पंच भूत अवगुण ते न्यारी ॥  
रोकि रहे सुत पति पितु मातातेकिमि रुकाहि अगम यह बाता ॥  
चलीं ध्यान धरि हरि उर माहीं । गृह वन कुंज रुकी कहूँ नाहीं ॥  
जो प्रारब्ध कर्म बश कोई । राखी रोकि पतिन गृह सोई ॥  
भयो विरह दुख तिनको ऐसो । कोटिन जन्म कर्म फल जैसो ॥  
पुनि धरिध्यान हरिहि उर लायो । कोटि स्वर्ग फल मानहुँ पायो ॥  
यों करि भोग त्याग तलुँ बाला । दिव्य देह धरि मिलीं गुपाला ॥  
इहि विधि बन सब चलीं किशोरी । लोक वेद मर्यादा तोरी ॥  
आतुर निकसि चलीं सब ऐसे । जरत भवन तजियत है जैसे ॥  
एक एककी सुधि कछु नाहीं । झुंडन चलीं श्याम पहुँ जाहीं ॥  
दोहा-गृह गुरु जन तजि लाज तजि, ब्रजसुन्दरी निकोय ॥  
सुरली ध्वनि रस रँगरली, मिलीं श्याम बन जाय ॥

१ वस्त्रभूषण । २ ज्ञान । ३ रस्ता । ४ देह । ५ समूह ।



सो०-नटवर वषु गोपाल, अधरसधर मुरली धरे ॥

सन्मुख सब ब्रज बाल, देखि श्याम आनंदभरी ॥

ब्रज युवतिन लखि सुदित बिहारी। मोर मनहु छवि घटा निहारी॥

कनक वर्ण शशि मुख सब बाला। पहुँची निकट जाय नंदलाला ॥

विपिन सुहावन अति छवि बाढी। भई जाय रान्मुरा सब ठाढी ॥

रहे चकित हरि छवि अवलोकी। अटपट तनु शृंगार विलोकी ॥

अद्भुत रूप देखि मुख पायो। मनहीं मन अति हर्ष बढ़ायो ॥

अति आदर करि कुँवर कन्हारि। बोले मंद मधुर सुसिकाई ॥

वाक्ये वचन प्रेमरस साने। प्रेम प्रतीत कसोटी माने ॥

कहो अहो तिय ब्रज कुशलई। निशि काहे वनको उठि धाई ॥

अर्द्धरात कछु डर नहि कीनो। ऐसो कहा काज मनदीनो ॥

यह कछु भली करी तुम नाहीं। निज पति तजि धाई वन माहीं ॥

वेदपंथ निदरयो तुम भारी। जाहु अजहुँ घर वेगि सवारी ॥

यह सुनिकै गुरुजन दुख पैहैं। बहुरो तुमको वास दिखैहैं ॥

दोहा-निज पति तजि परपतिभजैं, तियकुलीन नहि होय ॥

मरे नरक जीवत जगत, भलो कहै नहि कोय ॥

सो०-युवतिनको पतिदेव, कहत वेद हमहूँ कहत ॥

करहु तिनहि की सेव, जो तुम चाहो सुख लह्यो ॥

और कछु जियमें जिन राखो। करिये वेद वचन जो भाखो ॥

तजिके कपट करहु पति सेवा। तियको पति तजि और न देवा ॥

कूर कुपूत भाग बिन रोगी। वृद्ध कुरूप कुबुद्धि वियोगी ॥

ऐसेहु पतिको तिय जो त्यागे। बड़ा दोष ताके शिर लागे ॥

ताते मानहु कही हमारी। जाहु सकल घरको ब्रजनारी ॥

मात पिता तुम्हरे धौं नाहीं। ऐसे कहि कहि हरि पछिताहीं ॥

कैसे उन तुम आवन दीनी। कैसीधौं यह विधि तुम कीनी ॥

कैधौं कहि आई उन पाहीं। कै धौं वे जानत हैं नाहीं ॥

नव यौवन तुम सब सुकुमारी। निशि बसखो वन अलुचित भारी ॥



जो यह बात सुने ब्रज कोऊ । हमें तुम्हें दूषण दिशि दोऊ ॥  
अब ऐसी कीजो मति कबहुं । करि विचार देखौ मन तुमहुं ॥  
बार बार युवतिन भरमाई । ऐसे सबसों कहत कन्हाई ॥  
दोहा-निठुर वचन सुनि श्यामके, युवति उठी अकुलाय ॥

चकित भई मन गुनरहीं, मुख कछु वचन न आय ॥  
सो०-वदन गयो मुरझाय, जनु तुषार कमलनपरो ॥  
शोच रहीं शिरनाय, खोई निधि जनु पाइके ॥  
विरह विकल चिंता अति बाढी । रहीं चित्र पुतरीसी ठाढी ॥  
कपट खेल यह गिरिधर शम्भो। प्रेम विवस युवतिन नहि जान्यो ॥  
मनहीं मन विहँसत नैदलाला । भई विरह व्याकुल ब्रजबाला ॥  
सहि नहि सकी दुसह यह पीरा । बोलौ गद्गद गिरौ अधीरा ॥  
सुनहु श्याम सुंदर वर नायक । यह जिन कहो नाहि तुम लायक ॥  
कोमल सुभग कमल मुख ताते । कैसे कहत कटुक यह बाते ॥  
लैलै नाम बुलायो सबको । धर्म सिखावतहौ अब हमको ॥  
छाँड़ि देहु पिय यह चतुराई । करहु हेत जेहि भाँति बुलाई ॥  
कर्म धर्म श्रुति नाहि बखाने । जो कोउ कर्म धर्म विधिजाने ॥  
हम तो लोक वेद विधि त्यागी । चरणकमल तुम्हरे अनुरागी ॥  
सकल धर्म मय चरण तिहारे । वसत सदा सो हृदय हमारे ॥  
कहवावतहो अन्तर्यामी । काहे यह समझत नहि स्वामी ॥  
दोहा-अब यह तुमको उचित नहि, सुनहु श्याम सुखरास ॥

मन हमरो अपनाइके, हमको करत निरास ॥  
सो०-पाप पुण्य कहनाथ, यह तो हम जाने नहीं ॥  
विकी तुम्हारे हाथ, अधरामृतके लोभलगि ॥  
अरु यह मृदु मुसकान तुम्हारी । सकल धर्मकी मोहनहारी ॥  
ऐसीको तिय ब्रजके माहीं । जाको मन इन मोखो नाहीं ॥  
जैसिय मुरली मिली सहाई । जिनि विधिकी मर्याद मिटाई ॥



अब तो मृदु मुसकन मन मोहै । पाप पुण्य जानति नहिं कोहै ॥  
 हमतो पति इक तुमको जानै । धृक जो और दूसरो मानै ॥  
 कोटि करो अब भवने न जाहीं। तुम तजि हमहिं और प्रिय नाहीं ॥  
 जानतहो सब अन्तर्यामी । काहे यह समझत नहिं स्वामी ॥  
 मन वच कर्म तुम्हारी दासी । मृदु मुसकान तुम्हारी प्यासी ॥  
 भरत सकल विरहानल ज्वाला । सींचहु अधरामृत नैदलाला ॥  
 दीन कृपानिधि नाम तुम्हारे । हमते दीन न और विचारो ॥  
 मृदु मुसकान दान अब दीजै । दारुण विरह दूर पिय कीजै ॥  
 जो नहिं मानत विनय हमारी । तो यह तनु करिहैं बलिहारी ॥

दोहा-विरह विकल लखि गोपिकन, कृपासिंधु भगवान ॥

उमंगि उठे दृग भरि लिये, दीनवचन सुनि कान ॥

सो०-धनि धनि धनि ब्रज बाल, कहत अनहमन हर्षहरि ॥

सदय हृदय गोपाल, बोले दुहुँ कर जोरि तब ॥

बोले प्रभुता डारि गोपाला । धन्य धन्य तुम ब्रजकी बाला ॥  
 तुम सन्मुख मैं विमुख तुम्हारे । दूर करो यह दोष हमारे ॥  
 मैं निर्दय बहु वचन बखाने । तुम अपने जिय एक न आने ॥  
 मो कारण गृह कुटुंब विसारो । धनि धनि धनि यह नेम तुम्हारे ॥  
 लोकलाज शंका सब त्यागी । मनवचक्रम मोसों अनुरागी ॥  
 यों कहि विहँसि मिले नैदलाला । अंकम भरि लीनी सब बाला ॥  
 यदपि अकाम सदा सुखरासी । तदपि भये रस प्रेम विलासी ॥  
 एकहि बार युवति सब भेटी । दुसह ताप विरहानल भेटी ॥  
 कह्यो विहँसि सबसों गिरिधारी । करहु रासरस मिलि सुखकारी ॥  
 कृपादृष्टि अवलोकत नयनन । हँसिहँसि सींचत अमृत वयनन ॥  
 चहुँदिशि हर्ष भरीं सब ग्वारी । मध्य श्याम सुन्दर बनवारी ॥  
 विहरत बन विहार सुखदाई । नवल गोपिका नवल कन्हवाई ॥  
 दोहा-हँसत करत बहुरस चरित, युवतिवृन्द लिये संग ॥

१ घर । २ विरहानि । ३ गोपियोंके झुंड ।



गये यमुन तट श्याम तब, कीडत कोटि अनंग ॥  
 सो-सोहति अतिकमनीय, कोमल उज्ज्वल रेत तहँ ॥  
 करी परम रमणीय, यमुनाजी निज पाणि रचि ॥  
 बहत समीर त्रिविध सुखदाई । कुसुम धूरि धुंधरि छवि छाई ॥  
 उड़त सुगंध लपटचहुँओरा । गुंजत भँवर चारुचित चोरा ॥  
 बैठे तहां श्याम सुखसागर । कोटि काम मन मथन उजागर ॥  
 करत बिलास हास रसलीला । कोटि अनंग रंग सुखशीला ॥  
 परिरंभन चुंबन कुच परसत । हिय हुलास आनँदरस बरसत ॥  
 काम भाव गोपिन हरिधायो । कियो सबनके मनको भायो ॥  
 अस अद्भुत रस प्रेम बढ़ायो । बहुरि रासरस रँग उपजायो ॥  
 सुनिषिय वचन सकल अनुरागी । भूषण वसन सँवारन लागी ॥  
 लखि उलटे भूषण सज्जुचानी । निरखि परस्पर तिय मुसकानी ॥  
 नवसत साज भई सब ठाढी । परम प्रेम आनँद रस बाढी ॥  
 वंशीवट छवि धाम अनूपा । कोटि कल्पतरु सम सुखरूपा ॥  
 तहां रच्यो रस रास कन्हवाई । भई कपूरमय भूमि सुहाई ॥  
 छंद-भई भूमि कपूरमय रज, वरषि जल कुमकुमसिची ॥  
 परम कोमल शुभग शीतल, ज्योति मणि कंचन खिची ॥  
 हर्षि तहँ वनश्याम सुंदर, रासमंडल विधि रची ॥  
 वर्णिकापैजाय सो छवि, निरखि शौरदगतिलची ॥  
 एक एकहि युवतिके बिच, मधुर मूरति श्यामकी ॥  
 तिन मध्य जोरी रासनायक, राधिकावनश्यामकी ॥  
 एक रूप अनेक वपुधारि, सबनिके बिच राजहीं ॥  
 करी यह लीला प्रगट प्रभु, मरम कोउ न जानहीं ॥  
 भई मंडल जोरि ठाढी, जात नहिँ मुख छवि बनी ॥

१ कामदेव । २ छंदी, मंद, सुगंध, वायु । ३ सरस्वती । ४ भेद ।



सहस्र वलिस उदित मानौ, मध्य वनदामिनिवनी ॥  
 दोहा-तेहि अवसर ललना सहित, आये सुर मुनि सर्व ॥  
 देव नटी किन्नर वधू, तुंडरादि गंधर्व ॥  
 देखत चढ़े विमान, हर्षि हर्षि वर्षत सुमन ॥  
 करत सुदित मनगान, धन्य धन्य ब्रजधुवतिकह ॥  
 सुरगण सब बाजंत्र बजायें । निरखत ब्रज सुंदरि छविपावें ॥  
 नूपुर कंकण किकिणि बाजें । मन्दमधुर भुरली सुरगाजें ॥  
 ताल मृदंग वीन सुँहचंगा । सुर मंडल सारंग उपंगा ॥  
 तंत्र अनेक विविध गति साजें । मिले एक सुरसों सब नाजें ॥  
 निर्तत पियसँग चंचल बाला । जलु क्रीडत वन दामिन जाला ॥  
 बिच बिच श्याम बीच ब्रजगोरी । मर्कत मणि कंचनकी जोरी ॥  
 शुभग तमाल तरुण नैदलाला । कनकलता सम सब ब्रजबाला ॥  
 करसों कर जोरें छवि छाजें । कोटि काम छवि निरखत लाजें ॥  
 वृन्दावन उर मनहुँ विशाला । लसत रास मंडलकी माला ॥  
 हरि ब्रज नारि परस्पर सोहैं । कोटि काम रतिको मनमोहैं ॥  
 मटक चलत गति नागर नटकी । लटकन मुकुट लटक धूँधटकी ॥  
 जलु वन वन दामिनी वरुथा । निरख नचत मोरनके यूथा ॥  
 छं०-नचत मानौ मोरयूथन, मुकुट लटकन यों फवै ॥  
 चलत गतिलै नागरिन संग, श्याम नट नागर जवै ॥  
 धरणिपगपटकनि झटकिकर, भौंहमटकनिकहिपर ॥  
 ग्रीव चालन हलन कुंडल, कर जुफेरन मनहरे ॥  
 मणि कंठ मुक्तामाल उर, वनमाल चरणनलौबनी ॥  
 वदनपंकज अलक श्रमकण, झलकछविसकैको भनी ॥  
 पटपीत फरकन काछनी, कटिलाल किकिणिसोहई ॥

१ नाचत । २ झुंड । ३ गोपिकाओंको । ४ पृथ्वी । ५ प्रसवेदबिन्दु ।

६ करिहांव ।



मलय चित्रित बाहु भूषण, श्याम तन मन मोहई ॥  
 लखि रहत नंदलाल तिय छावि, विविधविधवेणीगुही ॥  
 शुभग पाटी मांग मुक्ता, शीश फूलनि छाविरही ॥  
 जटित माल जरावबेंदी, उदित द्युति भुवबंककी ॥  
 ललित वेशरिनाक अंजन, नैन श्रुतिताटककी ॥  
 अधर दशन कपोल चिबुकन, कंठ भूषण अतिबने ॥  
 करत रास विलास अहुत, हरत मन मोहन मने ॥  
 दोहा-कबहुँललितगति ले चलत, नवल सुघर नंदनन्द ॥  
 निरख हर्ष तैसेइ चलत, नवल नागरी वृन्द ॥  
 सो०-कबहुँ विचक्षण वाम, लटकिलेतिनूतन गतिहिं ॥  
 रीझरसिक धनश्याम, तापर तन मन वारही ॥  
 निरतत अरस परस पियप्यारी । बोलत बलिहारी बलिहारी ॥  
 कोउ कैलध्वनिपियके गुणगावै । कोउ अभिनय करि भाव बतावै ॥  
 कोउ संगीत कला गुण धारी । कोउ उघटत चटकत कर तारी ॥  
 निरतत ताल भेद गति लीना । सुघर एकते एक प्रवीना ॥  
 जात रसिकपिय विक विन मालै । जव थैइ ताथेइ ताथेइ बोलै ॥  
 तान तरंग रंग उपजावै । लेत उपज अति रस वर्षावै ॥  
 कबहुँक उघटत छैल कन्हाई । फिरत लुब्ध जिमि बाल सुहाई ॥  
 गिरत मणिनके भूषण तनते । झरत फूल जनु रूप लतनते ॥  
 लटकै २ निरतत अलवेली । ग्रीव ग्रीव मंजुल भुजमेली ॥  
 कोउ पियके संग मिल करिगावै । कोउ मुरलीको छीन बजावै ॥  
 काहु श्यामलेत भुज भरिके । तजै कमलमुख चुंबनकरिके ॥  
 रमत रास पिय संग छबीली । परम प्रेम रसरंग रंगीली ॥  
 छंद-रस रंगरंगीली प्रेमके वश, रास रस पिय संगकरै ॥

१ चंदन । २ नवीन । ३ मनोहरवाणी ।



निरखि देव प्रसून वर्षाहिं, हर्षि उर आनंद भरैं ॥  
 धन्य ब्रज धनि बाल ब्रजकी, धन्य वन पुनि २ कहैं ॥  
 करत रास विलास पूरण, ब्रह्म जहैं परगट अहैं ॥  
 शंभु अंज सनकादि नारद, मुदित गुण गण गावहीं ॥  
 निरखि छवि निधि श्याम श्यामा, ब्रह्म सुख बिसरावहीं  
 देवनारि बिसारि पति गति, परस्पर कह शोचहीं ॥  
 ब्रजबधू विधि हमनकीनी, निरखि सुख मनलोभहीं ॥  
 कह भयो जो ऊरधबसी, अरु अमरपदभी जो लही ॥  
 करत सुख जो श्याम संग, ब्रजनारि सो त्रिभुवन नहीं ॥  
 बार बार मनाय विधना, कहति यह वर दीजिये ॥  
 होय दासी ब्रज वधुनकी, कृष्ण पदरति कीजिये ॥  
 दोहा-धनि २ कहि वर्षाहिं सुमन, मुदित सकल सुरनारि ॥  
 धनि मोहन धनि राक्षिका, धनि ब्रजगोपकुमारि ॥  
 सो०-धनि धनि रास विलास, धनि सुंदरता धन्य सुख ॥  
 धनि वृन्दावन वास, सुर ललना विथकी कहत ॥  
 रमत रासरस गोपकुमारी । नन्दनँदन पियकी सब प्यारी ॥  
 करति गान कोकिला लजावैं । हावभावकरि पियहि रिझावैं ॥  
 राग रागिनी समय सुहाये । सहज वचन जिनके मनभाये ॥  
 गति सुगंध निरत सब गोरी । सहज रूपनिधि नवल किशोरी ॥  
 पगियह पटक भुजन लटकावैं । फंदा करन अनूप बनावैं ॥  
 निरखिलेत उपजत छबिभारी । शीझरहत लखि छवि गिरिधारी ॥  
 वेनी छुटी लटें वगराहीं । अलकें वेशरसों उरझाहीं ॥  
 श्रमजलबिंदु वदन धुतिकारी । मनहुं सुधाँकण चंदमझारी ॥  
 अति वशहोत निरखि मनमोहन । फिरत सबनके गोहनँगोहन ॥

१ ब्रह्मा । २ प्रसन्न । ३ विधुरी । ४ अमृतविन्दु । ५ साथ साथ ।



नारि नारि प्रति रूप प्रकासे । एकहि रूप सेवनको भासे ॥  
अद्भुत कौतुक प्रगट दिखायो । कियो सचनके मनको भायो ॥  
निर्तत अंग थकित भई नागरि । रूप प्रेमगुण परम उजागरि ॥

छंद-भई निर्तत थकित तरुणी, रूप गुणन उजागरी ॥

उमगि तब उर लाय लीनी, श्याम लखि नव नागरी ॥

गिरत उरते हार डूटे, निरखि प्रभुहि जनावहीं ॥

लेति बीचहि गहि तिन्हें, महिमांझ परन न पावहीं ॥

अति प्रीति श्रम जल पीत पटसों, पोंछि पवन डुलावहीं ॥

उरझि बेसरिसों रही लट, कमल कर सुरझावहीं ॥

देखि बिह्वल गात भूषण, शिथिल अंग सँवारहीं ॥

कहिरवचन मृदु परस्पर, निज पाँणि श्रमहि निवारहीं ॥

दोहा-ऐसी विधि ब्रज सुंदरिन, देत परमसुख श्याम ॥

लखि पति गति स्वाधीन अति, भई गर्विता वाम ॥

सो०-परमप्रेमकी खान, रूपशील गुण आगरी ॥

क्यों न करें अभिमान, जिनके वश त्रिभुवन धनी ॥

कहति भई निज निज मन माहीं। हमसम अरु न युवति जग माहीं ॥

अब गिरिधर हम वश करिपाये। करत हमारे मनके भाये ॥

अब हमते नाहिं ह्वै हैं न्यारे। रहिहैं सदा समीप हमारे ॥

जोड़ जोड़ हम कहिहैं सोइ करिहैं। सदा हमारे संग बिचरिहैं ॥

कोउ पिय अंश भुजनको दीनो। कहति वचन यों गर्वहि लीनों ॥

सुनो श्याम मैं अति श्रमपायो। अब तो मोपै जात न गायो ॥

एक कहति मम पौष पिराहीं। मोपै नृत्य होत अब नाहीं ॥

एक कंठ भुजमेलि सयानी। रही लटक बोलत नहिंवानी ॥

ऐसे भाव गर्वके कीन्हें। अंतर्यामी हरि सब चीन्हें ॥



गर्व देखि मोहन मुसकाने । मैं अवगति मोको नहि जाने ॥  
 करत सदा भक्तनमन माई । एक गर्व श्यामहि न सुहाई ॥  
 सो युवतिनके मनमें जानी । दूरि करन हित यह जिय आनी ॥  
 दोहा-प्रेम अभूषण कनकसम, मलिन गर्व ते होय ॥  
 विरह अग्नि ताये विना, निर्मल होय न सोय ॥  
 सो०-यह विचार जिय आन, लैवृषभानुकुमारि संग ॥  
 ब्रैगये अन्तर्द्वान, ब्रजवासी प्रभु संगते ॥

अथ अन्तर्द्वान लीला ॥

प्रेम बढावनहित सुखदाई । अन्तर कर बनदुरे कन्हाई ॥  
 गोपिन जब हरि देखे नाहीं । चकित भई तब सब मन माहीं ॥  
 कहति एक कित कुँवर कन्हाई । उठीं सकल जहँ तहँ अकुलाई ॥  
 भई विकल कछु भरम न पायो । पाय महाधन मनहुँ गमायो ॥  
 खोजत जहँ तहँ दृष्टि पसारें । अति आतुर चहुँ ओर निहारें ॥  
 तब सबहिनमिलिकै यह जानी । लैगइ हरिको कुँवरिसयानी ॥  
 कछु हर्ष कछुरिस उर धारी । देति भई हँसि रसकी गारी ॥  
 इन समान कपटी कोउ नाहीं । करत सदा दुविधा हम पाहीं ॥  
 चलहु खोज कुंजनमें लैहैं । जान कहां हमते वन पैहैं ॥  
 हूँढन चलीं सकल वन माहीं । चरण चिह्न खोजत सब जाहीं ॥  
 देखति जहँ तहँ फिरत अधीरा । कोउ वन वन कोउ यमुनातीरा ॥  
 कोउ कुंजन कोउ पुंजन हरे । श्याम श्याम करि कोऊ टेरें ॥  
 दोहा-इहि विधि सब खोजत फिरें, विरहातुर ब्रजबाल ॥  
 भई विकल पावत नहीं, कछु खोजत नैदलाल ॥

सो०-यदपि कियो हरि ख्याल, नेक दुरे वन कुंजमें ॥  
 तदपि भई बेहाल, युवति श्याम देखे विना ॥  
 पलकान्तर विधिको दिन जिनको । वन अंतर अतिबड दुख तिनको ॥

१ सोना । २ चौकना । ३ राधिका । ४ युकरें । ५ बेचैन । ६ पलकमानत्रब्रह्माकादिनसा ।



भई विरह व्याकुल चितजवहीं । हरिपद चिह्न लखति भई तवहीं ॥  
 कुलिश कमल ध्वज अंकुश जामें । जगमगात बन बन यहि तामें ॥  
 निकट चिह्न प्यारी चरणनके । अरुण कमल दल सुभग वरणके  
 वन्दन करन लगीं रज जोई । शिव विरंचि आचतहैं सोई ॥  
 कछु यक धीर धरयो मन माहीं । खोजलेति ताही मग जाहीं ॥  
 कुँवर कन्ह प्यारी सँगलीन्हें । फिरत सकल कुंजन रसभीने ॥  
 कबहुँ कुसुम वनमाल बनावैं । निराखि हर्षि प्यारिहि पहिरावैं ॥  
 कबहुँ सुमन सवारत वेणी । परम शुभग शोभाकी श्रेणी ॥  
 कबहुँ सरोज सुगंध सुँघावैं । नागरिमन अभिलाष बढ़ावैं ॥  
 कंठ कंठ भुज दोऊ जोरैं । धनदामिनि छूटति नहिँ छोरे ॥  
 अति प्यारीके रसवश मोहन । भौंह निहारत डोलत मोहन ॥

दोहा-पतिहित लखि अनुकूल अति, हरषि लाडलीहीयें ॥

ताते उपज्यो गर्वजिय, मैं अति प्यारी पीय ॥

सो-एक प्राण द्वैदेह, तहाँ गर्व कहँ पाइये ॥

यामें नहिँ संदेह, देह धरेको भाव यह ॥

तब प्यारीके मन यह आई । मेरेही वश कुँवर कन्हाई ॥  
 मेरे हित वांसुरी बजाई । मेरे हित सब तियन बुलाई ॥  
 मेरे हित रस रास उपायो । सबहिन तजि मोसों मन लायो ॥  
 मोसम सुन्दर चतुर उजागरि । और नहीं युवती कोउ नागरि ॥  
 ऐसे गुणति मनहिँ मन माहीं । ठठकि रहति गहि पिय की वांही ॥  
 बैठि जात कबहुँ मग माहीं । कहति कि मेरे पांय पिराहीं ॥  
 चलन कहत तुम जहाँ कन्हाई । मौपै पगन चलयो नहिँ जाई ॥  
 नृत्य करत मैं अति श्रम पायो । ताते पग नहिँ जात उठायो ॥  
 सुनहु मित्र मोहन सुखदाई । कंध लेहु पिय मोहिँ चढ़ाई ॥  
 ऐसे तिय जब वखन बखाने । गर्व जानि गिरिधर मुसकाने ॥  
 जहाँ गर्व तहँ रहत न कबहीं । अंतर्धान भये हरि तबहीं ॥



तुरतहि विकल भई अति प्यारी । देखत दुरे चरित गिरिधारी ॥  
दोहा-चकित भई तब नागरी, गये किते भजि श्याम ॥

मनहीं मन पछितात अति, भूली तन सुधि वाम ॥  
सो०-मैं कीनों अभिमान, नारि बुद्धि ओछी सदा ॥

वे पिय परमसुजान, जान लई मो जीवकी ॥  
भई विकल समुझत निज करनी । सो वह दशा जाय नहि वरनी ॥  
विरह विथा बाढी अति तनमें । परम अकेली रोवति वनमें ॥  
नैन सँलिल भीजत तनु सारी । कासि कासि पिय कहति पुकारी ॥  
हाहा नाथ अनाथ न कीजै । वेगि श्याम मोहिं दरशन दीजै ॥  
मैं तुम कृपा पाय गरवानी । ताते सकी सँभार न बानी ॥  
सो अपराध क्षमा प्रभु कीजै । यह दूषण मन माहिं न लीजै ॥  
वेगि कृपा करि मिलहु दयाला । अहो कमल दल नयन रसाला ॥  
विरह विकल यों वदत अकेली । रोवत सुन खग मृग द्रुम बेली ॥  
तहँ खोजति आई सब नारी । दूरिहि ते देखी तिन प्यारी ॥  
मुख शशि ज्योति रूपकी राशी । जनु वन ते विजुली चपलासी ॥  
द्रुम शाखा अविलंबिन ठाढी । रुदन करति विरहा दुख बाढी ॥  
व्याकुल चकित चहँ दिशि जौवैं । कमल चरण नख भूमि करोवैं ॥  
दोहा-जिततितते धाई सबै, ब्रजसुंदरि अकुलाय ॥

व्याकुल अति लखिलादिली, लीनी कंठलगाय ॥  
सो०-कहां गये गोपाल, बार बार बूझति सबै ॥

मुरछि परी तब बाल, मुखते वचन न आवई ॥  
देखि दशा सब तिय अकुलानी । बैठारी अंकम गहि पानी ॥  
कहु राधा क्यों बोलति नाहीं । काहे मुरछि परी महिमाहीं ॥  
या वनमें कैसे तू आई । कहां गये तजि तोहिं कन्हाई ॥  
निरखि वदन सबहिन दुखकीनां । मनहु अभी निधि अमृत दीनां ॥  
कोऊ लगी सँवारन अलकैं । कोउ अंचरते पोंछति पलकैं ॥

१ छिपे । २ अपनी । ३ आश । ४ शीघ्र । ५ हरे । ६ गोद ।



नयन नीर कुछ सुधि नहिं देही । अतिव्याकुल बिन श्याम खनेही ॥  
 बूझति युवति कहां वनवारी । चलिहैं तहां तोहिं लै प्यारी ॥  
 सुनत नाम पियको अनुरागी । विरह मोह निद्रति जागी ॥  
 जान्यो आयें कुँवर कन्हवाई । नयन उधारि मिलनको धाई ॥  
 जो देखे तौ सब ब्रजवामा । अतिही बिलखि उठी तब श्यामा ॥  
 कहत मोहि त्यागी नैदनन्दन । तुमहूँ नहीं मिले जगवन्दन ॥  
 मैं अपने जिय गर्व भुलानी । नहिं उनको महिमा कुछजानी ॥  
 दोहा-बोली पिय सों मन्दमति, मैं अभिमान बढ़ाय ॥  
 लीजै कंध चढ़ाय मुहि, मोपै चलयो नजाय ॥

सो०-वे प्रभु परमसुजान, बिहँसि कह्यो मोहिं चटनको ॥  
 हैगये अन्तर्धान, अपनी चूक कहा कहैं ॥  
 गये श्याम धौं कितवनमाहीं । मेरी दृष्टिपरे कहुँनाहीं ॥  
 कहति विकल नयननजलदारी । मोको त्यागगये गिरिधारी ॥  
 सुरछि परी धरणी अकुलाई । श्याम विरह दुख सख्यो नजाई ॥  
 देखि दशा व्याकुल सबनारी । कहति निदुररी अति वनवारी ॥  
 बिया पुरुषसों मान जुकरहीं । पुरुष नहीं ऐसी उरधरहीं ॥  
 देखहु श्याम तजी हम कैसे । नाहिं बूझिये उनको ऐसे ॥  
 कहति राधिकासों ब्रजनारी । मिलिहैं श्याम धीर धर प्यारी ॥  
 चली आप खोजन सब वनमें । विरह विकल कुछ सुधिनहितनमें ॥  
 डेरत जहँ तहँ घोषकुँमारी । अहो रासपति कुंजविहारी ॥  
 कहां दुरे पिय हमते भजिकै । जात प्राणतुम बिनतनुतजिकै ॥  
 क्षमाकरौ प्रभु चूक हमारी । मिलहु कृपाकरि वेग मुरारी ॥  
 तुम बिन हमको सुनहु कन्हवाई । क्षण क्षण कल्यसमान बिहँवाई ॥  
 दोहा-जरत सकल तुम दरश बिन, विरह अमितनुवाम ॥

मंद भधुर सुसकनिसुधा, वरषि नझावो श्याम ॥  
 सो०-सकल विश्वसुखधाम, गावत तुमको जगत सब ॥

१ प्रभाव । २ ग्यालमुताये । ३ नीतताई ।



Vinay Avasthi Sahib Bhuvan Vani Trust Donations

तिन्हैं होत कत बाध, जो दासी बिन मोलकी ॥

सदा हमारी रक्षा कीनी । गरल अनल जलते रखलीनी ॥  
 अबकत निठुर होत हो प्यारे । धिरह जरावत गात हमारे ॥  
 कतहि फिरत वन चरण उचारे । गड़िहैं कुश कंटक अनियारे ॥  
 तुम पद बसत हमारे हियमें । ते कंटक शालतैंहैं जियमें ॥  
 अहो नाथ यह कह जिय धारी । सुखदेके दुख देत मुरारी ॥  
 ऐसे कहति सकल वन डोलैं । अलबल वचन वदनते बोलैं ॥  
 अति अकुलाय गई मन माहीं । जड़ चेतन कछु समझत नाहीं ॥  
 बूझति वन विटपनसों धाई । तुम कहूँ देखे कुँवर कन्हाई ॥  
 अहो कदम अहो अंब तमाला । हमहि बताओ कित नँदलाला ॥  
 अहो जुही मालती निवारी । लखे कहूँ इतजात विहारी ॥  
 हे चंपक हे श्रीफल कदली । हे दाड़िम हे जामुनबदली ॥  
 तुम देखे मनमोहन लाला । श्याम कमलदल नयन विशाला ॥  
 हे पलाश हम दासि तुम्हारी । कहो कहां सुखरास विहारी ॥  
 दोहा-हे अशोक हरि शोक तुम, सत्य करो निज नाम ॥

लेत नहीं यशहेपनँस, क्यों न कहत कित श्याम ॥

सो०-हेमन्दार उदार, हेपीपर हर पीर मम ॥

कह कित नन्दकुमार, सुन्दर वन तन साँवरो ॥

हे चन्दन तनु जरत जुड़ावो । नन्दनँदन पिय हमहि बतावो ॥  
 हे अवनी चितचोर हमारे । कितराखे नवनीत पियारे ॥  
 तुमते दूरि कहूँ हरिनाहीं । क्यों न मिलाय देत हम पाहीं ॥  
 कहि धौं कुंद सुकुंद कहाँहैं । हमको देहु बताय जहाँहैं ॥  
 हेवँट नटनागरहि बताओ । कहूँ निकट नँदसुवन दिखाओ ॥  
 कहु धौं मृगी मया करि हमको । पृच्छति हम हाहाकरि तुमको ॥  
 देखियत डह डहे नयन तुम्हारे । तुमकहूँ मोहन लालनिहारे ॥  
 हे दुख दमन परम सुखकारी । कहियत गति सर्वत्र तुम्हारी ॥

१ विष । २ अग्नि । ३ गड़त । ४ कटहर । ५ वरमद ।



जहां होई बलवीर विहारी । कहति जाय किन बिथा हमारी ॥  
 हे तुलसी तुमताँ सब जानो । क्यों नहि हरिसों प्रगट बखानो ॥  
 तुमताँ सदा श्यामकी प्यारी । कहत नहीं यह दशा हमारी ॥  
 बोलत नहिं कोउ कहत तरुनको । लेगये श्याम इनहुँके मनको ॥  
 दोहा-इहि विधि वन धन दूँढ सब, ब्रजतिय विरह उदास ॥

इत उतते फिर आवहीं, कुँवरि राधिका पास ॥  
 सौ०-मनहुँ नीर विन मीन, अति व्याकुल तरफत परी ॥  
 श्यामविरह अतिदीन, कमकलतासी नागरी ॥

व्याकुल कहति सकल ब्रजवाला । अजहूँ नहिं आये नँदलाला ॥  
 कहा करे अब कितको जैये । श्याम विना कैसे सुख पैये ॥  
 तब सब बहुरि यमुनतट आई । जहां रसिक पिथरास रमाई ॥  
 बैठौ सब राधा ढिग बामा । कहन लगीं हरिके गुण ग्रामा ॥  
 सबके ढिग हरि सोहत कैसे । दृष्ट बन्द करि नटवर जैसे ॥  
 युवति नहीं कोउ उनको देखें । हरि सबहीकी लीला पखें ॥  
 देखि देखि मन अति सुख पावैं । परमप्रीति रस रीति बढावैं ॥  
 करत चरित्र विचित्र विहारी । सदा श्याम भक्तन सुखकारी ॥  
 विरह अग्नि तनु गर्व जरावैं । निर्मल प्रेम भक्ति उपजावैं ॥  
 गोपी जन सब हरिकी प्यारी । नैकनहीं कहूँ हरिते न्यारी ॥  
 कहति श्याम ब्रज प्रगटे जबते । देत सबनको सब सुख तबते ॥  
 तिनमें हम सब उनकी दासी । क्यों हमतज हरिभये उदासी ॥  
 दोहा-व्याधहुते करनी कठिन, हमते ठानी श्याम ॥

वेषु बजाय बुलाय सब, बधतमृगीज्यों वाम ॥  
 सौ०-कौन कौन उपाय, मोहन मुख देखे विना ॥  
 मराति मसोसा खाय, यह मन गीध्या माधुरी ॥  
 सदा हमारे मनको भावे । तिरछी चितवनचितहि चुरावै ॥  
 जब अति बालक हुते मुरारी । बालविनोद किये सुखकारी ॥

१ बहेलिया । २ हरिणी । ३ चीत्र ।



खेलतमें बहु असुर सँहारे । विघन अनेकन ब्रजके टारे ॥  
 अद्भुत चरित मनोहर कीनो । गिरिवरधर ब्रजको रख लीनो ॥  
 हलधर सखन संग मुरली धरि । गोचारन बन जाते जबहिं हरि ॥  
 तब हज्रको बीतत दिन जैसे । जानतहै हमरो मन तैसे ॥  
 कुंडल मुकुट केशं धुंवरार । गोरज रंजित दृग अनियारे ॥  
 पीत वसन वनमाल विशाला । वेणु बजावत मधुर रसाला ॥  
 सखन मध्य गौअनके पाछे । चंदन चित्र शुभगतनु आछे ॥  
 सांझ समय आवत जब देखें । तब हम जन्म सफल करि लेखें ॥  
 ऐसे कथत सकल ब्रजनारी । हरि गुण रूप कथा विस्तारी ॥  
 लसुझत कहत श्याम गुणरूपा । उपजी उर अति प्रीति अनूपा ॥  
 दोहा-भूलि गई सुधि देहकी, भयो विरह दुख औन ॥  
 केवल तनुमय है गई, नहिं जानति हम कौन ॥  
 सो०-भृंगी कीट समान, मगन ध्यान रस नागरी ॥

विसरो सकल सयान, भई आपुही कृष्णतनु ॥  
 लागीं करन चरित सब हरिके । पूरण प्रेम भई गिरिधरके ॥  
 ये लीला उनहींको सोहैं । नेक नहीं जानति हम कोहैं ॥  
 एक भई दधि चोर कन्हाई । एक पकरि गहि भुजलै आई ॥  
 एक यशोमतिको वपु धरिके । बांधतिहै उखलसां हरिके ॥  
 इक भई गाथ एक गोपाला । बोलति वैसेइ बचनरसाला ॥  
 कारी धोरी धूमरि कहिकै । हठकत फिरत लकुटकर गहिकै ॥  
 कहति एक अंबर गिरिधारी । गाथ गोप सब रहौ सुखारी ॥  
 कहति एक मूंदो सब लोचन । मैं करिहौं दावानल मोचन ॥  
 एक यमल अर्जुन तरु मंजै । एक वकासुर वदन विभंजै ॥  
 एक वस्त्रको नाग बनाई । तापर निरत करत हरषाई ॥  
 एक दहीको दान चुकावै । एक त्रिभंग है वेणु बजावै ॥  
 मगन भई सब यारस माहीं । तनु अभिमान रह्यो कछु नाहीं ॥

१ मारे । २ बाल । ३ अरुण । ४ बंसी । ५ नाश ।



दोहा-अंतरनेकु रह्यो नहीं, भई श्याम ब्रज वाम ॥

तब अंतर नहिं करि सके, भये निरंतर श्याम ॥

सो०-प्रगट भये तत्काल, तिनहीं मधि नैद लाड़िले ॥

सुन्दर नयन विशाल, गोपीजन बल्लभ सुखद ॥

प्रेम मगन अति आतुरताई । श्रीवृषभानु कुँवरि उर लाई ॥

देखि प्रगट दर्शन गोपाला । मिलीं धाय आतुर ब्रजवाला ॥

जो धन राशि परी कहूँ पावे । लोभी जन लूटनको धावे ॥

लपटी एक धाय उर माहीं । एक मिलत ग्रीवा दे बाहीं ॥

कोऊ परी चरण पर आई । कोऊ अंग रही लपटाई ॥

कोऊ गहि उर पंकज लावैं । तम विरहकी ताप नशावैं ॥

कोऊ लटकी गहि भुजा नवेली । जनु शृंगार बिटप छवि बेली ॥

कोऊ मुख छवि रही निहारी । कोऊ रही चरण उर धारी ॥

कोऊ दृग भरि कहत भले हरि । एक पीत पट छोर रही धरि ॥

हरिसों मिली लसति यो भासिन । जनु वन वन घेरयो बहु दामिन ॥

कहूँ अंजन कहूँ कुंकुम रेखा । कहूँ पीककी लीक सुवेखा ॥

युवतिन मध्य लसै हरि प्यारि । कृपा दृष्टि सब ओर निहारे ॥

दोहा-पुनि बैठे हरि हर्षि तहँ, युवति वृन्द चहुँ पास ॥

सबके सन्मुख राजहीं, सुन्दर छवि घनरास ॥

सो०-बोले बिहंसि गोपाल, हँसत कियो यह ख्याल हम ॥

कतहिं भई बेहाल, तुम प्रापन ते मोहि प्रिय ॥

सकुचीं सुनि प्यारी यह वानी । मन जान्यो नहिं प्रगट बखानी ॥

कहि २ कोमल वचन कन्हाई । सबको दुख डारयो बिसराई ॥

अति आनंद सबनको दीनो । सफल मनोरथ सबको कीनो ॥

जाके साधहुती जिय जैसी । पूरन करी श्याम मन तैसी ॥

भये कान्ह प्रीतम अनुकूले । बढ्यो अनंद सकल दुख भूले ॥

तब हरिसों सब नवलकिशोरी । पूछन लगीं बिहंसि कर जोरी ॥

प्रेम प्रीति की रीति सुहाई । हमै कहो समुझाय कन्हाई ॥



इक जो प्रीति परस्पर कहिये । एक एक ही दिशि ते लहिये ॥  
 एक दुहुनको मानत नाहीं । ताको कहा कहत जग माहीं ॥  
 उत्तम प्रीति कहावति जोई । कहहु श्याम हमसों तुम सोई ॥  
 हम अबला जानति कछु नाहीं । ताते पृछति हैं तुम पाहीं ॥  
 सुनि गोपिनके वचन रसाला । भये प्रेम वश परम कृपाला ॥  
 दोहा—यदपि जगत गुरु अजित प्रभु, जानराय ब्रज चंद ॥

प्रेम विवस हारे तदपि, अपने सुख नंदनन्द ॥  
 सो०—कहत भये तब कान्ह, सुनहु प्राणवल्लभ प्रिया ॥

नहिं तुम सम कोउ आन्ह, निपुण प्रेमेके पंथमें ॥  
 तद्यपि तुम पृछति हो जैसे । प्रगट करौ लक्षण सब तैसे ॥  
 एक जो प्रीति परस्पर होई । स्वारथ हेतु करत सब कोई ॥  
 जैसे पशु पशुको जाने । आपुसमें अतिहित करमाने ॥  
 सो वह प्रीति कनिष्ठ कहावे । जासों सब संसार बंधावे ॥  
 दूजी प्रीति एक दिशि जोई । करति धर्म अधिकारी सोई ॥  
 जैसे मात पिता चित धरिके । रक्षत हैं सुतके हित करिके ॥  
 सो वह मध्यम प्रीति कहावत । उत्तमगति ताते जन पावत ॥  
 जो यह दोउनको नहिं जाने । गुण दूषण कछु उर नहिं आने ॥  
 तिन्हें सुनो मैं कहत बखानी । कै कृतज्ञ कै पुनि अज्ञानी ॥  
 उत्तम प्रीति जानिये सोई । अन्यास उपजत उर सोई ॥  
 दुहुँदिशि हठिकरि प्रीति बढावे । नहिं निमित्ततामें कछु आवे ॥  
 अंतर नेक परै नहिं कोई । प्रीति पुनीत जानिये सोई ॥  
 छंद—नहीं अंतर नेकु जा मधि, प्रीति उत्तम सो कही ॥  
 करी मोसों तुम सबन सोइ, मैं ऋणी तुमरो सही ॥  
 करहुँ जो उपकार तुमप्रति, कोटि कोटि कोटिन जग भरी ॥  
 कवहुँ होहुँ न उरुण तुमते, हे प्रिया ब्रजसुंदरी ॥

१ प्राणप्यारी । २ प्रेममार्ग । ३ छोटी । ४ अकस्मात् । ५ रस । ६ बीच ।

७ कर्जा ।



करै ऐसी कौन जैसी, तुमन जो करनी करी ॥  
 लोक वेद मर्याद समहित, तोरि तूण सम परिहरी ॥  
 करहु मनते दूर अब यह, दोष मैं तुमते कियो ॥  
 प्रिया अंतर परमसुखमें, विरह दुख तुमको दियो ॥  
 दोहा-ऐसे प्रेमाधीनहै, कहि कहि वचन रसाल ॥  
 दूरकरी युवतीनके, मनते गांस गुपाल ॥  
 सो-जादयां परमानंद, बज वासिन प्रभु वचन सुनि ॥  
 परम मुदित तिय वृंद, प्यारी प्रिय नंद नन्दकी ॥

अथ महामंगल रासलीला ॥

सुनि पियके मुखकी रसवानी । गोपी जन सब मन हरषानी ॥  
 हँसि हँसि बहुरि लाल उरलाये । भवते सब सन्देह मिटाये ॥  
 देखि सवनकी प्रीति कन्हई । बहुरिरासरस हचि उपजाई ॥  
 वेसोइ सुख सबको उपजायो । वही भाव सबके मन भायो ॥  
 यह जान्यो सबहिन तबहीते । करतरासरस पिय सबहीते ॥  
 अन्तर्धान चरित सब भूली । वेसोइ आनंदके रस फूली ॥  
 बहुरि रास मंडल विधि जोरी । बिच बिच श्याम बीच बिचगोरी ॥  
 वेसोइमधि नायक हरि राधा । वहै परस्पर प्रीति अगाधा ॥  
 वेसोइ मुरली श्याम बजाई । वेसोइ थकित भयो उठुराई ॥  
 वेसोइ सुर विमान नभ सोहैं । वेसोइ सुर मुनि गंधरब मोहैं ॥  
 वेसोइ खग मृग नव द्रुम वेली । वेसोइ यमुना पुलिन सुहेली ॥  
 वेसोइ पवन त्रिविध सुखदाई । वही रास रस रूपनिकाई ॥  
 छंद-करै वैसोइरासरसपुनि, युवति अति छबिलाजही ॥  
 गौर अंग किशोर वेष, सुदेखमुख शशि राजही ॥  
 जोरि पंकज पाणि बाहु, मृणाल मंडन साजही ॥  
 मध्य सबके श्याम श्यामा रूप राशि विराजही ॥

१ छटक-चिन्ता । २ चन्द्र ।



मुकुट कुंडल वसन भूषण, वरण अंगन राजहीं ॥  
 अंग अंग अनंगरतिलखि, कोटि कोटिन लाजहीं ॥  
 चरणनूपुर किकिणी कटि, वलय नूपुर बाजहीं ॥  
 बीन ताल मृदंग चंग, उपंग सुर सुख साजहीं ॥  
 दोहा-अरस परस निरखत छबिहि, भरे प्रेम आनन्द ॥  
 नवल नागरी ब्रजबधू, नव नागर नंदनन्द ॥  
 सो०-रहे निरखि सुर भूल, सहित सुन्दरी भग सुख ॥  
 पुनि पुनि वर्षत फूल, धन्य धन्य ब्रजकहि मुखन ॥  
 सोहति हरिमुख सुरली कैसे । करि दिग्विजय नृपति वर जैसे ॥  
 बैठि पाणि सिंहासन गाजे । अधर छत्र शिर ऊपर राजे ॥  
 चमर चहूँ दिशि चिह्नुर सुहाये । वेत पाणि कुंडल छबि लाये ॥  
 बलि बलि बरजतहँ सब काहू । कहत निकट कोऊ मति जाहू ॥  
 दूरहिते सब करत जुहारै । सन्मुख आदर सहित निहारै ॥  
 मधुकर पिक बंदी गुण गावैं । मानध मदन प्रशंसि सुनावैं ॥  
 मान महीपति बलमधि मान्यो । युवती पृथ जीत गहि आन्यो ॥  
 बिनहि पनच बिनही कोढ़डा । सुर शर भेद कियो ब्रह्मडा ॥  
 ब्रह्मा शिव सनकादिक ज्ञानी । बोलत हैं सब जय जय वानी ॥  
 नारि पुरुष जड जंगम जेते । किये सकल अपने वश तेते ॥  
 थक्यो पवन जल अनल सिरानी । विधि कृत मेदि आपनी ठानी ॥  
 निज निज ठकुरायनकी रेखा । बांछि सकल वश भये विशेषा ॥  
 दोहा-रच्यो राजसूयज्ञ रस, रास विपिन शुभ धाम ॥  
 तहँ अधिकारी साँवरी, मोहन सुन्दर श्याम ॥  
 सो०-सबहिनको भुखदेत, दान मान रस प्रेमको ॥  
 बढ़यो माधुरी हेत, परमानंदित लोग सब ॥  
 गावत गोपी सँग सब जुरली । बाजत मधुर मधुर सुर सुरली ॥  
 राग रागिनी प्रगट दिखावैं । जे सब रूप अनूपस गावैं ॥



अति प्रवीन पियको मन मोहैं । नृत्य करति सुन्दर सब सोहैं ॥  
 नाचत कबहुँ श्याम अरु श्यामा । रीझत निरखि सकल ब्रज वाजा ॥  
 ले गति चलत परस्पर दोऊ । सो छबि वरणि सके कवि कोऊ ॥  
 होडा होडी रंग बढ़ावैं । तडपलेत शोभा अति पावैं ॥  
 उरझी कुंडल बेसर सां लट । पीत वसनवन माल रही सट ॥  
 उरझे मन मन वैतन वैना । लटकीली छवि उरझे नैना ॥  
 नाचत युगल चपल गिरिधारी । प्रेम उरझ उरझे पिय प्यारी ॥  
 उरझी गोपी जन लखि शोभा । नहि निरवार सकत मन लोभा ॥  
 अति रस रंग बढ़यो सुख भारी । थैइ थैइ बढ़ति मुदित ब्रज नारी ॥  
 भगन सकल रस सिंधु निहारैं । रीझ रीझ तन मन धन वारैं ॥

छं०—भगन सब रसरास सुखनिधि, हर्षि तनमनवारहीं ॥  
 हिय हुलास न जायकहि छवि, राज युगल निहारहीं ॥  
 कीनां जु तप जिहि हेतु बारह, मास सां पति पाइयो ॥  
 तवमंत्रकीनों व्याहको, सब सखिन मंगल गाइयो ॥  
 ललित कुंज बितान सुभग, लतानि मंडप द्युतिवनी ॥  
 बहु रंग वंदनवार चहुँ दिशि, चारु सुभजन छविपनी ॥  
 अति विविच पवित्र यमुना, पुलिन शुभ वेदीरची ॥  
 वर्णन सकै छबि कौन विधि, तिहुँ लोक शोभा कीसवी ॥  
 दौहा—तहँ नंदनन्दन लाड़िलो, श्रीवृषभानु कुमारि ॥  
 दूलह दुलहिन राजहीं, शोभा अभित अपारि ॥  
 सो०—भरीं परम उत्साह, ललतादिक ब्रज सुन्दरी ॥  
 प्रीति रीतिकी चाह, लागीं करन विवाह विधि ॥  
 मोर मुकुट रचि मोर बनायो । सो शिर धर गिरिवर धर आवे ॥  
 तनु घनश्याम पीत पट सोहै । घन दामिनि ताके दिग मोहै ॥

१ निछावरकरै । २ सुखसमुद्र ।



बनमाला गरभाहि बिराजे । निरखत इंद्र धनुष सुतिलाजे ॥  
 ललित अंग तनु भूषण जाला । कुंडल झलकन नयन विशाला ॥  
 सकल कला गुणरूप निधाना । त्रिभुवन सुन्दर परमसुजाना ॥  
 जाके मन्मथ सैन बराती । फूले विटप सुमन बहु भांती ॥  
 करिकोलाहल पिक शुक बोलैं । मंजुमोर नितत सँग डोलैं ॥  
 नभसुरपति दुंदुभी बजावैं । नाचत किन्नर गंधरव गावैं ॥  
 वर्षत सुरगण सुमन सुहाये । ब्रजतिय करति सकल मन भाये ॥  
 कुँवर लाडिली शुभग सँवारी । गोरे अंग चूनरी सारी ॥  
 नखशिख मणि भूषण छविछाजैं । मुख शोभा लखि उडुपति लाजैं ॥  
 प्रीतिरीति जहँ हित करि गानी । सो शुभ धरी विधाता बानी ॥  
 छंद-शुभ धरी सो वानी विधाता, हेतु जिहि दृढ़ व्रत लियो ॥  
 शरद निशि पून्यो विमल शशि निरखि अति प्रफुलित हियो ॥  
 अथर मधु मधुपर्क कहिकै, पाणिगृहण सुविधि करी ॥  
 पठत नभ विधि वेद वाणी, सुरन जय ध्वनि उच्चरी ॥  
 तब अलिनहंसिकै गांठि जोरी, प्रेम गांठ हिये परी ॥  
 सहससौरह संग सखियां, फिरति भांवरि रस भरी ॥  
 बढ़यो अति आनंद उरमधि, साद सब पूरण भई ॥  
 मदन मोहनलाल दूल्हा, राधिका दुलहिनि नई ॥  
 दोहा-निरखि देव वरपैं सुमन, हरष न हिये समात ॥  
 वृन्दावन रस रास सुख, लखि सुरवधू सिहात ॥  
 सौ०-हमसों यह सुखदूरि, कहत परस्पर सुरन गण ॥  
 क्यों उड़ि लागै धूरि, धनि ब्रजवासी धन्य ब्रज ॥  
 सोहति युवति वृन्द मधि जोरी । नवनागर वर नवल किशोरी ॥  
 शोभा अमृत पारको पावै । निरखत बन कहत नहि आवै ॥



दूलह श्याम दुलहनी राधा । रूपसिंधु दोउ परम अगाधा ॥  
 रागभीनि रँगभीने दोऊ । अति आनंद उमँगि सब कोऊ ॥  
 प्रेमरंग भीनी ब्रजनारी । निरखि युगल छबिहोहि सुखारी ॥  
 भरी प्रीतिरस गारी गावैं । लखि २ पिय प्यारी सुख पावैं ॥  
 हाव विलास मोह उपजावैं । बार बार दंपति गुणगावैं ॥  
 बिविध भांति दुंदुभि नभ बाजैं । निरत कला रंभादिक साजैं ॥  
 हंस मोर पिक चालक बोलैं । वनमृग निकट संग सब डोलैं ॥  
 वारति तिय भूषण हरषाई । वनके मृगन देति पहराई ॥  
 तब इक सखी भई नैदराई । इक वृषभानु रूप धरि आई ॥  
 अतिहित मिले महर दोउ धाई । तब विनती वृषभानु सुनाई ॥  
 छं०-तब जोरि कर वृषभानु विनयो, सुनहु श्रीनंदरायजू ॥  
 हम भये सकल सनाथ अब, सब कृपा तुम्हरी पायजू ॥  
 अतिबडे पुण्यते मिले तुमसे, सगे सुखके सिंधुजू ॥  
 शिरमोर गोकुल चंद आनंद, कंद सब जग बंदजू ॥  
 तुमगेहभंजनहेत कन्या, हम न तुम सम योगजू ॥  
 निज दासकरि सब जानिये, वृषभानुपुरके लोगजू ॥  
 अष्टसिद्धि नवनिद्रि संपति, सकल सुखके खानजू ॥  
 ऐसे विनयकरि नंदके, चरणन गहे वृषभानुजू ॥  
 तबनंद अति आनंदभरि, बोले सहित अनुरागजू ॥  
 सुनहु श्रीवृषभानुजू, तुम धन्य अति बडभागजू ॥  
 तुमसे समुद्र न सो सुनहु, संबंध मांगिन पाइये ॥  
 परम निर्मल यश तुम्हारो, लोक लोकन गाइये ॥  
 अति नेह कान्हर सों तुम्हारो, प्रीति पहली यह भई ॥  
 दईकन्या करि कृपा, गुण रूप सुख शोभामई ॥  
 पूरे मनोरथ सकल अब हम, बडे सब भांतिन भये ॥



वृषभानु नंद अनंद प्रसुदित, परस्पर चरणन नये ॥  
 दोहा-मन मन हरपित नागरी, नागर नवल किशोर ॥  
 लखिरसरीति सखीनकी, प्रेमप्रमोद न थोर ॥  
 सो०-विलसत अति आनंद, ब्रजविलास ब्रज नागरी ॥  
 प्रीति विवस ब्रज चंद, कोकहिसके सुहाग सुख ॥  
 करत मनोरथ सब मन भाये । त्रिभुवन पति दूलह करि पाये ॥  
 व्याहरीति सब करि ब्रजनारी । गावति यशुमति को रस गारी ॥  
 तब कंकण छोरन विधि कीनी । रचि पचि गांठि चतुर तिय दीनी ॥  
 कहत श्याम लों छोरौ कंकन । परमानंद सुदित गोपीजन ॥  
 बड़े चतुर तौ खोलहु गिरिधरायह न होय धरिवो गिरिको कर ॥  
 कै छोरौ कै दोउ कर जोरौ । दुलहनि के परि पांय निहोरौ ॥  
 बड़े कहावत हौ ब्रजनाथा । काहे कैंपन लगे दोउ हाथा ॥  
 छोरहु वेगि कि सुनहु कन्हारै । पठवहु यशुमति माथ दुलारै ॥  
 दोउ परस्पर कंकण छोरैं । प्रेम उमँग उर हर्ष न थोरैं ॥  
 पचिहारे कंकण नहि छूटत । निरखि हर्षि ब्रज तिय सुख लूटत ॥  
 कहत सहाय करो जिन कोऊ । कंकण छोरहि आपहि दोऊ ॥  
 दुलहनि दूलह कंकण खेलें । कै वृषभानु बजाको बोलें ॥  
 दोहा-कमल कमल परशो जनो, पाणि लाडिली लाल ॥  
 लखि कवि कुल सांचे लगत, रोम कटीली नाल ॥  
 सो०-दूलह नंदकुमार, दुलहन श्रीराधा कुँवरि ॥  
 सन्तन प्राणअधार, अविचल यह जोरी सदा ॥  
 यह रस रास चरित हरि कीनो । ब्रज युवतिन वांछित फल दीनो ॥  
 ब्रजतिय सुख हित कुंजविहारी । करी मास निशिषट उजियारी ॥  
 साद नहीं युवतिन मन राखी । श्रीभागवत कह्यो शुक्र भाखी ॥  
 वेद उपनिषद साख बतावैं । ब्रह्मा शंभु सहस सुख गावैं ॥  
 नारद शारद ऋषिय अनंता । कहत सुनत गावत सब संता ॥

१ भोगत । २ लीला ।



सोरह सहस गोप सुकुमारी । तिनके संग लाल गिरिधारी ॥  
 कियो रासरस रहस अगाधी । पूरण करी सबत की साधा ॥  
 हाव भाव रस रास विलासा । नैन सैन सुख वचन प्रकासा ॥  
 भुज भरिमिलन अधर रस चाखनादृत्य गान रस रुचि संभाषन ॥  
 क्षण क्षण बढ़ति अधिक रस रीती ॥ इह विधि रैन करत सुख बीती ॥  
 भयो समय ब्रह्मी शुभ काला । रास रमत भई भ्रम सब वाला ॥  
 तब श्री यमुना गे नंदलाला । सोहत संग सकल ब्रजवाला ॥  
 छंद-सोहत सकल ब्रजवाल संग, नंदलाल तब यमुनागये ॥  
 शरदनिशिरसरास करि, पूरण मनोरथ सब भये ॥  
 जैसे महा मद मत्तगज, वरपूथकरिनिनसंग लिये ॥  
 फिरत बनसरसरित क्रीडत, निदरि अतिनिर्मल हिये ॥  
 निमि नंदसुत जगबंद आनंद, कंदरसनिधिरयामये ॥  
 भेदि वेदमर्याद ब्रज तिय, प्रेम सब आनंद भये ॥  
 रमत वृन्दावन यमुनरस, केलि अति सुख मानई ॥  
 दास ब्रजवासी प्रभू गुण, नाग नर सुर गानई ॥  
 दोहा-धनि वृन्दावन धन्य सुख, धन्य श्याम धनि रास ॥  
 धनि धनि मोहन गोपिका, नित नव करत विलास ॥  
 सो०-नहिं सुरपुरसमतूल, वृन्दावन सुख एक पल ॥  
 कहि कहि वरषे फूल, सुरगण मन आनंद भरे ॥  
 यमुना जल क्रीडत नंदलाला । सोलह सहस संग ब्रजवाला ॥  
 मधि राजत दोऊ बहूँ जेरी । दंपति गौर सांवरी गोरी ॥  
 कोऊ कटिलौ जल सुख साजै । कोउ उर ग्रीवालौ छवि छाजै ॥  
 ताकी उपमा कवि किमि कहहीं । अति आदर छवि पार न लहहीं ॥  
 छिरकत पाणि परस्पर सोहैं । नंद नंदन पियको मन मोहैं ॥

१ ब्रह्ममूर्त । २ हाथी । ३ हयिनी । ४ तालाव । ५ नदी ।



सलिल शिथिल सोहत नैदनन्दन। सुन्दर भाल कुमकुमा चन्दन ॥  
पँचरँग भयो यमुनजल जाते । छवि मय लहरि उठतिहै ताते ॥  
रूप छटासी तिय गण आभैं । करत विहार लिये घनश्यामैं ॥  
एक एक अँग भरि भरि लेहीं । हास विलास करत छवि देहीं ॥  
एकनले अथाह जल डारैं । सुख व्याकुलता रूप निहारैं ॥  
इक भाजत इक पाछे धावैं । एक श्याम ढिग पकरिले आवैं ॥  
कंठ लगाय लेत पियताही । सो सुख कविसों कह्यो न जाई ॥  
दोहा-करत केलि यमुनासलिल, ब्रज ललना संग श्याम ॥

निशि श्रम भिटि आलस गयो, भये सुखी सुखधाम ॥  
सो०-अलख लखी नहि जाय, अविगति की गतिको कहै ॥

योगी सकत न पाय, सो भोगी ब्रजतियनको ॥  
जल विहार विहरत सुख पाई । रास रंग मनते नहि जाई ॥  
युवती मंडल करि कर जोरैं । श्यामा श्याम मध्य करि खोरैं ॥  
वही भाव मनमे उपजावैं । निराखि निरखि मोहन सुख पावैं ॥  
विहरति नारि हँसत नैदनन्दन। अंकम भरि भरि लेत अनन्दन ॥  
प्यारी श्याम अंजली डारे । सो छवि तिय सुख पाय निहारे ॥  
मानहु कमल और इन्द्रियवर । छिरकतहै मकरंद परस्पर ॥  
जल क्रीडा सुख करत कन्हवाई । वर्षत मुमन देव झरि लाई ॥  
लीला सागर परम अपारा । कवि किहिविधि कर पावै पारा ॥  
करि जल संग केलि ब्रजनारी । आये जलतट निकसि विहारी ॥  
भीजे पैट लपटे तनु माहीं । पट अंतर लट चीरनुचाहीं ॥  
ठाढे यमुनातीर कन्हवाई । पुलिन पवित्र परम छवि छाई ॥  
निरखत निर्मल तनुकी शोभा । अरसपरसविहँसत मन लोभा ॥  
दोहा-तबइक तरुको विहँसिके, आयसुदीनो श्याम ॥

नाना भूषण वसन वर, तिन वर्षे अभिराम ॥  
सो०-निज निज रुचि अनुहार, लै लै ब्रजकी सुन्दरिन ॥

१ पानी । २ जिसकी गति जानी न जाय । ३ वख ।



कीनो नवल शृंगार, उर आनंद नहिं जाय कहि ॥  
 करि शृंगार तनु नवल किशोरी । हरि सन्मुख ठाहीं सब गोरी ॥  
 निरखि श्याम छवि मन ललचाहीं । विदा करत घरको सजुचाहीं ॥  
 हैसि बोले तब मदनगुपाला । जाहु सदन अब सब ब्रजवाला ॥  
 अति आदर दैदे सुखदाई । पाणि परस सब सदन पठाई ॥  
 निशि सुखटरत न काहू मनते । चलीं सदन सब वृन्दावनते ॥  
 अति आनंद रह्यो उर भरि कै । भांवरिदे आई संग हरि कै ॥  
 मनके सफल मनोरथ कीने । नंदसुवन हित पति करि लीने ॥  
 गई सदन सब हर्ष बढ़ाये । घर घर लोगन सोवत पाये ॥  
 जगस्वामी हरि यह मति ठानी । ब्रज युवतिन सबहिन घर मानी ॥  
 प्रातकाल सब ब्रजजन जागे । निज निज कारजमें सब लागे ॥  
 नंद धामगये नंदके लाला । काहू नहिं जान्यो यह ख्याला ॥  
 यह रहस्य लीला गिरि नारी । संत जनन मन आनंद कारी ॥  
 छंद—यह रहस लीला श्यामकी, सब संत सुर मुनि भावनी ॥  
 ज्ञान ध्यान पुराण श्रुति मति, सार परम सुहावनी ॥  
 यह मंत्र यंत्र अनंत व्रत फल, ध्यान दंपतिको रहै ॥  
 भाव करि नित भावमन, विनु भाव यह सुखही लहै ॥  
 धन्य श्रीशुकदेव मुनि, भागवत यह रस गाइये ॥  
 निगम नेति अगाध श्री, गुरु कृपाविन नहिं पाइये ॥  
 सरैचि कहि जे सुनें सीखें, प्रीति करि जे गावहीं ॥  
 ऋद्धि सिधि सब कह गनाऊं, भक्ति अनुपम पावहीं ॥  
 उरबटै रसनेमददपद, प्रेम राधा श्यामको ॥  
 अहहि अचल निवास वृन्दा विपिन घन निज धामको ॥  
 यहै आशा राखिकै उर, दास ब्रजवासी कही ॥  
 कृपा कीजै श्याम श्यामा, शरण पद पंकज गही ॥

१ श्रेष्ठ । २ हितपूर्वक ।



दोहा-चरित ललित गोपालके, रास विलास अनेक ॥  
 कापै वरणे जात सब, इतनो कहां विधेक ॥  
 सो०-निकसीतरे अधाय, ज्योंपिपीलिका सिंधुते ॥  
 कह्यो यथा मति गाय, तिम ब्रजवासी दासद्व ॥

अथ मानचरित्र लीला ॥

नित्य श्याम श्यामा सुखकारी । करत नित्य नव चरित विहारी ॥  
 निर्गुण निर्विकार अविनाशी । भक्त मनोरथ सदा विलासी ॥  
 नित वृन्दावन धाम सुहायो । नित्य रासरस वेदन गाथो ॥  
 भक्तन हेतु विविध तनुधारें । भक्तन हित लीला विहारें ॥  
 सदा भक्त वश कृष्ण कृपाला । दयासिंधु प्रभु दीनदयाला ॥  
 शरदरैनि रसरास उपायो । युवतिन मति निज रूप बनायो ॥  
 सफल मनोरथ सबको कीनों । पतिहित करि सबको सुखदीनो ॥  
 तब कृपालु उरमें यह आनी । सदा भक्त वांछित फलदानी ॥  
 गोपिन गर्व रासमें कीनों । सो मैं अन्तर करि हरि लीनों ॥  
 रही साध इनके मन माहीं । हमको श्याम मनायो नाहीं ॥  
 ते ब्रज भक्त परम हित मेरी । करौं साव पुरण इन केरी ॥  
 अब इक मान चरित्र उपाऊँ । पौवन परि परि सबन मनाऊँ ॥  
 दोहा-करिविभेदरसरीतिमें, देहुं मान उपजाय ॥  
 इनके सुख मंडित वचन, कहवाऊँ सुखदाय ॥

सो०-सकल गुणनके धाम, परमविचक्षण रसिक मणि ॥  
 नवरस सागर श्याम, एक प्रेम रस वश सदा ॥  
 श्री राधा मनमोहन प्यारी । नव नागरि नवलप उजारी ॥  
 रास नृत्य रिझ्ये गोपाला । तारस मगन फिरत नंदलाळा ॥  
 करत भवत शृंगार पियासी । औचक तहां गये गिरिधारी ॥  
 देखि प्रिया पियको हँसि दीनो । हवि श्याम अंकम भरि लीनों ॥  
 रहे थकित लवि अंग निहारी । जात कमल मुख पर बलिहारी ॥

१ मनोहर । २ ज्ञान । ३ चीटी । ४ नवीन ।



इहि अंतर पियके उर माहीं । देखी तिय निज तनु परछाहीं ॥  
 झलकि उठी प्यारी अइ न्यारी । अति सनेहधम सुरत बिखारी ॥  
 और नारि पियके उर जानी । आपुन विषे प्रीति घटिमांनी ॥  
 राखत सदा हियमें याही । लयाये मोहिं दिखावन ताही ॥  
 कियो मान यह भ्रम उपजाई । कहत वचन पियसों अनखाई ॥  
 अन जानी पिय बात तुम्हारी । ऊपरहीकी प्रीति हमारी ॥  
 हमसों मुँहकी बात मिलावत । यह प्यारी उरमाहिं बसावत ॥  
 दोहा-धनि धनि याको भाग्यहै, बसति तुम्हारे हीय ॥  
 याही सों हित राखिये, अब मनमोहन पीय ॥  
 सो०-भलीकरी सुख मानि, मोहिं दिखाई आनिके ॥  
 यह प्यारी सुखदानि, उरते जिन न्यारी करौ ॥  
 ऐसे कहि मुखकाय किशोरी । कछु रिसकर जिय भौंहसिकोरी ॥  
 वकित श्याम लखि सन्मुखवानी । कहत कहा नागरी सँवानी ॥  
 सांच कहति कैधों करि हांसी । कत रितकरि तियहोत उदासी ॥  
 समझी नहीं कहा जिय आई । झलकि उठी कै अति भ्रमपाई ॥  
 हँसि भुज गहन लगे मन मोहन । बैठत क्यों नहिं मम प्रिय गोहन ॥  
 मोहिं छियो जिन दूर रहौजू । बसत हिये किन ताहि गहौजू ॥  
 तुम्हीं चतुर अरु सब सयानी । हम दासी अरु ये पटरानी ॥  
 उरमें मनआवली बसाई । हँसी करनको हमें बताई ॥  
 लखि लखि प्रिया वदन सुखकारी । हँसत मनहिं मन कुंजविहारी ॥  
 कहति कहा भासिन अइ ओरी । तोबिन उरको बसत किशोरी ॥  
 तू मम श्रवण नयन सुखवानी । जीवन प्राण आधार सयानी ॥  
 बृथा क्रोधकर जियमें आनै । मेरो कह्यो नहीं क्यों मानै ॥  
 दोहा-सुमो श्याम हिरदे बसत, सो छिपिये न छिपाय ॥  
 ज्यों शीशीके माहिं जल, परगट परत लखाय ॥  
 सो०-बातें कहत बनाय, यह देखत हमसों हँसत ॥

१ संदेह । २ राधिका ।



जैहैं कहुँ अनखाय, उरते तब पछितायहै ॥

जो वह कहै करौ तुम सोऊ । वह नागरि तुम नागर दोऊ ॥  
 मतहिं खिझावो मोहिं कन्हारै । भली करी लै सौत दिखाई ॥  
 जाहु चले अब मैं सुखपायो । ऐसे कहि मन मान बढायो ॥  
 रिस करि मौन रही गहि प्यारी । देत मनहिं मन बाको गारी ॥  
 शोचत श्याम देखि मन माहीं । बोल सकत नहिं प्रियहि डराहीं ॥  
 कहत वृथा जिय मान न कीजै । नहिं अपराध जान जियलीजै ॥  
 क्यों रिस करति प्रिया मन माहीं । भेरे उर तेरी परछाहीं ॥  
 यह सुनि कुँवरि राधिकारानी । बोली रिसकरि पियसों बानी ॥  
 कहा बनावत बातें हमसों । जाहु चले बोलों नहिं तुमसों ॥  
 यह कहि ओटगई है प्यारी । भये विरह वश तब गिरिधारी ॥  
 अति व्याकुल तन मन अकुलाहीं । बार बार शोचत मन माहीं ॥  
 गयो सरोज वदन कुम्हलाई । तहां एक सखि दूती आई ॥

दोहा-सो हरिसों बूझति भई, कहहु न मोहिं सुनाय ॥

आज दशा कैसी लखति, बैठे कहा गँवाय ॥

सो०-क्यों तनु रहे भुलाय, अति व्याकुल देखत तुम्हें ॥

रह्यो वदन कुम्हलाय, ऐसी शौच कहा परयो ॥

बोले श्याम सखी हित जानी । विरह विकल कहि जात न बानी ॥  
 कियो मान वृषभातु किशोरी । मैं कछु नहिं अपराध कियोरी ॥  
 लखि भेरे उर निज परछाहीं । रूसरही करिकोप वृथाहीं ॥  
 मैं कहिकै बहुभांति मनाई । नहिं प्रतीति राधा उर आई ॥  
 बिन समुझे इतनो हठ कीनो । तबते मोहिं भदन दुखदीनो ॥  
 ऐसे कहि शोचत बलवीरा । लेत नयन भरि सांस अधीरा ॥  
 परम चतुर दूतिका स्यानी । विरह विकलता पिय जियजानी ॥  
 कह्यो धीर धरिये वनवारी । चलिये वनको कुंजविहारी ॥  
 मैं प्यारीलै तुमहिं मिलाऊं । आज कहातौ तुमसों पाऊं ॥  
 गई सदनते ले बन धामहिं । तहँ बैठारि धीर धरि श्यामहिं ॥



मैं ले आवति राधाप्यारी । कितक बात यह सुनहु विहारी ॥  
 मेरे आंगकी वह बारी । कहा मान करिहै सुकुमारी ॥  
 दोहा-ऐसे कहि चातुर अली, आतुर लखि घनश्याम ॥  
 श्रीवृषभानु लली जहां, चंपल चली ब्रज धाम ॥  
 सो०-मन मन रचत सयान, नई बनाऊं बातइक ॥  
 अबहिं लुड़ाऊं मान, मोसों धों कहिहै कहा ॥  
 हरिसों रूस मान करि वैसी । अबही कहा भई यह ऐसी ॥  
 करत विचार यहै मन माहीं । गई सखी राधाके पाहीं ॥  
 कुँवरि किशोरी परम सयानी । मुख देखतहि दूतिका जानी ॥  
 सहजहि बोल ताहि ढिगलीनी । सहजहि कह्यो मया कितकीनी ॥  
 तुरतहि कहि तब सखी सुनायो । तुमको वन घनश्याम बुलायो ॥  
 सुनत कह्यो प्यारी अनखाई । कहिको मुहिं श्याम बुलाई ॥  
 तू आई याही के लीन्हें । मैं अब श्याम भले करिचीन्हें ॥  
 कहा कहाँ तो कोरी आली । तुहं भली अरु वे वनमाली ॥  
 उनकी प्रहिमा कहत न आवै । अब इक नई नारि मनभावै ॥  
 ताको लै उरमाहिं बसाई । तोहिं उहांते टारि पठाई ॥  
 आज कहा कछु कलह भयोरी । कैधौं कछु तैं मान ठयोरी ॥  
 तबहिं आज अतमनी बतानी । यह तौ कछु मैं बात न जानी ॥  
 दोहा-मोसों नहिं कछु हरिकह्यो, सहज पठाई लैन ॥  
 कहँ धौं परी पुकार वहँ, तुम चलि देखहु नैन ॥  
 सो०-कहत सुनाय सुनाय, लै लै तेरो नाम सब ॥  
 तैं धौं लियो लुड़ाय, कहिकाके काके गथाहि ॥  
 काहेको गथ लियो परायो । अपनो नाम कुनाम धरायो ॥  
 डारि देहु जाको जो लीनो । तेरे बहुत दर्दको दीनो ॥  
 तबहीं ते उन शौर लगायो । ता कारण हरि तोहिं बुलायो ॥  
 हरि तेरी दिशिते झगरेरी । तूकत उनसों रोष करैरी ॥

१ शीघ्रतासे । २ निकट । ३ प्रभाव ।



यह कछु मोखी बात सुनाई । मैं काको धनलियो छिपाई ॥  
 कहिको हरि अमरत माई । इती मया मोपै कहै आई ॥  
 जैसे हैं तैसे हरि जाने । नहि उनके गुण परत बलाने ॥  
 बैठि किधौ तू घर जा अपने । मैं उनपै अब जाउँ न सपने ॥  
 हौं कह तोहि मनावन आई । मान करो तुम और सवाई ॥  
 परधन लै सबको ब्रज बैठी । कहा करत बातें यों ऐंठी ॥  
 देति जवाब सबनि किन जाई । मोपै कह इतनो सतराई ॥  
 तबते सबसों लखत कन्हआई । जब मैं तोहि बुलावन आई ॥  
 दोहा-बार बार कह कहतरी, तू मोको डरपाय ॥

मैं नहि काहूको लियो, झूठहि दोष लगाय ॥  
 सो-लखत कौनसों श्याम, कौने करी पुकार अब ॥  
 कहै न तिनको नाम, सांच तबहि मैं मानिहौं ॥  
 तब बदिहौं ऐसे कहि हैरी । श्याम निकट बैठे जब वैरी ॥  
 कहै लागि सबके नाम बताऊं । एक एक करि तोहि गिनाऊं ॥  
 नभ जल धरणि वनहुमें आये । कहै लागि मोते जात सुनाये ॥  
 जो नहि तिनकी गथहि बुराई । तौ तू कत वन चलत डराई ॥  
 परी वान तोको यह कैसे । भली कहत अलिलगति अनैसी ॥  
 श्याम विना क्यों न्याव चुकेरी । तिनहीं सों तू रोष करेरी ॥  
 कोटि करो एक पुनि द्वैहो । वे अरु तुम कछु जियके द्वैहौ ॥  
 मानकही चलु श्याम बुलाई । श्रवण लागि हरि मोहि पठाई ॥  
 जिनकी यह सब सौज तुम्हारे । ते जन हरि पहुँ जाय पुकारे ॥  
 इंदु कहत भो वदन विगोयो । अलिकुल अलकनको दुखरोयो ॥  
 हरिण मीन छवि दगन दुराई । खंजन हूं तहँ देत दुहाई ॥  
 शुककी छविनासाँ हरिलीनी । वैननकरी कोकिलाहीनी ॥  
 दोहा-अधरविष दाडिमदशन, लूटे कंठ कपोत ॥  
 लई तरणि छवि छीनकै, तरल तरौना जोत ॥



सो०—चक्रवाक कुच दाय, कटि हरि कदली जंवलिय ॥

गज मराल गति जाय, चरण पाणि पंकज हरे ॥  
ये सख हरिसों करत लराई । तैं जुकरी इनसों अधिकारै ॥  
अति अनीत लखि कुँवर कन्हारै । पठई मोहिं लेन तोहिं आरै ॥  
प्रतिउत्तर अपना कह चलिकै । इहारही कह बैठि मचलिकै ॥  
सुनि पियके गुण तिय हँसि दीनैं । कछु सकुची मन मान जुलीनैं ॥  
चतुर सखी जियकी सब जानी । तबहीं हरषि कही यह वानी ॥  
बानि कहा अब तोहिं परीरै । जब तब लखि निज छांह डरीरै ॥  
तादिन दर्पण लखि भ्रमकीनो । सोदग मूढ़ि मेढि हरि दीनो ॥  
आज देखि पिय निज उर छाहीं । कियो इतोहठ कुँवरि वृथाहीं ॥  
यह सुनि ससुझ मनहिं सकुचाई । सहचरि कंठ विहँसि लपटाई ॥  
रसकरि तुरत मान विसरायो । सुनि वनधाम श्याम सुख पायो ॥  
हँसिकै कबो सखी सों जारी । तू हरि सों कहि आवत प्यारी ॥  
मैं अँग भूषण वसन सँवारी । आवति वनहिं जहां वनवारी ॥  
दोहा—यह सुनि हर्षी दूतिका, गई जहां वनश्याम ॥

अति व्याकुल तनु सुधि नहीं, विहल कीनों काम ॥  
सो०—बैठत उठत अधीर, क्योंहूँ सुख पावत नहीं ॥

बढति विरहकी पीर, श्रीराधा राधा रटत ॥  
राधाविकल विरह गिरिधारी । कहूँ माल कहूँ सुरली डारी ॥  
कहूँ मुकुट कहूँ पीत पिछोरी । नहि कछु सुरति भई मति भोरी ॥  
कबहुँ मूढ़ि हग ध्यान लगावैं । कबहुँ प्यारीके गुण गावैं ॥  
कबहुँ लोटत कुंजन माहीं । कबहुँ बैठि द्रुमनकी छाहीं ॥  
ठाढ़ेठकि कबहुँ द्रुम डारी । तकतपियापय पलक बिसारी ॥  
देखि दशा दूतिका सयानी । कही श्याम सों आतुर वानी ॥  
काहेको कदरात विहारी । मैं ल्याई वृषभानु दुलारी ॥  
विरह विषाद दूरि कर डारो । नेकधीर अपने मन धारो ॥

१ देखि । २ दुःखित । ३ पीतांबर । ४ पकड़ । ५ मार्ग ।



सुनि प्यारीको नाम कन्हार्ई । मिले दूतिका सों उठि धार्ई ॥  
 कहाप्रिया कहि अति अकुलाये । नयन सरोज नीर भरि आये ॥  
 तब हँसि कह्यो दूतिका ग्वारी । आवत प्रिया अवहि वनवारी ॥  
 मैजू प्रतिज्ञा तुमते कीनी । विधना आज राखि सो लीनी ॥  
 दोहा-अब अपने मन हर्षिकरि, दूरि करो सन्देह ॥

आवतिहै वृषभानुजा, भुज भरि अंकम लेहु ॥  
 सो०-मुख शोभाकी खान, नहीं कुँवरि वृषभानुसी ॥

तुम सम धन्य न आन, बड़भागिन तुम वश भये ॥  
 रासिक पुरंदर प्रभु सुखदानी । सुनत सिहात दूतिका वानी ॥  
 पुलकत अंग धीर नहि धारें । पुनि पुनि प्यारी पंथ निहारें ॥  
 निज करि सुमन सुगंध लगावे । कुंज भवन रुचिसेज बनावे ॥  
 अति कोमल तनु जान पियारी । सेज कली चुनि करत नियारी ॥  
 जो हुम लता लटकितनु लागैं । तेऊपर धरि मन अनुरागैं ॥  
 प्रेम प्रीति रस वश जग स्वामी । करत चरित मानहुँ अति कामी ॥  
 देखि श्यामकी आतुर ताई । हँसति सखी मन हर्ष बढ़ाई ॥  
 जान प्रेम वश हरि सुखरासा । गई बहुरि प्यारीके पासा ॥  
 करि शृंगार नवल तनु गोरी । राजतश्री वृषभानु किशोरी ॥  
 सहज रूपकी राशि कुमारी । भई अधिकलुबि भूषण भारी ॥  
 अंग अंग लुबि पुंज विराजें । निरखि मदन तिय कोटिकलाजें ॥  
 विभुवनकी लुबि मनहुँ बढोरी । विधिकीनी वृषभानु किशोरी ॥  
 दोहा-देखि रूप मन मगन सखि, बोली वचन सँभार ॥

धन्य धन्य राधा कुँवरि, तुव भुज रूप अपार ॥  
 सो०-तोसमान नहि तीय, तिहुँपुर सुन्दरि नागरी ॥  
 वसत सदा पिय जीय, तू मोहन मन भावती ॥  
 चलहु वेगि अब सहित हुलासा । लाग रही पियकी इत आसा ॥  
 तेरोइनाम जपत मन लाई । गावत तुव गुण कुँवर कन्हार्ई ॥



तुम तनु परस पवन जो जाही । उठि आतुर परिरंभत ताही ॥  
 तेरो रूप आनि उर अन्तर । धरत ध्यान दृग मृदि निरंतर ॥  
 रमी श्याम तन मन तू जति । राधा रमण नाम है ताते ॥  
 सुनि सहचरके सुखकी वानी । पुलकि प्रफुल्लित मृदु मुसिकानी ॥  
 पियको प्रेम समुझि सुखपाई । चली मिलन गज गति हर्षाई ॥  
 मुख शशिकनकलतासी गोरी । बाल हरण छवि नयनकिशोरी ॥  
 भूषण वसन अनूप सुहाई । अंग अंग शोभित छवि छाई ॥  
 अंग सुगंध मनोहर ताई । भँवर भीर चहुँ ओर सुहाई ॥  
 हँसि हँसि कहत सखीसों बातें । झरत सुमन जनु रूप लतातें ॥  
 ऐसे करत प्रकाश पियारी । गई जहां पिय कुंज विहारी ॥

दोहा-परम प्रेम दोऊ मिले, श्रीराधा नंदनन्द ॥

गुण आगर नागर युगल, छविसागर सुख कन्द ॥

सो०-जो प्रभु परम अपार, वेद भेद जानत नहीं ॥

सो ब्रज करत विहार, वर्णि पार को पावही ॥

कुंजन मंजु सुफल छवि छाई । भँवर गुंज सुख पुंज सुहाई ॥  
 फूलनसेज हविर रचि कीनी । चित्र विचित्र रंग रस भीनी ॥  
 फूले खंग गण करत कलोलैं । जहँ तहँ मधुर मनोहर बोलैं ॥  
 फूली वृन्दावन तरु डारी । तन मन फूले पिय अरु प्यारी ॥  
 सहचर सहित मनोहर जोरी । राजत युगल किशोर किशोरी ॥  
 हास भाव करि रस उपजावैं । हासविलास करत सुख पावैं ॥  
 सखी कह्यो तब कै अबनीके । सकुचि हँसी प्यारी सँग पीके ॥  
 नयन कोर पियको हियँ ताक्यो । तबहिं श्याम पीतांबर ढाँक्यो ॥  
 यह छवि निराखि सखी बलि जाई । अचल रहौ जोरी सुखदाई ॥  
 धनि राधा धनि कुँवर कन्हाई । धन्य मान रस केलि सुहाई ॥  
 धन्य कुंजवन धनि भँहि पावन । धन्य लता द्रुम सुमन सुहावन ॥

१ वसी । २ इती । ३ कृष्ण-राधा । ४ पक्षी । ५ हृदय । ६ पृथ्वी । ७ वृक्षा ।



धन्य सखी धनि सब ब्रजवासी । तिनसँग विहरत प्रभु सुखरासी ॥  
 दोहा-गये श्याम श्यामा सदन, सखी सहित सुख पाय ॥

मानचरित रस केलि करि, ब्रजवासी बलि जाय ॥  
 सो०-मानचरित्र अनूप, जे सुभाव गावहि सुनहि ॥

ते न परैं भवकूप, राधा कृष्ण प्रतापतैं ॥

करत चरित नाना गिरिधारी । सुखसागर भक्तन हितकारी ॥  
 जाको शिव अजं ध्यान लगावैं सनकादिक सुनि जप करध्यावैं ॥  
 जा प्रभु को यश परम विशारद । गावत अहिपति नारद शारद ॥  
 अखिल अनीह अकाम अभोगी । योग समाधि न पावत योगी ॥  
 सो प्रभु सबके अन्तर्यामी । युवतिन प्रेम भक्ति वश कामी ॥  
 बहु नायकहैं करत विहारा । ब्रज पुर घर घर नन्दकुमारा ॥  
 रस लीला नाना उपजावैं । काहु रुठावैं काहु मजावैं ॥  
 अरस परस तिय सब यह जानैं । हरि हैं सबके धाम लुभावैं ॥  
 अवधि वदत काहु सों जाई । काहुके घर वसत कन्हाई ॥  
 सांझ कहत जाके घर आवन । जात प्रात ताके मनभावन ॥  
 ब्रज गोपी जिनको पति जानैं । कोउ आदरहि कोउ अपमानि ॥  
 संदित वचन सुनत सुखदाई । यह लीला हरिके मन भाई ॥  
 दोहा-ब्रजमें करत विहार हरि, ब्रज वनितनके संग ॥

अखिल काम पूरण करण, भरे प्रेम रस रंग ॥

सो०-कोटि काम कमनीय, सुंदर सुखसागर नवल ॥

रमणी मन रमणीय, ब्रज भूषण ब्रज लाडिलो ॥

ब्रज वीथिन नंदनन्दन ठाढ़े । अंग अंग सुन्दर छवि बाढ़े ॥  
 ललता आई गई तिहि पैड़े । मन मोहन रोकी मग बैड़े ॥  
 देखत छवि ललता ललचानी । बोली विहँसि श्यामसों बानी ॥  
 कत रोकत मग में विन काजैं । जाहु चले जितहौ हित साजैं ॥  
 झूठि दत्तौ सनेह जनावो । कबहुँ हमारे धाम न आवो ॥

१ उमाराहित । २ ब्रह्मा । ३ गोलन । ४ घर ।



हरि हँसि कसो आज निशि ऐहैं । तेरीसों हम अनत न जैहैं ॥  
ऐसे कहि मधुरे सुसकाई । छोड़ि दई मग लैल कन्हआई ॥  
ललता गई सदन सुख मानी । ऐहैं श्याम आज यह जानी ॥  
सांझहिते हरिपंथ निहारै । धाम आपने संज सँवारै ॥  
भूषण वसन नवल तहु साजैं । खंजनसे दग अंजन आँजैं ॥  
सुमन सुगंध अनूपम गाई । रचि रचि राखति माल बनाई ॥  
कबहुं ठाढ़ी होति दुवारै । कबहुं लखति गगनके तारै ॥  
दोहा-कहति श्याम आये नहीं, होन लगी अधरात ॥

गये आशँदे मोहिं पुनि, कहाधरी जिय बात ॥  
सो०-वे बहु नायक श्याम, किधौं लुभाने अनत कहूँ ॥

मन मन शोचत बाम, कारण कह आये नहीं ॥  
कैधौं कछु ख्यालहि चितदीनों । कैधौं मात पिता डर कीनों ॥  
कैधौं सोय रहे अलसाने । कै मोघर आवत सकुचाने ॥  
ऐसे शोचत रैनि बिहानी । जहँ तहँ बोल तमचँर बानी ॥  
तब बँठी अपना मन मारी । कछु शोच कछु रिस उर धारी ॥  
हरि निशि गये सखी शीलाके । सुन्दर श्याम धाम लीलाके ॥  
तहँ सुख सोवति रैनगमाई । मात होत ललता सुधि आई ॥  
चले सहज शीलासों कहिके । जिय सँकोच ललताको गहिके ॥  
आये ललता सदन बिहारी । चितै रही सुखकी छवि प्यारी ॥  
अंजन रेख अधर पर राजैं । पीक लीक नयनत छवि लाजैं ॥  
सांहत ललित कपोलन नीको । लाग्यो अंजन काहू तीको ॥  
तुरत मुँकर लै उठी सपानी । दिखरायो सुख सन्मुख आनी ॥  
कहति देखि निज वदन सुधारो । लाल कहूँ तब मात सिधारो ॥  
दोहा-पीक पलक अंजन अधर, देखि श्याम सकुचाय ॥

रहे निचौहैं नयन करि, वचन कसो नहिं जाय ॥  
सो०-ज्योंज्योंसकुचत श्याम, त्योंत्योंहठ नागरिकरत ॥

१ रात । २ आकाश । ३ भरोसा । ४ मुर्ती । ५ दर्पण ।



देखहु छवि अभिराम, हाहामुख कत फेरियत ॥  
 सकुचत कहा बोलिके सांचे । आये तो मो गृह रंग राचे ॥  
 रैन नही तो प्रातहि आये । धनि धनि वह जिन स्वांग बनाये ॥  
 तुम जिन मानहु विलग कन्हार्ह । भैंतो करति अनन्द बधाई ॥  
 क्यों मोहन दर्पण नहि देख्यो । सूखे मोतन काहे न पेख्यो ॥  
 ठाढे कत बैठत क्यों नाहीं । कहु कछु चूक परी हम पाहीं ॥  
 रहे मूक है कहा ठगसे । सोहत हो अलसात जगसे ॥  
 उत्तर मोहि देत क्यों नाहीं । मैं तबहीं तें बकत वृथाहीं ॥  
 तब चितये दृगं कोर कन्हार्ह । भाव अतिहि आधीन जनाई ॥  
 ग्वालि प्रवीण जानि सब लीनों । तुरत रोष उरते तजि दीनों ॥  
 हँसि करि मोहन कंठ लगाये । भले श्याम ऐसेहु आये ॥  
 श्रमित अंग जागे निशि जाने । अति सनेह मनहीं मन माने ॥  
 अंग सुगंध मर्द अन्हवाये । बसन अभूषण दे बैठाये ॥  
 दोहा-रुचि भोजन दै सेज पर, पौढ़ाये घनश्याम ॥  
 रस वश करि नव नागरी, किये सफल मन काम ॥  
 सो०-सुर मुनि सकत न पाय, प्रभु ब्रजवासी दासको ॥  
 प्रेम प्रीति वश आय, सो गोपी बल्लभ भये ॥  
 कहत साँह करि रसिक बिहारी । तुम प्रिय मोहि प्राणते प्यारी ॥  
 सदा बसत तुम मोमन माहीं । तुम बिन लहत अनत सुख नाहीं ॥  
 ऐसे कहि अति प्रीति जनावें । चतुर वचन कहि चितहि चुरावें ॥  
 यहै भाव युवतिनसों भाखें । सबहिनके मनकी रुचि राखें ॥  
 कुल मर्याद लोक डर त्यागी । सब गोपी हरिसों अनुरागी ॥  
 बिन देखे रसभाव बढ़ावें । नयनन देखतही सुखपावें ॥  
 ब्रह्म सनातन जग सुखकारी । यह लीला ब्रजमें विस्तारी ॥  
 ललताको सुखदे मुखसागर । चले सदन अपने नट नागर ॥  
 उतते मग आवति चंद्रावलि । देखि रही सुंदरि छवि सांवलि ॥



वने विशाल कमल दल लोचन। चितवन चारु काम मद मोचन ॥  
 इत मुसकाय श्याम तेहि हेरी। खोरि सांकरी भइ भट धेरी ॥  
 विहँसि कह्यो चंद्रावलि प्यारी। कहां रहत हरि हमहि विसारी ॥  
 दोहा—तुम कैसे विसरत प्रिया, हँसि बोले वनश्याम ॥

आज आय सुख लेहिगे, रैनि तुम्हारे धाम ॥  
 सो०—सुनि हरषी जिय वाम, चली सदन मुसकायके ॥

लखि सुख पायो श्याम, मुदित गये अपने भवन ॥  
 चंद्रावलि मन अधिक उछाहूँ। फूली फिरत कहत नहिं काहू ॥  
 सुखके करत मनोरथ नाना। वासैंर कलप समान विहाना ॥  
 भये अस्त रवि निशि नियरानी। उडुगैण ज्योति देखि हरषानी ॥  
 हरि सुखमाके भवन सिधाये। चंद्रावलिके भवन न आवे ॥  
 सूने घर देखी सो ग्वाली। आतुर गये तहां वनमाली ॥  
 सुखमालखि हरिको सुखपायो। अतिही आदर करि बैठायो ॥  
 कोक कला कोविद वर नारी। हाव भाव मोहे गिरिधारी ॥  
 बसे तहां मोहन सुखपाई। चंद्रावलिकी सुरति भुलाई ॥  
 इत चंद्रावलि सेज सँवारै। बार बार हरि पंथ निहारै ॥  
 कबहुं भवन कबहुं अँगनाई। कबहुं रहति द्वार टकलाई ॥  
 कबहुं शोच करत मन माहीं। आवहिगे मोहन कै नाहीं ॥  
 कबहुं आलस कछु जिय जानी। धोवतिहै नयनन लै पानी ॥  
 दोहा—कबहुं कहत हरि आयहैं, उरमें हर्ष बढ़ाय ॥  
 कबहुं विरह व्याकुल जरति, अति आकुल अकुलाय ॥  
 सो०—कबहुं कहत सुख पाय, बहुरमणी रमणीय पिय ॥

बसे अनत कहूँ जाय, मोसों झूठी अवधि बदि ॥  
 ऐसेहि ऐसे रैनि विहानी। सुनी श्रवण वाँसकी बानी ॥  
 भई काम दुख वाम उदासी। जाने श्याम कपटकी रासी ॥  
 कहति बाम कर मनके माहीं। श्याम नाम खोटी सब आहीं ॥

१ उत्साह । २ दिन । ३ नक्षत्र । ४ कौआ ।



कोकिल श्याम श्याम अलि देखौ । श्याम जलद अहि श्याम विशेषौ ॥  
 तिनहीकी करनी हरि लीनी । मोसों प्रीति कपटकी कीनी ॥  
 ऐसे क्रोध विरह सब वाला । सुखमा सदन गये नँदलाला ॥  
 प्रात भये उठि चले तहांते । आलस भरे नयन रंगराते ॥  
 चंद्रावली सदन चलि आये । ठाढ़े अजिर रहे सकुचाये ॥  
 मन्दिर ते रिसभरी गुबारी । नखते शिखलों रही निहारी ॥  
 मन मन कहत कुटिल अति गिरिधर । प्रात होत आये भरे घर ॥  
 कियो मान मनमें अति भारी । आंगनमें ठाढ़े बनवारी ॥  
 और नारिके चिह्न विलोकी । शोकतिरिसहि रुकत नहि रोकी ॥  
 दोहा-तब बोली करि मान तिय, कहा काम भम धाम ॥

ताहीके घर जाइये, वसे जहां निशि श्याम ॥  
 सो०-प्रात दिखावन मोहिं, आये रंग बनायके ॥  
 मैं सुख पायो जोहि, भले वनेहौ लाल अब ॥  
 बिन गुण शोभित है उरमाला । बीच रेख सुख चन्द्र रसाला ॥  
 अधर दीप सुत रेख सुहाई । नागवेलि रंग पलक रंगाई ॥  
 लटपटि पाग महौवर लाये । आलस नयन अर्पण जल लाये ॥  
 चंदन भाल मिल्यो कहूँ वन्दन । यह छवि अधिक बनी नँदनन्दन ॥  
 बलय गाढ वर पीठ धरेहौ । जान्यो नागरि अंक भरेहौ ॥  
 इतने पर डाहन सुहिं आये । सोह करन को इत उठि धाये ॥  
 जाउ तहीं जासों मन मान्यो । जैसेहो तैसे मैं जान्यो ॥  
 विहँसि कह्यो तब लाल चिहारी । तुमते और कौन सुहिं प्यारी ॥  
 तुमबिन मोहिं कहूँ कल नार्हीं । वसत सदा मन तेरे माहीं ॥  
 यह चतुरई कहां पढ़ि आई । चीन्हे हो गुण राशि कन्हाई ॥  
 यह कहि गई भवनमें भागिन । रीझे श्याम देखि छवि कामिन ॥  
 सन्मुख जाय भये पुनि ठाढ़े । द्वारकपाट दिये पुनि गाढ़े ॥  
 दोहा-पौढ़ि रही तिय सेजपर, वदन मूढ़ अनखाय ॥

१ मेव । २ पान । ३ बरोठा । ४ लाल ।



हरि तन पुनि चितयो नहीं, उरमें प्रेम बढ़ाय ॥  
 सो०-प्रभु गति लखी न जाय, जो चाहैं सोई करें ॥  
 पौढ़ि रहे सँग जाय, पौढ़ी तिय जहँ मानकर ॥  
 जो देखे तो संग कन्हई । चली बहुरि तिय उठि झहराई ॥  
 खोलि किवार अजिरमें आई । देखे ठाढ़े तहां कन्हई ॥  
 बिनय करत नयननकी सैनन । चकित भई देखत तिय नैनन ॥  
 भीतर भवन गई पुनि प्यारी । तहां अंक भर लई मुरारी ॥  
 तब नागरि रिससबै सुलाई । चेटक करि वश करी कन्हई ॥  
 मान छुड़ाय हुलास बढ़ायो । तियको सुख दीनो सुखपायो ॥  
 तब निज धाम गये गिरिधारी । चंद्रावलि उर आनंद भारी ॥  
 तहां सखी दश पांचक आई । चंद्रावलि बैठी जेहि ठाई ॥  
 औरै वदन और अँग शोभा । निराखि रही दृग द्वै मन लोभा ॥  
 कहत पिया कह हर्ष बढ़ायो । वहै न लूट कहूं कछु पायो ॥  
 क्यों अँग शिथिल मरगजी सारी । यह छवि कहीं न जाय तुम्हारी ॥  
 हमसों कहा हैरावति प्यारी । हमजाने तोहि मिले विहारी ॥  
 दोहा-चंद्रावलि करि चतुरई, ज्वाब सखिन नहिं देह ॥  
 रही मंद मुख मंद हँसि, भीजी श्याम सनेह ॥  
 सो०-रह्यो ध्यान उरछाय, वह लीला बिसरे नहीं ॥  
 मुखसों कह्यो न जाय, गूंगेको गुड़सों भयो ॥  
 तब बोली वृद्धति कह आली । युवती मनमोहन वनमाली ॥  
 है लीला अद्भुत सब जिनकी । कही न जात बात सखि तिनकी ॥  
 हाहा कहि चंद्रावलि हमसों । हमहूँ सुने श्याम गुण तुमसों ॥  
 कैतोहि मिले यमुनके तीरा । कैतोहि मिले भवन बलवीरा ॥  
 तब चंद्रावलि गद्गद वानी । हर्ष सहित हरिकथा बखानी ॥  
 सुनि हरि चरित ललित सुखकारी । भई प्रेमवश सब ब्रजनारी ॥  
 चंद्रावलि धनि धन्य कही तब । कहन लगी हरिके गुणगण सब ॥

१ छिपावति ।



नन्दनन्दन सब लायकहैंरी । सबहिनके सुखदायकहैंरी ॥  
 बसे रैनि काहूके जाई । काहू देत प्रात सुख आई ॥  
 काहूको मन आय चुरावें । काहूसों अपनो मन लावें ॥  
 काहूके जागत सिंगरी निशि । काहूको उपजावतहैं रिशि ॥  
 ब्रजवासी प्रभुके मन भावें । तैसेइ तैसे चरित उपावें ॥  
 दोहा-यह लीला आनंद भरी, सकल रसनको सार ॥

भक्तनहित हरि करतहैं, गाय तरत संसार ॥  
 सो०-घर घर करत विहार, ब्रज युवतिनके संग हरि ॥  
 गावतिहैं श्रुति चार, ब्रजवासी प्रभुके यशहि ॥  
 श्रीराधा वृषभानु दुलारी । नन्द नंदन पियकी अति प्यारी ॥  
 सहज रहै अपने मनमाहीं । नन्द सुवन निशि अन्त न जाहीं ॥  
 नन्द भवनके भरेगेहा । रहे सदा चित यही सनेहा ॥  
 श्याम बसे काहू नारीके । आये सदन प्रात प्यारीके ॥  
 रति रँग चिह्न अंग परवाने । सोहत नयन अहण अलसाने ॥  
 प्यारी देखि रही मुखपियको । जान्यों रंग लग्यो कहूँ तियको ॥  
 तब मन बिहँसि कह्यो श्रीराधा । आज बन्यो पियरूप अगाधा ॥  
 पर उपकार हेतु तनु धान्यो । पुरवन सबकी साध विचार्यो ॥  
 कहां पढी यह नीति बतावो । हमहूँको सो ठाम सुनावो ॥  
 कहो कहां काको सुखदीनों । धनिधनि यह उपकार जु कीनों ॥  
 धनि यह बात आज मैं जानी । क्यों नहि कहियत प्रकट बखानी ॥  
 धन्य मोहि यह दर्श दिखायो । धनि धनि जासों नेह लगायो ॥  
 दोहा-भली दिखाई आज यह, अद्भुत छवि अभिराम ॥  
 मूर उदय लोचन कमल, चन्द उदै पर श्याम ॥  
 सो०-उर कुच कुंकुम दाग, अधर दशन छवि राजई ॥  
 रंगी महावर पाग, यह शोभा अनुपम बनी ॥  
 क्यों उठि भोर यहांको आये । काहेको इतने सरमाये ॥

१ सूर्यनारायण । २ उपमारहित ।



तुमहूँ भले भलीहैं वेऊ । कीनो भलो भले मिलि दोऊ ॥  
 कीनोहैं इतनो हित जिनते । तौ अब कित बिगुरेहो तिनते ॥  
 जाहुतहीं वे सुनि दुख पैहैं । बहुरो तुमसों मन न मिलैहैं ॥  
 तिनहींको सुख दीजै मोहन । जिनसों निशि बिलसे मिलि मोहन ॥  
 तिय सन्मुख नहिं लखत कन्हाई । वदन नवाय रहे सज्जुचाई ॥  
 कबहुँ नयनकी कोर निहारैं । कबहुँ चरण नख भूमि उखारैं ॥  
 प्रगट वसित मनमन मुसकाई । खंडित वचन सुनत हरषाई ॥  
 पियको सुख प्यारी नहिं जानै । रोष करतहूँ पिय मनमानै ॥  
 जोइ आवत सोइ कहत वदनते । जाहु जाहु पिय कहत सदनते ॥  
 तुम जानतजिय हमहिं सयाने । और बसत सब लोग अयाने ॥  
 रैन बसत कहूँ भोर हमारे । आवत नाहिं लजात ललारे ॥

दोहा-तबहिं श्याम बाणी मृदुल, बोले अति सकुचाय ॥  
 किन देख्यो कौन कह्यो, झूठहि तुमसों आय ॥  
 सो०-कहति झूठ यह बान, खोटी ब्रजनारी सबै ॥  
 तुमते प्रिय को आन, सौंह करौं जो मानिये ॥

बिनहीं बोले रहिये जू पिय । कत ऐसे वचनन दुहिये हिय ॥  
 झूठी सबै एक तुम सांचे । नीके लाज छांडिके नांचे ॥  
 सौंह कहूँ सुनिबो करि पायो । सो अब इहां काम है आयो ॥  
 ऐसे खिजत पीयसों प्यारी । आई तहां और ब्रजनारी ॥  
 सखियन देखि कुँवरि मुसुकाई । उर अन्तर है रिस अधिकाई ॥  
 तिन्हें कह्यो सैनन में प्यारी । देखहु हरिकी छबिहि निहारी ॥  
 मौनहि रहे श्याम सज्जुचाई । युवति विलोकति छबि अधिकाई ॥  
 कहति सबै हँसि हँसि बजवाला । कहैं पाई छबि यह नँदलाला ॥  
 तबहिं सखिन सों कह्यो किशोरी । करत इते पर सौंह लखोरी ॥  
 निशि औरनके चितहि चुरावत । दर्शन देन प्रात इत आवत ॥  
 तुमहीं अंग चिह्न पहिचानो । सही परै सो बात बखानो ॥  
 कृपा करैं तहँ हीं पग धारें । नहीं काज इहँ वेगि सिधारें ॥



दोहा-प्यारी उर अतिरोष लखि, अरु सखियनकी भीर ॥

तब वहाँते बहरायके, द्वार गये बलवीर ॥

सो०-रोच करत उरमाहिं, भरे विरह आनन्दरस ॥

जाय सकत कहूँ नाहिं, मनमें प्यारी डर डरत ॥

अथ मध्यममानलीला ॥

जबहीं श्याम गये द्वारे तन । कियो मान प्यारी अपने मन ॥

कहति सखिन सों देखी तुम अब । बहुरि दोष देती मोको तब ॥

ऐसे श्याम गुणनके आगर । चोरत चित्त फिरत अति नागर ॥

ऐसे खयाल मोहिं दिखरावें । जान देहु अब यह जिन आवें ॥

इहां काज उनको कहु नाहीं । मैं बैठी अपने घर माहीं ॥

जाव तुमहुँ अपने सब कामहिं । योंकहि प्रिया गई उठ धामहिं ॥

नख शिख रोष भरी पिय प्यारी । योवन रूप गर्व उर भारी ॥

चली सखी बहु दशा निहारी । द्वारे पर देखे वनवारी ॥

कहति सुनौ मोहन पिय हमसों । प्रिया रोष कीनो अति तुमसों ॥

तुम्हरे आवत अति रिखपाई । यह तुम कहा करी चतुराई ॥

सुनत बात यह कुँवर कन्हआई । भये चकित अति गये झुराई ॥

जान्यो मान कियो फिर प्यारी । भये विरहव्याकुल तनु भारी ॥

दोहा-तब सखियन हरिसों कह्यो, चतुर कहावत नाम ॥

करत फिरत ऐसे गुणन, अब कन्यातकत श्याम ॥

सो०-तुमहिं करायो मान, अटपट रूप दिखायके ॥

अब लागे पल्लतान, प्रथम विचार करयो नहीं ॥

यह सुनि धीरज कियो कन्हआई । तब इक युवती और बुलाई ॥

तासों कहि सब बात जनाई । दूती करि हरि ताहि पठाई ॥

कहत श्याम तौसों यह बानी । बेगिं मिटे जिय मान सयानी ॥

दूती गई करति मन साधा । बैठी तहां जाय जहँ राधा ॥

प्यारी मान ठान दृग बैठी । हृदय रोष भौहँ करि पेंठी ॥

१ युवावस्था । २ शीघ्र । ३ विचार ।



उरमें सौति शाल अति शाले । नेक नहीं इत उत कहूँ हाले ॥  
 दूती कछु थाह नहि पावे । विना भीत कहूँ चित्र बनावे ॥  
 मनहीं मन दूती पछिताई । अति आतुर मोहि श्याम पठाई ॥  
 यह इत उत कहूँ नाहि निहारै । कहा करौं मन मांझ विचारै ॥  
 तब कहि उठी दूतिका नारी । मान कियो वृषभानुदुलारी ॥  
 कहा करौं मोहन अति कीन्ही । उनकी बात आज मैं चीन्ही ॥  
 ऐसे मैं उनको नहि जाने । अब कैसे उनसों मन माने ॥  
 दोहा-घर घर डोलत फिरत निशि, बोलत लगतनलाज ॥

आय दिखायें प्रात मुख, नटकरति रंगसाज ॥  
 सो०-मैं आई अब बाज, जित चाहो तितही फिरो ॥

उनको यहां नकाज, राज करो ब्रजमें सदा ॥  
 दूती सुनि प्यारी की बानी । अन्तर प्रेम रोष लपटानी ॥  
 कस्यो यमुनते मैं गृहआई । सखी एक यह बात सुनाई ॥  
 तब मैं रहि न सकी घरमाहीं । भली प्रकृति हरिकी यहनाहीं ॥  
 अब द्वारे ते हरि न टरतहैं । पर घर जानकि लोंह करतहैं ॥  
 मन पछितात कहत वनश्यामा । भूले हूँ ऐसो करहुँ नकामा ॥  
 तूजिनमान तजै सुन मोलों । यहै कहन आई मैं तोलों ॥  
 अब समझे अरु हम समझावैं । पर घर जानकि बात मिटावैं ॥  
 अब मोको यह बात लखाई । जाहिन पर घर कुँवर कन्हाई ॥  
 जब दूती यों बात बखानी । द्वारेहैं हरि तब यह जानी ॥  
 उमगि उठ्यो रखसुनि मनमाहीं । बाहर प्रगट कियो सोनाहीं ॥  
 काहेको हरिद्वार खेरी । कौन राखे जाय वरेरी ॥  
 तूरहि मान कितहिरिस पावति । यह हरिसों मैंही कहि आवति ॥  
 दोहा-लई तीर्थके हीयकी, चतुर दूतिका जान ॥

अति आतुर हरिपै गई, कहति आनकी आन ॥  
 सो०-कही मनाकं लाल, नेकु मरम नहि पाइये ॥

१ खटकै । २ स्वभाव । ३ विदयात । ४ राधा ।



दीठ न जोरति बाल, सूधे मुख बोलति नहीं ॥

अपनी सी बहुतैं में भाषी । सुनि उनमौन हृदय धरराखी ॥  
 नेकनहीं उत्तर मुख बोलैं । अति रिस कंपत इत उत डोलैं ॥  
 मैं जु कही सो सुनहु कन्हवाई । भई बृंद बारूद किनाई ॥  
 भरि भरि लेत नयन दृगकोरैं । नहीं डरत बैठी मुखमोरैं ॥  
 तिरछी करि करि भौहन तानै । कोटि कोटि अवगुण मुखगानै ॥  
 ऐसीहै यह दीठ तुम्हारी । कहा बलीठि करे कोउनारी ॥  
 सुनहु रसिक बर कुँवर कन्हवाई । आपहि लीजे जाय मनाई ॥  
 याको नाम भयो गढ़वाई । लीजे ताहि सुरंग लगाई ॥  
 यह सुनि विरह भरे बनवारी । सुरछिपरे धरसुरति बिसारी ॥  
 सखी उठाय लये अँकवारी । योंकत बिकल होत बलिहारी ॥  
 नागर बड़े कहावत हौजू । धीर धरो मुखपावत हौजू ॥  
 बातन नेकु तोहि गहि पाऊँ । तोतबहींमें तुमहि मिलाऊँ ॥  
 दोहा-धीरजदे घनश्यामको, दूती गई उताल ॥

जाय कह्यो प्यारी निकट, प्यारे श्याम बेहाल ॥

सो०-मुख नहि बोलत वयन, अतिव्याकुल तेरे विरह ॥

भरि भरि डारत नयन, कहा कहीं न संभार कछु ॥  
 बारहि बार कहति पछितानी । देखुख जो तू कुँवरि सयानी ॥  
 तूही प्रिया भावती हरिकी । और नहीं कोऊ तो सरकी ॥  
 तेरेहि रसवश कुँवर कन्हवाई । तेरे ततक विरह कुम्हलाई ॥  
 तेरोहि रूप अधीन खेरेरी । तेरोहि चितवनके चरेरी ॥  
 तेरेइरंग बसन तनुधारें । तेरेइरंगको तिलक सँवारें ॥  
 चन्द्रवदन तेरो लखि गोरी । मोरचन्द्र शिर मुकुट कियोरी ॥  
 तेरोइ चरित सुने अरु गाने । तू माने भावे जिनमाने ॥  
 अति अनुराग श्यामको तेरो । करि विचार नीके मैं हेरो ॥  
 जो जाको नीकेकरि जानें । सो तासों तैसो हित मानें ॥

१ दृष्टि । २ दूत । ३ घनवाईहुईशीघ्रतासे ।



यह प्रीतिकी रीति पियारी । कहेतु बोलि लेहुँ गिरिधारी ॥  
तूकहँगई कहन कह आई । मैजानति हरि तोहि पठाई ॥  
मनत कौन कही अब तेरी । जानतिहों हरि चरित बडेरी ॥  
दोहा-अवधौं को तिनसों मिलै, जिन्हें परी यह बान ॥

उरमें राखत आन कछु, कहत करत कछु आन ॥  
सो०-हैं वे कपटनिधान, बहुनायक पूरे गुणन ॥

जिनको करत बखान, जिन वामन द्वै बलिछल्यो ॥  
मान किये अब नाहि बनेरी । देखु विचार हिये अपनेरी ॥  
जाके गुण गण सुर मुनि मोहैं । सो तेरे गुण गणि मणि पोहैं ॥  
सनकादिक जेहि ध्यान लगावैं । सोतेरे दरशन सुख पावैं ॥  
शिव विधि जाके द्वार खरेरी । सो प्रभु तेरे द्वार परेरी ॥  
जाके पद कमलाकर लीने । सो प्रभु पद चितत मनदीने ॥  
अति आनुर नैदलालहियेरी । सोह करति हों शिशुखेरी ॥  
सुनु प्यारी अति हठ नहि कीजै । सर्वसवारि श्यामपर दीजै ॥  
यह योवन वर्षाको पानी । गर्व नकीजै याहि सयानी ॥  
सब सुख हरिके संग कियेरी । कृष्ण विमुख के काज जियेरी ॥  
पूरुब पुण्य सुकृत फल तेरो । आभिनि मान कह्यो करमेरो ॥  
हरिके रस रँग जो मनभीजै । रूपसुधा जो नयनन पीजै ॥  
सोह चरण तेरेकी कीजै । सफल दर्श दिय तो यों जीजै ॥

दोहा-वृथा जान नहि दीजिये, हरिसों करिकै मान ॥

उठति वैसके दिननको, सुन तिय यहै सयान ॥

सो०-हिलि मिलि करहिकलोल, मैं तेरे हितकी कहति ॥

लेहि श्यामको बोल, परे द्वार विलपत दई ॥

सोई चतुर सुलक्षण नीकी । सदा भावती जो पियजीकी ॥

योवन गुण युति अरुहित पीको । है सुन्दर तेरे शिर टीको ॥

तेरे हित सब ब्रजकी वाला । कियो हुलाय रास नैदलाला ॥

तू तनु श्याम प्राणरी प्यारी । परछाई अरु सब ब्रजनारी ॥



तोसी और नहीं ब्रजगोपी । तेरेइ रूपवसे तिय ओपी ॥  
 सुंदरश्याम सकल सुखदायक । कहा भयोरी जो बहुनायक ॥  
 तो समान वृषभानु ललीको । शशिहि कहा डर कुमुदकलीको ॥  
 ऐसे जब दूती समुझाई । तब बोली तिय कछु मुसुकाई ॥  
 वादहि वकति आय मेरे घर । वेधति हैं ऐसे वचनन शर ॥  
 उतकी इत इतकी उत जाई । मिलवत झूठी बात बनाई ॥  
 जो चहिहैं तो आपुहि ऐहैं । सौंह करैं अरु हाहाखैंहैं ॥  
 प्रीति रीति कछु जानत नाहीं । जोइ आवत सोइ कहत वृथाहीं ॥  
 दोहा—जब प्यारी ऐसे कह्यो, सखी लियो तब जान ॥  
 मानत नाहीं लाड़िली, श्याम भिलाऊं आन ॥  
 सो०—कह्यो सखी मुसकाय, नहि मानत मेरो कह्यो ॥  
 श्याम मनावें आय, मैं जानी तब मानिहैं ॥  
 भरी मानवे बहुतें तेरे । लगत माननी कोई हेरे ॥  
 हांसी खेल औरको माई । तुलत न तेरे बिरस रुखाई ॥  
 ऐसेही रहि जो लगि जाऊं । यह सुख हरिको आनदिखाऊं ॥  
 पिय मन नूतन चोप बढाऊं । अतिरस रूप अनूप उपाऊं ॥  
 यह कह गई श्याम पे आली । कहत आज सुनिये वनमाली ॥  
 मानति नाहि मनायो प्यारी । को जानें जियमें कह धारी ॥  
 हाहा करि मैं बहु समुझाई । सुनितैं अधिकहोतरिसहाई ॥  
 तुम आलुर वैसी गति वाकी । आवति जाति बीचमें थाकी ॥  
 आपहि चलि लीजिये मनाई । और भांति नहि वनत बनाई ॥  
 वहै बयारि जैसिये जबहीं । पीठ आडिये तैसी तबहीं ॥  
 मोसी जो पठवहु तुम कोरी । नहि मानत वृषभानु किशोरी ॥  
 हाँतो कहति तुम्हारे हितकी । पाई है कछु वाके चितकी ॥  
 दोहा—चले वनतहै लाल अब, और यत्न नहि कोय ॥  
 काठ काठिये जौन हरि, नाच नाचिये सोय ॥

१ कमलकली । २ वृथा । ३ उपाय ।



Vipav Ayasthi Sahib Bhuvan Vani Trust Donations

सो०—आप काज महकाज, बड़े काह गय बात यह ॥

तजहु श्याम उर लाज, करि विनती तियसों मिलहु ॥  
चलो चले तुम्हरे हठ जैहैं । देखत प्रेम उमँग उर ऐहैं ॥  
सखी संग तब नवल विहारी । गये भवन बैठी जहँ प्यारी ॥  
आगे भये सँकुच्चिके ठाढ़े । अति आधीन प्रेम रस बाढ़े ॥  
नेक नहीं इत उत कहूँ डोलैं । चित्र लिखेसु मुख नाहिँ बोलैं ॥  
यदपिलाल गाढ़े अति जीके । सकल सयानप भूले नीके ॥  
प्यारी देखि पियहिँ मुसकानी । जिय डरपे मोते यह जानी ॥  
अति आनन्द भयो मन माहीं । जुषही रही कछो कछु नाहीं ॥  
मन मन कहत न अब उचटाऊँ । आदर कर पियको बैठाऊँ ॥  
मोसों श्याम बहुत सकुचाने । अब नहिँ जैहैं धामे विराने ॥  
सहचरि कछो देखुरी प्यारी । कबके ठाढ़ेहिँ गिरिधारी ॥  
मान मनायो प्यारी पियको । तूपिय जिय पिय जीवन जीको ॥  
प्राणहिँ तनुहिँ रुखिबो कैसो । यह कहूँ भयो सुन्यों नहिँ ऐसो ॥  
दौहा—करि आदर बैठारि पिय, हँसलै कंठ लगाय ॥

घर आये नहिँ कीजिये, ऐसी कित सकुचाय ॥

सो०—है तू नागरि वाम, मनमें कह ऐसी धरी ॥

वे ठाढ़ेहिँ श्याम, तू मुखते बोलति नहीं ॥

तब हँसि कछो भलो पिय बैसो । अबजिन काम करहु कहूँ ऐसो ॥  
अबकी चूक नहीं मैं मानो । और दिनाको रहिये जानी ॥  
मेरी सौंह करो मो आगे । तज सँकोच बोलो डर त्यागे ॥  
कछो सौंहकर मोहन तबहीं । और तियन पर जात न कबहीं ॥  
नंद भवन ते अबहीं आये । तुम्हरो रोष देखि सकुचाये ॥  
ऐसी अब काहेको बोलो । अबलोंकी करनी नहिँ खोलो ॥  
अब जु कालिते अनत सिधारे । तौ तुमहीं जानोगे प्यारे ॥  
तब हरि हँसि कर शिरपर राखे । बाराहि बार सौंह कर भाखे ॥

१ लाजकर । २ घर ।



Vinay Ayasthi Sahib Bhuvan Vani Trust Donations

सहचरि हँसि कर साख रहाजू। सखी आज त बात यहीजू ॥  
 पानदिये प्यारी तब लालहि। आई सखी सकल तेहि कालहि ॥  
 सोंह करी सबहिन यह जानी। हँसे श्याम श्यामा मुखकानी ॥  
 आदर कर सबको बैठायो। निरखियुगल सबहिन मुखपायो ॥  
 दोहा-कह्यो सखिनसों हँसि प्रिया, भरि आनंद उत्साह ॥

तुमहूँ सब मिलके कह्यो, भये श्याम अब साह ॥

सो०-लखिलखि सखी सिहात, यह मुख लाड़िलि लालकौ  
 बसे श्याम तहँ रात, प्रात चले अपने सदन ॥

चले धामनिज श्याम सकारे। देखे ठाढे नन्द दुवारे ॥  
 सकुच फिरे घर जात लजाने। प्रसुदाके घर जाय समाने ॥  
 चकित बाल जब श्याम निहारे। कहत लाल यह ख्याल तुम्हारे ॥  
 कहां हुते गवने कित माहीं। कबहुँ दरशदेति हौ नाहीं ॥  
 रहत कहां हौ सकल लुभाने। आयपरे इत कहां भुलाने ॥  
 कहौ कहाहौ कछु डरेसे। आलस भरे जम्हात खरेसे ॥  
 बसेकहूँ निशि तिय संग जागे। नयन अरुण अतिरस रँगपागे ॥  
 मलयज उरज छाप उर धारे। द्रैशशि मनहुँ उदित उजियारे ॥  
 नयन कछु सकुचतसे ऐसे। शशिके उदय सरोरुह जैसे ॥  
 पुतरी अलि उडसकौ न जानो। उरझरहै अँग गात न मानो ॥  
 डग मगातसे डग पग डोलो। रसमसे गात श्रृंगार अमोलो ॥  
 अंग अंग शोभाके सागर। धनि धनि बसे जहां रतनागर ॥

दोहा-विहँसि चले कहि श्याम तब, तरक करी तुमबात ॥

समुझी सब हम आय हैं, आज तुम्हारे रात ॥

सो०-सुनि हरषी जिय नारि, पुलक गात आनंद उर ॥

ऐहँ आज मुरारि, साँझ परे मेरे सदन ॥

प्रातहिते मन हर्ष बढ़ायो। नव शत साज श्रृंगारवनायो ॥  
 बार बार दर्पण मुख देखे। भूषण बलन अंग अवरेखे ॥

१ चन्दन । २ कमल ।



कद्र सुत छवि छाजत वेणी । भांग सुधारत दधि सुत श्रेणी ॥  
 भवन तोय सुत रेख सँवारे । धनपति पुरको नाम सुधारे ॥  
 हीरावलि उर पर लै धारे । श्याम मिलन मुख मनहि विचारे ॥  
 रचि रचि सुमनन सेज बनावें । केसर चन्दन अगर मिलावें ॥  
 बहु नायक नैद सुवन कन्हारि । गये अनत याको बिसराई ॥  
 वासर ऐसे करत बिहानी । एक यौम निशिको नियरानी ॥  
 परचो शोच विरहा अकुलानी । श्याम न आये कहँ धो जानी ॥  
 गये सांझहीको कहि आवन । अजहूँ नहि आये मनभावन ॥  
 कैधों आवत हैं अब धाये । किधों परे कहूँ फंद पराये ॥  
 वे बहु रमणी रमण बिहारी । कैधों मेरी सुरत बिसारी ॥  
 दोहा-कुमुदाके घर हरिरहे, बढ्यो अधिक उरहेत ॥  
 भीजे दोऊ प्रेमरस, अरस परस सुखलेत ॥  
 सो०-सुदित श्यामसँग वाम, क्षण सम बीतत यामतिह ॥  
 याको युग समयाम, बीतत नैभतारे गनत ॥  
 वैसे वहां याहि इहि रीती । भयो भोर रजनी सब बीती ॥  
 मनहीं मन युवती पछितानी । मोसों श्याम कुटिलई ठानी ॥  
 गयो मदन दुख बदन झुराई । रही बैठि सदनहिं सुरझाई ॥  
 आई तहां सहज इक आली । देखी विरह विकल तनु ग्वाली ॥  
 लोचन जलज भरे जल ठारै । मन मारे मँहिनखन बिदारै ॥  
 बूझन लगी निकट सो जाई । कहा भयो तोकोरी माई ॥  
 आनँद रहित आज मुख तेरो । देखत होत विकल मन मेरो ॥  
 सोतौ बात भई है कैसी । मोहिं सुनाय कहत किन तैसी ॥  
 तब बोली मधुरे तिय बानी । अंचर पाँछ नयन को पानी ॥  
 कहा कहाँ तोसोंरी आली । कपटी कुटिल कठिन वनमाली ॥  
 मोसों गये अवधि बदि माई । अनतहि लुब्ध रहे कहूँ जाई ॥  
 कियो नहीं मेरे गुह आवन । भये सखी नयना दोउ सावन ॥

१ नागिन । २ दिन । ३ पहर । ४ आकाश । ५ रात । ६ पृथ्वी ।



दोहा-ऐसे गुण हरिके सखी, निपट कपटकी खान ॥

अब उनसों मोसों कहा, बने लिये पहिचान ॥

सो०-तोहि मिलें जो आज, मेरीसों कहियो उन्हें ॥

गहौ कछु जियलाज, वचननके सांचे बड़े ॥

उन्हें गई मैं कछु बुलावन । आपहि अजिर गये करि पावन ॥

मोपै कृपा आप यह कीन्ही । तोसों कहों तबहि मैं चीन्ही ॥

काल्हि कहूँ जागे तिय गोहन । जात हुते अपने घर मोहन ॥

द्वारे नन्दहि देखि डराने । भरे गृह आये सकुचाने ॥

डग मग पग हग नींद भरेरी । बारहि बार जम्हात खरेरी ॥

जब मैं कही कहाते आये । तब मोतन सन्मुख सुखकाये ॥

उत्तर नहीं दियो सकुचाई । श्याम करी तब यह चतुराई ॥

कछो धाम भरे निशि आवन । आपहि श्रीमुख वचन सुहावन ॥

रैनि जागि मैं सेज सँवारी । ताते जरी रिसहि की मारी ॥

इतनी कहत द्वार हरि आये । ग्वालनि भीतरते लखिपाये ॥

देखतही रिसमें झहरानी । कही सुनाय श्यामको बानी ॥

धन्य धन्य यह घरी विधाता । आये मेरेजू सुखदाता ॥

दोहा-ऐसे कहि चुपनै रही, मुरि बैठी रिस गात ॥

मधुरे वचननसों कहति, निकट सखीसों बात ॥

सो०-आयेहैं करि गौन, चतुर नारि संग निशि जगे ॥

इनसों मिलिहै कौन, फिरत कहा कोऊ वही ॥

कृपा करहि अब इतहि न आवैं । उतही जाँय जहां सुखपावैं ॥

सखी लखे सब अंग श्यामके । जागे कहूँ निशि संग बामके ॥

कहूँ चदन कहूँ बन्दन रेखा । कहूँ काजर कहूँ पीक सुवेखा ॥

लखि स्वरूप हरितन सुसकाई । मान कियो यह दियो जनार्ण ॥

मन मन शोचत कुँवर कन्हाई । परे कठिन तियके फँद आई ॥

मेरो नाम सुनतही ऐंठी । मान कियो मोसों फिर बैठी ॥

तबहीं श्याम करी चतुराई । सैननहीं सों सखी बुलाई ॥



सो कहि चली जाति घरमाई । तू बैठी जो मान दृढ़ाई ॥  
अनतहि ठाढ़े भये कन्हाई । तहां सखी सहजहि चलि आई ॥  
निरखि बदन दोउन हँसि दीनो । सखी कह्यो तुम यह कहकीनो ॥  
तब हँसि कह्यो सखीसों गिरिधर । मैं मनायलेहों तू जा घर ॥  
यह सुनि बिहँसि गई कहि आली । जाय मनाय लेहु वनमाली ॥  
दोहा-रासिकनके भणि जानमणि, विद्या भणि गुण पाय ॥

आपनहूँ तहँ ते गये, तिनको दरश दिखाय ॥  
सो०-रही अकेली वाम, फिरकै चितयों द्वारतन ॥

तहां न देखे श्याम, अधिक शोच मनमें भयो ॥  
तब जानी फिरि गये कन्हाई । रहीतिया मनमें पछिताई ॥  
भई विरह व्याकुल अति नारी । मिटगयो मान हृदय दुखभारी ॥  
कहत कहाँ यहमति ठानी । आवतही हरिसों झहरानी ॥  
भीतरलों आवन नहि दीनों । कहा क्रोध भोको वह कीनों ॥  
ज्यों त्यों कर मेरे घर आये । सो देखतही मैं उचटाये ॥  
बार बार ऐसे पछिताई । मनही रही मसोसाखाई ॥  
श्याम गये निहचै जब जानी । न्हान चली तब यमुना पानी ॥  
अति व्याकुल मन कछु न सुहाई । कोऊ सखी न संग बुलाई ॥  
पहुँची यमुना तुरत अन्हाई । चली बहुरि घरको अतुराई ॥  
भये श्याम मारगमें ठाढ़े । पांच वर्षके हैं छवि वाढ़े ॥  
आगे हैं नागरिसों बोले । सुन्दर कोमल वचन अमोले ॥  
कहां जाति है री तू नारी । चलु बोलति जाकी तूफ्यारी ॥  
दोहा-वनहिं बुलाई श्याम तोहिं, लैन पठायो मोहिं ॥

सुनत वचन चकृत भई, रही बाल मुख जोहिं ॥  
सो०-श्याम नाम सुनि कान, अति आनंद उरमें भयो ॥

अगम चरितको जान. ब्रजवासी प्रभु कान्हके ॥  
करगहि लियो चली दरषाई । गोप कुमार जान गृहलाई ॥



कहत श्याम वन धाम बुलाई । या बालकको लेन पठाई ॥  
 पूछौं याहि भेद वनको सब । कहा कह्योहै हरियासों अब ॥  
 अति आनंद भयो मन बालहि । अंतहपुर लेगई गुपालहि ॥  
 तहां चरित्र कियो नँदलाला । भये तरुण सुन्दर ततकाला ॥  
 भुज गहि लई हर्षि उर लई । चकित भई नागरि सज्जुवाई ॥  
 छाँड़ि देहु मन सुदित कहत तिय । ऐसे चरित करत धन धन पिय ॥  
 ऐसे हरि भामिनी मनाई । सुख दे गये सदन सुखदाई ॥  
 परमहर्ष मन भई गुवारी । रैन विरह तनु ताप निचारी ॥  
 समुझिसमुझि कै पिय गुण मनमें । पुनि पुनि हर्षित पुलकित तनमें ॥  
 हरियेचरित करत ब्रज डोलैं । यशुमति दिग बालक जिमिबोलैं ॥  
 निजगृह गये सदा नँदलाला । परम विचित्र श्यामके ल्याला ॥  
 दोहा-ब्रजवासी प्रभुकी कथा, अति विचित्र सुखखान ॥

कहत सुनत गावत गुणत, हरषत संत सुजान ॥

सो०-ब्रजनायक धनश्याम, नट नागर गुण आगरे ॥

ब्रजवासी सुखधाम, गोपीपति नँद लाड़िले ॥

अथ गुरुमानलीला ॥

सखिन संग वृषभानु किशोरी । चली न्हान प्रातहि उठि गोरी ॥  
 जाकेघर निशिबसे कन्हाई । तावर ताहि बुलावन आई ॥  
 ठाढ़ी भई द्वार पर आई । कोठ तहांते कुँवर कन्हाई ॥  
 औचक मिले न जानत कोऊ । रहे चकित इत उतते दोऊ ॥  
 फिरी सदनको लुरतहि प्यारी । न्हान जानकी सुरति बिलारी ॥  
 भई बिकल तनुरिस अति बाढ़ी । रह गई सखी निरखि सब ठाढ़ी ॥  
 रह गये ठाढ़े श्याम ठगेसे । सज्जुचाने उर शोच पगेसे ॥  
 जब देखे हरि अति मुरझाये । तब सखियन भुज गहिसमुझाये ॥  
 उलटि भई सब हरिकी घाई । दैकै बांह प्रिया जहँ ल्याई ॥  
 देखी श्याम आय तहँ राधा । बैठी मान दहाय अगाधा ॥



रिखहीके रस मगन किशोरी । भई श्याम मति देखत भोरी ॥  
ठाढ चकित चित अकुलाहीं । सुखते वचन कहे नाहिं जाहीं ॥  
दोहा-व्याकुल लखि नंदलालको, सखियन कियो विचार ॥

अब दोऊ जैसे मिलें, करिये सो उपचार ॥  
सो०-अति रिस नारि अचेत, कोसुनिहै कासों कहें ॥

इत ये धरत न चेत, परी रुठावनवानइन ॥  
प्यारी निकट गई सब आली । ठाढ पौर रहे बनमाली ॥  
कहत मानकीनों तैं प्यारी । न्हान जानते फिरी कहारी ॥  
तोहि लखत हैं गिरिधारी । अतिही डर तनु सुरति बिसारी ॥  
सुरछि परे धरणी अकुलाई । तरुतमाल जनु गयो झुराई ॥  
तेरी सों कछु चितयो उनको । नेकहु चैन रह्यो नाहिं तिनको ॥  
तेरे नयन अरी अनिशारे । किशो बान खर सान सँवारे ॥  
भौहकमान तान यों मोरे । क्यों कर राखे प्राणपियारे ॥  
वायल जिमि मूर्छित गिरिधारी । अंभी वचन अब सींचत प्यारी ॥  
बहुनायक वे तू नहिं जानें । तिनसों कहा इतो दुख मानें ॥  
बाँह गहो हरिको ढिग लावें । अब वे निज अपराध क्षमावें ॥  
गहत बाँह लुमहीं किन जाई । मोसों कहा गहावन आई ॥  
कालिहिसोंह मोहिं उनदीनी । आजहि यह करणी पुनि कीनी ॥  
दोहा-देखि चुकी उनके गुणन, निज नयनन सुखपाय ॥

तिन्हें मिलावति मोहिं अब, बांहगहावति आय ॥  
सो०-मिलों न तिनसों भूल, अब जोलों जीवन जिवहुँ ॥

सहों बिरहकी शूल, बरु ताकी ज्वाला जरो ॥  
मैं अब अपने मन यह ठानी । उनके पंथ न पीजं पानी ॥  
कबहुँ नयन न अंजन लाजं । मृगमंद भूलि न अंग चढाजं ॥  
हस्तवलै पटनील न धारौ । नयनन कारि घन न निहारौ ॥  
सुनों न श्रवणन अँलि पिकबानी । नीलेतनुपरसों नाहिं पानी ॥

१ दुआर । २ अमृतवचन । ३ कस्तूरी । ४ कान । ५ भौरा । ६ हस्त ।



सुखत प्रियाकी बात सुहाई । हर्षत उठे पौरि कन्हाई ॥  
 सखी कहति यों हठ नाहि लीजै । हरिसों ऐसा मान न कीजै ॥  
 तूहै नवल नवल गिरिधारी । यह यौवन हैरी दिन चारी ॥  
 क्षण क्षण जां करको जलछीजै । सुनरी याको गर्व न कीजै ॥  
 नंदनंदन पिय सुख सुखकारी । तूकरि नयन चकोर पियारी ॥  
 हुतो प्रेम धन यह तौ प्यारी । सो अब कहु तैं कियो कहारी ।  
 कहति हुती रूसों नाहि कबहीं । सो अब रूसतिहै जब तबहीं ॥  
 सुनिहैं सुघर नारि जो कोई । करिहैं हँसी प्रेमकी सोई ॥  
 दोहा-मान कियो जो भावते, सो न भाव वो होय ॥

उरते रिसवत प्रेम कित, अंत भावतो सोय ॥  
 सो०-लाख कहे किन कोय, पिय सनेह जो गाइहै ॥

चतुर नारि है सोय, लियो प्रेम परचो किनहुँ ॥  
 तुम वे एक न दोय पियारी । जलते तरंग होति नाहि न्यारी ॥  
 रस रूसनो ओसकन जैसो । सदा नरहिये चहिये तैसो ॥  
 तजि अभिमान मिलहिं पिय प्यारी । मान राधिका कही हमारी ॥  
 चुप न रहत कह करत मनावन । तुम आईहो बात बनावन ॥  
 बहुत सखी घर आई यातें । सुरति दिवावत पिछली बातें ॥  
 मोसों बात कहतहौ काकी । जाहु घरन अब कछुहै बाकी ॥  
 को उनकी यह बात चलावत । हैवे अब तुमहीं को भावत ॥  
 तुम पुनीत अरु वे अति पावन । आईहो सब मोहिं मनावन ॥  
 यह कहि रही रोष भर भारी । गई सखी जहँ रहे बिहारी ॥  
 कह्यो जाय हरिसों हरषाई । आज चतुरई कहां गँवाई ॥  
 विन निज जांघन चलहिं ललारे । कैसे चहत कियो सुखप्यारे ॥  
 हौ मनमोहन तुम बहु नायक । नागर नवल सकल गुण लायक ॥  
 दोहा-मान तजै नाहि लाडिली, थाकीं सबै मनाय ॥

बेगि यत्न कलु कीजिये, रचिये आप उपाय ॥



सो०-रच्यो दूतिका रूप, तब मनमोहन आपही ॥

करतिय स्वांग अनूप, गये जहां प्रिय माननी ॥

बैठे निकट सखी मिसजाई । कहत अब ग ढिंग बात सुहाई ॥

बन घनश्याम धाम तुप्यारी । करि बैठी यों मान कहारी ॥

मैं उतगई तोहि नहि पाई । हरिकी दशा देखि फिरि आई ॥

अति भारति मन कुंजबिहारी । इकले खड़े गहे डुम डारी ॥

तेरोइनामरटत मुख माहीं । और कछु तिनको सुधियाहीं ॥

देखत बिथा भई सुहि गाढी । चल तू होहि नेक ढिंग ठाढी ॥

कुंज भवन ठाढे दोउ देखों । तब मैं नयन सकल करिलेखों ॥

अब हरि कहत कृपामोहि कीजे । जो बृक्षिये दंडसो दीजे ॥

अति आतुर प्रीतमको लेरी । हठतजि हाहाकहि सुनिमेरी ॥

तुव कारण वृषभालु दुलारी । मेरे पांय परत गिरिधारी ॥

अब मैं पांय परतिहौं तेरे । करु अपराध क्षमा हरि केरे ॥

चाहत कियो श्यामको जोई । उन्हें जानि मोसों करि सोई ॥

दोहा-क्षण क्षण परशत चरणकर, क्षण क्षण लेत बलाय ॥

कहत प्रिया अब मानतजु, पुनि पुनि हाहा खाय ॥

सो०-लखिलखिसखीसिहात, चरित ललितनंदलालके ॥

मनहीं मन सुसुकात, भरी प्रेम आनन्द रस ॥

तब चितयोप्यारी नयनन भर । आयो उधरि लाल लीला धर ॥

श्याम चतुरई मोसों माडत । वे गुण तुम अजहूं नहि छांडत ॥

इन छंदन में मानत हौ जू । नीके सब गुण जानतहौ जू ॥

रस वादिन मोको करि पाई । वे बातें सब देहु भुलाई ॥

यह कहि बहुरि भई रिस हाई । रहे श्याम ठाढे सकुचाई ॥

गहे ग्रीव पट अति आधीना । जलके निकट दीन जनु मीना ॥

फिरि पौढी दै पीठ श्यामको । हृदय बिरह दुख अधिक वानको ॥

कर आरसी अग्र लै धारैं । पट अंतर हरि बदन निहारैं ॥



रिसवश धरत नहीं मन श्रीरा । तलफत हिये बिरहकी परी ॥  
 इत नागरि उत नागर ओऊ । भली चतुरई बाढ़े दोऊ ॥  
 जिते जिते मुख फेरति प्यारी । तितही ठरि आवत गिरिधारी ॥  
 जोइ जोइ बात भावतिहि भावैं । सोइ सोइ बातें श्याम चलावैं ॥  
 दोहा-करिहारे छलछद्द सब, छुवन न पावत छांह ॥

हठ छांडत नहिं लाडिली, हरि शोचत मनमांह ॥  
 सो०-देखि श्यामको दीन, बिरह विवस प्यारी निकट ॥

सखियां परमप्रवीन, तब सब समझावन लगीं ॥  
 लघुरी कमल नयन तो आगे । कबके हहा करत अनुरागे ॥  
 तेरे भयते कुंवर कन्हवाई । आये तियको रूप बनाई ॥  
 मधुर मधुर वचनन बनवारी । तोहिं मनावति हैं री प्यारी ॥  
 हाहा करि अरु पाँयन लागे । कियो कहा चाहति है आगे ॥  
 लखि हरि खड़े मिलन सुरझाये । आदर नहिं चुकिये घर आये ॥  
 वेतौ वनके भँवर बिहारी । तोसी और बेलिको प्यारी ॥  
 करिसन्मान बिहँसिकर वैसो । कीनो कहा निहुर मन ऐसो ॥  
 पावत कहा मान के कीने । कहा गमावत आदरदीने ॥  
 होत कहा वृंघट पट खोले । कहा नशात तनकमन बोले ॥  
 ऐसी कहा कीजियत है री । प्रीतम छांड़ि राखियत वैरी ॥  
 निज वश मदन गुपालहिजानी । ऐसी कहा अधिक इतरानी ॥  
 सिखकी कहत अनसिखी आवैं । कहातोहिं कोई समझावैं ॥  
 दोहा-जो नहिं मानति श्यामसों, मानहि रहिहै हाथ ॥

तब अपने मन जानिहै, जब दहिहै रतिनाथ ॥  
 सो०-ऐसे कहिहै कौन, मान पिया हम कहतिहैं ॥

त्रिभुवन ठाकुर जौन, सो तेरे वशहै परयो ॥  
 ऐसी समय बहुरि नहिं पैहै । सुनुरी फिरि पाछे पछितैहै ॥  
 यह-योवन है धन स्वप्नेको । मान मनायो पिय अपनेको ॥



अब ये दिन रूसनके नाहीं । प्रिया विचार देखु मनमाहीं ॥  
 पावस ऋतु कायिरी फेरो । गर्जत गगन भयो धनधेरो ॥  
 बोलत दादुर चातक मोरा । चहुँ दिश करति पवन झकझोरा ॥  
 वरषत मेघ भूमि हित लागी । नारि सकल प्रीतम अनुरागी ॥  
 जे बेली ग्रीष्मऋतु दाहीं । ते हुलसी तरुसों लपटाहीं ॥  
 सरिता उमंगि सिंधुको जाहीं । मिलत सरी सर आपसमाहीं ॥  
 भयो समो यह दिवस चार को । नंद नंदन प्रिय संग विहारको ॥  
 सुनि सखियनके बचन किशोरी । उमग्यो प्रेम रही रिस गोरी ॥  
 रिस करि कह्यो जाहु उठि ताके । रस कर हाथ बिकाने जाके ॥  
 मुख सों भलो मनावत मेरो । रहत सदा अनतहि चितधेरो ॥

दोहा—संघ बखानत जगत सब, विरद तुम्हारीलाल ॥

गहे रहत मनतियनके, विहँसि कह्यो यों बाल ॥

सो०—अथ प्रफुलित श्याम, विरह ताप तनुको गयो ॥

हार्थ उठी सष वाम, प्यारी मुखविहँसत निराखि ॥

तब बोले हरि दोउ कर जोरी । तेरी सौं वृषभानु किशोरी ॥  
 तूही हित चित जीवन मोको । सदा करत आराधन तोको ॥  
 तू ममतिलक तुही आभूषण । पोषण तेरेइ वचन पियूषण ॥  
 तेरोइ गुण मैं निशिदिन गाऊं । अब तज मान हृदय सुख पाऊं ॥  
 कर जोरे विनती करि भाख्यो । कहत शीश चरणनपर राख्यो ॥  
 यह सुनि कछु प्यारी मुसकानी । तब बोली उठि सखी सयानी ॥  
 सुनहु श्याम तुमहो रस सागर । रूप शील गुण प्रीति उजागर ॥  
 तुमते प्रिया नेकनहि न्यारी । एक प्राण द्वैदेह तुम्हारी ॥  
 प्यारीमें तुम तुममें प्यारी । जैसे दर्पण छांह निहारी ॥  
 रसमें परै विरस जहँ आई ! होय परति तहँ अति कठिनाई ॥  
 अबकै हमसब देति मनाई । परैसो प्यारी चरण कन्हाई ॥  
 अबरुठायहो जो गिरिधारी । राम रामतो बहुरि हमारी ॥

१ आकाश । २ बादल । ३ मेढक । ४ स्पर्शकरो ।



दोहा-जब परशे प्यारीचरण, परम प्रीति नंदनन्द ॥

लुब्धो मान हर्षी प्रिया, मिट्योविरह दुखद्वन्द ॥

सो०-उर आनन्द बढाय, प्रेम कसौटी कसि पियहि ॥

अवगुण मन बिसराय, मिलीप्रियाउठिश्यामसों ॥

हर्षि मिले दोउ प्रीतम प्यारी । भई सखी सब निरखि सुखारी ॥

तब दोउ उबटि सखी अन्हवाये । रुचिर शृंगार शृंगार बनाये ॥

मधुर मिष्ठ भोजन मन भाये । दोउन एकहि थार जिमाये ॥

दिये पान अचवन कर वाये । सुमन सुगंध माल पहिराये ॥

लैवीरा अपने कर प्यारी । दीनो वदन विहँसि गिरिधारी ॥

तबहिं सफल यौवन हरि जान्यो । परमहर्ष उर अन्तर मान्यो ॥

मिलि बैठे दोउ प्रीतम प्यारी । तब सखियन आरती उतारी ॥

अतिआनन्द भरे दोउ राजें । अरस परस निरखत छवि छाजें ॥

पाये वश करि कुंज बिहारी । विहँसि कखो तब प्रियसों प्यारी ॥

सुनहु श्याम वर्षाक्रतु आई । रचहु हिंडोला शुभ सुखदाई ॥

है मन पिय यह साथ हमारे । सब मिल झूलहि संग तुम्हारे ॥

सुनतियवचन श्याम सुख पायो । ऐसे कहि हरि मान छुड़ायो ॥

छं०-तिय मान हरि ऐसे छुड़ायो, भक्तहित लीलाकरी ॥

निगम नेति अपार गुण, सुख सिंधु नट नागर हरी ॥

यह मानचरित्र पवित्रहरिको, प्रेम सहितजोगावहीं ॥

करहि आदर मान तिनको, संत जन सुख पावहीं ॥

दोहा-राधा रसिक गोपालको, कौतूहल रस केलि ॥

ब्रजवासी प्रभु जननको, सुखद कामतरुवेलि ॥

सो०-सफल जन्म है तास, जे अनुदिन गावत सुनत ॥

तिनको सदा हुलास, ब्रजवासी प्रभुकी कृपा ॥

अथ हिंडोरावर्णनलीला ॥

भक्त वश्य प्रभु कुंजबिहारी । भक्तनहित लीला अवतारी ॥



सदा सदा भक्तन सुखदाई । करत सदा भक्तन मन भाई ॥  
 प्रेम भक्ति दृढ ब्रजकी बाला । भवे वश्य तिनके नैदलाला ॥  
 जो जो सुख तिनके मन भावें । सो सो ब्रजमें श्याम बनवें ॥  
 समय समयके सुखद विहारा । करे तियन सँग नन्दकुमारा ॥  
 ग्रीष्म गत पावसक्रतु आई । परम सुहावन जन सुखदाई ॥  
 श्रीराधा मनकी रुचि जानी । तबहिंडोल लीला मन आनी ॥  
 यमुना पुलिन गये मनभावन । वृन्दावन धन परम सुहावन ॥  
 सखिन सहित सोहति सँगप्यारी । कोटिक करत मनोजविहारी ॥  
 भति आनन्द उमैंगि चहुँ ओरा । घुमड़ि रहे पावस घन घोरा ॥  
 जहां तहां बगपांति उड़ाहीं । चपेला चमक रही घन माहीं ॥  
 गर्जत मधुर श्रवण सुखदाई । तैसिय बहत समीर सुहाई ॥  
 दोहा-नाना रंग खग फूल फल, लगे नगनके चार ॥  
 गजमुक्तनके झूमका, झालर झवा अपार ॥  
 सौ०-शोभित लता वितान, अति उत्तंग तरु सुमन गुत ॥  
 रहे पान मिलपान, विविध नगन मानहु जड़े ॥  
 कनैक वर्णमय भूमि सुहाई । छविहिंडोर नाहिं वर्ण सिराई ॥  
 तापर रसिक छबैले दोऊ । उपमा को त्रिभुवन नाहिं कोऊ ॥  
 नन्दनंदन वृषभालु किशोरी । गौर श्याम सुन्दर छविजोरी ॥  
 चढे उमैंगि आनंद उर भारी । निरखत छवि नभ सुर नरतारी ॥  
 मोर मुकुट पीताम्बर सोहै । श्याम सुभग तनु त्रिभुवन मोहै ॥  
 प्यारी अंग बैजनी सारी । शोभित चहुँ दिशि चारु किनारी ॥  
 गुगल अंग भूषण छवि छाये । रुचि रुचि सखि भ्रंगार बनाये ॥  
 उर रत्नके हार विराजै । सुमन हार अतिशय छवि छाजै ॥  
 उत कुंडल इत तरवनकी छवि । रखोल जाय निरखि छवि को रवि ॥  
 सखि गण क्षण तृण तोर निहारें । वारत प्राण रीझ रिझवारें ॥  
 भरि उछाह अंघे सुर गावें । पिय प्यारीको हर्ष झुलावें ॥

१ बिजुली । २ पवन । ३ स्वर्णवर्ण ।



ताल मृदंग बांसुरी बीना । बाजत सरसमधुर सुरलीना ॥

दोहा-यह सुख सुनि ब्रज सुन्दरी, अपर सकल नवबाल ॥

वृन्दावन झूलति कुँवरि, राधा अरु नँदलाल ॥

सो०-चली सकल अतुराय, नवसत साज शृंगार तनु ॥

गृहकारज विसराय, मन मोहनके रस पैगी ॥

चुनि करि पहिरि चूनी सारी । अरुण चुहचही कोर किनारी ॥

यूथ यूथ मिलि हरि पै आवें । तिन्हें प्रिया प्रिय निकट बुलावें ॥

आदर वचन सप्रेम सुनावें । सबके मनकी साद पुरावें ॥

एकन लेत निकट बैठाई । एकै चढत पाँग पर धाई ॥

एक बुलावति अति सजुपाई । गावति एक मलार सुहाई ॥

राग रंग मुख वरणि न जाई । रख्यो छाव घन निधि बन जाई ॥

युवति वृन्द चहुँ ओर सुहाई । भूषण भीर वर्णि नहिं जाई ॥

बसन सुगंध सने बहुरंगा । भवैर भीर छाँडत नहिं संगी ॥

हरि मुख शशि लखि शुभग अनंगा । उमगि मनो छवि सिधुतरंगा ॥

देत चाव भरि जब झकझोरा । होति अधिक छवि बढत हिंडोरा ॥

ऊँचो मिलत दुमन सों जाई । लेत जहां ते सुमन कन्हाई ॥

ज्यों ज्यों पैग बढति अति भारी । त्यों त्यों डरति कुँवरि सुकुमारी ॥

दोहा-राखु राखु सखियन सहित, सोंह दिवावत जात ॥

जब नहिं सकत सँभारि तनु, तब पियसों लपटात ॥

सो०-हँसत परस्पर बाल, तब हिंडोल राखत पकरि ॥

करत चरित्र रसाल, पिय प्यारी अति रस भरे ॥

इक उतरत इक चढत हिंडोरे । इक आतुर चढि वेको दोरे ॥

एक कहति मोहिं देहु उतारी । एक चढनको बिनवति नारी ॥

सबके मनकी रुचि हरि राखें । मधुर वचन सबसों हँखि भावें ॥

कबहुँ अकेले झूलत मोहन । गावति युवती सब मिल गोहन ॥

कबहुँ युवतिन देत चढ़ाई । आप झुलावत कुँवर कन्हाई ॥

१ लीन । २ लाल । ३ मुंडमुंड ।



कचहूं सुरली मन्द बजावें । कचहूं संग सवनके गावें ॥  
 निच निच दंत कोकिला ढेरे । रहे सजल घन झुकि अतिनेरे ॥  
 परत फुवार मंद श्रमहारी । बहत त्रिविध अति सुखद बयारी ॥  
 चातक पिय पिय रटत पुकारी । राधा नाम रटत बनवारी ॥  
 ऐसे गोपिनसों मन मोहन । करत केलि कौतूहल गोहन ॥  
 अति आनन्द सवन उपजावें । निरखि सुमन सुरगण वरषावें ॥  
 जय जय जयध्वनि बोलत बानी । धन्य धन्य ब्रज कहत बखानी ॥  
 छंद-कहत ब्रज धनि अमर अंबर, सकल मन आनंद भरे ॥

कहत मन मन इहे चाहत, हमन विधि ब्रज दुम करे ॥  
 भक्त हित प्रभु अज सनातन, ब्रह्म तनु धर अवतरे ॥  
 वर्णि कापे जात सो सुख, करत जो नित ब्रज हरे ॥  
 दोहा-नित लीला आनन्दनित, नित नव मंगल गान ॥  
 धनि धनि जिनकेचित रहत, ब्रजवासी प्रभु ध्यान ॥  
 सो--हरिके चरित रसाल, जे सप्रेम गावत सुनत ॥  
 रहत सदा नंदलाल, ब्रजवासी तिनके निकट ॥

अथ कालगुनवर्णनलीला ॥

जय जय जय श्रीनित्य विहारी । नित्यानन्द भक्त हितकारी ॥  
 ब्रह्मरूप अवतरे सुरारी । नितनव करत बिहार बिहारी ॥  
 नित्य नवल गिरिधर अभिरामा । नित्य रूप राधा ब्रज वामा ॥  
 नित्य रास जल केलि बिहारा । नित्य मानखण्डन व्यवहारा ॥  
 नित्य कुंज सुख नित्य हिडोरा । नित्य प्रेम सुख सिंधु हिलोरा ॥  
 नित्य नवल हितहरि संगजोरी । नित्य नवल छवि मन्मथ चोरी ॥  
 नित बृन्दावन घन सुखदाई । सदा बसंत रहत जहँछाई ॥  
 सदा सुमन नवपल्लव डारी । सदा त्रिविध मारुत सुखकारी ॥  
 सदा मधुर मधुमाते डोलैं । कोकिल कीर सदा कलबोलैं ॥

१ धीरेसे । २ कृष्ण । ३ पुष्प । ४ ठंडी, मंद, सुगंध हवा । ५ अमर ।

६ सुवा । ७ मनोहरवचन ।



सुनि सुनि नारि हृदय सुख पावैं । मनहीं मन अभिलाष बढ़ावैं ॥  
 वारि वारि कहि पिय सुख पावैं । ऋतु वसन्त आई समुझावैं ॥  
 फागु चरित अतिसाद हमारे । खेलैं मिलि सब संगतुम्हारे ॥  
 दोहा-ब्रज वनिता हरिऔं हरषि, कहति सुनहु ब्रजराज ॥

देखहु वन शोभा निरखि, अतिहि विराजत आज ॥  
 सो०-खेलतहैं दौट फाग, मानहु मदन बसन्त मिलि ॥

लखि उपजत अनुराग, यह रस अधिक सुहावनी ॥  
 द्रुमन मध्य टेसूतरु फूले । करत प्रकाश अग्निसम तूले ॥  
 मानहु निज निज मेरु मुहाई । हर्षि सबन होलिका लगाई ॥  
 कुंज कुंज कोकिल सुखदाजी । बोलति विमल मनोहर वानी ॥  
 निलज भई जनु ब्रजकी नारी । गावति गृहपति चढी अटारी ॥  
 नाना खग केकी झुकनारी । जहैं तहैं करत कुलाहल भारी ॥  
 मनहु परस्पर नर अरु नारी । देत दिवावत हैं सबगारी ॥  
 प्रफुलित लताविलोकतजितही । अलि मधुमत्त जातचलि तितही ॥  
 मानहु गणिका देखि सुहाई । मतवारे लपटतहैं धाई ॥  
 पुहुप पराग अभीर सुहाई । लिये समीर फिरतहैं धाई ॥  
 संयोगिनरस अनरस विरहन । कर छोड़तमनभायो सबहिन ॥  
 नवपल्लवदल सुमन सुहाये । वर्ण वर्ण विटपन छबिछायै ॥  
 जनु ऋतुराज संग छबि बाढे । बहुरैंग भरे लसतजनुठाढे ॥  
 दो०-भँवर गुंज निरझरशबद, वजत दुंदुभी चारु ॥

रची मण्डली मदन जनु, जहैं तहैं विविध बिहारु ॥  
 सो०-वृन्दाविपिन समाज, कहैं लगि वर्णि बखानिये ॥

कान्ह तुम्हारे राज, कीडत सब आनंद भरे ॥  
 रचहु फाग सुख अब नँदलाला । कर जोरे बिनवति सब बाला ॥  
 सुनि गोपिनके वचन कन्हआई । रची फागलीला सुखदाई ॥  
 विहँसि कस्यो तब श्री गिरिधारी । सजहु समाज जाय तुम प्यारी ॥  
 हमहुं सखन संगलै आवैं । फागु रंग ब्रजमाहि मचावैं ॥



यह सुनि सुदित भई ब्रजबाला । गये सदनको मदन गोपाला ॥  
 सखा वृन्द सब श्याम बुलाये । मुनत सकल आतुर जुर आये ॥  
 हैंसि हैंसि उन्हें श्याम समुझायो । आयो फाल्गुन मास सोहायो ॥  
 भैया हो सब खेलें होरी । भरो अबीर गुलालन झोरी ॥  
 यह सुनि ग्वाल बाल अनुरागे । होरी साज सजन सब लागे ॥  
 कंचन कलश अनेक सुहाये । केसर टेसू रंग भराये ॥  
 अतर अरगजा विविध विधाना । लिय सुगंध भाजन भरनाना ॥  
 पीत अरुण बैर वसन बनाये । नेह सुगन्धन अति मन भाये ॥  
 दोहा-अंग अंग भूषण ललित, उर सुमननकी माल ॥

नयन सैन शोभा हरन, बनी मण्डली ग्वाल ॥  
 सो०-पान भरे मुख लाल, उसकाये बाहें झुँगा ॥  
 फेंटन भरे गुलाल, पिचकारी कञ्चन बरन ॥

फेदा पीत श्याम शिरसोहै । तुराकी झलकन मन मोहै ॥  
 तापर मोर चंद्र छवि न्यारी । कोटि चंद्र रवि छवि बलिहारी ॥  
 केसर खौर भाल शुभकारी । बीचतिलक की रेख श्रृंगारी ॥  
 भौहैं कुटिल नयन रतनार । कुण्डल झलक केश धुंधरार ॥  
 चारु कपोल मनोहर नाशों । मन्द हैंसनि द्युति दर्शन प्रकाशा ॥  
 अंधरे अरुण चिबुक छविस्तीवां । कटि अति ललित कंबुकलश्रीवां ॥  
 झुँगा झीन रँग पीत सुहायो । शोभित तनु छविस्तीं लपटायो ॥  
 घेरदार संजाफ जरीकी । झमकिरही छवि उमँग भरीकी ॥  
 तैसिय कमल चरणपर पनहीं । कंचन मणिमय मोहत मनहीं ॥  
 कर चूडामणि जटित अँगूठी । लसत अँगुरियन भांति अनूठी ॥  
 बाहु बिजौटा जटित रतनको । चन्दन चित्रित श्याम लतनको ॥  
 झलकत झीन झुँगके माहीं । सो छवि कहत बनत मुख नाहीं ॥  
 दोहा-कटि पर पट पीरोकसे, कनक किनारे चार ॥

१ सोनेकेकलश । २ वर्तन । ३ सुंदर । ४ बाल । ५ नाक ।

६ दांत । ७ ओष्ठ । ८ बजुला ।



तापरखोंसे मुरलिका, उर मुक्तनके हार ॥

सो०-तापर ललित विशाल, माल गुलाव प्रमूनकी ॥

चितवन हँसन रसाल, बन्यो छैल नँद लाडिलो ॥

बन्यो यूथ सब रंग रँगिलो । मधि नायक नँद नँद छबीलो ॥

खेलत श्याम चले ब्रजहोरी । उड़त अबीर गुलालन झोरी ॥

बाजत ताल मृदंग सुहाई । डफ मुहचंग वीन सहनाई ॥

और नगारनकी कल जोरी । बीच बीच मुरली सुरचोरी ॥

कोउ नाचैं कोउ भाव बतावैं । होरी गीत मिले सुरगावैं ॥

ब्रज वीथिन वीथिन सब डोलैं । होहो होरी मुखते बोलैं ॥

मिलत गलिनमें जो नरनारी । वचत नहीं दीन्हें बिन गारी ॥

अबिर गुलाल दासुपर डारैं । भरि भरि पिचकारिन रँग मारैं ॥

बोलत होरी वचन सुहाई । करि छांडत सब मनकी भाई ॥

गोरस केसर माते डोलैं । वरन वरनके फटका खोलैं ॥

जो कोउ भाजि रहति घर बैठी । बारिआई आनत तिहि पैठी ॥

अटन चढी देखैं ब्रजनारी । लज्जन ते छूटाहि पिचकारी ॥

दोहा-गावत होरी गीत सब, देहिं दिवावहिं गारि ॥

डारत अबिर गुलालकी, झोरी भरि भरि नारि ॥

सो०-इत हरिके सँग ग्वाल, सुदित गुलाल उड़ावाहिं ॥

पिचकारिनके जाल, वर्षत भारि केसर ललित ॥

होत कुलाहल आनँद भारी । रंग अबीरन महल अटारी ॥

हैं गइ ब्रजकी वीथिन वीचा । अबिर गुलाल कुंकुमाकीचा ॥

ऐसे संगलिये सब ग्वाला । करत फागु कौतुक नँदलाला ॥

भीज रहे केसरि रँग बाँगे । नख ते शिख गुलाल ते पागे ॥

आनँद भरे सुदित सब गावत । गुणी जननके बाल नचावत ॥

बरसानेको चले कन्हाई । यह सुधि कुँवरि राधिका पाई ॥

तुरत सखी सब बोलि पठाई । सुनत सकल आतुर उठि धाई ॥

१ मोतिन । २ गलियन । ३ वख ।



नवसत सकल मनोरथ साजें । वरण चरण चर वसन विराजें ॥  
 चंदी भौल विराजत रोरी । मुख तँबोल तनुकी छवि गोरी ॥  
 होरी खेल सुनत सब चोपी । आई प्रिया निकट सब गोपी ॥  
 हँसि हँसि सबसों कहति किशोरी । चली श्याम संग खेलें होरी ॥  
 पकरि आज मोहनको लीजै । मन भाई तिनसों सब कीजै ॥  
 दोहा-ललतादिक ब्रज नागरी, मिलि सब सजो समाज ॥  
 तिनमें श्रीकीरति कुँवरि, सबहिनकी शिरताज ॥  
 सो०-परमरूप की रास, गुणागार नवनागरी ॥  
 राजति भरी हुलास, मन मोहन मन भावनी ॥  
 नख शिखलें सब सुन्दर ताई । रही छाय छवि पुंजनिकाई ॥  
 भूषण जाल लाल नग केरे । शोभित अंगन सुभग घनेरे ॥  
 मुख छवि वज्रिलकैसो को है । जाहि देखि मोहन मन मोहै ॥  
 लखति नवल तनु सुंदर सारी । केसरिया कीनी जर तारी ॥  
 गुलनचको लहंगा चटकीली । घेरबनो अति छविन छबीली ॥  
 कंकण किंकिणि नूपुर बाजें । होरी साज सजे सबराजें ॥  
 रंग गुलाल संग सब लीनो । सोहति युवति यूथ रँग भीनो ॥  
 भृगमद केसर मेल मिलाई । मधि मधि लीने कलश भराई ॥  
 हाथनमें लीने नवलासी । चली श्याम धन पै चपेलासी ॥  
 युवति यूथलै संग किशोरी । वही जाय आगे ब्रज खोरी ॥  
 उतते आये मदनगुपाला । सोहत संग भीर नव वाला ॥  
 देखि परस्पर आनंद बाढ़यो । दुहुँदिशि गोलभयो रुपिठाढ़यो ॥  
 दोहा-भरि भरि पिचकारी हरषि, इतते धाये ग्वाल ॥  
 नवलासी लै लै करन, सिमिटि चली उतवाल ॥  
 सो०-भो भंडभरो आन, परी मार बिच रंगकी ॥  
 करत न कोऊ कान, मन भाई मुखते कहत ॥  
 भरि भरि मूँठि गुलाल चलावैं । होहो होरी वचन सुनावैं ॥

१ मस्तक । २ बिजुलीसी । ३ मिलाप ।



केसरि रँग लै लै पिचकारी । तकि तकि मारत पिय अह प्यारी ॥  
 दुहुँ दिशि चलत झराझर जेरी । भइ गुलालकी घटा अँधेरी ॥  
 आय परत जाके जो बैडै । सो केसरिके कलश उलेडै ॥  
 लगिलगिरहे चरि अंगनसाँ । पहिचाने नहि परत रँगनसाँ ॥  
 मुख शोभा कछु कहति न जाई । रही गुलाल झलक लबिछाई ॥  
 कवि उपमा कहि कहा बखाने । शशि सरोज दोऊ सकुचाने ॥  
 सकुच रहित गारी सब गावैं । दुहुँ दिशि लै लै नाम चुनवैं ॥  
 बाजत बिन रबाव तँवूरा । ताल पखावज ढोलक तूरा ॥  
 नवलासी चपलासी गोरी । मारति ग्वालन कहि कहि होरी ॥  
 एक भागे एक टूटन लागे । एक अबीर डारि मुख भागे ॥  
 मच्चो खेल रँग रस अति भारी । सखियन बोलि कह्यो तब प्यारी ॥

दोहा-छल बल कर कछु भेदसों, मोहन पकरे जाय ॥

आंख आंज मुख माँडि तब, छाँड्यो हहाकराय ॥

सो०-हैं अति लंगर कान्ह, ऐसे ये नहि मानिहैं ॥

बसन चुराये आन, लेहि दाँव सो आपनो ॥

तब एक तिय हलधर वपु काछ्यो । चली ओढि नीलांबर आछ्यो ॥  
 निकस यूथते है कै न्यारी । निकसी जित ठाढ़े बनवारी ॥  
 हरि जान्यों आये बलदाऊ । चले अकेले लेन अगाऊ ॥  
 गये निकट ताके हरि तबहीं । धरे जाय औचक तिन तबहीं ॥  
 आई धाय और सब नारी । लीने पकरि श्याम अँकजारी ॥  
 हँसि हँसि कहत सकल ब्रजवाला । ठीठो बहुत दर्द तुम लाला ॥  
 सो फल आज तुम्हें सब देहैं । दाँव आपनो नीको लेहैं ॥  
 ठाढ़े हँसत दूर सब ग्वाला । कहत गये पकरे नँदलाला ॥  
 हँसति कुँवरि राधा दुर ठाढ़ी । पिय मुख निरखि सकुच उर बाढ़ी ॥  
 किनहुँ लियो पीत पट छोरी । काजर दियो किनहुँ बरजोरी ॥  
 काहु बेनी शीश सँवारी । मुख गुलाल लावति कोउ नारी ॥



काहू उर अरगजा लगायो । काहू रंग शीश ठरकायो ॥  
दोहा-गये छूटि मोहन तबै, गोहन बले पराय ॥

आन मिले निज सखनमें, रहीं नारि पछिताय ॥  
सो०-करमींजति पछितात, कहति परस्पर बालसब ॥

भली बनीथी घात, दांवलेन पाई नहीं ॥  
गये आजु तुम भजि नंदलाला । जैहौ कहां काल्हि गोपाला ॥  
करि राखी जैसी तुम हमसों । सो हम दांव लेइंगी तुमसों ॥  
पीताम्बर अपनो यह लीजै । पटै ग्वाल काहूको दीजै ॥  
कै आपही आय लै जाहू । अब हम नहीं पकरि हैं काहू ॥  
हंसत सखा सब तारी दैकै । बेनी छोरत हैं कर लैकै ॥  
कहत जाहु फिरि कुँवर कन्हारै । पीताम्बर लै आवहु जाई ॥  
भाजत हार दियेते टूटै । पीताम्बर गहनेदैं छूटै ॥  
तबहिं कछो हरि नंददुहारै । अबहिं पीत पट लेत मँगारै ॥  
सखा एक हरि निकट बुलायो । युवति भेष करि ताहि पठायो ॥  
गयो सुमिलि युवतिनके माहीं । हंसत जाय ठाढो पट पाहीं ॥  
कहत देहु पट धरैं दुराई । अब नहिं पावहिं कुँवर कन्हारै ॥  
अब यह पट हरिको तब देहैं । दांव आपनो जब हम लेहैं ॥  
दोहा-ऐसी कहि पटलै लियो, आयो चमकि गुवाल ॥

फेरयो करसों श्याम लै, चकित भई सब बाल ॥  
सो०-लखि हरिकी चतुराय, भई थकित ब्रजवाल सब ॥

धिरवत कहत सुनाय, भली बनाई आज तुम ॥  
गये आज बचिकर चतुराई । अब नदिहैं जो बचहु कन्हारै ॥  
अब तो लाग लगीहै हमसों । जब लगि दाँवलेति नहिं तुमसों ॥  
पकरि नचावहिं तुमहिं बिहारी । तब कहिहौ हमको ब्रजनारी ॥  
कहत श्याम अब भये सयाने । इन बातन कछु भय नहिं माने ॥  
जान लियो हम कपट तुम्हारो । अब तुम कह कर सकात हमारो ॥  
अबहीं ग्वालन देहू लगाई । छांडौ अपनी विनय कराई ॥



नेक कान मानतहौं तिनकी । सखी कहावति हौ तुम जिनकी ॥  
 यह सुनि तब युवती सुसकानी । कहा करत हौ श्याम सयानी ॥  
 तुम्हें नन्दकी सौह कन्हाई । जो नहिं विनय करावहु आई ॥  
 सखन सहित तब मोहन करषैं । लैलै पिचकारिन रँग बरषैं ॥  
 उत सब युवती है इक ठौरी । लैलै नवलाली सब दौरी ॥  
 दियो सबनको मारि हटाई । भाजि चले तब कुँवर कन्हाई ॥  
 दोहा-भाजे भाजे कहत सब, तारीदै ब्रजबाल ॥

जो तुम जाये नंदके, ठाढे रहौ गुपाल ॥  
 सो०-फिरे बहुरि घनश्याम, सखा वृन्द सब फेरिकै ॥

शिथिल करी ब्रज बाम, झोरिन भारे अवीरकी ॥  
 ऐसे खेलत रस मिलि होरी । इत मोहन उत कुँवरिकिशोरी ॥  
 गोपी ग्वाल संग सब लीने । मोहन सकल रंग रस भीने ॥  
 कबहुँ परस्पर गावत गारी । कबहुँ करत रस वाद विहारी ॥  
 कबहुँ अवीर गुलाल उड़ावैं । कबहुँ रंग सलिल बरषावैं ॥  
 अरख परख छवि निरखत दोऊ । परमानन्द मगन सब कोऊ ॥  
 चढे विमानन नभ सुर देखैं । जन्म सफल ब्रजको करिलेखैं ॥  
 पुनि पुनि हवि सुमन वर्षावैं । जय जय करि प्रभुको मश गावैं ॥  
 ऐसे श्याम रंग रस राख्यो ! ललता आय बीच तब भाष्यो ॥  
 आज श्याम तुम औचक आये । हम काहू जानन नहिं पाये ॥  
 बहुत करी तुम आय दिठाई । भई रांझ अब कुँवरकन्हाई ॥  
 काल्हि प्रात है बार हमारी । देखैगी मनसाय लुम्हारी ॥  
 ऐहैं नन्द गांवलों प्यारी । रहियो सजग लाल गिरिधारी ॥  
 दोहा-प्यारी करते पानलै, दीने सखी सुजान ॥

प्रात अवधि बदि खेलकी, राख्यो दुहुँ दिशि मान ॥  
 सो०-घर आये घनश्याम, सखन संग गावत हँसत ॥  
 गई प्रिया निज धाम, सखिन सहित आनंद भरी ॥



Vinay Avasthi Sahib Bhuvan Vani Trust Donations

परमानन्द सकल ब्रजनारी । कृष्ण कोल सुखकी अधिकारी ॥  
 लोक लाजको भय नाहि मानै । कृष्ण विलास सदा उर आनै ॥  
 श्रीराधिका कुँवरि सुखदाई । प्रात सखी सब बोलि पठाई ॥  
 कियो विचार सबन मिलि गोरी । नन्द गाँव खेलैं चलि होरी ॥  
 मिलि मोहन सों यह सुखकीजै । फगुवा नन्दमहर सों लीजै ॥  
 सामा सकल खेलकी लीनी । रंग गुलालन सों बहु कीनी ॥  
 मथि मथि विविध सुगंधन लीन्हे । भाँति अनेक अरगजाकीन्हे ॥  
 भरि भरि भाजन कनक सुहाये । अमित सुगंध न जाहि गनाये ॥  
 ले काँवरिन अनेक अपारा । चले संग सजि सुभग शृंगारा ॥  
 ग्वालनि यौवन गर्व गहेली । श्रीराधा संग चलीं सहेली ॥  
 कुंकुम उबटि कनक तनु गोरी । रूप राशि सब नवलकिशोरी ॥  
 एक वयस सुन्दर सब राजैं । निरखत कोटि मदन तिय लाजैं ॥

दोहा—नवसत साज शृंगार तनु, अंग अंग सब ग्वारि ॥  
 चंद्रावालि ललतादि सब, अमित गोप सुकुमारि ॥  
 सो०—को कवि वरणैं पार, प्यारी सब नंदलालकी ॥  
 शोभा अमित अपार, उपमाको त्रिभुवन नहीं ॥

सुमन सुगंधन गूथी वेणी । लटकत कनक छवी छवि श्रेणी ॥  
 मोतिन मांग बनी अतिनीकी । केसरि भाड़ जड़ाऊटीकी ॥  
 कुटिल भौंह अलकैं चुंवरारी । मन मोहन मन मोहनहारी ॥  
 खंजन नयन मधुप मृग हारे । अंजन रेख सुभग अनियारे ॥  
 श्रवणनतरवण रवि सम ज्योती । नकबसरिलटके गज मोती ॥  
 दशन कुंद बिंबाधर सोहैं । चिबुकनीलकण छवि मन मोहैं ॥  
 कंठ कपोत मोति उर हारा । जलुयुगगिरि विच सुरसरि धारा ॥  
 कुचचकवा मुख शशिध्रमभूले । बैठे विद्युरि मनहुँ दुहुँकूले ॥  
 कर कंकण चूरी गजदंती । नखमणि माणिक मेटत कंती ॥  
 नाभी हृदय कहा कवि वरणैं । कटि मृगराज लेत जनु निरणैं ॥

१ उमर । २ कुंदर ।



चरणन नूपुर बिछिया बाजें । चालमराल चलत कल राजें ॥  
लहंगा कसब पीतरंग सारी । चमक चढ़ दिशि लाल किनारी ॥

दोहा-नख शिख सब शोभा भरी, बनी छबीली वाम ॥

तिनमें श्रीराधा कुँवरि, राजत अति अभिराम ॥

सो०-लई सवन गहि हाथ, पीरे सुमननकी ठरी ॥

होरी हरिके साथ, नंद गाँव खेलन चली ॥

प्रेम प्रीतिके रसवश पागों । नंदनंदन पियकी अनुरागी ॥

बाजे सुघर बजावें गोरी । गावहि कोकिल कंठ निहोरी ॥

करतिकेलि कौतुक मन माहीं । अबिर गुलाल उड़ावत जाहीं ॥

लीनोघेरे नंदगृह जाई । बसत तहां मन हरन कन्हाई ॥

शोभित रूप लतासी गोरी । गावत फाग नंदकी पोरी ॥

सुनि सुन्दर वर बाहेर आये । हलधर ग्वाल गुपाल बुलाये ॥

एकन एक भई सब नारी । होरी खेल मच्यो अति भारी ॥

मृगमद कुंकुम चंदन घेरे । लैलै पिचकारी करदोरे ॥

गोपी ग्वाल भरे झकझोरी । अबिर गुलालन माराहि गोरी ॥

उड़त गुलाल घटा धन छाई । मंहिकेसरिकी कीच सुहाई ॥

बाजे सरस मधुर सुर बाजें । गान सुनत गण गंधर्व लाजें ॥

पकरत एक एक छुटि भाजें । गारी देत एक तजि लाजें ॥

दोहा-हो हो होरी कहत सब, भरे परम आनंद ॥

सखिन संग उत लाडिली, इतै सखा नंदनंद ॥

सो०-औचक धाई वाम, गहन हेतु नंदनंद तब ॥

गहि पाये बलराम, निकसि गये हरि भाजिके ॥

अति निशंक सब ब्रजकी गोरी । तामें अवसर पायो होरी ॥

भरि भरि कसरिरंग कमोरी । लैलै हलधरके शिरहोरी ॥

अबिर उड़ाय अंधेरो कीनो । ललता गहि दृग काजर दीनो ॥

व्यंग्य वचन सब कहत सुहाई । लेहु रोहिणी मात बुलाई ॥



Vinay Ayasthi Sahib Bhuvan Vani Trust Donations

हास विलास विविध कहि गाव । इत उत बल कहु जान न पावें ॥  
 फगुआ मन भावतो मैगाई । हलधर आंखें विनय कराई ॥  
 हँसत सखन मिलि कुँवर कन्हारै । आये दोऊ आंख अँजारी ॥  
 तब हलधर दुचिते हरि कीने । युवतिन धाय श्याम गहिलीने ॥  
 सिमटे सखा छुड़ावन धाये । युवतिनसे हरि छुटन न पाये ॥  
 लैलै नवलासी नव बाला । दिये हठाय मारि सब ग्वाला ॥  
 श्यामहि जीत प्यारे लाई । भई सबनके मनकी भाई ॥  
 रस लम्पट नैदन्द कन्हारै । दीनो आपुन आनि गहारै ॥  
 दोहा—ले आई प्यारी निकट, हँसति कहति ब्रजबाल ॥  
 कहिये अब कैसी बनी, बहुत करत हौ गाल ॥  
 सो०—एक कहति सुसकाय, बसन हरेते आपुही ॥  
 हमहुं बसन छुड़ाय, लैहि दाँव अब आपनो ॥  
 काहू कह्यो करिहौ कह भरो । सोई पाय भयो अबनरो ॥  
 ऐसे कहति रूप अनुरागी । सुरली छीनि बजावन लागी ॥  
 एकनिलियो पीत पट लोरी । एकरंग गागरिलै दौरी ॥  
 हरिके हाथ गये चन्द्रावलि । कजललै आई संजावलि ॥  
 ललता लोचन अंजन लागी । एक श्रवणलगि कछु कहि भागी ॥  
 एक चिबुक गहि बदन उड़ावै । एक गुलाल कपोलन लावै ॥  
 धारि रहीं परिखाकी नाई । करति सबै निज निज मन भाई ॥  
 काहू बेनी गूथ सँवारी । काहू मोतिन मांग सुधारी ॥  
 पहिरावति लहंगा कोउ सारी । काहूलै अँगिया उरधारी ॥  
 निरखि निरखि प्यारी मुसुकाई । राखत आपन कृष्ण बड़ाई ॥  
 काहू वदन अभूषण लीन्हे । नेकहु श्याम परत नाहि चीन्हे ॥  
 वधू वधू कहि सबहिन गायो । प्यारी निकट आनि बैठायो ॥  
 दोहा—निरखि बदन प्यारी हँसी, श्याम हँसे सकुचाय ॥  
 गहि प्यारी निज पाँणि तब, दीनो पान खवाय ॥

१ पीतांबर । २ हाथ ।



सो०-सखियां करत कलोल, गांठि जोरि आँजर दई ॥

ब्रजमें रह्यो अडोल, यह जोरी युग युग सदा ॥

लीन्हे मध्य श्याम सब गवारैं । मग्न भई अब वपु न सँभारैं ॥

पिय प्यारी मुखकी छवि जोहैं । अरस परस दोऊ मन मोहैं ॥

रंगन भरें रँगोले दोऊ । त्रिभुवन छवि पटतर नहिं सोऊ ॥

एक नयनकी सैन मिलावैं । एक युगल छवि लखि सुख पावैं ॥

गावति एक महरिको गारी । बजै मँजीरा डफ करतारी ॥

भरि भरि मूठ गुलाल उड़ावैं । ग्वालनिकटकुँ लगन न पावैं ॥

रही गुलाल घटा छवि छाई । फूली मानहुँ सांझ सुहाई ॥

तब ललताको यशुमति माई । घर भीतरसे बोलि पठाई ॥

हँसिकै महरि बहुत सनमानी । विनती करी बहुरि मृदुबानी ॥

आज भई भोजनकी बिरियां । देखहु अब राधाकी उरियां ॥

खान पान करि श्रमहि निवारो । बहुरि खेलियो निकट सबारो ॥

ल्यावहु अब लाडलिहि लिवाई । कीरति जीकी सौंह दिवाई ॥

दोहा-तब यशुमति पहुँराधिकहि, ललता चलीलिवाय ॥

सकुच जानि घनश्याम अति, छूटे हाहा खाय ॥

सो०-हँसे ग्वाल मुखहेरि, तनु शोभा देखत खरे ॥

बलको लीनो टेरि, बन्यो आजु अति साँवरों ॥

कहत सखा सब दैद सौहन । ऐसेहि चलौ नंदपै मोहन ॥

चले भुजागहि तहां लिवाई । छवि अनूप वह वरणि नजाई ॥

उत सब युवतिनके चितचोरे । चले लाल इतके अति भोरे ॥

अति छवि देखि हँसे नँदराई । जननी सुनति दौरि तहँ आई ॥

निरखि हरषि लीन्हे उरलाई । अति आनंद हृदय न समाई ॥

बार बार करलेत बलैया । किन यह कीनो हाल कन्हैया ॥

ये ऐसी सब ब्रजकी बाला । सकुच हँसे मनहीं नँदलाला ॥

तुरत श्याम सोइ वेष उतारयो । कटि पट पीत मुकुट शिरधारयो ॥



Vipay Avasthi, Sahib Bhuvan Vani Trust Donations

युवतिनसाहत कुवार श्री श्यामा । आइ नंद महारिके धामा ॥  
 भूषण वसन नवीन बनाये । यशुमतिले सबको पहिराये ॥  
 अति सनेह वृषभालु दुलारी । अपने हाथ गुँगार सँवारी ॥  
 निरखिरूप प्रमुदित नँदरानी । वारति राई नौन सिहानी ॥  
 दोहा-विविध भांति भैवा मधुर, और मिठाई पानि ॥

सादर सबकी गोदमें, भरे हरषि नँदरानि ॥  
 सो०-रह्यो नंद गृहछाय, होरीकी आनंद अति ॥

कहाति यशोमति माय, फगुआकहोसो दीजिये ॥  
 ललकि कह्यो औरै कलु नाहीं । ले हैं कान्हूर फगुआमाहीं ॥  
 देखे बिन रहि सकाहि जु उनको । तो मांगे देह हम तुमको ॥  
 बाढ़ौ वंश महर नँदराई । चिरजीवहु बलराम कन्हारी ॥  
 जिनसे यह सुख ब्रजमें लीजत । यह अशीश सबही मिलि दीजत ॥  
 अति आनंद मगन ब्रजवासी । अष्टसिद्धि नवनिधि सब दासी ॥  
 गोपी ग्वाल भये अलुकूला । न्हान चले यमुनाके कूला ॥  
 जहँ वर विटप विविध रँग फूले । गुंजत भ्रमर मत्त रस भूले ॥  
 शीतल सुखद छांह छवि छाई । फूल डोल तहँ रच्यो कन्हारी ॥  
 झूलत रंग भरे पिय प्यारी । गावत मिले गोप अरुनारी ॥  
 ऐसे दूर खेल श्रम कीनो । अति आनंद सबनको दीनो ॥  
 तब यमुना जल श्याम नहाये । महिदेवन शिर तिलक बनाये ॥  
 दियो दान तिनको नंदलाला । वर्षत सुर सुमननकी माला ॥  
 छं०-वर्षतमालप्रसून सुरगण, निरखि छवि आनंदभरे ॥

श्रीनंद सुत सुख धाम पूरण, काम सब ब्रज जन करे ॥  
 लूटि सुखरस फागको सब, मुदित निजनिज गृहगये ॥  
 गोप बाल गोपाल बल, निजधाम आये छवि छये ॥  
 दोहा-कियो जो फाग विहार हरि, शारद लहैं न पार ॥  
 ब्रजवासी सो किमि कहैं, लीला सिंधु अपार ॥

१ कृष्ण-राधिका । २ भूदेव-ब्राह्मण ।



सो०—जन मनके सुखधाम, चरित ललित गोपालके ॥  
गावत सुनत सुजान, ब्रजवासी जन रति लहत ॥  
अथ सुदर्शनशायमोचनलीला ॥

पूरण ब्रह्म कृष्ण भगवाना । ब्रज विलास जो कीन्हे नाना ॥  
शिव विधि शारद नारद शेषा । कहि नहिं सकहिं गणेश अशेषा ॥  
कीन्हे चरित रहस्य अपारा । ब्रज युवतिन मिलि रस भृंगारा ॥  
साध नहीं काहू मन राखी । करी सकल जो जाने भाषी ॥  
ब्रजविलास रस केलि बड़ाई । भांति अनेक मुनीजम गाई ॥  
ब्रजवासी प्रभु सब गुणनायक । जो कछु करहिं सो सबही लायक ॥  
सखा संग सबको सुख दीनो । मन भायो गोपिन को कीनो ॥  
महरि नंद पितु मात कहाये । तिनके हेत देह धरि आये ॥  
नालकेलि रस सुख करि भारी । दियो परमआनंद सुरारी ॥  
गिरिधर ब्रज जन सगरे राखे । इंद्रादिक सुर जय जय भाषे ॥  
गाय बच्छ बन माहि चराये । कालीनाग नाथि लै आये ॥  
करे चरित्र अनेक कृपाला । भक्तन हित प्रभु दीनदयाला ॥  
दोहा—भक्तनके हित लेतहैं, प्रभु युग युग अवतार ॥

असुर मारि थापत सुरन, हरत भूमि भव भार ॥  
सो०—गावत संत अपार, यशपुनीत पावन करन ॥  
पूरि रह्यो संसार, करता हरता आप हरि ॥  
इक दिन प्रभु भक्तन सुखदाई । नंद हृदय यह मति उपजाई ॥  
चलिये आज सरस्वति तीरा । पूजन शंकर सकल अहीरा ॥  
लिये संग बल मोहन दोऊ । गोपी ग्वाल चले सब कोऊ ॥  
करत कुलाहल आनंद भारी । पहुँचे तहां सकल नर नारी ॥  
सरित पुनीत कियो सुस्नाना । महिदेव नदीनो सब दाना ॥  
देखि देव थल अति अभिमानी । सादर पूजे शंभुभवानी ॥  
पूजा करत सांझ है आई । श्रमिंत भये सब लोग लुगाई ॥

१ नदी । २ द्विजनको ।



खान पान करि सहित हुलासा । कियो रैनि तहँ वनमें बासा ॥  
 सोये हरि हलधर सुखराशी । तब सोये सब ब्रजके बासी ॥  
 आधी निशि अजगर यक आयो । नन्द महरके पग लपटायो ॥  
 उठे पुकारि चौकि नँदरई । आये ब्रजवासी सब धाई ॥  
 अजगर देखि डरे सबकोई । लगे छुड़ावन छुटत न सोई ॥  
 दोहा-हारे यत्न अनेक करि, सर्प न छोड़ै पांय ॥

कृष्ण कृष्ण करि नन्द तब, गुहराये अकुलाय ॥  
 सो०-अति व्याकुल गये ग्वाल, बोले श्याम जगायकै ॥  
 कह्यो महायक व्याल, लपटानो पग नंदके ॥  
 सुनत उठे आतुर गोपाला । निकट जाय देख्यो स्वइव्याला ॥  
 परयो ताहि कमल पद पावन । पाप शाप संतप नशावन ॥  
 छुवत चरण तिन लइ जमुहाई । धन्यो दिव्यैतनु वरणि न जाई ॥  
 लाग्यो हाथजोरि गुणगावन । जय जय जगतईश जगपावन ॥  
 सब देवनके देव सुरारी । जय जय जय ब्रजगोप बिहारी ॥  
 ऋषि अंगिरा शाप मोहिं दीन्हो । सोवह बहुत अनुग्रह कीन्हो ॥  
 जाते प्रभुको दर्शन पायों । जन्म जन्मको पाप नशायों ॥  
 ऐसी दिनती प्रभुहि सुनाई । आयसुपाय चलयो शिरनाई ॥  
 बहुरि नन्दको शीश नवायो । देखि महर अति अचरजपायो ॥  
 पूछ्यो जाय नन्द तब भेवा । तुमतो दिव्यरूप कोउ देवा ॥  
 सर्प शरीर धन्यो क्यों आई । सो सब हमसों कहौ बुझाई ॥  
 नन्द वचनसुनि मन सुखपाई । तब उन अपनी कथा सुनाई ॥  
 दोहा-हैं यश गायक श्यामको, नाम सुदर्शन होय ॥

सुन्दर विद्याधरनमें, मोते और न कोय ॥  
 सो०-इकदिन ऋषिके धाम, गयो धरे अभिमान मन ॥  
 कियो न तिन्हें प्रणाम, रूप द्रव्यके गर्वसे ॥  
 ऋषि अंगिरा बड़े विज्ञानी । जानि मोहिंजड अति अभिमानी ॥

१ दुःख । २ सुन्दर । ३ दाया ।



दीनो शाप कोप करियेहा । जाय होहु शठ अजगरदेहा ॥  
 ऐसेकह्यो मोहिं ऋषि जवहीं । अजगर भयों तुरत मैं तबहीं ॥  
 देखि दुखित स्वहिं परम कृपाला । भये बहुरि मुनिराय दयाला ॥  
 तब करिकृपा कह्यो यहमोहीं । कृष्ण दरशहै जब तोहीं ॥  
 परशि चरण रज पाप नशैहै । बहुरि आपनो तनु तब पैहै ॥  
 तेषद आजु परशि सुखदाई । भयों पुनीत रूप निजपाई ॥  
 जो पदरज ब्रह्मा नहिं पावै । शिव सनकादि सदा चितलावै ॥  
 मुनि प्रसाद सोरज मैपाई । कहँ लगि मुनिकी करौं बड़ाई ॥  
 दीनदयालु जगत हितकारी । सन्त समान कौन उपकारी ॥  
 ऐसे विद्याधर सुखमानी । नन्दहि अपनी कथा बखानी ॥  
 बहुरिकाल चरणन शिरनाई । गयो लोकनिज बहु हर्षाई ॥  
 दोहा-नंदादिक आनंदसच, महिमा देखि पुनीत ॥  
 कहत परस्पर कृष्ण गुण, गई तहां निशि बीत ॥  
 सो०-आये सब ब्रज धाम, प्रात होत आनंद सों ॥  
 संग श्याम बलराम, प्रभु ब्रजवासी दासके ॥

अथ शंखचूडवध लीला ॥

एकदिन सुन्दर मदन गोपाला । श्रीबलदेव और संग ग्वाला ॥  
 दिवशान्त निशि समय सुहाई । उदित उडैप उडगण छबिछाई ॥  
 प्रफुलित चारु मालती सोहै । कुसुद सुगंध पवन मनमोहै ॥  
 गुंजत भँवर मत्तरस लोभा । चले तहां देखन बनशोभा ॥  
 ग्वालन मिलि गावत दोउ भाई । कबहुँ बजावत बेणु कन्हवाई ॥  
 ब्रजवनितागण चहुँदिशि घेरे । चले सुनत बंशी की ठेरे ॥  
 जिनके तन मन बसे कन्हवाई । मग्न भई छबि लखि अधिकाई ॥  
 पहुँचीं श्रीवृन्दावन जाई । गोपी ग्वाल संग समुदाई ॥  
 विहरत वन विहार दोउ भाई । गोपी ग्वाल साथ सुखदाई ॥  
 मंद मंद गति इत उत डोलै । मृदुमुसकाय लेत मन मोलै ॥

१ चन्द्र । २ नक्षत्र । ३ वंशी ।



रूपराशि निधि छवि दोउ वीरा । बैठे जाय यमुनके तीरा ॥  
 पाछे सखा वृन्द सब सोहैं । सन्मुख गोपी जन मनमोहैं ॥  
 दोहा-करत सबै मिलि मुदित मन, भरे प्रेम रस माहिं ॥  
 भये मगन उनमत्त जिमि, रही देह सुधि नाहिं ॥  
 सो०-बाजत ताल मृदंग, बोन चंग सुरली मधुर ॥

छाय रह्यो रस रंग, उठत तरंगें तानकी ॥  
 प्रेम मगन सब घोष कुमारी । हरिछवि निरखति सुरति बिसारी ॥  
 शिथिल वदन कंच शीश सुहाये । विह्वल तनमन श्याम सोहाये ॥  
 को हम कहां नहीं कछु जाने । नयन श्यामके रूप लोभाने ॥  
 रही श्रवण सुरली ध्वनि छाई । गृह वनकी कछु सुधि नहिं राई ॥  
 चन्द्रवदन चपलासी गोरी । हरि मुख नाद सुनत भई भोरी ॥  
 तहाँ यक्ष औचक इक आयो । शंखचूड़ नामी तिहिं गायो ॥  
 सो वह धनद अनुग अभिमानी । प्रभु प्रभाव नहिं जान अज्ञानी ॥  
 देखतही बलराम कन्हारै । सब गोपिन लीनो अगुवारै ॥  
 घेरलेत जिमि गाय अहीरा । उत्तर दिशि ले चलयो अभीरा ॥  
 जब गोपिन हरि देखे नाहीं । भयोचेत तब कछु मन माहीं ॥  
 कही जाति हम काके साथा । भई विकल जिमि परम अनाथा ॥  
 कृष्ण कृष्ण तब टेरन लागीं । महादुखित अति भयसों भारीं ॥  
 दोहा-सुनत श्रवण आरत वचन, उठि आतुर दोउ भाय ॥

अति समीप गोपीनके, तुरतांहि पहुँचे जाय ॥  
 सो०-भैं आयों हों धाय, मत डरपौ तिनसों कह्यो ॥

अबहीं लेत छुड़ाय, तुम्हें मारि या दुष्टको ॥  
 शंखचूड़ फिरिकै तब देख्यो । काल मृत्यु सम दुहुँवन पेख्यो ॥  
 भयो त्रस्त तब मृद अभगो । युवतिन छाँडि जीवले भागो ॥  
 गोपिन पास राखि बलभाई । ता पाछे पुनि चले कन्हारै ॥  
 अतिही निकट धाय कै लीनो । मृका एक तासु शिर दीनो ॥

१ बौराहा । २ बाल । ३ दुःखितवाणी । ४ कृष्ण, बलराम । ५ गोपिनको ।



भयो प्राण विन अधम अन्याई । प्रभु प्रताप उत्तम गतिपाई ॥  
 हती एक मणि तोक शीशा । खोलै आये हरि जगदीशा ॥  
 दीनीसो बलको नँदलाला । प्रसुदित भई देखि ब्रजबाला ॥  
 गोपी ग्वाल सहित दौड भाई । बहुरि कियो सुख वनमें आई ॥  
 सो दुख सबको तुरत मुलायो । परमानन्द सबन उपजायो ॥  
 करत विविध विधि हास बिलासा । गृह आये पुनि सहित हुलासा ॥  
 नव किशोर सुन्दर सुखदाई । ब्रज जीवन बलराम कन्हाई ॥  
 ग्वाल बाल गायनके साथी । क्रीडा करत ललित ब्रजनाथी ॥  
 दोहा-देखि देखि हरिके चरित, परम विचित्र उदगरि ॥  
 निशि दिन सब प्रसुदित रहत, ब्रजवासी नर नारि ॥  
 सो०-हरण सकल भय भीर, दुष्ट दलन जनहित करन ॥  
 नँदनंदन बलवीर, ब्रजवासी प्रभु साँवरों ॥

अथ नृपभासुरवधलीला ॥

नंदनंदन संतन हितकारी । कमल नयन प्रभु कुंज बिहारी ॥  
 मुरली सुकुट धरे ब्रजराजै । कोटि काम निरखत छबिलाजै ॥  
 नित नवसुख ब्रजमें उपजावै । सुरनर सुनि त्रिभुवन यश गावै ॥  
 सुनि सुनि अगम कृष्ण गुणगाहा । कंस असुर उर दारुण दाहा ॥  
 जो जिहि भाव ताहि हरि तैसे । हितको हित जैसे को तैसे ॥  
 हित अनहित यह प्रभुकी लीला । सदा श्याम सुन्दर सुख शीला ॥  
 रीझ खीझ हरिको जो ध्यावै । परमानन्द अभय पद पावै ॥  
 रहै कंस उर ध्यान सदाहीं । नंदनंदनपल बिसरत लाहीं ॥  
 शत्रु भाव शोचत दिन राती । नन्दसुवन मारों किहि भांती ॥  
 असुर अरिष्ट नाम बल भारी । एक दिवस नृपलियो हँकारी ॥  
 तासों कहि सब भ्रम बुझायो । बल सखाहि ब्रज ताहि पठायो ॥  
 नंदनंदन मारनके काजा । चलयो असुर करि गर्व समाजा ॥  
 दोहा-नृपको शीश नवायकै, कह्यो अरिष्ट सुनत्य ॥

१ खेल । २ खलनकेनाशा । ३ भेद । ४ कृष्ण ।



कितक काज महाराज यह, मैं करि आवत जाय॥  
 सो०—तुम असुरनके राज, इतनेको शीघ्रत कहा ॥  
 पलमें मारों आज, बालक नंद अहीरके ॥  
 वृषभ रूप सोइ असुर बनाई । आयो तुरत ब्रजहि ससुहाई ॥  
 गिरि समान तनु अति विकराला । महाकाठिन दोउ सींग विशाला ॥  
 पूंछ उठाय डकारत आवै । खोदि खुरन सों क्षार उड़ावै ॥  
 दृग आरक्त फेन मुख डारै । कबहुँ सींगसे भूमि विदारै ॥  
 कबहुँ तरुनसों रगरत जाई । इत उत खोजत फिरत कन्हाई ॥  
 उन्नत ग्रीव चहूँ दिशि धावै । जहां तहां गैयन विडरावै ॥  
 बार बार गर्जत अति भारी । सुनत डरे सब ब्रज नर नारी ॥  
 बिडरीं गाय गोप सब भागे । कृष्ण कृष्ण कहि डेरन लागे ॥  
 कालस्वरूप वृषभ इक आयो । सबन कृष्ण सों जाय सुनायो ॥  
 प्रभु सर्वज्ञ तुरत पहिचान्यो । वृषभ न होय असुर यह जान्यो ॥  
 बिहँसि कह्यो मोहन सब पाहीं । मत डरपौ किता कछु नाहीं ॥  
 चले असुर सन्मुख मन मोहन । गोप ग्वाल लागे सब मोहन ॥  
 दोहा—आगे है हरि हांकदै, तासों कह्यो सुनाय ॥  
 रे शठ का तनु तरुघसत, फिरत बिडारत गाय ॥  
 सो०—मोहि न लख इत आय, तो तनु उपजो कंडु जो ॥  
 अबहीं देहुँ मिटाय, कहत नंदकी सौंह करि ॥  
 वृषभासुर सुनि हरिकी बानी । मनमें गर्व कियो यह जानी ॥  
 याही बालकके वध काजा । आदरदै पठयो स्वहि राजा ॥  
 भले शकुन मैं ब्रजमें आयों । जो याको तुरतहि लखि पायों ॥  
 अबहीं याहि पलकमें मारों । नृपति काज करि जाय जुहारों ॥  
 ऐसे अपने जिय अनुमानी । चल्थो श्याम सन्मुख अभिमानी ॥  
 दृष्टि परयो हरि ऊपर आई । लिये सींग गहि कुँवर कन्हाई ॥  
 यह आवत हरिकी दिशि धाई । हरि पाछे लै जात हटाई ॥

१ पर्वत । २ धूरि । ३ आँखें ।



पाछे पेलि श्याम तिहि दीनों । बहुरो वृषभासुर बल कीनो ॥  
 आवत जात असुर जब हारयो । ग्रीव मोडि तब धरणि पछारयो ॥  
 परयो असुर पर्वत आकारा । मुखते चली रुधिरकी धारा ॥  
 असुर मारि उत्तम गति दीनी । जय जय ध्वनि देवननभकीनी ॥  
 भये सुखी सब सुर समुदाई । वरषि सुमन प्रस्तुति मुख गाई ॥

दोहा-चकित भये लाखि परस्पर, कहत सकल ब्रजवाल ॥

हम जान्यो कोउ वर्षभहै, यह तो असुर कराल ॥

सो०-दुष्टदलन गोपाल, मुदित कहत नर नारि सब ॥

भक्तनको रक्षपाल, ब्रजवासी नंदलाडिलो ॥

जब अरिष्ट मारयो गिरिधारी । भयो कंस सुनि बहुत दुखारी ॥  
 आये ऋषि नारद तिहि काला । कह्यो कंस सां सुन भूपाला ॥  
 जिन मारे सब असुर तुम्हारे । ते नाहिं होहिं नंदके बारे ॥  
 मैं जान्यों निश्चय यह भेऊ । हैं वसुदेव पुत्र वे दोऊ ॥  
 कन्या लै जो तुमहिं दिखाई । सोवह हती यशोमति जाई ॥  
 भयो कछु यह सुनु छल राजा । को जानै कर्ता के काजा ॥  
 यह तो पुत्र भयोहो जबहीं । कही हुती तोसां मैं तबहीं ॥  
 अपनी सां बहुतै तुम कीनां । सो क्यों मिटै जोबिधि लिखि दीनां ॥  
 करहु यत्न तुम अबहुँ सवारे । यह कहि नारद स्वर्ग सिधारे ॥  
 उख्यो कंस सुनि मुनिकी बानी । भयो शोच वश मूढ अज्ञानी ॥  
 प्रथम देवकी अरु वसुदेऊ । छोड़े हुते वंदिते दोऊ ॥  
 बहुतबुरो मान्यों तिन पाहीं । राखे बहुरि वन्दिके माहीं ॥

दोहा-कैसे मारों कह करों, निशि दिन यहै विचार ॥

शालि रहे नृप कंस उर, हलधर नंदकुमार ॥

सो०-अब धौं पठऊं काहि, मनहीं मन शोचत खरो ॥

काहु न मारयो ताहि, असुर गयेते सब मरे ॥



अथ केशीवधलीला ॥

असुरन माहि बड़ो बलधारी । केशीअसुर वीर अति भारी ॥  
 कंस ताहि तब बोलि पठायो । अति आदरकरि ढिग बैठायो ॥  
 कहत कंस केशी सुनु मोसों । जीकी बात कहत मैं तोसों ॥  
 मोसमान राजा कोउ नाहीं । मेरी आन सकल जग माहीं ॥  
 ये सेवक मेरे नहि ऐसे । जैसे मैं चाहत हों तैसे ॥  
 जासों कहों बात मैं जोई । करि आवैं कारज वह सोई ॥  
 ताते मोहि यही पछितायो । तब केशी कहि वचन सुनायो ॥  
 ऐसो कहाकठिन प्रभु काजा । जाको तुम शोचतहो राजा ॥  
 तुमहो सब असुरनके नायक । और कौन दूजो तुम लायक ॥  
 जाहि क्रोध करि चितवो जवहीं । ताको नाश होय नृप तबहीं ॥  
 आयसु कहा मोहि किन दीजै । सो कारज अबहीं हम कीजै ॥  
 यह सुनि कंस हर्ष जिय आन्यो । केशी को बहु भांति बखान्यो ॥

दोहा-असुर वंश सबही हैते, काहि कहों ब्रजजान ॥

नंदमहरके छोहरा, करि आवैं विन प्रान ॥

सो०-कियो न तिन कछुकाज, आगे जे पठये असुर ॥

यह सुनिकै अति लाज, मारे सब नंद बालकन ॥

ताते कछु हैहैं मैं जानत । बड़ो वीर तोको मैं मानत ॥  
 ता कारण ब्रज तोहि पठाऊं । बहुत और कहि कहा सिखाऊं ॥  
 जिहि तिहि विधि छलबल करि कोऊ मारि आव नंद बालक दोऊ  
 कै लै आव बांधि दोउ भैया । कहत जिन्हें बलराम कन्हैया ॥  
 यह सुनि गर्व असुर भटकीनों । चल्यो ब्रजहि नृप आयसु दीनों ॥  
 मनहि कहत देखौधौ ताही । कंस नृपति डरपत सब जाही ॥  
 अश्वरूप है ब्रजमें आयो । अति बल गरजि चहुंदिशि धायो ॥  
 वेगवन्त अति वपुष विशाला । झारत ग्रीव पूछ विकराला ॥  
 बारहि बारहि सो ध्वनिकरही । ब्रजके लोगन मारत फिरही ॥

१ मारे । २ घोडा ।



जित तित भाजि चले तरनारी । भये विकल सब अति भय भारी ॥  
 कस्यो जाय आतुर हरिपाहीं । अथ एक आयो ब्रजमाहीं ॥  
 अति विकराल न जात बतायो । कैधौ बहुरि असुर कोउ आयो ॥  
 दोहा-ब्रज आयो केशी असुर, जानि लियो नँदलाल ॥  
 सन्मुखताके हरषिकै, चले कंसके लाल ॥

सो०-शीश मुकुट वनमाल, कटि कसि बांध्यो पीतपट ॥

उर भुज नयन विशाल, असुर विदारन सुरमुखद ॥  
 जब केशी देखे हरि आवत । भयो क्रोध करि सन्मुख धावत ॥  
 अति बल दोऊ चरण उठाये । प्रभुके उरको चपल चलाये ॥  
 देखत डरे सकल ब्रजवासी । गहे वीचही हरि अविनाशी ॥  
 छूटन असुर बहुत बलकीनों । ठेलि श्याम पाछे तब दीनों ॥  
 गिरो धरणि पर मुच्छित भारी । उठ्यो क्रोधकरि बहुरि सँभारी ॥  
 दावँ घात कारिकै बहु धावै । पुनि पुनि चरण चपेट चलावै ॥  
 अतिहि वेग हरि जात बचाई । करत युद्ध कौतुक सुखदाई ॥  
 देखत सुर मुनि चढे अकाशा । कछु हर्ष मन कछु इक त्रासा ॥  
 तकत गोप गोपी भय बाढे । चक्रित चित्र लिखेसे ठाढे ॥  
 वदनपसारि असुर तब धायो । चाहत हरिको सुखमें नायो ॥  
 तबहिं श्याम यह बुद्धि उपाई । दियो हाथ ताके सुखनाई ॥  
 दांतनदाबि सक्यो सो नहीं । वृक्ष समान भयो मुख माहीं ॥  
 दोहा-एक हाथ सुख नाइकै, तुरत केश गहि धाय ॥

बली सुवत नँदरायके, पटक्यो असुर फिराय ॥  
 सो०-शब्द भयो आवात, धरक्यो उर सुनि कंसको ॥

नंदमहरके तात, जान्यो केशीको हन्यो ॥  
 देखत सुरगण भये सुखारी । वर्षे सुमन सुमंगलकारी ॥  
 प्रफुलित भये सकल ब्रजवासी । बढ्यो हर्ष उर मिठी उदासी ॥  
 गावत जय यश प्रभुहि सुनाई । असुर निकंदन जन सुखदाई ॥



धाय धाय हरिको सब भेंटें । धन्य धन्य कहि कहि दुख भेंटें ॥  
बड़ो दुष्ट मोहन तुम मान्यो । ब्रजवासिनको प्राण उबारयो ॥  
कान्हहि सदा सहाय हमारी । धन्य धन्य मोहन गिरिधारी ॥  
लिये लाय उर यशुमति मैया । पुनि पुनि सुखकी लेत बलैया ॥  
नंद देखि आनंद अति कीनों । बहुत दान विप्रनको दीनों ॥  
हरिको लै पुनि पुनि उर लावता सुख चूवत लखि छवि सुख पावत ॥  
केशी मारि श्याम गृह आये । भये सकल आनन्द बधाये ॥  
घर घर सब ब्रजलोग लुगार्ह । नंद नंदनकी करत बड़ाई ॥  
ब्रजवासी प्रभु जन प्रतिपालक । संतन सुखद असुर कुल बालक ॥  
दोहा—धनि धनि ब्रजमें अवतरे, भक्तनके हित आय ॥  
सुखसागर शोभा अधिक, बलनिधि त्रिभुवनराय ॥  
सो०—बल मोहन दोउ भाय, चिरजीवो जोरी युगल ॥  
देत अशीश बनाय, ब्रजवासी प्रभुको सबै ॥

अथ व्योमासुरवधलीला ॥

दूजे दिन सुंदर ब्रजनाथा । गये वनहि गायनके साथ ॥  
बलदाऊ अरु ग्वाल सुहाये । शोभितसंग सुभग मन भाये ॥  
गई गाय वनमें अगुवाई । जहँ तहँ चरन लगैं सुखपाई ॥  
ग्वालन संग श्याम अनुरागे । चोर मिहिचनी खेलन लागे ॥  
भये मग्न तनु सुधि कछु नाहीं । दौरत दुरत फिरत मगमाहीं ॥  
तबहि कंस केशीवध सुनिकै । बार बार शोचत शिर धुनिकै ॥  
व्योमासुर इक अति बलवाना । माया चरित बहुत सो जाना ॥  
पठयो ताको तब ब्रज माहीं । मारन कह्यो श्यामको ताहीं ॥  
गोप वेष धरि सो ब्रज आयो । दूँढत हरिको वनमें पायो ॥  
गयो समाय सखनके माहीं । ताको किनहूँ जान्यो नाहीं ॥  
व्योमासुर इक बुद्धि उपाई । प्रथम बालकन लेहुँ चुराई ॥  
इकलोकरि जब हरिको पाऊँ । तब मारौँकै गँहि लै जाऊँ ॥

१ बनाई । २ पकड ।



दोहा-दुरन जाहि बालक जहां, तहां असुर संग जाय ॥

आवहि एकहि एकलै, पर्वत माहि दुराय ॥

सो०-रहि गये थोरे ग्वाल, जब यों बहु बालक हरे ॥

तब जान्यों नंदलाल, व्योमासुरके कपटको ॥

धरयो ध्यान तब कुँवर कन्हाई । हरिसों ताकी कहा बसाई ॥

तुरत असुरलै भूपर पटक्यो । प्राण देह तजि स्वर्गहि सटक्यो ॥

असुर मारिकै दीन दयाला । बालक शोधन चले गोपाला ॥

ऋषि नारद आये त्यहि काला । देखि श्याम मुख लख्यो विशाला ॥

उपज्यो प्रेम हर्ष उर पावन । बीन बजाय लगे यश गावन ॥

जय जय ब्रह्म सनातन स्वामी । आदिपुरुष प्रभु अन्तर्यामी ॥

अलख अनीह अनन्त अपारा । को जानै प्रभु रूप तुम्हारा ॥

सकल सृष्टिके सिरजन हारे । पालन लय सब ख्याल तुम्हारे ॥

युग युग यह अवतार गुसाई । भक्तनहित प्रभु लेत सदाई ॥

धरणी भार पाप भइ भारी । सुरन संग ले जाय पुकारी ॥

वाहि वाहि श्रीपति दैत्यारी । राखि लेहु प्रभु शरण उबारी ॥

राज अनीति सुरन तब भारी । शशि अरु सूर भये सब साखी ॥

दोहा-क्षीरसिन्धु अहि केणु प्रभु, श्रवणन परी पुकार ॥

तब जान्यों सुरसन्त माहि, दुखित दनुजके भार ॥

सो०-कह्यो भूमि अवतार, सिन्धु मध्य वाणी प्रकट ॥

श्रीपति प्रभु असुरारि, जगत्राता दाता अभय ॥

मधुरा जन्मि गोकुलहि आये । मात पिता सोवतही पाये ॥

नन्द यशोदा बालक जान्यों । गोपिन काम रूप करि मान्यों ॥

पय पीवतही बँकी विनाशी । भयो असुर सुनिकंस उदासी ॥

यहि अन्तर जे दनुज पठाये । ते प्रभु सब कौतुकहि नशाये ॥

धन्य धन्य ये ब्रजके वासी । जिन वश किये ब्रह्म सुखराशी ॥

मन बुधि वचन तर्क ते न्यारे । निगमहुं अगम न परत विचारे ॥

१ छिपन । २ पृथ्वी । ३ सूर्यनारायण । ४ जगरक्षक । ५ पूतना । ६ असुर ।



त ब्रज युवतिन बनाहि विहारे । कमल नयन प्रभु नन्ददुलारे ॥  
नील जलज तनु सुन्दर श्यामा । मोर मुकुट कुण्डल अभिरामा ॥  
मुरलीधर पीताम्बर धारी । वनमाला धर कुंजविहारी ॥  
बसहु रूप यह उर धर पाऊं । बहुरि नाथ प्रभु विनय सुनाऊं ॥  
यह अवतार जबहि प्रभु लीनो । आयसु सुरन यहै प्रभु दीनो ॥  
दैत्य दहन सन्तन सुखकारी । अब मारहु प्रभु कंस प्रचारी ॥  
दोहा-जब यह गाथा गायकै, नारद कही सुनाय ॥

बोले प्रभु करि तब कृपा, सुधा वषन मुसुकाय ॥  
सो०-जाहु वेगि मुनिराय, करहु सुरनको काज यह ॥

पठबहु मोहि बुलाय, नृप आयसुते मधुपुरी ॥  
जब प्रभु हँसि यह आयसुदीनो । तब प्रणाम प्रभुको ऋषि कीनो ॥  
हरषि चले मुनि नृपके पास । यहै बुद्धि मन करत प्रकाश ॥  
यहै बात हलधर समुझाई । जो वाणी ऋषि गये सुनाई ॥  
तुम प्रभु अखिल लोकके कारन । जन्मे हौ भुव भार उतारन ॥  
परमपुरुष अविगति अविकारा । अविनाशी अद्वैत अपारा ॥  
सिन्धु रूप जनहित सुखकारी । त्रिभुवन पति श्रीपति असुरारी ॥  
संकषेण जब ऐसो भाष्यो । सुनि सुनि श्याम हृदय सब राख्यो ॥  
तब हँसि कही भ्रातसों वानी । जो तुम कहत बात मैं जानी ॥  
कंसनिकन्दन नाम कहाऊं । केश गहाँ पुहुमी बसिठाऊं ॥  
ऐसे प्रभु हलधर समुझाये । बालक बहुरि शोधि सब लाये ॥  
व्योमासुर मारयो नंदलाला । भये सुदित सब देखि गुवाला ॥  
धन्य धन्य सब प्रभुको भाषे । कहत आज तुम हम सब राखे ॥  
दोहा-गाय गोप हलधर सहित, भये परम आनंद ॥  
सांझ समय वनसे चले, ब्रजको श्रीनंदनंद ॥  
सो०-आये नंद अवाँस, प्रभु ब्रजवासी दासके ॥  
गये कंसके पास, ऋषिनारद मथुरापुरी ॥



नारद गये कंसके पास। मन मारे सुख करे उदास ॥  
 आदर करि आसन बैठाये। हर्षि कंस मुनि निकट बुलाये ॥  
 कैसो सुख ऋषि मन क्यों मारे। कह चिन्ता मन बड़ी तुम्हारे ॥  
 नारद कही सुनो हो राज। कह बैठे कछु करौ उपाज ॥  
 त्रिभुवनमें नाहीं कोउ ऐसो। देख्यो नन्दसुवन मैं जैसो ॥  
 करत कहा रजधानी ऐसी। उपजी तुमको बात अनैसी ॥  
 दिन दिन भयो प्रबल बहु भारी। हम सब हितकी कहत तुम्हारी ॥  
 तब बोल्यो नृप गर्वित बानी। यह नारद तुम कहा बखानी ॥  
 यदपि कहत हो तुम हित केरी। तदपि बरावरि नहि वह मेरी ॥  
 कोटि दनुज मोसम मो पासा। जिनको देखि सुरन मन नासा ॥  
 कोटि कोटि जिनके संग योधा। जीतसके को जिनको क्रोधा ॥  
 तिनके बल कहैं कहूं बताई। देखत जिनको काल डराई ॥

दोहा—रहत द्वार संतत खरी, कोटि भटनकी भीर ॥  
 अतिप्रचंड कौदंडधर, महाबली रणधीर ॥  
 सो०—महामत गज एक, त्रिभुवन गामी कुबलिया ॥  
 ऐसे सुभट अनेक, नामी सुभटन को गनै ॥

कहा ग्वालके बालक दोऊ। तदपि बली उपजेहैं वोऊ ॥  
 प्रजालोग ब्रजके सब मेरे। सेवा करत सदा रहे मेरे ॥  
 तातेसकुचत हौं उन काजा। बालक सुनत होत मोहि लाजा ॥  
 भलीकरी यह बात बुझाई। मनकी डारों खटक मिटाई ॥  
 सुनहु और नारद मुनि हमसों। कहत मतेकी वाणी तुमसों ॥  
 उनपर सैना कहा पठाऊं। नन्द सहित सहजहि बोलवाऊं ॥  
 डारों गजके चरण खुदाई। और प्रजा ब्रज देउँ बसाई ॥  
 यहै बात मेरे मन आई। तब मुनि मुनि बोले सुसुकाई ॥  
 जो तुम अपनो गर्व सँभारो। तो जानो अब तुम उन मारो ॥  
 त्रिभुवनमें को बलहि तुम्हारे। यह कहि मुनि विधि धाम पधास्ते ॥

१ स्वर्ग, पाताल, मर्त्य ।



कंस आपने जिय यह जानी । नारद हितकी बात बखानी ॥  
 अब मारों नहिं गहैर लगाऊं । मथुराजिहि तिहि भांति बुलाऊं ॥  
 दोहा—यहै शोच उरमें परचो, नहिं विचार कछु और ॥  
 कैसे तिन्हें बुलाइये, करत मनहिं मन दौर ॥  
 सो०—कबहुं विचारत हीय, आपहि चढ़ि धाऊं ब्रजहि ॥  
 पुनि सकुचतहै जीय, ब्रजवासी प्रभु गुण समुझि ॥  
 जन्महिते वैहैं असुरारी । सातहि दिनके बकी सँहारी ॥  
 कागासुर बल गयो बढाई । सो सुरझाय गिरयो फिर आई ॥  
 शकट तृणा क्षणहीमें मारे । ख्यालहि और असुर संहारे ॥  
 गये प्रतिज्ञा करि करि जोई । आयो नहिं जीवत फिरि कोई ॥  
 अब उनको सहजही बुलाऊं । ऐसोको जिहि लेन पठाऊं ॥  
 जाय नन्दसों कहै बुझाई । श्याम राम सुन्दर दोउ भाई ॥  
 सुनि सुनि अति नृपके मन आयो । देखनको मधुपुरी बुलाये ॥  
 ऐसे करि जब वे ह्यां ऐहैं । बहुरो जियत जान नहिं पैहैं ॥  
 यह विचार उर में ठहरायो । तब आतुर अक्रूर बुलायो ॥  
 सुनि अक्रूर मनमें भय पायो । किहि कारण नृप वेगि बुलायो ॥  
 आतुर गयो पवँरि पर धाई । जाय पवँरिया खबरि जनाई ॥  
 सुनतहि बोलि महलमें लीनो । सकुचि गमन सुफलकसुतकीनो ॥  
 दोहा—कछु डर कछु जिय धीर धरि, गयो नृपतिके पास ॥  
 देखि डरचो मुख शोचवश, उरते लेत उसास ॥  
 सां०—हाथ जोरि शिरनाय, अनबोल्यो सन्मुख रह्यो ॥  
 लीनो ढिग बैठाय, मर्म वचन कहि कंस तब ॥  
 आपहि और तहां कोउ नाहीं । बोल्यो नृप सुफलकसुत पाहीं ॥  
 कहि जु गये नारद ऋषि बानी । सो सब कहिकै प्रगट बखानी ॥  
 सुनि अक्रूर कहत सत तोको । श्यामराम शालत उर मोको ॥  
 ज्यहि त्वहि विधि अब उनको मारौं । यह कछु दोषददय नहिं धारौं ॥



पठवों काहि जाहि ब्रज जोई । कहै प्रीति करि नंदहि सोई ॥  
 बल मोहन तुव तनय सुहाये । तुमहि सहित नृपराज बुलाये ॥  
 सुन गुण रूपहि अगम अगाधा । है नृप को देखन की साधा ॥  
 काली पीठ कमल ले आये । तब ते नृपके मनमें भाये ॥  
 सो बखसीस इन्हें अब देहैं । इनके वचन सुनत सुख पैहैं ॥  
 यह कहिकै उनको लै आवै । भेद सुकोऊ जान न पावै ॥  
 ऐसे कहि जब कंस सुनायो । तब अक्रूरहि धीरज आयो ॥  
 मन मन कहत कहा यह भावै । आपुहि अपनो काल बुलावै ॥  
 दोहा—कियो विचार अक्रूरतब, कहत जु कछु मैं और ॥

तौ मारैगो मोहि यह, अबहीं याही ठौर ॥  
 सो०—कह्यो मानिहै नाहि, काल याहि आयो निकट ॥

यह विचारि मन माहि, सुफलकसुत बोल्यो हरषि ॥  
 सुनहु नृपति नीके मन आनी । धनि धनि नारद सत्य बखानी ॥  
 बड़े शत्रु हमको वे दोऊ । उपजे नंदभवन में कोऊ ॥  
 कीजै वेग नृपति यह काजा । तुम सर और कौन म्वहिं राजा ॥  
 सुखते आयसु जो करि पाऊं । भोर वेगि तिहि ब्रजहि पठाऊं ॥  
 सुफलकसुत यह कही तयानी । तब हृष्यो नृप सुनि यह बानी ॥  
 फिर फिर कहत हिये गरवाई । घात बोलि मारौं दोउ भाई ॥  
 आधी निशि लौं यह मन कीनो । तब अक्रूर बिदा करि दीनो ॥  
 परचोसेज आलस जिय जानी । सेवाकरन लगीं सब रानी ॥  
 नेक पलक लागी झपकाई । लखे स्वप्न बलराम कन्हवाई ॥  
 काल सरिस दोउ देख डरानो ॥ झिझकि उठ्यो भग्न्यो ससकानो ॥  
 देखे जागत ह्वां नहिं दोऊ । चकित भई रानी सब कोऊ ॥  
 वृश्चन लगीं सबै अकुलाई । कह झिझके स्वप्ने नृपराई ॥  
 दोहा—महाराज झिझके कहा, स्वप्ने आज सकाय ॥  
 कहिये काको शोच अति, जीमें रह्यो समाय ॥



सो०-तब मनमें सकुचाय, सहजहि रानिनसों कह्यो ॥

भेद न भयो जनाये, मन शंका उर धकधकी ॥

सावधान प्रतिपाल कराये । जहँ तहँ योधा सकल जमाये ॥

श्याम राम भय पलक न लावै । अंतर शोच न प्रगट जनावै ॥

जाग्यो आप संग सब नारी । भई यामनिशि युगते भारी ॥

बैठत कबहुँ उठत अकुलाई । ठाढ़ो होत कबहुँ अँगनाई ॥

घरियाली सों पूछि पठावै । बार बार निशि खबर मँगावै ॥

शोचत सब प्रातहि कह करिहै । क्रोध भरयो नृपका शिर परिहै ॥

कही घरी निशि गणिकन बाकी । इक इक क्षण युग यह गति ताकी ॥

कहत ब्रजहि धौं काहि पठाऊँ । जासों कहि नँदसुवन मँगाऊँ ॥

पठवों अक्रूरहिको जाई । ल्यावैं ब्रजते ठगि दोउ भाई ॥

इत देख्यो सपनो नँदराई । बल मोहन कहूँ गये हिराई ॥

ग्वाल बाल रोवत पछिताहीं । कहत श्याम तौ अब ब्रज नाहीं ॥

संगहि खेलत रहे हमारे । निद्रा होय कहूँ अन्त सिधारे ॥

दोहा-दूत एक कोउ आयकै, सँगलै गयो लिवाय ॥

वाहीके दोउ द्वैगये, ब्रजवासिन विसराय ॥

सो०-अतिव्याकुल नँदराय, मुरझि परे धरणी सुनत ॥

विवश यशोदा माय, श्याम विरह व्याकुल खरी ॥

व्याकुल नरनारी ब्रजवासी । पशु पक्षी सब परमउदासी ॥

रोवत गिरत धरणि दुख पागे । अति अकुलाय नंद तब जागे ॥

धकधकात उर श्रवत नयन जलासुत अँग परसन लागे शीतल ॥

ससकत सुनत अतिहि अतुरानी । कह भरमें पूछत नँदरानी ॥

नन्दनहीं कह्यु भेद जनायो । श्यामहिं लखि धीरज उर आयो ॥

अति प्रभात रवि उगन न पायो । सुफलक सुत उत कंस बुलायो ॥

सुनतहि द्वारपाल उठि धायो । सोवतत अक्रूर जगायो ॥

कह्यो वेग चलिये नृपपासा । समुझि मन निशि चलयो उदासा ॥



ठाहो नृपति द्वारही पायो । देखत दूरिहिते शिरनायो ॥  
 अति आदर करि निकट बुलायो । शिरोपाव नृप तुरत मँगायो ॥  
 अक्रूरहि निजकर पहिरायो । बहुत कृपाकरि वचन सुनायो ॥  
 ल्यावहु नन्द महरि सुत दोऊ । तुम सम और चतुर नहिं कोऊ ॥  
 दोहा-मुख हरण्यो अक्रूर सुनि, हृदय गयो विलखाय ॥

असुर त्रास जियमें पर्यो, वचन कह्यो नहिं जाय ॥  
 सो०-दीनो रथहि चढ़ाय, जाहु वेगि ब्रज नृप कह्यो ॥  
 लै आवहु दोउ भाँप, अबहिं बिलम्ब न कीजिये ॥

तब अक्रूर कह्यो कर जोरी । सुनहु देव विनती इक मोरी ॥  
 बल मोहन प्रातहि दोउ भैया । वनको जायँ चरावन गैया ॥  
 जो उनको घरमें नहिं पाऊं । जाते प्रभु यह बात सुनाऊं ॥  
 आज नन्द गृह बसिहों जाई । प्रातहि लै आवहुँ दोउ भाई ॥  
 ऐसे जब अक्रूर जनायो । कंस बात यह मानि पढायो ॥  
 शीशनाथ तब रथ चढि हाँक्यो । सुफलक सुत ब्रज सन्मुख ताक्यो ॥  
 बहु प्रशंसि सब मल्ल बुलाये । चाणूरादि सकल चलि आये ॥  
 तिनसों कह्यो सुनौ सब वीरा । ब्रजमें रहत जु नन्द अहीरा ॥  
 कहियत बली तामुसुत दोऊ । राम कृष्ण जिनकह सब कोऊ ॥  
 बहुत असुर मेरे उन मारे । तातेहैं वे शत्रु हमारे ॥  
 उनको भैं मधुपुरी बुलायों । सुफलक सुतको लेन पठायों ॥  
 उनको मति जानौ तुम बारे । हँवे महाकठिन बल भारे ॥  
 दोहा-रंगभूमि ताते रच्यौ, चित्र विचित्र बनाय ॥

सावधान द्वैकै तहां, रहौ मल्ल सब जाय ॥  
 सो०-ऊँचो एक मचान, तहाँ और सुन्दर रच्यो ॥  
 जहां असुर परधान, बैठें सब मेरे निकट ॥  
 योधा और अनेक बुलावो । सावधान करि सब बैठावो ॥  
 ताते और पौरके बाहर । रहे कुबलियागँजतिहि ठाहर ॥

१ पहिराव, वस्त्राढकारार कंसभया ३ कृष्ण, बलदेव । ४ दशसहस्र हाथोंका बलवाला ।



राखो द्वार तीसरे जाई । गरुड कठिन अति धनुष धराई ॥  
 बहुभट तहां रहैं रखवारी । अस्त्र शस्त्र धारी बलभारी ॥  
 ऐसे सजग रहौ सब कोऊ । जब आवैं वे बालक दोऊ ॥  
 प्रथम धनुष उनसों चढ़वावो । उन्हें कहौ यह धनुष उठावो ॥  
 जब वे धनुष उठावैं नाहीं । घेरि लेहु उनको तिहिठाहीं ॥  
 ताही ठौर मारि दोउ लीज्यो । भीतरलैं आवन नहिं दीज्यो ॥  
 जो कदापि हांते चलि आवैं । तौ गजते आवन नहिंपावैं ॥  
 डारो गजके चरण रुंदाई । तुमको राखत अबाहिं जनई ॥  
 जो छल बल करिकै बचि आवैं । रंगभूमि आवन नहिंपावैं ॥  
 तौ सब मल्ल मारि उनलेहू । मोसमीप आवन नहिं देहू ॥  
 दोहा-ठौरहि ठौर सजायकै, सजगरहौ यहि भांत ॥  
 जिहिं तिहिं विधि मारौं उन्हें, नहीं दूसरी बात ॥

सो०-मन मन मौज बढ़ाय, ऐसे आयसुदे सबन ॥  
 गयो सदन नृपराय, सुनहु कथा अक्रूरकी ॥

अथ अक्रूरभागमन लीला

सुफलकसुत मनशोच अपारा । हैनृप कंस बड़ो हत्यारा ॥  
 मंत्र कियो मिलि मेरे साथ । पठयो मोहिं लेन व्रजनाथा ॥  
 कैसे आनितेऊ मैं जाई । भो देखत मारै दोउ भाई ॥  
 नगर निकसि रथकीनो ठाढ़ो । षण्णो विचार हृदय अति गाढ़ो ॥  
 गज मुष्टिक चाणूर सुमिरिकै । आयो मीर लोचनन ढरिक्कै ॥  
 अति बालक बलराम कन्हई । कहा करौ कछु नाहिं बसाई ॥  
 मोहिं मारि वरु वन्दि करावे । यह विचारकरि रथ न चलावे ॥  
 पुनि पुनि कृष्ण हृदयमें लयावे । चलत फिरत कछु बनि नहिं आवे ॥  
 प्रभु कृपालु सब अंतर्दामी । सुफलकसुतमन पूरण कामी ॥  
 सुमिरत कृष्णहृदय यह भाई । वे श्रीपति प्रभु त्रिभुवन राई ॥  
 अखिल जगतके कारण कर्ता । उत्पति पालन अरु संहर्ता ॥  
 भूमि भार कारण अवतारा । को जानै गुणरूप अपारा ॥



दोहा--धन्य कंस जिन मोहिं ब्रज, पठयो लेन गोपाल ॥

जाय रूप वह देखिहौं, निगम नेति नंदलाल ॥

सो०--यह बिचार उर आनि, रथ हांकयो अक्रूर तब ॥

भयो शकुन शुभवानि, मृगन आये दाहिने ॥

दाहिने देखि मृगनकी माला । सुफलकलुत उरहर्ष विशाला ॥

कहत आज इन शकुन नजाई । भुज भरि मिलिहौं प्रभु सुखदाई ॥

रथाम सुभग तनु परमसुहावन । इंदुबंदन चय ताव नशावन ॥

अंग विभंग किये गोपाला । सारसदूते नयन विशाला ॥

मोर कुकुट कुण्डल वनमाला । कटिकछनी पट पीत विशाला ॥

तनु चंदनकी खौर बनाये । नटवरवेष मनोज लजाये ॥

हैं गैयनके सँगठाटे । ग्वालन मध्य महाछवि बाटे ॥

सो दरशन लखि होब सनाथा । धरिहौं जाय चरण पर माथा ॥

जे शुभ चरण पितामह ध्यावैं । महिमा जिनकी वेदबतावैं ॥

जिन चरणन कमल रतिमानी । शंभु धन्योशिर जिनको पानी ॥

सनकादिक नारद यशगावैं । जिन चरणनयोगी जितल्यावैं ॥

बलि जिनकी मयींदन पाई । हारि मानि निजपीठ नपाई ॥

दोहा--शिलांशाप मोचन करन, हरन भक्त उरपीर ॥

आज देखिहौं ते चरण, सकल सुखन की सीर ॥

सो०--अरुण कंजके रंग, अंकित अंकुश कुलिश ध्वज ॥

गोप बालकन संग, गो चारत वन पाइहौं ॥

परिहौं जाय चरणपर जबहीं । भुजन उठाय भेटिहौं तबहीं ॥

परसत उर आनंद उपजैहैं । अंगन पुलकि तनोरुह ऐहैं ॥

देखत दरश परश सुख हैहैं । प्रेम सलिल लोचन भरिजैहैं ॥

कुशल पूछि हैं म्वाहि सुखदानी । कहि नहिं सकिहौं गद्गद बानी ॥

बारहि बार वचन मृदु कैहैं । सुनि सुनि श्रवण परम सुखपैहैं ॥

१ वेद । २ हरिणोकेयूथ । ३ चन्द्रवदन । ४ कामदेव । ५ ब्रह्मा । ६ प्रभुता ।

७ लक्ष्मीजी । ८ चरणोदक-गंगाजी । ९ थाह । १० अहल्या । ११ प्रेमाश्रु । १२ कान ।



यों अक्रूर ध्यानमें अटक्यो । भूल्यो पंथ फिरत रथ भटक्यो ॥  
हरि अनुराग भरयो उर माहीं । रंही देहकी सुधि कछु नाहीं ॥  
सांझ भई गोकुल नहि पायो । नहि जानत कोहों कहँ आयो ॥  
किन पठ्यो कहँ जात न जानी । रथ बाहनकी सुरति भुलानी ॥  
भयो हर्ष उर प्रेम विशाला । दशहूँ दिशि पूरण गोपाला ॥  
हरि अंतर्ध्यामी सब जानी । भक्त बल्लल है जिनकी बानी ॥  
भक्त भाव करि जो कोउ ध्यावैं । मिलत तिन्हें नहि विलम लगावैं ॥  
दोहा-गवाल संग वृन्दा विपिन, चारत धेनु सुजान ॥

चले हर्षि हलधर सहित, भक्त हेतु जिय जान ॥

सो०-यमुन पार करि गाय, गौरी गावत हर्षि हरि ॥

गायन तहां मंगाय, लागे गोदोहन करन ॥

गायन दुहन लगे सब ग्वाला । आपहु दुहत भये नैदलाला ॥  
भक्त हेतु यह सुख उपजायो । तहां दरश सुफलकसुत पायो ॥  
रहि न सक्यो रथपर सुख व्याकुला उतरि परयो भूपर अति आकुल ॥  
भयो मनोरथ मनको भायो । दौरि श्याम चरणन शिरनायो ॥  
पुलकि गात लोचन जल धारा । हृदय प्रेम आनंद अपारा ॥  
कृपासिंधु करि कृपा उठायो । भक्त हेतु मिलि कंठ लगायो ॥  
भयोजु सुख सो सोई जाने । ब्रजवासी किहि भाँति बखाने ॥  
जो अक्रूर चरित मन कीनो । तैसिय भाँति दरश हरिदीनो ॥  
मधुर वचन श्रवणन सुखदाई । पुनि पुनि पूजत कुँवर कन्हौई ॥  
आनन चारु निरखि सुखकाशी । तब नोख्यो अक्रूर सँभारी ॥  
कुशल नाथ अब दरश निहारी । दैत्य दलन भक्तनहितकारी ॥  
भेदहि भेद कंसकी बानी । सुफलकसुत सब प्रगट बखानी ॥  
दोहा-सुनत वचन अक्रूरके, मुसकाने ब्रजचन्द ॥

फरकि भुजा भूभारकी, टारन असुर निकन्द ॥

सो०-मिले राम पुनि आय, परमप्रीति अक्रूरसों ॥



उर आनंदन समाय, वासुदेव दोऊ निरखि ॥

कहि कहि उठत इहै नंदलाला । हमहि बुलायो कंस भुआला ॥  
 लेबेको अक्रूर पठाये । कालहि करि अति कृपा भँगाये ॥  
 सुनतहि भये चकित सबग्वाला । कहा कहतहैं मदन गोपाला ॥  
 भये प्रेम वश मति अकुलानी । भरि आयो नयननमें पानी ॥  
 निरखि सबनको मुख सुखदानी । तब बोले करि श्याम सयानी ॥  
 चलहु कालिह देखहि नृप कंसा । मति आनौ जियमें कछु संसा ॥  
 यह कहि चले हर्षि ब्रज बालन । कछु हर्ष कछु संशय ग्वालन ॥  
 अति कोमल बलराम कन्हारि । हैंसि लीन्हें अक्रूर उठाई ॥  
 सुमनहुते हरवे सुख दनियां । दोउ लसत सुफलक सुत कनियां ॥  
 ग्वाल सकल लीनो रथ डोरी । पहुंचे आय सकल ब्रजखोरी ॥  
 लखि जहैं तहैं ब्रज लोग चक्राने । कंस दूत सुनि नन्द सकाने ॥  
 स्वप्नो सखुझि शोच उर छायो । मन मन कहत कछौ धौ आयो ॥  
 दोहा-आतुर उठि आगे चले, लेत नन्द उपनन्द ॥  
 देखन प्राये धरमते, सुनत नारि नर वृन्द ॥

सौं-श्याम राम उरलाय, स्यंदन तजि सुफलक सुवन ॥

आवत लखि नंदराय, भये हर्ष विस्मय विवश ॥  
 सादर तिनको शशि नवाये । कुशल प्रश्नकरि गृह लै आये ॥  
 चरण धोय बैठक शुभ दीनी । विविध भौतिभोजन विधि कीनी ॥  
 संकर्षण अरु कुँवर कन्हैया । मिलिगये अक्रूरहि दोउ भैया ॥  
 क्षणक होत नहि नेक नियारे । मनहुँ दुलार उनहि प्रतिपारे ॥  
 तब अक्रूर संग लै दोऊ । भोजन क्रियो लखत सब कोऊ ॥  
 हरिद्वत उत फेरत नहि आखैं । सब ब्रजलोग मनहि मन भाखैं ॥  
 उठे अँचै तब पान खवाये । आदर सहित पलंग बैठाये ॥  
 पुनि करजोरि नंद याँ भरियो । कहा कृपा करि पग इतराख्यो ॥  
 तब ऐसे अक्रूर सुनायो । बल मोहनको नृसिंह बुलायो ॥  
 तुमको कछो संगलै आवैं । सुनि सुनि गुण मेरे मन भावैं ॥



देखनको अभिलाष जनायो । ताते वेगहि प्रात बुलायो ॥  
 ब्रजके लोग सुनत यह बानी । भये चकित सुधि बुद्धि हिरानी ॥  
 दोहा-चकित नन्द यशुमति चकित, मनहीं मन अकुलात ॥

हरि हलधरको सैनदे, सबै बुलावत जात ॥  
 सो०-माया रहित मुकुंद, जाके योग वियोग नाहीं ॥

सदा एक आनंद, अविगति अविनाशी पुरुष ॥  
 प्रेम भक्तकी कछु उर लाजा । कीनो चहैं भूमि सुर काजा ॥  
 जाते नहिं काहू तनु हेरत । बोलत नहीं नयन नहिं फेरत ॥  
 जनु पहिचान कबहुँ की नाहीं । लिख लिख सब डरपत मन माहीं ॥  
 हरि सुफलक सुतसों मन लायो । यहै कहत नृप हमहिं बुलायो ॥  
 हुती साध हमहू मन माहीं । कबहुँ नृपति बोल्यो क्यों नाहीं ॥  
 हँसि हँसि ऐसे कहत सुरारी । यहसुनि विकल सकल नरनारी ॥  
 श्याम नहीं कछु मनमें आने । भये नेहैतजि तुरत विराने ॥  
 कहति परस्पर तिय अकुलाई । कितते आयो यह दुखदाई ॥  
 महाक्रूर अक्रूर नामको । जैहै प्रात लिवाय श्यामको ॥  
 जान कहत या संग कन्हाई । कैसे प्राण रहेंगे माई ॥  
 बिलिखि वचन शोचति सब ढाठी । मनहुँ विचित्र चित्र लिख काठी ॥  
 अब हम संग तुम्हारे जैहैं । भली भाँति नृप देखन पैहैं ॥  
 दोहा-ठौर ठौर ऐसी दशा, कहत न आवत बयन ॥

बढी श्यामबिलुरन व्यथा, ढरत उमँगजलनयन ॥  
 सो०-फिरत विकल सब ज्वाल, पूछत एकहि एकसों ॥

चलन कहत नँदलाल, मन मलीन व्याकुल सबै ॥  
 ब्रजके लोग विकल सब देखैं । तब अक्रूर सबन पीरतोंखैं ॥  
 चिन्ता भतिहि करो मन माहीं । इनको कछु और डर नाहीं ॥  
 भंजन धनुष यज्ञके काजा । मधुपुरि इनहि बुलायो राजा ॥



जिन गिरि कर धारि ब्रजहि बचायो । बहुरि हमैं वैकुण्ठ दिखायो ॥  
जाहि गयो सुरपति शिरनाई । लयायो नाथि कालि अहि जाई ॥  
बहणधाम देखी प्रभुताई । करति हते सब तुमहि बड़ाई ॥  
कहा कंस ताको भय मानैं । इनकी महिमा येही जानैं ॥  
कितक धनुष हरि तुरत चढ़ैहैं । देखत इनहिं कंस सुख पैहैं ॥

दोहा—जो करि है कलु कपट तौ, सब समरथ गोपाल ॥  
हरि हलधर भैया उभय, ये कालहुके काल ॥  
सो०—हर्ष सबै अहीर, हरिप्रताप उरमें समुक्षि ॥

सब लायक बल वीर, धीर धरौ यह जानिकै ॥  
बार बार यशुमति अकुलाई । कहत रहौ सुत कुँवर कन्हाई ॥  
अबहीं तात बहुत तुम बारे । मथुरा बसत प्रलू हत्यारे ॥  
वयो बलराम कहत तुम नाहीं । तुमविनलाल मात मारि जाहीं ॥  
कहत राम सुनु यशुमति मैया । तूमतिचारी जान कन्हैया ॥  
मतिहि कंसभय व्याकुल होहीं । एक भरोसो हरिको मोहीं ॥  
प्रथमहि बकी कपट करि आई । अतिहि प्रबल विषकुचलपटाई ॥  
चारहि दिनके तबहि कन्हाई । तौ देखतही ताहि नशाई ॥  
शकट तृणावृत वत्स अन्याई । अग्र अरिष्ट केशी दुखदाई ॥  
एकहि पलमें सकल संहारे । विष जलते सब सखा उबारे ॥  
गोवर्द्धन जिन करपर धारयो । महाप्रलयको जल सब टारयो ॥  
हरि सम बली और कोउ नाहीं । तू मत शोच करै मनमाहीं ॥  
हम बालक कह तुमहिं सिखावैं । धीर वरौ हम फिरि ब्रज आवैं ॥

दोहा—सुनि चरित्र गोपालके, उर आयो अवरोहि ॥  
जो कलु करै सो सत्य प्रभु, आवत है सबसोहि ॥  
सो०—कह्यो नंद तब आय, मैं लैजैहों संग हरि ॥  
धनुषयज्ञ दिखराय, लै ऐहीं तुरतहि बहुरि ॥



## अथ मथुरागमनलीला ॥

ऐसेहि सबको रात बिहानी । भयो प्रात चिरिया चुहचानी ॥  
 महर कछो सब गोप बुलाई । दधि घृत भार सजौ बहु जाई ॥  
 नृपति भेंट हित करहुँ सँजोई । हरिके संग चलौ सब कोई ॥  
 ग्वाल सखा यह सुनि अकुलाने । चहत श्याम मधुपुरि निज जाने ॥  
 परचो शोर ब्रज घर जहँ ताई । हरि मुख देखनको सब धाई ॥  
 सजत ग्वाल चलबेको साजा । गैया फिरत दुहनके काजा ॥  
 कछो श्याम अक्रूरहि तबहीं । जोतहुतात तुरत रथ अवहीं ॥  
 सुफलकसुत आपसु जब पायो । सहित सँकोच रथहि पलनायो ॥  
 सुफलक ढिगते दोऊ भाई । होत नहीं न्यारे कहूँ राई ॥  
 देखतही यशुमति अकुलानी । परी धरणि बिलपति बिललानी ॥  
 विकल कहति मोहिं तजो दुलारे । जात किये सुनो ब्रज प्यारे ॥  
 यह अक्रूर ठगौरी लाई । मोहे मेरे बाल कन्हारै ॥  
 दोहा-यह सुफलकसुत ब्रजिये, तुम्हीं हरे मोवाल ॥  
 वृद्ध समयकी लकुटिया, मेरे मदन गोपाल ॥  
 सो०-देखहु मनहिं विचारि, लाभ कछू यामें तुम्हैं ॥  
 दियो धरम डरडारि, क्रूर भये इत आयकै ॥  
 चलत जात चितवत ब्रजनारी। विरह विकल तनु सुरत बिसारी ॥  
 जहँ तहँ चित्र लिखीसी ठाढ़ी । नयनन नीरनदी जिमि बाढी ॥  
 लगत निमेष कूल दोड नाहीं । भ्रमति नाब श्रुतरी ता माहीं ॥  
 ऊरध श्वास समीर झकोरत । चित्र कपोल तीरतरुतीरत ॥  
 काजलकीच कुचीलकिये तट । अधर कपोल उरज अंचलपेट ॥  
 रहे जहां तहँ पथिक जकेसे । चरण हस्त मुख वचन थकेसे ॥  
 श्याम विरह व्याकुल ब्रजवाला । नीरहीन जिमि मीन बिहाला ॥  
 सुखत अधर मदन मुरझाने । जनु हिम परस कमल कुम्हिलाने ॥  
 कहति परस्पर वचन अधीरा । गदगद वचन ढरत दृग नीरा ॥  
 जीवन धन प्राणनको प्यारो । लिये जात अक्रूर हमारो ॥

१ पलक । २ घुंघट । ३ पाला ।



सुनहु सखी अब कीजै सोई । जाते बहुरि शूल नहि होई ॥  
गयो दूर रथ रह्यो न जैहै । पुनि पाछे पछितायो ऐहै ॥  
दोहा-परिहरि यश आशा जियन, लाज पंचकी कान ॥

करिये विनती इयामसों, सखी समय पहिचान ॥  
सो०-होनी होय सो होय, पाँय परशि हरि राखिये ॥  
नातरु मरिहैं रोय, समय चूक उर शालिहै ॥

प्रभु अन्तर्यामी सुखदानी । विरह बिकल गोपी जन जानी ॥  
चितये नयन कमल दल लोचन । सकल शोच संताप विमोचन ॥  
मृदु मुसकानि ठगोरी डारी । श्याम उगी सब ब्रजकी नारी ॥  
रहि गइँ चितवत वचन न आयो । चढ़े श्याम रथ अवसर पायो ॥  
हरिको नाम छुमिरि मन माहीं । चढ़े अक्रूर तुरंत तहांहीं ॥  
देखत महारि यशोमति धाई । पुन पुन कहि ढेर लगाई ॥  
मोहन नेकु देखि इत लैहौ । बिछुरत लाल भेंटम्बाहिं दैहौ ॥  
राखहु तात बोध करि भैया । बहुरौ चढ़हु विमान कन्हैया ॥  
लेहु निहारि जन्मको खेरो । बहुरौ ब्रजमें होत अँधेरो ॥  
यह कहि ग्वाल सखनको फेरो । अपनी गाय जाय सब धेरो ॥  
ऐसे कहि यशुमति बिलखाई । किये यत्न बहु प्राण न जाई ॥  
बिलपति बिकल राम महतारी । अति व्याकुल सब ब्रजकी नारी ॥

दोहा-देखि दुखित ब्रज लोग सब, और यशोदा माय ॥

तब हरि कहि यह सुख दियो, बहुरि मिलेंगे आय ॥  
सो०-धरणीके हितकारि, मथुरातन चितये बहुरि ॥

कह्यो दृगन सनकारि, रथ हांकन अक्रूर सों ॥  
बार बार यशुदा यों भाखै । कोऊ चलत गोपालहि राखै ॥  
सुफलकसुत बैरी भयो आई । हरे प्राण धन बाल कन्हवाई ॥  
हरहु कंस बहु गोधन सारो । कै करि मोहिं वन्दिमें डारो ॥  
ऐसेहु दुख श्याम सभागे । खेलहिं मों नयननके आगे ॥  
यह कहि महि लोटत अकुलानी । अतिही दुखित नन्दकी रानी ॥



गोपी जन विरहानल डाढीं । रहि गई प्रेम वियोगनिडाढीं ॥  
जिमि कुसुदिनि गण नीर विहीना । रविहि प्रकाश त्रासते दीना ॥  
श्यामविमुख क्षणक्षण कुम्हिलानी । बहुरो मिलन कठिन जियजानी ॥  
बल बुधि थकित श्रवत जल लोचन । चलि नहिं सकीं रहीं मद मोचन  
गवैंडेलों सब गई विहाला । ब्रज तजि गमन कियो गोपाला ॥  
लै गये मधु अकूर निकारी । माखी ज्यों सब दीन बिडारी ॥  
देखत रहीं थकी टकलाई । जब लागि धूरि दृष्टिमें आई ॥  
दोहा--भये ओट जब दृगनते, मुच्छिं परीं विलखाय ॥

कहाति गयो रथ दूरि अब, धूरि न परति लखाय ॥  
सो०--कहा करैं ब्रज जाय, मन हरि लैगयो साँवरो ॥

परत न आगे पाय, पाछेही लोचन लखत ॥  
वदन विकल विरहारसमातीं । भई न पवन सङ्ग उडि जातीं ॥  
रजहू नहीं विधाता बानी । जाती चरण कमल लपटानी ॥  
भई नहीं यक रथको अङ्गा । जाती चली तहां लागि सङ्गा ॥  
बिछुरे आज श्याम सुखराशी । तौ परतीति दृगनकी नाशी ॥  
उडि नहिं गये श्याम सँग लागे । कृष्ण मयी नहिं भये अभागो ॥  
रसिक प्रेमके जगत बखाने । रूप लालची सब कोउ जाने ॥  
सो करनी कछु इन नहिं कीनी । वृथा मीनकी छबि हरि लीनी ॥  
धनि धनि मीन प्रीतिपथ स्पन्धे । साखि ये नवन हमारे काचे ॥  
अब ये शूल सहत जिय शोचत । उमंगि उमंगि भरि भरि जल मोचत ॥  
हरि बिन अब लखिये ब्रज सुनो । समय चूक सहिये दुख दूनो ॥  
भई अजान सनै सुन माहीं । काहु बलत गछ्यो रथनहीं ॥  
वृथा लाज करिकाज बिनरथी । सखा दुखहविरहा दुख भारचो ॥  
दोहा--यों ब्रजतिय पछिताय सब, देखि यशोदहिदीन ॥  
लै आई सब नंद गृह, कश तनु वदन मलीन ॥  
सो०--ब्रजतिय परम उराल, हरि बिन सुख संपतिसपन ॥



रहैं प्राण इहि आश, श्याम कह्यो मिलिहौं बहुरि॥  
 खग भृग विकल जहां तहैं बोलैं । गाय वत्स राँमत सब डोलैं ॥  
 तरुवेली पल्लव कुम्हिलानी । ब्रजकी दशा न परति बखानी ॥  
 चले नंद गोपन सँगलैकै । ब्रजबासिनको धीरजदैकै ॥  
 बाल सखा हरिके सुखदाई । दर्शन लागि चले सब धाई ॥  
 उत अक्षर शोच मन माहीं । कियो काज मैं नकीो नाहीं ॥  
 बल मोहन भैया दोउ बारै । अति कोमल नवनीत पियारै ॥  
 करिकै जननी जनक दुखारी । व्याकुल सबै घोषकी नारी ॥  
 मैं छै जात कंसपै तिनको । माँ देखत मारैगो इनको ॥  
 धृक धृक धृक कुबुद्धि यह मैरी । जाहूँ लिबाय इन्हैं ब्रज फेरी ॥  
 कंस आज मारे वरु मोहीं । हरिको जाय देहुँ नहि ओहीं ॥  
 यहि अंतर यमुना नियराई । ठाढ़ो कियो तहां रथ जाई ॥  
 अंतर्दामी हरि भगवाना । भक्त हृदय संशय पहिचाना ॥  
 दोहा-भूख लगी तब हरि कह्यो, हमें कलेऊ देहु ॥  
 करि यमुना स्नान पुनि, तात तुमहुँ कछु लेहु ॥  
 सो०-सुनत वचन मृदुकान, सुफलक सुत पुनि तुरतही॥  
 कछु भेवा पकवान, भोजन दुहुँ भैयन दियो ॥  
 आप स्नान करन मन दीनो । यमुना पैठि संकल्प कीनो ॥  
 जबहीं शीश नीरमें डारयो । तब अचरजयक भाव निहारयो॥  
 राम कृष्ण रथपर सुखदाई । जल भीतर शोभित दोउ भाई ॥  
 चकित भयो जलते शिर काढयो । देख्यो रथ बाहर सो ठाढयो ॥  
 बहुरो बूडि सलिलमें पेर्यो । वैसोइ फेरि तहां रथ देख्यो ॥  
 क्षण जलमें क्षण प्रकट निहारै । पुनि पुनि संभ्रम बुद्धि विचारै ॥  
 स्वप्नकिधौं जाग्रत यह होई । कैधौं माँ मतिमें भ्रम कोई ॥  
 कैधौं जलमें रथकी छाया । कैधौं यह हरिकी कछु माया ॥  
 भयो विकलमति थिर कछु नाहीं । देखन लग्यो बहुरि जल माहीं ॥



जब अक्रूर बहुत भकुलायो । निज स्वरूप तहँ श्याम दिखायो ॥  
देखत भयो तहां जल माहीं । सकल देव ठाढ़े हरि पाहीं ॥  
प्रस्तुति करत चरण चित दीने । नमित कंधपर सम्पुट कीने ॥  
दोहा-शेष सहस्रफणिमणिनयुत, जग मग ज्योति अनूप ॥

श्वेत चरण पटपीत युत, राजित हलधर रूप ॥  
सो०-नव नीरद तनु श्याम, पीत वसन लावण्य निधि ॥

भुज प्रलम्ब अभिराम, शेष अंक हरि सोहर्ही ॥  
चारु अरुण पङ्कजदल नयना । चितवन चारु चारु मृदुवयना ॥  
चारु तिलक बर बाल विशाजै । चारु कुटिलकुन्तल छाष छाजै ॥  
चारु तिठक नासिका सुहाई । चारु कपोल अधर अरुणाई ॥  
सुन्दर भ्रवणचिभुक दरग्रीवा । चारु बसन बिहसनछवि सीवा ॥  
उर विशाल श्री चिह्न विशाजै । उदर सुधर रोमावलि राजै ॥  
नाभि गँभीर क्षीण कटि देशू । भुज विशाल बरचारु सुबेशू ॥  
जब गुल्फ अति चारु सुहाई । पद कमलन नख शशि छविछाई ॥  
नख शिख अनुपम रूप विशाजै । दिव्याभरण सकल आँछाजै ॥  
कुंडल मुकुट जटित मणि माला । मुक्तमाल वनमाल विशाला ॥  
यज्ञोपवीत पीताम्बर काँधे । कौस्तुभ मणि अङ्गन बरवाँधे ॥  
कर पल्लवन मुद्रिका राजै । शङ्ख चक्र गद पद्म धिराजै ॥  
भुद्रवाटिका अति श्रुति कारी । मणित जटित नूपुर छवि भारी ॥  
दोहा-नन्दसनन्दादिकनते, दिव्य पारषद आहिं ॥

कर जोरे ठाढ़े सबै, परिचर्याके माहिं ॥  
सो०-ठाढ़ी जोरे हाथ, माया निज माया सहित ॥

भक्त भक्तके साथ, अंबरीष प्रह्लाद बालि ॥  
शिव अज सहित शिवा अरुघानी । सनकादिक नारद अरु ज्ञानी ॥  
भक्तन सहित सुरासुर जेत । कर जोरे ठाढ़े सब तेते ॥  
चन्द्र कुने वरुण दिक्पाला । मनु विश्वकर्म धर्म यम काला ॥



बंदन करत चरण धरि माथा । गावत वेद सकल गुण गाथा ॥  
 जलमें लखि अकूर भुलान्यो । कृष्ण प्रभाव प्रगट सब जान्यो ॥  
 चिंता सकल चित्तकी नाशी । जान्यो कृष्ण ब्रह्मा अविनाशी ॥  
 मोहिं कृपा करि दर्शन दीनो । तहँ प्रणाम सुकलकसुत कीनो ॥  
 अति आनंद बढ्यो मन माहीं । अस्तुति करन लग्योतिहि ठाहीं ॥  
 धन्य धन्य प्रभु अंतर्यामी । नारायण त्रिभुवनके स्वामी ॥  
 सकल विश्व तुमहीं विस्तारो । विश्वरूप है रूप तुम्हारी ॥  
 निर्गुण निर्विकार अविनाशी । लीला सगुण गुणनकी रीशी ॥  
 प्रभु तुम सब देवनके देवा । जानै कौन तुम्हारी भेवा ॥  
 छंद-कोजान तुम्हरो भेव हरि, तुम सकल देव मयी प्रभो ॥  
 आदि कारण सबहिके तुम, विश्व सब तुम्हरो विभो ॥  
 नाग नर सुर असुर अग जग, दास सब तुम्हरो हरी ॥  
 रहति माया सब तुम्हारी, जाहि तुम ज्यहिं विधि करी ॥  
 योग यज्ञ अनेक कर्मनकरि, तुम्हें सब ध्यावहीं ॥  
 जैसी जाकी भाव तैसी, तुमहिं ते फल पावहीं ॥  
 अति अगाध अपार तुम गति, पार काहू नहिं लख्यो ॥  
 शंभु शेष गणेश विधना, नेति निर्गमनहू कह्यो ॥  
 भक्त हित धरि विविध तनु तुम, चरित अद्भुत विस्तरौ ॥  
 मच्छ कच्छ वराह वपु होय, वेद गिरि तुम उद्धरौ ॥  
 होय नरहरि भक्त प्रण करि, शरण हित बामन भये ॥  
 भृगु वंश मणि अभिराम तनु धरि, मानमय क्षत्रिय हये ॥  
 राम रूप निपाति रावण, अरु विभीषण नृप कियो ॥  
 कंस अरि यदुवंश भूषण, कृष्ण वपु छविनिधिलियो ॥  
 बौद्ध रूप दयालु कल्किहिंसादि, कर्मन भावहीं ॥



निःकलंकमलेच्छेहा, दशरूप श्रुति तव गावहीं ॥  
दोहा-तव गुण रूप अनंत प्रभु, हौ अजान जगदीश ॥  
यों स्तुति अक्रूर करि, नायो पद पर शीश ॥  
सो०-तवहिं श्याम सुखदाय, अंतरहित जलते भये ॥

निकरयो अति अकुलाय, तव जलते अक्रूर पुनि ॥  
लखी कृष्णकी जष प्रभुताई । बढ्यो हर्ष अति उर न समाई ॥  
भूले नेम न कछु कहिजाई । मगन ध्यान बलराम कन्हाई ॥  
कहत मनहिंमन यह अविनाशी । पूरण ब्रह्म सकल गुणराशी ॥  
हरण करण समरथ भगवाना । नाहिन इन समान कोउ आना ॥  
कितक कंस भेदी उर सन्शा । येकरिहैं ताको निरवन्शा ॥  
चल्यो हांकि रथ तव हर्षाई । नैन्द उपनन्द मिले तहैं आई ॥  
हरि अक्रूरहि बूझत जाहीं । करि सखानमन मन सुखकाहीं ॥  
कही तात तुम अब हरषाने । प्रथमाहि कछु बहुत मुरझाने ॥  
कहौ सांच हमसों सोइ बानी । तव स्तुति अक्रूर बखानी ॥  
धन्य धन्य प्रभु धनिश्रीकंता । गुणन अगाध अनादि अनंता ॥  
निगमनेति कहि जाहि बखानैं । सहस्रानन नित नव गुण गानैं ॥  
करिकै कृपा जानि निज दासा । दियो दरश संशय सब नासा ॥  
दोहा-अब म्वाहिं प्रभु बूझत कहा, तुम त्रिभुवनके नाथ ॥

कर्ता हर्ता जगतके, सकल तुम्हारे हाथ ॥  
सो०-कहाबापुरोकंस, कहा मल्ल कह कुबालिया ॥  
अब करिये निर्वेश, वेग नाथ ऐसे खलन ॥  
सुनि मोहन सुफलक सुत बानी । भये प्रसन्न भक्त सुखदानी ॥  
जात चले रथपर दोउ भाई । सम्मुख दृष्टि मधुपुरी आई ॥  
तरणि किरण महलन छवि छाई । जगमगात नभ सुंदरताई ॥  
अक्रूरहि बूझत घनश्यामा । कहियतहै मधुपुर ये नामा ॥  
श्रवणन सुनत रहत हे जाही । देख्यो आजु दृगनते ताही ॥

१ म्लेच्छोंके हतनेहरे ।



वचन कोटि कंगूरासोहैं । बैठे मनहु मदन मन मोहैं ॥  
 वन उपवन पुरके चहुँ पाहीं । अति भावत मेरे मन माहीं ॥  
 लाखि लाखि हरि मथुराकी शोभा । पुनि पुनि पुलकत करि मन लोभा ॥  
 तहां जन्म जियमें करि जाने । ताते अधिक हर्ष उर माने ॥  
 बाजतिनौ बति नृपति दुवारा । होत शब्द बरियाल उदारा ॥  
 सुनि सुनि मन आनंद बढ़ावैं । नगर शोर सुनि रुचि उपजावैं ॥  
 कनक खचित मणि जटित अटारी । धवलनवल अति ऊँचि सवारी ॥  
 दोहा-ध्वजपताक तोरण कलश, जहँतहँ ललितवितान ॥

मुक्ता झालरि झलमलैं, कोकरिसकै बखान ॥  
 सो०-निरखि निराखि हर्षात, मन मोहन अक्रूरको ॥  
 बलहि देखावत जात, लसित लालकर पल्लवन ॥

कह अक्रूर सुनहु ब्रजनाथा । भई आजु मधुपुरी सनाथा ॥  
 तुमहि विलोकि विराजति ऐसी । पति आगमति य सोहति जैसी ॥  
 कसी कोट कटि किंकिणि मानौ । उपवन वसन विविध रँग जानौ ॥  
 मंदिर चित्र विचित्र सुहाये । जनु भूषण रुचि रँग बनाये ॥  
 जहँ तहँ विविध बाजने बाजैं । मनहु चरण नूपुर ध्वनि साजैं ॥  
 धामन ध्वजा विराजतहँ जिझि । संभ्रम गति अंचल चंचल तिसि ॥  
 उच्च अटन पट ऋतु छवि छाजै । जनु उर आनंद उमंगि विराजै ॥  
 भली अति सुख संभ्रम ताते । प्रगटे कनक कलश कुच जाते ॥  
 मोखा द्वार दरीची द्वारा । लागे बिटुम कुलिश किंवारा ॥  
 मनहु तुम्हारे दर्शन लागी । नयननरहीं निमेषन त्यागी ॥  
 मुक्ता झालरि खिरकि विराजैं । हँसति मनो आनन्दन साजैं ॥  
 जगमगि ज्योतिरही छवि झली । जनु तुम पथ निहारत भूली ॥  
 दोहा-नीके हरि अवलोकिये, पुरी परम रुचि रूप ॥

असुर कंसको जीतिकै, होहु इहाँके भूप ॥  
 सो०-सुनि बिहँसे नंदलाल, ललित वचन अक्रूरके ॥  
 पहुँच्यो रथ ततकाल, जाय निकट मथुरा पुरी ॥



नगर निकट पहुँचे जब जाई । सुफलक सुवन सहित दोउ भाई ॥  
 गौर श्याम रथ पर दोउ राजें । कौटिनकाम निराखि छबिलाजें ॥  
 कंस दूत लखि जहँ तहँ धाये । समाचार सब नपति सुनाये ॥  
 आये बल मोहन दोउ भाई । सुनतहि नाम उठ्यो अकुलाई ॥  
 गहि कर खँड चर्मलै धायो । रंगभूमिके महलनआयो ॥  
 गज मुष्टिक चाणूर बुलाये । और सुभट सब बोलि पठाये ॥  
 तिन सन कछो सजग सब होऊ । ठाँहि ठाँ रहौ सब कोऊ ॥  
 बहुतक असुर निकट बैठाये । धनुषपास बहु सुभट पठाये ॥  
 षष्ठत दूत दूत परधाई । आये कहँ लगि देखौ जाई ॥  
 गजै कंस सेन सब साजे । द्वारे विविध वाजने वाजे ॥  
 पीरो भयो हृदय डर मानो । सूखत अधर बदन कुम्हिलानो ॥  
 नंदमहरके सुत सुनि आवत । मन मन मारन गर्व बढावत ॥

दोहा--परचो शोर मथुरा नगर, आवत नंदकुमार ॥

सुनि धाये नर नारि सब, गृहको काम बिसार ॥

सो०--लाजकानडरडार, कोउ खिरकि नकोउ अटनपर ॥

कोऊ खडी दुवार, कोउ धावत गलियन फिरत ॥

कियो प्रवेश नगरमें जाई । असुर निकन्दन जन सुखदाई ॥  
 इन्दुवरण रथपर दोउ बीरा । सुभग श्यामवर गौर शरीरा ॥  
 शीश मुकुट कुण्डल छबिलाजै । कुण्डल एक राम श्रुति राजै ॥  
 नीलपीत बर वसन निकाई । मुक्तमाल बनमाल सुहाई ॥  
 निराखि सकल पुरजन अनुरागे । धाय धाय रथके सँगलागे ॥  
 युगल रूपलखि होहिं सुखारे । यकटकलोचन टरहिं नटारे ॥  
 चढी अटारिन देखहिं नारी । बढ्यो प्रेम आनँद उरभारी ॥  
 निशिदिन सुनि गुणगण अभिलासी । अति आरत दर्शन की प्यासी ॥  
 शशि आनन मृदुवेष किशोरा । भये निराखि दोउ नयन चकोरा ॥

१ तरवारि । २ योद्धा । ३ अनेकप्रकारकीगलिके । ४ राक्षसोंकेनामकर्त्ता ।

५ चन्द्रवर्ण । ६ मधुर ।



Vinay Avasthi Sahib Bhuvan Vani Trust Donations

पुलकि गात हृग आनंद पानी । कहत सप्रम परस्पर बानी ॥  
 येईसखि बलराम कन्हई । सुनियत जिनकी बहुत बढ़ाई ॥  
 नन्द गोपके येदोड ढोटा । गौर श्याम सुन्दर बरजोटा ॥  
 दोहा-मणि कंचनके शिखर दोउ, किधौं मानसर हंस ॥

कै प्रगटे ब्रजदेन सुख, त्रिभुवनके अवतंस ॥

सो०--धनि धनि गोकुल ग्राम, धन्य श्याम बलराम धनि ॥

धनि धनि ब्रजकी बाम, प्रगट प्रीतिपाली जिन्हन ॥

सुनति हुती पुरुषार्थ जिनके । देखहु रूप नयन भरि तिनके ॥  
 अतिहि अनूप वेष नटसोहै । कहहु सो को छवि देख न मोहै ॥  
 पूरब जन्म सुकृत कोउ कीनो । सो विधि यह नयननफल दीनो ॥  
 अति अभिराम श्यामछवि धारी । इनहीं प्रथम घृतना मारी ॥  
 शकटा वृण इनहीं संहारे । बत्स बका अघ पुनि इनमारे ॥  
 इन्द्रकोप वर्षन ब्रजकीनो । इनहीं गिरिकर धरिनख लीनो ॥  
 जलते काली इनहिं निकान्यो । पुनि अरिष्ट केशी इन मान्यो ॥  
 गौर शरीर नाम बल सोई । धेनुक अरु प्रलम्बहा सोई ॥  
 अब अक्रूर पठै नृपराई । इहां बोलि पठये दोउ भाई ॥  
 रंगभूमि रचि कियो अखारो । कहा करन धौं हृदय विचारो ॥  
 जनैनी धीर धन्यो धौं कैसे । अति नालक पठयेहैं ऐसे ॥  
 देहिं अशीश मांगि विधिपाहीं । न्हातहुबारखसहु तनुनाहीं ॥

दोहा-लेत बलैया वारिकै, आंचर यह कहिनार ॥

करिहै इनसों कपट नृप, तौ बहै जरिछार ॥

सो०--सफल भये मनकाम, देखि दरश इनको सखी ॥

कुशल जाहु निज धाम, देत अशीश सुनाय सब ॥

कहत सुवति बक सुनहु सयानी । मैं जो सुन्यो सो कहत बखानी ॥  
 ये बल्लुदेव कुवैर सखि दोऊ । ऐसे लोग कहत सब कोऊ ॥  
 कंस नास करि मात पठाये । नन्द सखा गृह जाय दुराये ॥

१ पुत्र । २ सुयम । ३ माता ।



करि दुलार यशुमति पय प्याये । हित करि तिनके बाल कहाये ॥  
गौर अंग नयनन रतनारै । जो प्रलम्बको मारन हारे ॥  
कुंडल एक वाम श्रुति धारी । तेरोहिणी सुवन सुखकारी ॥  
अति अभिराम महाबल धामा । ताते नाम धरयो बलरामा ॥  
श्याम सुभगतलु उर बनमाला । शीश मुकुट दृग नयन विशाला ॥  
जिन्हैं हेत करि सँग ब्रज वासा । मान्यो नाह सकल सुखधामा ॥  
जिनके चरण छुवत बड़ पापी । पाई सुगति सु दर्शन शापी ॥  
अमित प्रभाव कृष्ण सब कहहीं । जिनके नाम अधमगति लहहीं ॥  
कहत देवकी सुत सब तिनसों । कंस राज भय मानत जिनसों ॥

दोहा-आयेहैं अक्रूर सँग, तात मात सुख देन ॥

रंगभूमि रिपु जीतिकै, करिहैं यदुकुल चैन ॥

सो०-सुनिसुनि मुदित सुनारि, अति प्रिय वाणी तासुकी ॥

मांगत गोद पसारि, विधिसों ऐसो होय सब ॥

देत सबन सुख यों मन भावन । उतरे जाय बाग इक पावन ॥  
गापन सहित नन्दतहैं राख्यो । तब सुफलकसुत सों हरि भाख्यो  
कहहु तात आगे तुम जाई । आये श्याम राम दोड भाई ॥  
बहुरि नृपति जब हमें बुलैहैं । करि विश्राम हमहुँ तब ऐहैं ॥  
तब अक्रूर जोरि युग पाणी । बोल्यो सुनत श्यामकी वाणी ॥  
मोहि न्यारो क्यों करत गोसाई । राखो निकट दासकी नाई ॥  
कंस दूत मोको जनि मानो । निज सेवक अपनो करि जानो ॥  
अरु मेरे मनमें यह आखा । बलिपावन कीजै मो बासा ॥  
तब हँसिकै बोले घनश्याम । ऐहौं एक दिना तुम धामा ॥  
ऐसे कहि अक्रूर पठाये । बिदा होय नृप पास सिधाये ॥  
रथते उतारि परे दोड भाई । ग्वाल बाल सब लिये बुलाई ॥  
सखा भ्रात सँग सहज हुलासा । गये यमुनतट नगर निवासा ॥

दोहा-बाल वयस शोभित सुभग, बाल सखनके संग ॥



गौर श्याम शोभा निरखि, लजित कोटि अनंग ॥  
 सो०-अति विचित्रको जान, ब्रजवासी प्रभुके चरित ॥  
 अमित गुणनकी खान, जन रंजन दुष्टन दलन ॥

अथ रजकवध लीला ॥

नृपतिरजैक अम्बरें नृप धोवै । आवत देखि श्याम तनु जोवै ॥  
 हँसत गर्व बातें यां चालै । कंसराजके उर ये शालै ॥  
 लघु लघु वंयस गोपके जाये । बहुत अचगरी कारि ये भाये ॥  
 तृणावर्त प्रभु रह्यो हमारो । इनहीं ताहि शिला पर मारो ॥  
 अति खोटो जिहि नाम कन्हार्ह । प्रथम ताहि डारै मरवाई ॥  
 है बलभद्र तैसई खोटो । गोरो अंग म्हा बल मोटो ॥  
 ताहु को मारैगो राजा । बोले हैं याही के काजा ॥  
 ऐसे कहत परस्पर बानी । प्रभु अंतर्दामी सब जानी ॥  
 ग्वालन सहित गये तेहि पाहैं । कछो कछु अंबर हम चाहैं ॥  
 तिनको पहिरि नृपाति पै जैहैं । देहैं बहुरि तुम्हें जब ऐहैं ॥  
 जो पहिरावन नृप सां पैहैं । तामें कछु तुमहूं को दैहैं ॥  
 कै पहिलेही लेहौ हम सां । वृद्धत हैं तैसी हम तुम सां ॥

दोहा-हँस्यो वचन सुनि श्यामके, कछो गर्व करि बैन ॥

बलिके बकरा द्वै रहे, आयैहैं पट लैन ॥

सो०-राखैं वरी बनाय, द्वै आवहु नृप द्वारलौं ॥

तब लीजो पट आय, जो भावै सो दीजियो ॥  
 वन वन फिरत चरावत गैया । अहिर जाति कामरी उटैया ॥  
 नटको भेष साजके आये । नृप अम्बर पहिरन मन भाये ॥  
 जुरिकै चले नृपातिके पासा । पहिरावन लेबेकी आसा ॥  
 नेक आश जीवनकी जोऊ । खोवन चहत अबहिं पुनि सोऊ ॥  
 यह सुनि श्याम कछो मुसकाई । देहु वस्त्रनै तुमहिं भलाई ॥  
 हम माँगतहैं सहजहि तुमसां । तुमकत करत इतीरिस हमसां ॥

१ कामदेव । २ लीला । ३ घोबी । ४ वस्त्र । ५ डमर । ६ कपडा ।



सहज बातको रिस नहिं कीजै । मांगे देहु मानि गुण लीजै ॥  
 भौंहें ऐंठ तब रजक रिसानो । ये नृप बसन नहीं लुम जानो ॥  
 अबहीं सुनत क्षणकमें मारैं । नन्दहिपकरि बन्दिमें डारैं ॥  
 जाहु चले छांते अबनीके । कैहैहो अबहीं बिनजीके ॥  
 करत अचगरी मोखों आई । दुहुँन मारिहों कंस दुहाई ॥  
 यह सुनि कियो श्यामसो खाला । भुजापकरि पटक्यो ततकाला ॥  
 दोहा-तुरत गयो तनु तजि स्वरग, कीन्हो रजक निहाल ॥  
 जन्म मरणते रहगयो, ऐसो गुण गोपाल ॥

सौ०-लखिकै गये परायें, संगी ताके सब रजक ॥

लीन्हें बसन लुटाय, श्याम प्रथमहीं नृपतिके ॥  
 रजक मारि सब बसन लुटायें । आप पहिरि ग्वालन पहिरायें ॥  
 विविध रङ्ग बहु भांति नदीने । निज निज रुचि ग्वालन सबलीने ॥  
 चले तहांते सब हुरषाई । मिल्यो एक दरजी पुनि आई ॥  
 प्रभुको देखि बहुत सुखपायो । चरण कमलको माथ नवायो ॥  
 थाट बाट जो बसन सुहायें । ते उनकरि सम तुरत बनाये ॥  
 ताको कृतहि मान प्रभु लीन्हो । अभय दानदै निज पद दीन्हो ॥  
 पुनि एक माली हुतो सुदामा । ताके द्वार गये घनश्यामा ॥  
 तुरत आई तिन पद शिरनायो । हरि हलधरलखि हर्ष बढ़ायो ॥  
 आदर सहित सदनमें आने । चरण धोय निज भाग्य बखाने ॥  
 नृपतिहेतु जो हार बनाये । ते सप्रेम प्रभु को पहिरायें ॥  
 हाथ जोरि बहु बिनय सुनाई । जय जय श्रीपति प्रभु यदुनाई ॥  
 मोको बहुत अनुग्रह कीन्हो । दीन जानि अपनो करि लीन्हो ॥  
 दोहा-सुनि सप्रेम ताके वचन, रीझै श्याम सुजान ॥

माली पूरण काम करि, दियो भक्ति वरदान ॥

सौ०-सखन सहित दौड भाय, बहुरि हर्षि आगे चले ॥  
 तहां पंथमें आय, कुबिजालै चन्दन मिली ॥



निरखि श्याम छबितनु सुधि भूली । बोली हर्षि प्रेम रस फूली ॥  
 हो प्रभु दीनबन्धु सुखदाई । तुम्हें नाथ चन्दन में लयाई ॥  
 मोहिं कल्पना यह जगवन्दन । चरचां अंग तुम्हारे चन्दन ॥  
 दासी कुल कुबिजा ममनाऊं । नृपके उर चन्दन नितलाऊं ॥  
 तुमहिं जानिकै प्रभु तिहिं ठाहीं । अरि अह मित्र बसत उरमाहीं ॥  
 आजहि दरश प्रकट प्रभु पायो । मोजियकी संताप नशायो ॥  
 अब यह मलय कृपा करिलीजै । पूरण काम नाथ मम कीजै ॥  
 अन्तर्यामी प्रभु सुखदानी । भाव भक्ति कुबिजा पहिंचानी ॥  
 भावहिके वश त्रिभुवन राई । हित करि कुबिजानिकट बुलाई ॥  
 वन्दन करि पूजे दोउ भाई । रही श्याम छवि निरखि भुलाई ॥  
 तब हरि हलधरसों हैंसि भाष्यो । हेत बहुत इन हमसों राख्यो ॥  
 हमहूँ कछु याको हित कीजै । सूधे अङ्ग नेक करि दीजै ॥

दोहा-पगराख्यो पग पीठपर, धरेउशीशकर श्याम ॥

नेक उठाई चिबुक गहि, भई सुन्दरी बाम ॥

सो०--को करिसकै बखान, जाहि बनाई आपुहारि ॥

भई रूप गुणखान, कुबिजामन आनन्द अति ॥

महाकुरूप कूबरी तैसी । परसत तुरत भई रति जैसी ॥  
 तब कुबिजा अपने मन मान्यो । मिले मोहिं मोहन पति जान्यो ॥  
 पुनि पुनि कमल चरण शिरनाई । हाथ जोरि बहु विनय सुनाई ॥  
 जिमिकीनी म्वहिं कृपा कृपाला । तिमि ममसदन चलहु नँदलाला ॥  
 अपने चरण कमल तहँ धरिये । सफल मनोरथ मेरो करिये ॥  
 तासों बिहँसि कल्यो घनश्यामा । कंस देखि अइहाँ तवधामा ॥  
 अपनी करि तिय सदन पठाई । चले धनुष देखन दोउ भाई ॥  
 ग्वाल सखा सँग सुभग सुहाये । कासने वर रूप बनाये ॥  
 पुगजन भीर चहुँदिशि भारी । चहीं अटारिन देखहि नारी ॥  
 निरखि श्याम सुख इन्दुउदारा । जनुपुर उँदधि तरङ्ग अपारा ॥

१ अमिलाषा । २ बलदेवजी । ३ ठोढी । ४ लुवत । ५ घर । ६ समुद्र ।



जहँ तहँ करत सकल पुरवासी । भई सुन्दरी कुबिजा दासी ॥  
 श्याम कछु चेटकसो कीन्हो । अंग सुधारि रूप बर दीन्हो ॥  
 दोहा--रजकमारि लूटे बसन, करी कूबरी चारु ॥  
 बाल भाव मोहत मनहि, हैं कोउ देव उदारु ॥  
 सो०--सुनत रहे दिन रैन, पुरुषारथ इनको भवन ॥  
 तैसे देखे नैन, ब्रजवासी प्रभु नन्दसुत ॥

गये धनुषशाला दोउ बीरा । देखत चकित भये भटभौरा ॥  
 अछ सँभारि उठे अकुलाई । देखि थके सुन्दर दोउ भाई ॥  
 धनुष समीप असुर सब ठाढ़े । अति बलवन्त धीर नर गाढ़े ॥  
 सहजहि धेरि लिये दोउ भैया । बोलि उठे सब सुनहु कन्हैया ॥  
 सुनियत अतिबल भुजातुम्हारी । यह कोदण्ड चढावहु भारी ॥  
 तिनसों बिहँसि कह्यो सुखरासी । कहा करत हमसों यह हासी ॥  
 कहां बाल हम बैस किशोरा । कहां धनुष अति गरुड कठोरा ॥  
 शूरवीरठाढ़े सब लहिये । तिनसों धनुष चढावन कहिये ॥  
 खेलन कहौ खेल कछु हमको । सोहम खेल दिखावैं तुमको ॥  
 ऐसे श्याम हँसत तिन माहीं । अरु अकूर गये नृप पाहीं ॥  
 समाचार सब जाय सुनाये । नन्द सहित बल मोहन आये ॥  
 यह कहि घर अकूर सिधारे । रजक जाय तिहि काल पुकारे ॥  
 दोहा--मारि बिन दूषण हमैं, नन्द गोपके बाल ॥

लीन्हे बसन लुटायकै, पहिराये सब ग्वाल ॥  
 सो०--सुनतहि उठ्यो रिसाय, बोल्यो सबन बुलायनृप ॥  
 करी प्रथमहीं आय, देखौइन ठीठे बड़े ॥  
 अब मारिहौं अवशि दोउ भाई । लेहुँ आज सब ब्रजहि लुटाय ॥  
 देहु वन्दिमं नन्दहि ल्याई । गये अहीर बहुत इतराई ॥  
 मैं सादर करि इनहि बुलायो । आगे दै इन रजक मरायो ॥  
 देखहु कोउ जान नहि पावैं । असुर जाय सबको गहिल्यावैं ॥



ऐसे कंस कहत रिस पाई । तबहीं दूतन खबरि जनाई ॥  
 कुबिजासों चन्दन हरि लीन्हो । ताको रूप अनूपम दीन्हो ॥  
 धनुष निकट पहुँचे दोउ भाई । यह सुनतहि कछु गयो सुखाई ॥  
 बहुरि धीर धरि असुर पठाये । ते यह कहत श्याम पहुँ आये ॥  
 पहिले तोरि धनुष गोपाला । बहुरि बुलायो निकट भुवाला ॥  
 सुनि असुरनके वचन कन्हाई । बोले मनहीं मन सुसकाई ॥  
 याहीको नृप हमहि बुलायो । जोरेउ वैर जानि यह पायो ॥  
 गर्हन लगे ते बालक जानी । तबहि श्याम कछु रिस उर आनी ॥

छंद-उर आनिरिस गहि पाणि तुरतहि, असुरलैमारे सबै ॥  
 अतिहि बेगि उठाये धनुषहि, तोरि महिडारेउ तबै ॥  
 उठे तब करि क्रोध योधा, मार मार पुकारहीं ॥  
 नंदसुत रणवीरहो, धर धीर असुर सँहारहीं ॥  
 एक झटकत एक पटकत, तेन मटकत फिरतहीं ॥  
 एक अटकत एक लटकत, एक सटकत जाहिं तहीं ॥  
 ताल चटकतचमकि छटकत, देखि भटकत नट भले ॥  
 एक पकरि फिराय हटकत जातते नृप पहुँ चले ॥

दोहा-ख्यालहिमारे असुर सब, तोरि धनुष नंदलाल ॥  
 चले सामुहे पवँरितकि, जहांकुवलिया ब्याल ॥  
 सो०-देखत चढ़े विमान, ब्रह्मादिक सुर सिद्ध सुनि ॥  
 डारत सुमन सुजान, ब्रजवासी प्रभुपद हरषि ॥  
 रंगभूमि हरि हलधर आये । संग सखा सब ग्वाल सुहाये ॥  
 आय आपनी लखि सब लाये । रवि शशि उडगैण उदित सुहाये ॥  
 देख्यो द्विरद द्वार पर ठाढ़ो । मनहुँ गर्वको गिरिवर गाढ़ो ॥  
 कंधकेशरी गर्व प्रहारी । बल तन हँसे गयन्द निहारी ॥

१ पकरनलगे । २ हाथी । ३ नक्षत्र ।



ताक्षणी छवि कही न जाई । कसत पीत पट कटि लपटाई ॥  
 श्याम सुभग लट बंधुर वारी । पाग पेच मिलि पाग सँवारी ॥  
 मधुपुरकी युवती सब बाढी । कहत परस्पर महलन डाढी ॥  
 लखहु सखी अँग अँग लुनाई । रूप राशि मन हरण कन्हाई ॥  
 कोटि मदन छवि विधि लुनलीनी । तब यह मूरति साँवरि कीनी ॥  
 अतिहि कुशल ये लखि सुखदाता । हम अभागिके कूर विधाता ॥  
 धनि ब्रजतिय इनके सँग लागीं । निशिदिन रहत प्रेम रस पागीं ॥  
 बनवीथिन कुंजन बिच डोलैं । रास हास रस करत कलोलैं ॥  
 दोहा-होय हमारे सुकृत कछु, सुनहु सखी तौ आज ॥  
 जैसे तोरेउ धनुष हरि, त्यों जीतैं गजराज ॥

सो०-सुरन मनावत जात, अति कोमल नंदलाल लखि ॥  
 बचहु कुशल दोउ भ्रात, मात पिताके पुण्यते ॥  
 देखि मतंग द्वार मतवारो । गजपालहि बलराम हैंकारो ॥  
 सुनहु महावत बात हमारी । लेहु द्वारते वारण टारी ॥  
 जान देहु हमको नृप पासा । नातरहैहै गजकी नासा ॥  
 कहे देत नहिं दोष हमारो । मति जानै तू हरिको वारो ॥  
 त्रिभुवन पति दुष्टन संहारी । धरणी भार उतारन कारी ॥  
 सुनत बोल गजपाल रिसानो । रे गोपाल तुम्हें मैं जानो ॥  
 त्रिभुवन पति अब गाय चराये । गाँडे खान गजनसां आये ॥  
 बादत बडे शूरकी नाई । जैहैं प्राण अबहिं क्षण माई ॥  
 तोरेउ धनुष भयो अति गाँशे । नहिं जानत यह गज अति भारो ॥  
 दश सहस्र गजको बल याही । डरपत है ऐरापति ताही ॥  
 जब लगि यासों लखि नहिं लैहौ । तब लगि कैसे भीतर जैहौ ॥  
 ऐसे कहि अंकुश कर लीन्हो । गज गजपाल सासुहे कीन्हो ॥  
 दोहा-तबहिं कोपि हलधर कह्यो, सुनुरे मूढकुजात ॥  
 गज समेत पटकौं अबहिं, मुँह सँभारि कहु बात ॥

१ मथुरापुरी । २ शोभा । ३ हाथी-कुवलिया । ४ बोलत । ५ गर्व ।



सो०-नेक न लागि है बार, बारण मरिजैहै अवाहि ॥

तासों कहत पुकार, मान अजहुँ मेरो कहाँ ॥

यह सुनि गज गजपालचलायो । झटकि सृंड बहुरो गज धायो ॥

लीन्हो लपटि सृंडके माहीं । देखत शूरवीर चहुँघाहीं ॥

तब बलरामकोपकारि भारी । वज्र समान थाप इकमारी ॥

तलुसमेटिकर करि सकुचान्यो । दर्ईकूक मदरंध्र सुखान्यो ॥

तबहीं उच्चटि भये बलन्यारे । असुर सेन देखतहियहार ॥

हँसत निकट ठाठे दोउ भाई । देखि महावत रहेउ लजाई ॥

थकित रहेउ हाथी जब जान्यो । तब मनमें गजपाल डेरान्यो ॥

जो ये बालक बधे न जाहीं । भारै कंस मोहि पलमाहीं ॥

अंकुश मसक शीश परदीन्हो । बहुरि गयन्दाहि तातहि कीन्हो ॥

भयो क्रोध हाथी मनसाहीं । गंडस्थल मद अंगु चुचाहीं ॥

पवन वेगते आतुर धायो । गरजि धुमरि दोउनपर आयो ॥

महा कोप करि गहे कन्हाई । परेउदशन है धरणि धसाई ॥

दोहा-डरपि उठे तेहि काल सब, सुर मुनि पुर नर नारि

दुहं दशन बिच है कटे, बलनिधि प्रभु दैत्यारि ॥

सो०-उठे गजहिके साथ, बहुरि ख्यालईहांकदै ॥

तुरतहि भये सनाथ, देखि चरित सब श्यामके ॥

हांक सुनत अति कोप बढ़ायो । झटकि सृंड बहुरो गजधायो ॥

रहे उदरतर दबाकि मुरारी । गये जान गजरहेउ निहारी ॥

पाछे प्रगट बहुरि हरि टेरेउ । बलदाऊ आगे ते बेरेउ ॥

लागे गजहि खेलावन दोऊ । चकित भये देखत सब कोऊ ॥

चहुँघा फिरत चक्रकी नाई । सृंड पूछ क्षण क्षण छै जाई ॥

नेक नहीं अवसर गज पावै । चारों दिशि हरि फिरत नचावै ॥

घात करत मनहीं मन माहीं । गजरिसबिकल इन्हें रिसनाहीं ॥

कबहुं पूछ पकरिकै खेलें । ज्यों बालक बछरन सँग खेलें ॥



कबहुँ इत उत ते दोउ बीरा । भजत मारिके मुष्टि गँभीरा ॥  
कबहुँ उदरतर है कटि जाहीं । नेक छुवन पावत गज नाहीं ॥  
नीलपीत पट कटि फहराहीं । चपल नयन दीरघ बरबाहीं ॥  
खेलत गज चंचल सँगराजें । निरत मदन मनहुंगति साजें ॥  
छंद-जनु मदन निरत साजि गति, इमि श्याम अरु गज खेलहीं ॥

पूछ कर गहि कबहुँ आगे, कबहुँ पाछे पेलहीं ॥  
गजहि लखि पुर नारि नर सब, बिकल विधिहि मनावहीं ॥  
वेगि मारैं श्याम गजको, हम निरखि सुख पावहीं ॥  
दीन्हो महावत बहुरि अंकुश, क्रोधकरि हाथी चल्थो ॥  
जबहि हरि गहि पूछ पटक्यो, नेकनहि भूपरहल्थो ॥  
लथे खैंच मृणाल ज्यौरैंद, सुमन झर देवनकरी ॥  
दास ब्रजवासी हरषि सब, असुरकी सेना डरी ॥  
दोहा-हँसत हँसत मारेउ प्रबल, द्विरद कुवलियाश्याम ॥  
सखन सहित ठाठे मुदित, छवि निरखत ब्रजबाम ॥  
सो०-मारेउ गज बल भ्रात, जहँ तहँ सब कोऊ कहत ॥  
चिरजीवहु दोउ भ्रात, प्रभु ब्रजवासी दासकें ॥

अथ मल्लयुद्ध लीला ॥

चले जहां सब मल्ल गोपाला । द्विरद दंत धरि कंध विशाला ॥  
गौर श्याम सुंदर दोउ भाई । अमसीकर मुख कमल सुहाई ॥  
छवि अपार बलनिधि गंभीरा । संग गोप बालककी भीरा ॥  
सुनत कंस जिय अति भय मान्यो नव खगें ज्यों पिंजर अकुलान्यो  
भाजनको मन माझ विचारा । भाजि न सक्यो लाजको मारा ॥  
गये रंग महि मोहन जबहीं । ज्यहिजल भाव दशतेहि तसहीं ॥  
उठे शंक सब मल्ल अधीरा । बल समूह देखे दोउ बीरा ॥

१ लंबी । २ पृथ्वी । ३ दांत । ४ पक्षी ।



दुष्टी दैत्य हते तहँ जेते । रूप भयानक दरशे तेते ॥  
 कंस समीप भूप जे आये । तिन्हें राजवंशी दरशाये ॥  
 साधु सिद्ध देखहिं शुभ धामा । इष्ट देव पूरण सब कामा ॥  
 देखे सुर गण गगन सुखकारी । सब देवनेके देव मुरारी ॥  
 ग्वाल बाल सब देखत ऐसे । सदा संग खेलत ब्रज जैसे ॥  
 दोहा-महलनते देखैं प्रभुहि, सकल सुंदरी बाम ॥

कोटि काम शोभाहरण, नव किशोर सुखधाम ॥  
 सो०-देखत अति विपरीति, कंस नृपति नंदलालको ॥  
 कं पि उज्यो भय भीति, प्रकटकालदरशनभयो ॥

सर्व भाव पूरण भगवाना । अबलहिं अबल बलहिं बलवाना ॥  
 ललितहिललितसाधुको साधू । छलन छली सब गुणन अगाधू ॥  
 जो जन जैलो ध्यान लगावैं । ताको तिहि विधि दरश दिखावैं ॥  
 कहत देखि सब सुन्दर जोटा । येई नंद महरके ठोटा ॥  
 रजक भारि नृप बसन लुटाये । कीन्हें कुबिजा अंग सुहाये ॥  
 इनहीं असुर समूह सँहारेउ । धनुष तोरि हाथी इन मारेउ ॥  
 धरे कंध गजदंत विराजैं । बालक गोप सखा सँग राजैं ॥  
 देखत असुर भीर चहुँपासा । जिनके वशमें भूमि अकाशा ॥  
 लीन्हें धेरि कंस भय मानी । तब चाणूर कहत हँसि बानी ॥  
 आवहु श्याम इतहि पग धारो । सुनत हुते बहु नाम तुम्हारो ॥  
 सब कोउ तुम्हरे बलहि बखानै । हारि जीत काकी को जानै ॥  
 कहा भयो जो गज तुम मारो । लरहु आज हम संग अखारो ॥  
 दोहा-कहा नाम हमरो सुन्यो, हँसि बोलै धनश्याम ॥

हम बालकभोरि अबहि, हमैं खेलसों काम ॥  
 सो०-कहिये बात विचार, हमैं तुम्हें लरिवो कहा ॥

अपगति यह व्यवहार, आप देखि देखहु हमैं ॥  
 जान देहु हमको नृप पाहीं । काहे को रोकत मर्ग माहीं ॥



नृप हमको करि हेत बुलायो । तुम यह हमको कहा सुनायो ॥  
 तब चाणूर कहो पुनि ऐसे । तुमको बालक कहिये कैसे ॥  
 किये कर्म ब्रजमें तुम जैसे । देखे सुने नहीं कहूँ तैसे ॥  
 गिरि गोवर्द्धन कर पै धारेउ । जलते कालीनाग निकारेउ ॥  
 औरो असुर वीर बल भारे । सुनियत खेलतही तुम मारे ॥  
 सोबल आज देखि हम लेहैं । आगे जाय तुम्हें तब देहैं ॥  
 ज्यों ज्यों कंस लखत दोउ भाई । त्यों त्यों भय व्याकुल अकुलाई ॥  
 कहि कहि बारहिं बार पठावैं । मल्लनको बहु त्रास सुनावैं ॥  
 क्यों रे सकुच करत मन माहीं । भारत शत्रु वेग क्यों नाहीं ॥  
 जो दोउ बालक आज न मारो । करों सकुल तौ नाश तुम्हारे ॥  
 नृप सँदेश सुनि मल्लडराने । कहत परस्पर मन सकुचाने ॥  
 दोहा--लोन नृपतिको मानकै, नंदसुवनसों आज ॥  
 लर मरिये कै मारिये, करैं कंसको काज ॥  
 सो०--लेहु सुयश नृपपास, अब धिलंब नहिं कीजिये ॥  
 कछु क्रोध कछु त्रास, बोलि उठे तब मल्ल सब ॥  
 हमसों श्याम लरत क्यों नाहीं । वाटि न कछु हम ते बल माहीं ॥  
 पशुपालक तुम कुवैर कन्हई । जीते बहुतक पशुनखिलाई ॥  
 अबलगि नहीं मल्ल कोउ भेट्यो । अबतौ हम सँग परयो चपेट्यो ॥  
 मल युद्ध तुम सों हम लरिहैं । अबनरपतिको कारज करिहैं ॥  
 ऐसे कहि कहि प्रभुहि सुनावैं । भुजा ऐंठि रज अंग चढ़ावैं ॥  
 ठोंकैंताल गाँज ज्यों गरजैं । गहँगाँस हारि तनतकि तरजैं ॥  
 आपुसमें सब करत विचारा । डारहुमारि उभय सुकुमारा ॥  
 सुनि सुनि हारि हलधर मुसकाहीं । बोले बहुरि बिहँसितिहिपाहीं ॥  
 सुनिये सकल मल्ल सनुदाई । यहै तुम्हारे मन अब आई ॥  
 नृपपै हमें जाय नाहिं देहौ । बड़ो सुयश हमसों लरिलेहौ ॥  
 निपट खोज अब परे हमारे । यह नबसी उर भली तुम्हारे ॥



हम न कहैं तौ तुमचित जैसी । कहत कहा कीजै अबतैसी ॥  
दोहा-जबहिं श्याम ऐसे कह्यो, बिलखि उठीं सबनार ॥

देखौरी मारन चाहत, मल्ल उभय सुकुमार ॥  
सो०-अति कोमल अति चार, बाचैं कैसे हूं दर्ई ॥

कहत नयन जलठार, क्यों जननी पठये इहां ॥  
अतिहि निदुर उर जाति अहीरा । लोभ लागि पठये दोउवीरा ॥  
थेतौ बालक अतिहि अजाना । कियो कहा उन यह अज्ञाना ॥  
होन चाहत अबधौ यह कैसी । कहत कंस यह बात अनैसी ॥  
कहत सबै हमको यह भावै । करि सहाय विधि इनहिं बचावै ॥  
तोरयो धनुष हन्यो गज जैसे । जीतहिं श्याम इनहुंको तैसे ॥  
जोरि जोरि कर विधिके आगे । अंचर छोरि छोरि सब मांगे ॥  
तब चाणूर कृष्णपै आयो । सहज श्याम कटिपट लपटायो ॥  
भुज भुज जोरि भये भिडि ठाढ़े । तकि तकि दाँव चलावत गाढ़े ॥  
एसेई मुष्टिक बलरामा । भिड़े बढाय बाद बल धामा ॥  
दोऊ वीर लरत अति सोहैं । देखत सुर नरके मन मोहैं ॥  
दीरघ नयन कमलते आछे । ललितलाल कछनी कटिकाछे ॥  
तनु चन्दन चित्रित छवि जाला । वृषभ कन्ध उरबाहु विशाला ॥  
दोहा-शिरसोंशिर भुजसों भुजा, दृष्टिदृष्टि सों जोरि ॥

चरण चरण गहि झपटिकै, लपटझपट झकझोरि ॥  
सो०-गहन न पावत घात, छूटि जात लपटात पुनि ॥

शिव बिधि पै न गहात, तिन्हें मल्ल चाहत गहन ॥  
श्याम सहज मल्लन सों खेलैं । पकरिपकरि भुज दण्डन पेलैं ॥  
भये प्रथम कोमल तनु ताहीं । शिथिल रूप पणिवत मनमाहीं ॥  
तब चाणूर मनहिं गरवान्यो । हरिक बलहिं तुच्छ करि मान्यो ॥  
कोटि कुलिशसम तनुतिहि काला । तुरतहि होय गये नँदलाला ॥  
करिकै कोपै मुष्टि इकमारी । फलसमान श्याम उर पारी ॥



पुहुपहुते कोमल तिहि मान्यो । तिन मारयो अपने जिय जान्यो ॥  
 भयो वेगि अति हर्षि निवारो कहन लग्यो सुरि अहिर पछारो ॥  
 देख्यो हँसत गोपालहि ठाढो । पर्यो शोच प्राणन अति गाढो ॥  
 नंदसुवन महिमा तब जानी । निश्चय मीच आपनी मानी ॥  
 तब मोहन करिकोप हँकारयो । जनुगज को मृगराज पुकारयो ॥  
 सुनत होंक सब दौव भुलानो । थर थराइ चाणूर डरानो ॥  
 धरयो धाय तब झपट कन्हाई ! पटक्यो महि गहि चरण फिराई ॥

छंद-पटक्यो चरण गहि फेरि महि, चाणूर अति बल सांवरे ॥

धासि गयो धरणीमसकिअंग, सब विकटभूख्योदांवरे ॥

भयो शब्दावात सुनि नृप, कंस उरधसको परयो ॥

निरखि पुर नर नारि नभसुर, हर्षि हिय आनंद भरयो ॥

पकरि ऐसिय भांति तब, बलराभ मुष्टिक मारियो ॥

कहैं धनि धनि लोग सब, जय जयतिसुरन उचारियो ॥

शल्ल अरु अति मल्ल आदिक, मल्ल तहँ जितने हते ॥

लपटि झपटि पछारिकै, पुनि नंदसुत मारे तिते ॥

दोहा-जब मारे हरि मल्ल सब, परयो कटक में शोर ॥

जिमि तारागण रवि उदय, छपैं असुर चहुँओर ॥

सो०-सखन सहित दोउ वीर, रंगभूमि राजत खरे ॥

हरण भक्त भय परि, ब्रजवासी प्रभु नंदके ॥

अथ कंसासुरवध लीला ॥

जबहीं श्याम मल्ल सब मारे । चपे असुर सब लखि हिय हारे ॥  
 देखि कंस अति भयो दुखारी । सेनापतिन कहत दैगारी ॥  
 कांपतलिये खड्ग बहु झौंथा । कहत गये कितरे सब योधा ॥  
 छैतरवार ढाल सब कोऊ । डारहु मारि नंदसुत दोऊ ॥

१ सिंह ।



डारे मारि मल्ल सब मेरे । तनक छोहरा अहिरन केरे ॥  
 डर नहिं करत चले इत आवैं । देखहु जीवत जान न पावैं ॥  
 असुर वीर अपनी सर जेतें । लैलै नाम पठाये तेतें ॥  
 कहा द्वारपालन भय बाढो । करहु कपाट पँवरिको गाढो ॥  
 नृप भय मानि असुर सब धाये । अख शस्त्रलै हरिपर आये ॥  
 भये विकल लखि पुर नर नारी । मनमन देत कंसको गारी ॥  
 कहतकि भई कठिन यह वाता । बर्चाहि श्यामखो करै विधाता ॥  
 आवत लखी असुरकी भीरा । भिरे हांक दैदैं दोड वीरा ॥

छुंद--अवलोकि असुर समूह आवत, हांक दै दोऊभिरे ॥  
 मनहुँ गज गण निरखि, केहरि धायतिनऊपरपर ॥  
 सुनत शब्द गँभीर हरिको, हँहरि सेनापति गये ॥  
 लपकि गहिमहिपटाकि जहँ तहँ, क्रोध करबलजू हये ॥  
 श्याम गौर किशोर सुन्दर, असुर गण विच यों लरैं ॥  
 जनु शांत अरु शृंगार धरि तन, वीरकी करनी करैं ॥  
 जात नहिं बरणी चटक गहि, पटक इत उत धावहीं ॥  
 भूमि भार अपार अघ निधि, असुर निकर नशावहीं ॥

दोहा--परयो नगर खल भल सकल, अति भय श्याकुल कंस ॥

पुनि पुनि मंत्रिन सों कहत, बढयो अधिक उरसंस ॥

सौ०--कजै कछु उपाय, जियत जाहिं नहिं बंधु दोड ॥

मारहु नंद बुलाय, ब्रजकोड रहन न पावहीं ॥

पुनि वसुदेव देवकी दोऊ । मारहु कठिन बन्धुते सोऊ ॥

बहुरों उग्रसेनको मारों । पिता दोष कछु उरनहिं धारों ॥

ऐसे पुनि पुनि वचन उचारें । कपित रिसन खड्ग कर धारें ॥

क्षण बैठत क्षण उठत अधीरा । मारे असुर सकल दोड वीरा ॥

१ तुल्य । २ झुंड । ३ सिंह । ४ लाजि । ५ समूह ।



अति बलवन्त नन्दके बारे । तब सक्रोध तृप ओर निहारे ॥  
गये मचान मचकि चिह्न दोऊ । बाज झपट देखत सब कोऊ ॥  
है गयो चकित तृपति भय मान्यो । आयो काल निकट यह जान्यो ॥  
रहि गयो लिये खड्ग कर माहीं । हरिको मारिसक्यो सो नाहीं ॥  
तबहीं श्याम लात इक मारी । गिरि गयो मुकुट शीशते भारी ॥  
दीन ठकेलि मंचते भूपर । कूद परे हरि ताके ऊपर ॥  
तहां चतुर्भुज रूप दिखायो । सो स्वरूपदे स्वर्ग पठायो ॥  
मारयो कंस कहत सब बानी । जय ध्वनि सुरगण गगन बखानी ॥

छंद-जय ध्वनि गर्भन सुरगण बखानी, सुमनकी वर्षा भई ॥  
कहत सब हरि कंस मारयो, हांक यह त्रिभुवन गई ॥  
ब्रह्मादि सुरमुनि सिद्ध गंधर्व, मुदित मन स्तुति भनी ॥  
भूमि सुर उपकार हित, अवतार धनि त्रिभुवन धनी ॥  
धन्य गज धनि मल्लभारे, धन्य कंसासुर अनी ॥  
परशि तनु अनुपम लही गति, जात नहि महिमागनी ॥  
धन्य अलख ब्रह्मांड नायक, भक्तहित नर तनु धरयो ॥  
धन्य ब्रजवासी सकल जिन, प्रेम करि तुम वश करयो ॥

दोहा-करि स्तुति पुनि पुनि हरषि, सुमन वर्षि सुरवृंद ॥  
मुदित बजावत दुन्दुभी, कहि जय जय नंदनंद ॥

सौ०-मथुरापुर नर नारि, अति प्रफुलित सबको हियो ॥  
मनहु कुमुद बन चारि, विकसत हरि शशि मुख निरखि ॥  
मारयो कंस जबहि भगवाना । भ्राता अष्ट तासु बलवाना ॥  
करि करि कोप युद्धको धाये । ते पुनि सब बलदेव नशाये ॥  
बहुरि केशगहि कंस मुरारी । दियो घसीट यमुन जलडारी ॥  
कीन्हो कछुक तहां विश्रामा । भयो विश्राम घाट तिहि नामा ॥

१ आकाश । २ स्वर्ग, पाताल, मृत्युलोक । ३ प्रसन्न । ४ श्रीकृष्ण ।



सुनिकै मरन कंसकी नारी । और सकल भ्राताकी प्यारी ॥  
 रोदन करि करि विविध ब्रिजापा । सुमिरि भूपगुण रूप प्रतापा ॥  
 निजहित समुझि भयो दुख भारी । चहुत मरण पति नेह विचादी ॥  
 गये तहां बहुरो दोउ भ्राता । करुणामय कोमल सुखदाता ॥  
 करि प्रबोध बोलीं सब रानी । रहीं मरण ते सुनि प्रभुबानी ॥  
 बहुत भांति तिनको समुझाई । आये महल द्वार दोउ भाई ॥  
 कालनेमिके वंश सुहायो । उग्रसेन सुनिकै उठिधायो ॥  
 तिन प्रभु चरण आय शिरनायो । बाहि बाहि कहि वचन सुनायो ॥  
 छंद-बाहि बाहि सुनाय आरत, वचन प्रभु चरणन गिरयो ॥

अब करहु करुणानिधि क्षमा, अपराध यह हमते परयो ॥  
 असुर मारे कंस भाइन, सहित सो उचितै करी ॥  
 परद्रोह रति खल दलन हित, अवतार यह तुम्हरोहरी ॥  
 करिकै कृपा अब प्रजा पालन, हेत प्रभुचित दीजिये ॥  
 वर बैठि सिंहासन सुभग, यहराज्य मधुपुरि कीजिये ॥  
 सुनि दीन वचनन हारि हरि, तब उग्रसेन उठायकै ॥  
 बहुभांति करि सन्मान पुनि पुनि, लिये हृदय लगायकै ॥  
 दोहा-श्रीमुखसों कर जोरि पुनि, कह्यो सुनहु महाराज ॥

यदुवंशिनको शापहै, हमैं उचित नहि राज ॥  
 सौ०-करहु देव तुम राज, दूरि करौ सन्देह सब ॥  
 हम करिहैं सब काज, जो आयसु देहो हमैं ॥  
 जो नहि मानै आनि तुम्हारी । ताहि दण्ड करिहैं हम भारी ॥  
 और कछु चित शोच न कीजै । जीति सहित परजहि सुखदीजै ॥  
 यादवजिते कंसकी ब्राह्म । गृहतजितजि भजिगये प्रवासा ॥  
 तिन सबको अब खोज बुलावो । सुखदै मधुरा मांझ बसावो ॥  
 विप्र धेनु सुर पूजनकीजै । इनकी रक्षामैं चितदीजै ॥



यों प्रभु उग्रसेन समुझाये । राज सिंहासन पुनि बैठाये ॥  
 शिरपर मंजुल छत्र फिराई । निजकर चँवर लिये दोउ भाई ॥  
 युग युग प्रभु भक्तन सुखदाई । राखत जनकी सदा बड़ाई ॥  
 वरषि सुमन सुर कहत सुखारी । जय जय जय भक्तन हितकारी ॥  
 उग्रसेन नृप करि बैठायो । लखि मथुरा लोगन सुखपायो ॥  
 धनि धनि कहत सकल नरनारी । अब करिहैं पितु मातु सुखारी ॥  
 यहै बात सब घर घरमाहीं । इनसम और जगतकोउ नाहीं ॥  
 छंद-नर नारि सब यह कहत घर घर, और नहिं इनते वियो  
 धनि मातु पितु दिनराति धनि, सो जन्म जग जब हरिलियो ॥  
 गहि कंस सहित सहाय मारयो, मरन नहिं रानिनदियो ॥  
 उग्रसेन नरेश करि पुनि, चवँर कर अपने कियो ॥  
 विबुध हर्षे सुमन वर्षे, सुधिरसब यदुकुल भयो ॥  
 अब पावहीं पितु मातु सुनि सुख, सकल दुख उनको गयो ॥  
 हम जिये अब सब निराखि मुख छबि, जन्मको फल जगलहो  
 जियहु युगयुग भ्रात दोऊ, हरषि पुरवासिन कह्यो ॥  
 दोहा-कंस मारि भूभार हरि, उग्रसेन करि भूप ॥  
 कहां हमार मातु पितु, तब बोले सुख रूप ॥  
 सो०-संगहि चले लिवाय, उग्रसेन अक्रूर तब ॥  
 राम कृष्ण दोउ भाय, ब्रजवासी जन दुखहरन ॥  
 उत वसुदेव स्वप्न निशि आयो । हृदय हर्षि देवकी सुनायो ॥  
 रामकृष्ण जनु मधुपुर आये । सुफलकसुत संग नृपति बुलाये ॥  
 असुर सेन हति कंसहि मान्यो । उग्रसेन नृपकरि बैठायो ॥  
 सुनि तिय कहै नयन भरिपानी । कहत कहापिय ऐसी बानी ॥  
 सुनिहै दूत कोऊ दुखदाई । कहिहै अबहिं कंससों जाई ॥  
 हम करिपाव जन्म जगलनिहो । सोफल हमें विधाता दीन्हो ॥

१ पवित्र-श्वेत । २ रात्रि । ३ अक्रूर ।



बधे सात सुत देखत आगे । बच्चो एकडरि ब्रजलै आगे ॥  
 तापर बन्दिकिये हम दोऊ । धृग जीवन परवश जगकोऊ ॥  
 हमको मीच नीचविधि भूल्यो । होहु कंसको वंशनिमूल्यो ॥  
 कह वसुदेव रोउमति नारी । धोवौ बदन दीन्ह जलझारी ॥  
 कहियतहै दुखहरण गोपाला । गर्व प्रहारी दीनदयाला ॥  
 हैहैं प्रगट कबहुँ सुखदाई । तात तुम्हारे त्रिभुवन राई ॥

दोहा-अब जानि होहु अधीर तिय, धरहु धीर सुखपाय ॥

आयु तुलानी कंसकी, देखत जाय बिलाय ॥

सो०-स्वप्न वृथा नहि जाय, मानु कह्यो मेरो प्रिया ॥

आज काल्हि में आय, तोहि मिलैं तेरे सुवन ॥

यहि अन्तर द्वारे हरि आये । वज्र कपाट जहां जडिलाये ॥  
 करुणाकरि हरि तिन्हें निहारा । गये सहज सब उधरि केवारा ॥  
 लखि वसुदेव सामुहे पाये । कहत कुँवर काके दोउ आये ॥  
 दियो दरशतिहि प्रेम सुहायो । जन्मसमय जो दरशन पायो ॥  
 मिले धाय पितु मातु निहारे । कह्यो तात हम सुवन तुम्हारे ॥  
 रोवत मधुर निरखि सुत दम्पति । सुनै न कंस मनाहिं मनकम्पति ॥  
 तबहीं कृष्ण कह्यो सुनुमाता । मान्यो कंस असुर हमताता ॥  
 मल्ल पछारि सुभट सब भारे । द्विरद कुबलिया दन्त उखारे ॥  
 यह कहकरि पितु मातु सुखारे । तुरत तोरि पगबन्धन डारे ॥  
 तब जर्ननी निश्चय करिजानी । रोवन लगी कण्ठलपटानी ॥  
 बारहिं बार कहत उरलाये । मैंनाहिं कबहुँ गोद खिलाये ॥  
 द्वादशवर्ष कहां रहेप्यारे । माता पिता जाहिं बलिहारे ॥  
 दोहा-सुनि जननी के वचन प्रभु, करुणानिधि यदुराय ॥

भये प्रेम वश दुखित लखि, बोले अति सकुचाय ॥

सो०-लिख्यो न भैयो जाय, मतिकरुमात विषादचित ॥

अब पुरवैं दोउ भाय, तुव मनके अभिलाष सब ॥



पुत्रजन्म जगमें सुखकारी । तुमपायो हमते दुखभारी ॥  
मात पिता जाते दुखपावैं । वृथा जन्म सुत तासु बतावैं ॥  
सो अब दोष न मनमें दीजै । होनहार ताकी कह कीजै ॥  
अब जन्मी सब शोच निवारो । तजो शोक आनंद उर धारो ॥  
सकल मनोरथ तुमरो करिहौं । स्वर्ग पताल जात नाहि डरिहौं ॥  
अष्टसिद्धि नव निधि ले आऊं । घर घर मथुरा मांझ बसाऊं ॥  
सुनि प्रभुवचन जननि सुखपायो । बार बार गहि कण्ठ लगायो ॥  
अति आनन्द भयो मन माहीं । सो कहि सकत शारदानाहीं ॥  
कहत तात तुम वदन निहारो । सफल भयो अब जन्म हमारो ॥  
सुत हित श्रवत पयोधर क्षीरो । मिटी सकल उर अन्तर पीरा ॥  
वसुदेव हृदय हर्ष अति आयो । सिद्ध लाभ साधक जनु पायो ॥  
पूरवपुण्य फल्यो सुखकारी । पायो सुत हित करि दैत्यारी ॥

अथ वसुदेवगृहउत्सव लीला ॥

दांहा--तुरत बोलि तब विप्रवर, प्रीति सहित परि पाँय ॥  
प्रथमहि संकल्पी हती, दई लक्षते गाय ॥  
सो०--और दियो बहु दान, बन्दीजन आये सुनत ॥  
परितोषे सन्मान, अति उछाँह वसुदेव मन ॥

तब देवकी कह्यो पति पासा । भरी परम आनंद हुलासा ॥  
प्रगटोआज सुवन मम धामा । करहु जन्म उत्सवकी सामा ॥  
सुनि वसुदेव परमसुखपावा । हर्ष द्वार दुंदुभी बजावा ॥  
यदुवंशी सगरे जुरि आये । ध्वज पताक मंदिरन बँधाये ॥  
रोषे कदली खंभ रसाँला । बांधी रचि रुचि बंदनमाला ॥  
लखि हरि जन्म अनंद बधाई । ऋद्धि सिद्ध प्रकटी सब आई ॥  
टाँककलश अनेकविधाना । मंगल द्रव्य रचे विधि नाना ॥  
गज मुक्तानके चौक बनाये । मंदिर गलिन सुगंध सिंचाये ॥

१ माता । २ टपकत । ३ दुध । ४ हर्ष । ५ कैला । ६ अम्ब । ७ सोनेके । ८ पदार्थ ।



सुनि सब मधुरा पुर नर नारी । उमगि उठों आनँद उर भारी ॥  
 घरघर सबहिन मंगल साजे । द्वार द्वार प्रति बाजन बाजे ॥  
 नौसत साज संकल वरनारी । सजि सजि मंगल कंचन थारी ॥  
 गान करत कलंकंठ लजावैं । श्रीवसुदेव धामको आवैं ॥  
 दोहा-जाति पांति परिजन प्रजा, बंधुहितू सब लोग ॥  
 लै लै आवत भेट सजि, हरषत निज निज योग ॥

सो०-भई भवन अति भरि, नट नाचत गावत गुणी ॥

धरि धरि मनुज शरीर, मानहुँ सुख आये सकल ॥  
 तब जननी मन अति सुखपाये । उपटनकारि दोउ सुत अन्हवाये ॥  
 निज कर अंग अँगौछि सुहायो । तन युति लखि दृग ताप नशायो ॥  
 केसरि मलय मिलिय रुचिकारी । किथो तिलकवर भाल सुधारी ॥  
 भूषण बसन भूंगारत कैसे । राजकुवँर वर पहरत जैसे ॥  
 कंचन मणि मय खचित नवीनो । कीट मुकुट शोभित शिर कीनो ॥  
 कलंगी ललित जडाव जडाई । तुरी मध्य अनूप सुहाई ॥  
 गज सुक्तनके कुण्डल कानन । अति विशाल छवि शोभित आनँद ॥  
 कंठपदिकके हार बिराजैं । उर विशाल पर अति छवि छाजैं ॥  
 पंच रत्नके अंगद नीके । शोभित भुजन भावते जीके ॥  
 कर चूरा नव रतन निक्राई । पाणि पल्लवन छाप सुहाई ॥  
 किंकिणिललित कलित रत्नकारी । कटिकेहरि पर बलित सवारी ॥  
 चूरा चारु मनोहर पाँयन । चरण कमल भक्तन सुखदायन ॥  
 दोहा-नील पीत वर बसन तनु, दोउ सुतन शृंगार ॥

चारु अलक मुख शशि झलक, निरखिजात बलिहार ।

सो०-हते श्यामके साथ, ग्वाल तिन्हैं पुनि देवकी ॥

पहिराये निज हाथ, जानि कृष्ण प्रीतम सबै ॥

ग्वाल बाल सब चकित निहार । कहिन सकत कछु मनहिं विचारे ॥  
 येतो कृष्ण देवकी जाये । झूठहि यशुमति सुवन कहाये ॥

१ कोकिला । २ चन्दन । ३ मुख ।



करत शोच मनहीं मन माहीं । अब हरि ब्रज चलिहैं कै नाहीं ॥  
 तब दोउ कुँवर चौक बैठारे । विप्र वृन्द वसुदेव हँकारे ॥  
 धिधिवत पूजि तिलक करवाये । दान बहुत हरि हाथ दिवाये ॥  
 बहुरि आरती मात उतारी । लखि छवि मुदित सकल नरनारी  
 वेद ध्वनि महि देवनकीन्हों । द्रव्य अनेक निछावरि दीन्हों ॥  
 वरुण सहित सुरनभ यश गावैं । बरषि कुसुम दुंदुभी बजावैं ॥  
 परमानन्द सकल पुरवासी । निधि सिधि सब गृह गृहकीदासी  
 बहुरो सखन सहित दोउ भैया । निजकर परसि जिमाये भैया ॥  
 पूजी सकल कामना जीकी । मिट्टी कल्पना दारुण हीकी ॥  
 यहि विधि कंस मारि यदुराई । मात पिताकी बंदि छुड़ाई ॥  
 छंद० इहि भांति कंसनिपातियदुपति, मातुपितुकोसुखदयो  
 हर्षि अति नर नारि मथुरा, धरनवर आनंद भयो ॥  
 परमपावन यश सुहावन, पलहिं में त्रिभुवन गयो ॥  
 जीव जल थल नाग नर सुर, सरसरस जहैं तहैं भयो ॥  
 यह कंसहतन पुनीत यश, नितनर सुनैं जे गावहीं ॥  
 ते न भव बंधन परहिं, फिरि अर्घं समूह नशावहीं ॥  
 मिटहिं दारिददोष दुरमाति, विपति निकट न आवहीं  
 सकल मन बांछितलहैं अरु, भक्ति अविचल पावहीं ॥  
 दौहा—कठिन शूल शंकट हरण, मंगल करण अशेष ॥  
 राम कृष्णके चरित वर, गावत सुनत विशेष ॥  
 सो०—नरतनु पाय सुजान, अनुदिन गावत हरि कथा ॥  
 सकल सुखनकी खान, ब्रजवासी प्रभुकेसुयश ॥  
 अथ कुबिजागृहप्रवेश लीला ॥  
 श्रीयदुकुल कुल कमल तमारी । दीनबन्धु भक्तन हितकारी ॥  
 करिकें जननी जनक सुखारी । तब कुबिजाकी सुरति सवारी ॥

१ ब्राह्मण । २ पुष्प । ३ पाय । ४ अहर्निश ।



Vinay Avasthi Sahib Bhuvan Vani Trust Donations

नृपति भवन तजिके अभिरामा । चले वसन कुबिजाके धामा ॥  
 कृष्ण कृपा सबही पै न्यारी । भाव भजन कुबिजा भई प्यारी ॥  
 सांचो भाव हृदय जहँ जाने । विवश होय तेहि हाथ बिकाने ॥  
 नारि पुरुष कछु नाहिँन भेदा । नीच ऊँच नाहिँ करत निषेदा ॥  
 प्रथमहिँ आय मिली मग पाई । सोहित मानि लियो यदुराई ॥  
 चन्दन चर्चि तनक तनु दीन्हो । मनहुँ कोटि तप काशी कीन्हो ॥  
 अति अकुलीन कंसकी दासी । परसत पावन भई रमासी ॥  
 आये पुनि प्रभुताके धामा । भक्त वत्सलै जिनको नामा ॥  
 जब कुबिजा जान्यो हरि आये । पाटम्बर पाँवडे बिछाये ॥  
 अति आनंद लियो उठि आगे । पूरण पुण्य पुंज सब जागे ॥

दोहा-टेढीते सूधी करी, दियो रूप अभिराम ॥

दासीते रानी भई, पूरे सब मन काम ॥

सो०-कोकरिसकै प्रकाश, अति विचित्र हरिके गुणन ॥

सदादासको दास, भयो रहै प्रभु जननके ॥

पुरवासिन सबहिन यह जानी । राजा हरि कुबिजा पटरानी ॥  
 घर घर कहत सकल नर नारी । कियो कहा धौ इन तप भारी ॥  
 मिली तनक चंदनदै मगमें । भई विदित अति पावन जगमें ॥  
 यह महिमा कछु कहत न आवै । कोताकी पटतर अब भावै ॥  
 भूलि कहत कुबिजा जो कोऊ । ताहि रिसाय उठत सब कोऊ ॥  
 सो तो भई कृष्णकी प्यारी । दासी कहत डरत नर नारी ॥  
 करत ब्रास मनमें सब प्राणी । डारहि मारि सुनै जो रानी ॥  
 जापर कृपा करें यदुराई । ताहिनीहीं यह कछु अधिकाई ॥  
 सदा सदा हरिकी यह रीती । मानत एक भक्तसों प्रीती ॥  
 धनि धनि कुबिजा हरिकी रानी । धनि धनि कृष्ण प्रीति करिमानि ॥  
 धनि धनि चन्दन अंग लगायो । धनि धनि भवन जहां हरि आयो ॥  
 कहि कहि सब सुर नारि सिहाहीं । आज कूबरी सम कोउ नाहीं ॥

१ आनन्ददाता । २ पुनीत । ३ भय ।



दोहा-बसे श्याम कुबिजा सदन, तहँ करि कछु विश्राम ॥

पुनि आये वसुदेव गृह, जन मन पूरण काम ॥

सौ-तब श्री नन्दकुमार, ब्रज वासिनकी सुरति करि ॥

मनमें कियो विचार, अब सब चलिये नंदपै ॥

लै वसुदेव संग दोउ भाई । गेजहँ उग्रसेन नृपराई ॥

तहां बहुरि यादव सब आये । पुनि उद्धव अक्रूर बुलाये ॥

तब हरि ऐसे वचन सुनाये । ममहित ब्रजवासी सब आये ॥

नंदादिक सब गोप जितेका । रह्यो नहीं ब्रजमें कोउ एका ॥

गाय बत्स सब तजे अनेरे । हैं सुने मंदिर सब केरे ॥

हैंहै दुखित यशोमति मैया । जिन हम प्रतिपाले दोउ भैया ॥

बहुत हेत उन हमसों कीन्हों । विविध भांति अबलों सुखदीन्हों ॥

सज्जुचत हौं अपने मन माहीं । उनसों उक्कण कबहुँ मैं नाहीं ॥

पलटो नहिं जो उनको दीजै । अब चलि विदा उगहँ ब्रजकीजै ॥

सुन हरि वचन परम सुख पाई । सब मिलि चले जहां नंदराई ॥

सुनी नंद गोपन यह बाता । मारो कंस जाय दोउ भ्राता ॥

साँच नहीं मनमें कछु माने । प्रजा भाव सबरहे सकाने ॥

दोहा-मनही मन शोचत खड़े, नहिं आये बलराम ॥

ब्रज में आये द्वैगयो, तिन्हें आयषोवाम ॥

सौ०-अब कैसे ब्रज जाहि, बल मोहन दोउ बिना ॥

अति व्याकुल मन माहिं, कबधौं नयनन देखि हैं ॥

अथ नन्दाविदालीला ॥

आये तबहीं कुवैर कन्हारी । नृप वसुदेव सहित दोउ भाई ॥

देखत नन्द मिले उठि धाई । लिये लगाय कण्ठ सुखदाई ॥

अब चलि हैं ब्रजको यह जान्यो । अति आनन्द हृदय हरवान्यो ॥

लखि वसुदेव बहुत सुखपाई । मिले नन्दसों सादर धाई ॥

उग्रसेन तब नन्द जुहारे । आदर सहित सकल बैठारे ॥

उग्रसेन वसुदेव उपाँगसुत । सुफलक सुत अरु यादव गण युत ॥



बैठे मिलि हरि हलधर भाई । नन्दहि मिले निकट बैठाई ॥  
 और गोप ठाढ़े सब देखैं । यशुमति सुतको भाव न देखैं ॥  
 नंद मनहिं मन अति अकुलाहीं । चलत वेगि अब ब्रज क्यों नाहीं ॥  
 सबहीके मनमें यह आई । हरि अब हम सों प्रीति घटाई ॥  
 करत विचार श्याम मनमाहीं । प्रीति विवश बोलत सकुचाहीं ॥  
 तब हरि यों मुख वचन उचारे । बहुत कियो प्रतिपाल हमारे ॥  
 दोहा-झझकि परे नंदराय सुनि, कहा कहत गोपाल ॥

मोसों कहतकि आनसों, किन कीन्हों प्रतिपाल ॥  
 सो०-चौंकत जिय नंदराय, मति मोसों ऐसे कहौ ॥

गहबैरहिय भारि आय, डारि सकत नहिं नयन जल  
 तब हरि मधुर कह्यो नंदराई । सुनहु तात हम कहत लजाई ॥  
 कही गर्ग तुमसों जो वानी । सो तुम तब निश्चय नहिं जानी ॥  
 पुत्र हेतु हमको प्रतिपारे । तात मात जिमि अधिक दुलारे ॥  
 खेलत हँसत बसत ब्रज माहीं । जात इते दिन जाने नाहीं ॥  
 हमको तुम दीन्हों सुख जितनो । कह्यो न जात बदन ते तितनो ॥  
 तुम सम मात पिता न हमारे । जहाँ रहें तहँ तात तुम्हारे ॥  
 बिछुरन मिलन मोह अरु माया । यह प्रपंच जग विधि उपजाया ॥  
 है है दुखित यशोमति मैया । मोविन ब्रज तिय अरु सब गैया ॥  
 ताते गमन वेगि ब्रज कीजै । जाय सबनको धीरज दीजै ॥  
 यशुमति सों विनती मम कहियो । माने सदा पुत्रहित रहियो ॥  
 मेरी सुरति न उर ते टारो । मैं तुम ते कबहूँ नहिं न्यारो ॥  
 हरि यों नन्दहि वचन सुताई । बहुरो रहे सकुचि अरगाई ॥  
 दोहा-निहुर वचन सुनि श्यामके, भये विकल अतिनंद ॥

उमगि नीर नयननचल्यो, परिगये दुखके फंद ॥  
 सो०-दुखित मखा अरु गोप, चकित रहे हरि मुख निरखि ॥  
 करत मनहिं मन कोप, ये चरित्र अक्रूरके ॥



Vinay Avasthi Sahib Bhuvan Vani Trust Donations

परे नन्द तब चरणन धाई । कहत न ऐसी कबहुँ कन्हाई ॥  
 हों मोहन तजि चरण न जैहों । तुमबिन जाय कहा ब्रज लैहों ॥  
 मधुचन तुमहि छांड़ि जो जाऊँ । यशुदै उत्तर कहा सुनाऊँ ॥  
 सन्मुख सुनत दौरि जब ऐहै । तुमबिन काहि गाढ़ भरि लैहै ॥  
 पंथ निहारत हैहै मैया । चलहु वेगि ब्रज कुँवर कन्हैया ॥  
 सद माखन मधि कीन्हो हैहै । कहोसो तुम बिन काहि खैहै ॥  
 क्यों जीहै बिन दरशन पाये । होत निदुर कित मथुरा आये ॥  
 बारह वर्ष कियो हम गारो । नाहि जान्यो परताप तुम्हारो ॥  
 अब प्रकटे वसुदेव कुमार । कीन्हो वचन गर्ग निरधारा ॥  
 कत हम काज महारिपुमार । कत दरिद्र दुख हरे हमारे ॥  
 डारि न दियो कमल कर गिरिवरादबि मरते ब्रज जन ताकेतर ॥  
 कहैं नन्द यों बिकल अधीरा । भई कठिन बिछुरनकी पीरा ॥

दोहा-देखि प्रीति अति नंदकी, मन वसुदेव सिहात ॥

सकुचि रहे सब प्रेम वश, कहि न सकत कछु बात ॥

सौ०-व्याकुल सबै अहीर, मानहु पन्नगके डसे ॥

हरि मुख लखत अधीर, ठाठे काठे चित्रसे ॥

तब हलधर नंद ससुझावत । कहत तात तुम कत दुख पावत ॥  
 करि कछु काज बहुरि ब्रज आवैं । तुमबिन और कहाँ सुख पावैं ॥  
 हरि प्रगटे भूभार उतारन । कछो गर्ग तुमसों सब कारन ॥  
 मात पिता हमरे नाहि कोऊ । तुम्हरे सुवन कहावैं दोऊ ॥  
 हमें तुम्हें सुत पितुको नातो । और परे अब होत न हातो ॥  
 बहुत कियो प्रतिपालें हमारो । जाय कहाँ उर ध्यान तुम्हारो ॥  
 जननि अकेली व्याकुल हैहै । तुम्हें गये धीरज कछु पैहै ॥  
 व्याकुल नंद सुनत यह बानी । पुनि पुनि कहत जोरि युग पानी ॥  
 अब कै चलहु श्याम मम गोहैन । ब्रजमें मिलि आवहु फिरि मोहन ॥  
 मरिउ कंस कियो सुर काजा । दीन्हो उग्रसेनको राजा ॥

१ सर्प । २ सेवा । ३ साथ ।



Vinay Avasthi Sahib Bhuvan Vani Trust Donations

सुख वसुदेव देवकी पायो । भयो सकल यदुकुल मन आयो ॥  
 यदपि यशोमति बिन गिरिधारी । को जानै प्रभु टेक तुम्हारी ॥  
 दोहा-ऐसे कहि अति विकलहै, रहे नंद गहि पांय ॥

भई क्षीण श्रुतिहीन मति, नयनन जल नरहाय ॥  
 सो०-माया रहित मुकुन्द, नहीं विरह संयोग तिह ॥

ब्रह्म पूरणानन्द, सब घटवासी एकरस ॥  
 देखि विरह अति कादर नंदहि । सखा वृंद अरु सब उपनन्दहि ॥  
 बिछुरत तजन चलतहैं प्राना । तब यह चरित रच्यो भगवाना ॥  
 मेरी अति दुस्तरहै माया । जिनकर जीवविमुख भरमाया ॥  
 तिन कछु द्वन्द कियो जगमाहीं । तब हरि बोध करत नंद पाहीं ॥  
 कत पछितात तातहौ एतो । ब्रज अरु मथुरा अंतरकेतो ॥  
 कहा दूरि तुमते कहूँ जाहीं । करि विचार देखौ मन माहीं ॥  
 हैं ब्रजके नरनारि दुखारी । ताते कीजत बिदा तुम्हारी ॥  
 ऐसे बोधकियो ब्रजनाथा । तब नंद कह्यो जोरि सुग हाथा ॥  
 जो प्रभु तुमको ऐसे भाई । तौ अब मेरो कहा बसाई ॥  
 जैहाँ ब्रज प्रभुकहे तुम्हारे । जात वचन मोपै नहि टारे ॥  
 बहुत करी तुम मम प्रभुताई । नीच दशालै ऊंच चढाई ॥  
 परमगँवार ग्वाल पशुपाला । भयो धन्य सब जगत विशाला ॥  
 दोहा-मेदि पाप संताप सब, कियो सुकृतकी खान ॥

भरी साखि चौदह भुवन, सुर सुनि वेद पुरान ॥  
 सो०-ऐसे कहि नंदराय, परे बहुरि हरिके चरण ॥

लीन्हें श्याम उठाय, कह्यो जान सन्मान तब ॥  
 तब वसुदेव विनय बहु भाषी । आगे बहुत संपदा राखी ॥  
 कियो जोहम प्रति तुम उपकारा । ताको बदलो नहि संसारा ॥  
 बालक ये अपनेही जानो । इहाँ उहां कछु भेद न आनो ॥  
 सुनि सुनि नंद महर पछिताई । रहेठगे तनु दशा भुलाई ॥  
 ऊरध्रवास नयन बह पानी । कंपित तनु कहि जात न बानी ॥



Vinay Avasthi Sahib Bhuvan Vapi Trust Donations

सो कछु संपात नद न लाना । विनती बहुरि श्याम साँ कीनी ॥  
 मांगतहाँ प्रभु यह कर जोरी । ब्रजपर कृपा होय नहिँ थोरी ॥  
 तब सब गोप नृपति पहुँ आये । बहुत बोध करि ब्रजहि पठाये ॥  
 गोप सखा बोधे हरि सबहीं । बिदा किये आदरदै तबहीं ॥  
 चले सकल ब्रज शोचत भारी । हारे सरवस मनहुँ जुवारी ॥  
 काहू सुधि काहू सुधि नाहीं । लटपट चरण परत मग माहीं ॥  
 ब्रजतन जात बिलोकत मधुवन । विरह व्यथा बाढ़ी व्याकुल तन ॥  
 दोहा-भये विरह वारिधिभगन, अति अचेतअकुलाय ॥  
 श्यामराम तजिमधुपुरी, आये ब्रज नियराय ॥  
 सो०-उताहि गये हरि गेह, उग्रसेन वसुदेव युत ॥  
 ब्रज वासिनको नेह, पुनि पुनि श्रीमुखते कहत ॥  
 पुनि पुनि नंद कहत पछिताई । चूकपरी हारिकी सेवकाई ॥  
 कहँ लगि गनिये यह अपराधू । किये कर्म हम परम असाधू ॥  
 कोमल पद बन अति कठिनाई । तहँ हरि पै हम गाय चराई ॥  
 किंचक दधिके काज रिसाई । बांधे यशुमति ऊखल लाई ॥  
 इंद्रकोप ब्रजलोग बचाये । वरुण लोक ममहित उठि धाये ॥  
 हम मतिमन्द न उनहीं जाने । निकट बसत नाहिन पहिँचाने ॥  
 तन धन लोभ कंस भयपाई । करि दीन्हें आगे दोउ भाई ॥  
 ऐसे समुद्धि नंद निज करनी । परे मुरछि व्याकुल अति धरनी ॥  
 बार बार जोवतमंग माता । व्याकुल बिन मोहन बल ताता ॥  
 आवत देखि गोप ब्रज ओरी । हरषि हृदय आतुर उठि दोरी ॥  
 धाई धेनु वत्सको जैसे । माखन प्यारेहँ धाँ कैसे ॥  
 कनियां लेवेको अतुरानी । आये बल मोहन यह जानी ॥  
 दोहा-धाई अति हर्षित हिये, सुनत रोहिणी पास ॥  
 दरश आश आई सबै, ब्रजतियाहिये हुलास ॥  
 सो०-त्यहि क्षण अति आनन्द, ब्रजवासी ब्रजतिय सबै ॥  
 अति सकोच वश नंद, सो दुख कापै जात कहि ॥

१ धन-वत्सालंकार । २ मार्ग देख ।



अथ ब्रजकीविरह लीला ॥

आतुर सकल गई नैदपासा । मनमोहन दर्शनकी आशा ॥  
 पेखे नन्द गोप सब देखे । श्याम राम दोऊ नहिं पेखे ॥  
 बृझत यशुमति अति अकुलाई । कहँ मेरे श्याम राम दोऊ भाई ॥  
 सुनत वचन व्याकुल नैदराई । नयन नीर भरि नारिनवाई ॥  
 देखत सुखि गई ब्रजनारी । जनु प्रफुलित कुसुदिनिहिमहारी ॥  
 जान्यो आन भई विधि सोई । कहि गये वचन गर्ग मुनि जोई ॥  
 अति व्याकुल सब बिन ब्रजनाथा । भये सकल नरनारि अनाथा ॥  
 परे भूमि सब ढेर लगाई । कौन दोष प्रभु हम बिसराई ॥  
 यशुमति अति बिलपति बिलखानी । कहत सरोष नंदसाँ बानी ॥  
 धिग धिग महर कहा यह कीनो । मधुरातजि सुत ब्रज पगदीनो ॥  
 मारग सूझि परेउ केहि भाँती । विदा होत फाटी नहिं छाती ॥  
 अर्द्ध वचन सुनताहि उठि धाये । कहा लेन सुख ब्रजमें आये ॥  
 दोहा—कैसे प्राण रहे हिये, धिखुरत आनंदकन्द ॥  
 सुनी नहीं दशरथ कथा, कहँ श्रवण मतिमन्द ॥  
 सो०—मैं मधुपुरकां जाय, रहिहौं हरिकी धायहै ॥  
 लीजै ठाँकि बजाय, अब अपनो ब्रज नंद यह ॥  
 यह सुनि नन्द परे मुरझाई । अति व्याकुल ब्रज लोग लुगाई ॥  
 पुनि पुनि कहति यशोमति टेरे । कहँ छाँड़े दोऊ सुत मेरे ॥  
 जीवन प्राण सकल ब्रज प्यारो । छीनि लियो वसुदेव हमारो ॥  
 सुफलक सुत वैरी भयो भारी । लै गयो जीवन मूरि हमारी ॥  
 हौं न गई हरि संग अभागी । सिखये इन लोगनके लागी ॥  
 जोमैं जानि पावती गोहन । तोक्यों छाँडि आवती मोहन ॥  
 ऐसे रोवत करत विलापू । कहि न जान यशुमति परितःपू ॥  
 हरि बिन सबनरनारि उदासी । आये जबाहि सकल ब्रजवासी ॥

१ क्रोधकरके ।



नहीं श्याम विनय स्याम सुहृद् । मनहु मशान भूमि धरि खाई ॥  
 पूछत विलखि यशोमति मैया । कहा नंद कहकहो कन्हैया ॥  
 तुमको बिदा ब्रजहि जब कीन्हो । हरि कछु मोहि सँदेशो दीन्हो  
 तुम कछु हरिसों धिनय न भाषी । कहा श्याम मनमें यह राखी ॥  
 दोहा—भैं अपनोसों बहु कियो, वे प्रभु त्रिभुवन नाथ ॥

जो चाहैं सोई करें, कहा सु मेरे हाथ ॥  
 सो०—कहिकै तोहि प्रणाम, बहुरि श्याम ऐसे कह्यो ॥  
 करिकै कछु सुरकाम, मिलिहौं तुमसों आय ब्रज ॥  
 पुनि बोले ऐसे बल भैया । दुखीहोनपावै नाहि मैया ॥  
 धीरज देहु तात तुम जाई । बछु दिनमें हम मिलिहैं आई ॥  
 पठयो मोहि तोहि हितलागी । तबमें वचन सक्यों नहि त्यागी ॥  
 सुनि सँदेश यशुमति दुखपागी । रहे प्राण हरि चरणनलागी ॥  
 एक पलक बिछुरत हरि नाहीं । गहि रहि मिलन आश मन माहीं  
 ब्रज घरघर सब कहत गुवाला । किये कृष्ण मथुरा जो खयाल ॥  
 मारेउ रजकजाय हरि जबहीं । नहि निबहै जान्यो हम तबहीं ॥  
 चन्दन बहुरि कंसको लीन्हो । रूप अनूपम कूबरि दीन्हो ॥  
 वैसो धनुष तोरि पुनि डारेउ । फिरि दोउ भाइन गजको मारेउ ॥  
 रङ्गभूमि सब मल्ल पछारे । असुर अनेक युद्ध करि मारे ॥  
 कहत हते ब्रजमें हरि जैसे । कियो जाय कंसहि पुनि तैसे ॥  
 केश पकरि महि तुरत गिरायो । मारि यमुन जल माहि बहायो ॥  
 दोहा—उग्रसेन राजा कियो, निज कर चमर दुराय ॥

मथुरा नर नारी सबै, आनन्दे सुख पाय ॥  
 सो०—पुनि भेंटे हरि जाय, देवकि अरु वसुदेव सों ॥  
 कह्यो परम सुख पाय, तात मात कहि आत दोउ ॥  
 तहां भयो उत्सव अति भारी । दियो दान बहु विप्र हँकारी ॥  
 हरिहि बल्लन भूषण पहिरायै । मंगल सब नर नारिन गाये ॥

१ मर्घटकी भूमि ।



मथुरा घर घर बजी बधाई । बहु सम्पति वसुदेव लुटाई ॥  
 अब नहिं गोप गोपाल कहावैं । वासुदेव सब नाम बुलावैं ॥  
 यदुकुल कमल सकल जगनायक । विरद वान वर्णत गुण गायक  
 भये कृष्ण मथुरा के राजा । अहिरन देखि लगति अति लाजा  
 पुनि ग्वालन यह बात सुनाई । बसे श्याम कुबिजा गृह जाई ॥  
 भये जासुवश अति हित मानी । कीन्ही ताहि आपनी रानी ॥  
 राजा हरि कुबिजा भइ रानी । गोपिन सुनी जबहिं यह बानी ॥  
 गई विरहतन तपत सिराई । सौति शाल शाल्यो उर आई ॥  
 भयो दुसह दुख ऊरध आसा । मिठी श्याम आवन की आशा ॥  
 नयनन जल धारा अति बाढी । रही शोच बैठीं कोउ ढाढी ॥  
 दोहा-जुरि आई ब्रज तिय सबै, सुनि कुबिजाकी बात ॥  
 लागीं आपस में कहन, मन दुख सुख हर्षात ॥  
 सो०-करी सुहागिनि श्याम, कुबिजा दासी कंसकी ॥  
 आपुन पति वह बाम, कियोनाम तिहुं पुर विदित  
 लै श्रीखण्ड मिली मग माई । सुनियत ताते अति मन भाई ॥  
 भली बुरी कछु जात न चीन्ही । बहुत रूप दै सम कर लीन्ही ॥  
 वे बहु रमण नगर की सोऊ । बन्यो संग अब नीको ओऊ ॥  
 कहत जु वह सोई अब मानैं । निशि दिन वाके गुणहि बखानैं ॥  
 जानि अनोखी नेह बढ़ावैं । अब नहिं सखी श्याम ब्रज आवैं ॥  
 अपर कह्यो कछु रोष जनाई । श्याम सदाके ऐखेइ माई ॥  
 जब अकूर लेन ब्रज आयो । कान लागि तब यहै सुनायो ॥  
 नई कूबरी नारि बताई । तबहिं गये ताके संग धाई ॥  
 बोली और एक तिन माहीं । कुबिजा तुम देखी कै नाहीं ॥  
 दधि बेचन जब जात तहांरी । तब नीके हम ताहि निहारी ॥  
 अँगटेढी मालिनकी जाई । हँसत जाहि सब लोग लगाई ॥  
 बसत ढिगन नृप महलन जोई । सुनियत करी सुन्दरी साई ॥

१ चंदन । २ नई । ३ उत्पनकी ।



दोहा-कोटि बार दाहौ अनल, कोटिकसौकिन सोय ॥

तौकत पीतरते कहूं, कैसे सोनो होय ॥

सो०-हरि तजि दीन्हीं लाज, हमें होत सुनिकै हँसी ॥

जाय कूबरी काज, मथुरा मारेउ कंसनृप ॥

बोली सखी और इक बानी । अलि यह बात नहीं तुम जानी ॥

कुचिजा सदा श्यामकी प्यारी । वे भर्ता उनकी वह नारी ॥

तैसे वहां ताहि करि दासी । राखी ये अवगति गुणराशी ॥

रूप रतन कूबर में राख्यो । जिमि मोती सीपनमें भाप्यो ॥

कंस मारिकै सो अब लीन्ही । ताकी प्रभुता प्रगट न कीन्ही ॥

ब्रज वनिता त्यागी अब तातें । बूझी सकल श्यामकी बातें ॥

कहत एक तब सुनु सखिएरी । वेदिन हरिको बिसरि गयेरी ॥

लिये फिरतही जब सब कनियां । पहिरावन सिखये हमतनियां ॥

घर घर डोलत माखन खाते । यशुदाहि उरहन देतलजाते ॥

बहुरि भये जब कलुक सयाने । बाट घाट अवगुण बहु टाने ॥

जो जो उन हमसों गुण ठान्यो । हग सब ताही में सुख मान्यो ॥

जिमि भजि आप गोकुलै आये । गोप भेष करिरहे छिपाये ॥

दोहा-देव मनावत दिन गये, बड़े होनकी आस ॥

बड़े भये तब यह कियो, बसे कूबरी पास ॥

सो०-यशुमति लाड लडाय, बारते सेवाकरी ॥

ताहको बिसराय, भये देवकी पुत्र अब ॥

सुनो सखी अब कह्यो हमारो । नहिं कीजै तिनको पतियारो ॥

जो जन जगमें कर्तहि न मानै । निज स्वारथ लागि बहु गुणठानै ॥

ज्यों भँवरा कल कुंज स्वहाई । बैठन चाहि सुमनपर आई ॥

रसहि चाखि पुनि हित नहिं मानै । तहीं जात जहँ नूतन जानै ॥

पालत कमाधिकहि हितमानै । मिलत कुलहि जब होत सयानै ॥

सोई भई हमहि अरु नन्दहि । कहिये कहा सखी गोविन्दहि ॥

१ कियेकारपकार । २ नवीन ।



जे खोटे मन कपट सयाने । औसर परे परें पहिचाने ॥  
 बैठत अब नृप आसन माहीं । सुनियत मुरली देखि लजाहीं ॥  
 मोर पंख देखत नहि भावें । ब्रजको नाम लेत बहरावें ॥  
 मुरभी चित्रहुमें जो हेरत । तोलजाय इतउत मुख फेरत ॥  
 हमरो नाम सुनत चपि जाहीं । सुरत करत ग्वालनकी नाहीं ॥  
 वे कह जानें पीर पराई । जिनकी प्रकृति परी यह आई ॥

दोहा-भयो नयो अब राजहां, नये मात पित गेह ॥

नई नारि कुबिजा मिली, भये सखानवनेह ॥

सो०-विसरे ब्रजकी बात, कुंजकेलि रस रासका ॥

गये आपनी घात, दिन दिन दुख दूनो लहौ ॥

कौन बातको करें परेखो । सखि अपने जिय शोच न देखो ॥

नाहिर जाति न पांति हमारी । तिनको दुख मानिये कहारी ॥

गोपीनाथ नन्दके लाला । अब न कहावत कान्ह गुवाला ॥

वासुदेव अब उहाँ कहावत । यदुकुलदीप भाटवर गावत ॥

नहि वनमाल गुंज उर माहीं । मोर पच्छ माथेपर नाहीं ॥

गृह वनकी सब प्रीति भुलाई । वा मुरली सँग गई सगाई ॥

अब वह सुरति होत कतराजन । दिनदश प्रीति करी निजकाजन ॥

सने अजान भई तिहि काला । सुनि मुरलीको शब्द रसाला ॥

अब मन जलनिधि खगज्यों थाकें । फिरि फिरि शरण जहां जिहिताकें ॥

कहत एक सुनुरी ब्रजनाथा । ब्रज अब मानों कियो अनाथा ॥

तब वह कृपा हुती ब्रज पाहीं । राख्यो गिरिवर करंतल माहीं ॥

बहुरो और प्रताप कियोरी । हमहित दावानल अँचयोरी ॥

दोहा-अब यह दोष लगै हमें, समुझत सकुचत जीय ॥

भयो वज्रहूते कठिन, बिलुरत फटयो नहीय ॥

सो०-अबलागे दिन जान, सुनु सखि मोहनलाल बिन ॥

रहत देहमें प्रान, बिन वह सुरति सांवरी ॥

१ गोवर्द्धन पर्वत । २ छगुनियापर । ३ अमिकी ज्वाल ।



रहत वदन देखे बिन नयना । श्रवण नरहत सुने बिन वयना ॥  
 रहतहियो बिन हरि कर परसे । वेधत बाण मनोभव बरसे ॥  
 अब सखि यों सहियत दुख भारो । मनहुँ नयन तन प्राण हमारो ॥  
 जब विधि बालक वत्स चुराये । तब हरि तैसेइ और बनाये ॥  
 जनु वैसेइ कुँवर कन्हारि । विरह वृष्टि ब्रज ओर चलाई ॥  
 ऐश्वर्य गुण गुणि गोपाला । भई विरह वश सब ब्रजवाला ॥  
 अतिही कठिन भयोदुख मनमें । व्यापी दशई अवस्था तनमें ॥  
 कोउ कह लोचन दीन हमारे । क्योंजीवाहिं बिनश्याम निहारे ॥  
 ज्यों चकोर बिन चन्द्र दुखारी । जैसे री बारिजबिन बारी ॥  
 विवरन जिलि ग्रीष्म के खंजन । जैसे दुखी अमर बिन कंजन ॥  
 श्याम सिंधुते बिछुरि परेरी । तडफडात ज्यों मीन खरेरी ॥  
 भरत हरत पुनि पुनि अकुलाहीं । हरिबिन धरत धीर दृग नाहीं ॥

दोहा-देख्यो नहीं सुहात कछु, गृहवन बिन नंदनन्द ॥  
 विरह व्यथा जारत नहीं, भयो तपनि अति चन्द ॥  
 सो-बिन श्वासाकी देह, और रूपहै जात जिमि ॥  
 तिमि लागत ब्रज गेह, हरि बिन सखी भयावनी ॥

इहि विरियां बनते हरि आवत । दूरिहिते कलवेण बजावत ॥  
 कबहुँक परम चतुर गोपाला । गावत ऊंचेस्वरन रसाला ॥  
 कबहुँक लैलै नाम सुनावत । धौरी धूमरि धेनु बुलावत ॥  
 देत दृगन सुख बनते आई । वह मनमोहन रूप दिखाई ॥  
 और सखी बोली एक ऐसे । बहुरो कबहुँ देखिये वैसे ॥  
 बैठे ग्वाल बालकनसाथा । बाँटत खात अशन ब्रजनाथा ॥  
 एकदिन दधि चोरत मम धामा । मैं दुरिदेखि रही लविश्यामा ॥  
 वेभाने ममलखि परछाहीं । तब मैं धाय लई गहिवाहीं ॥  
 मुख करपाँछि लिये गहि कनियां । प्रेम प्रीतिरसके सुख दनियां ॥  
 रहेलागि छातीसाँ जैसे । सो वह कहो जातसुख कैसे ॥

१ वछरा । २ विशेष । ३ कमलन । ४ सुंदरीवंशी । ५ भोजन ।



जिन धामन वे सुख अवलोकै । तेअब धरि धरि खात बिलोकै ॥  
 सुमिरिसुमिरिवेगुणगणनाना । हरिविन रहत अधम तनुप्राना ॥  
 दोहा-कहाँ लगि कहिये ये सखी, मनमोहनके खेल ॥

उन बिन अब गोकुल भयो, ज्यों दीपक बिनतेल ॥  
 सो०-रहत नयन जल छाये, सुमिरि सुमिरि गुण श्यामके  
 कहिये काहि सुनाय, भये पराये काह अब ॥

एक प्रलप करत मन माहीं । कहै जाय कोऊ हरि पाहीं ॥  
 लेहु आय निज गायन घरी । फिरत नहीं ग्वालनकी फेरी ॥  
 बिडरी फिरत सकल धनमाहीं । तुमबिन नाहिं काहु पतियाहीं ॥  
 अपनो जानि सँभारहुआई । मति बिसरौ ब्रजहेत कन्हआई ॥  
 बिलखत गाय बरस सचवाला । नेकुसुनावहु वेणु रसाला ॥  
 बूझत विरह सिधुमें नारी । लेहु आय गहि भुजानिकारी ॥  
 कोऊ कहत कहै कोउजाई । बसौफेरि ब्रज कुँवर कन्हआई ॥  
 अबनाहिं तुमसों गाय चरावैं । नहिं जगाय वन प्रात पठावैं ॥  
 माखन खात बरजिहैं नाहीं । नहिं उरहन यशुदहि लैजाहीं ॥  
 नहिं दावँरि यशुमतिको दैहैं । नहिं अब ऊखल साँ बँधवैहैं ॥  
 चोरी प्रगट करैं नहिं काहु । नहीं जनावाहिं अवगुण ताहु ॥  
 बेनी फूल सुहन नहिं कैहैं । नहीं महावर चरण दिवैहैं ॥  
 दोहा-साँगत दान न बरजिहैं, हठ नहिं करिहैं मान ॥

आय दरश अब दीजिये, रहत न तुम बिन प्रान ॥  
 सो०-ऐसे कहि गहि पाँय, ल्यावाहिं फेरि मनाय हरि ॥

बसहिं बहुरि ब्रज आय, तौ ब्रजनंदन साँवरो ॥  
 एक कहत अब हरिनहि आवैं । तुपपद तजि क्यों ग्वाल कहावैं ॥  
 वहँ गजरथ चहि चलत कन्हआई । इहँ क्यों गाय चरावाहिं आई ॥  
 उहां पटम्बर पहिरि दिखावैं । इहांकि क्यों अब कामारि भावैं ॥  
 अब उन यशुमति मातु विसारी । कौन चलावै बात हमारी ॥

१ अनेकप्रकार । २ विचार । ३ भागी । ४ रस्सी ।



बोली अपर सखी बिलखाई । भये निठुर अब कुँवर कन्हाई ॥  
करी प्रीति हमसों हरि ऐसी । सुनु सखि सलिल मीनकी जैसी  
तलकत मीन निपट अकुलाने । नीरे कछु उर पीर न जाने ॥  
इतनी दूर दया नहिं कीन्हों । वीती अवधि खबरि नाहिं लीन्हों ॥  
दै गये बिहँसि चलत परतीती । मिलि हों आय बहुरि रिपुजीती  
हारे नयन उतहि मग जोवत । रोय रोय उर कंचुकि धोवत ॥  
जैसा दिन निशि तैसी जाई । पल भर नोंद परत नहिं आई ॥  
मंद सभार चंद दुखदाई । इनते जरत सेज अधिकाई ॥

दोहा-स्वप्ने हूतो देखिये, नोंद परै जो नयन ॥

कीन्हे विविध उपाय मन, क्योंहूँ लहै न चैन ॥

सो०-बोलि उठी इकबाम, सुन सखि हों तोसोंकहाँ ॥

जबते बिछुरे श्याम, आज लखे मैं स्वप्नमें ॥

आये जलु मम सदन गोपाला । हँसि भुज पाणि गेहे नँदलाला ॥  
कहा कहों और नोंद भईरी । एकहु क्षण नहिं और रहीरी ॥  
ज्यों चकई लखि निज परछाहीं । पतिहि जानि हरषी मन माहीं ॥  
तबहीं निठुर विधाता आई । दियो पवन भिख सलिल डुलाई  
मेरी दशा भई सखि सोई । जो जागों तो ठिग नाहिं कोई ॥  
देखहु कहा अधिक अकुलाई । विरह जरी अरु काम जराई ॥  
कहा कहों किहिं दोष लगाऊँ । अपनी चूक समुझि पछिताऊँ ॥  
बिछुरतही नहिं तज्यो शरीरा । समुझि परी तबहीं यह पीरा ॥  
महादुखित अब अंग हमारे । भये सखी दोउ नयन पनारे ॥  
अतिही भ्रम माते बिन देखे । चाहत रूप श्यामको पेखे ॥  
रखना यही नेम गहि राख्यो । हरि बिन और न चाहत भाष्यो ॥  
जबते बिछुरे कुँवर कन्हाई । तबते भये सखे दुखदाई ॥  
दोहा-वोई निशि वोई दिवस, वोई ऋतु वइ मास ॥  
बदलेसखे सुभाव जनु, बिन हरि मदन विलास ॥

१ पानी । २ शत्रु । ३ वैरी । ४ राति । ५ दिन । ६ महीना ।



सो०-चली औरही चाल, अब या ब्रजमें ऐसखी ॥

विमुख भये गोपाल, भये दुखद जे सुखद सब ॥  
 गृह कन्दरा तेज भइ शूली । शशिकी किराणि अग्नि सम तूली ॥  
 सींचत अली मलय घसिनरी । होत अधिक ताते उर पीरा ॥  
 फूली अरुण फूल बन डारी । झरत देखियत मनहुँ अँगारी ॥  
 हरि बिन फूल लगत सब कैसे । मनहुँ त्रिशूल शूल उर जैसे ॥  
 तब इन तरुन अमृत फल लागे । अबते फल सब विष रस पागे ॥  
 त्रिविध समीर तीर सम लागे । कोकिल शब्द अग्नि जनु दागे ॥  
 तप्त तेल सम वारिद पानी । उठत दाह सुनि चातक बानी ॥  
 सुनु सखि चातक दोष नदीजै । ज्याये या पक्षिके जीजै ॥  
 जैसे पिय पिय हम रट लावत । तैसेही कहि कहि वह गावत ॥  
 अति सुकंठ पीतम हित मानी । क्षण नहि रहत रटत पिय बानी ॥  
 आप सुधारसपी सुख पावैं । टेरि टेरि बिरहिनको ज्यावैं ॥  
 जो यहखग नहि करत सहाई । लहत प्राण तो दुख अधिकाई ॥

दोहा-यापक्षी सम औरको, सुनु सखि सुकृत समाज ॥

सफल जन्म है तासुको, जो आवै परकाज ॥

सो०-मगन सकल ब्रजबाल, ऐसे हरिके विरह वश ॥

नहि बिसरत नंदलाल, सोवत जागत दिवस निशि ॥

पथिक जात मधुवनतन हैरैं । ताहि धाय ब्रजतिय सबदेरैं ॥  
 कहत परहिं हम पायें तुम्हारे । सुनहु बढोही वचन हमारे ॥  
 उतहैं बसत कृष्ण ब्रजनाथा । कहियो तिनसां ब्रजकी गाथा ॥  
 तुम जु इन्द्रको यज्ञ नशायो । पुनिगिरि कर धर ब्रजै बचायो ॥  
 सो अब वह विरहा है आयो । चाहत है ब्रज फेरि बहायो ॥  
 वर्षत निशि दिन दृग घनकारे । बहत कुवन बिच सलिलपनारे ॥  
 ऊरध श्वास पवन झक झोरे । गर्जत शब्द पीर घन धोरे ॥  
 महावज्र दुख सुख द्रुम डारे । व्याकुल अंग सकल अति मारे ॥



Vinay Avasthi Sahib Bhuvan Vani Trust Donations

व्यथा प्रवाह नदयो अति भारी । वूडत विकल सकल ब्रजनारी ॥  
चितवत मग सब नाथ तुम्हारी । जानि आपनो आइ उबारो ॥  
गये मिलन कहि श्रीमुख बानी । अबधि वदीते सब सिरानी ॥  
तुम बिन तलफत प्राण हमारे । जैसे मीन सलिलते न्यारे ॥  
दोहा-एक बार फिर आयकै, देहु सुदरशन श्याम ॥

तुम बिन ब्रज ऐसो लगत, ज्यों दीपकबिन धाम  
सो०-मिलते वेणु बजाय, अब वह कृपा भई कहा ॥

पुनि का करिहो आय, प्राण गये ब्रज आयकै ॥  
सुनहु पथिक त्वहि राम दुहाई । कहियो यह मोहनते जाई ॥  
तुम बिन राधेके तनु आई । भई सब विपरीत बनाई ॥  
वदन लयांकर प्रीति छिपानी । अब रहगई कलंक निशानी ॥  
अँखियाहुतीं कमल पखुरीसी । सो अब मनहुँ रंगनिचुरीसी ॥  
अँच लगै कंचन जिमि काचो । तिमि तनु विरहानलको ताचो ॥  
कदलीदलसी पीठ सुहाई । सो अब मानों उलटि बनाई ॥  
सुखकी संपति सकल नशानी । जारत भई कोकिला बानी ॥  
अब सब साद मानकी नासी । है रहि तुम्हरे दश पिपासी ॥  
चातक पिक मृग अति कुल जाती । तब इनको देखत अनखाती ॥  
अब तिनसों पूछत हैं धाई । तुम्हरे चरण कमल कुम्हिलाई ॥  
ललतादिक सखियां लाखि धाई । जानि अद्य चटि गर्व बढाई ॥  
अब कहि सखी तिनहैं अकुलाई । मिले रायकै कंठ लगाई ॥  
दोहा-सुधि बुधि सब तनुकी गई, रह्यो विरह दुख छाया

होन चहत दशई दिशा, वेगि मिलहु तिहिआय ॥  
सो०-ऐसे निज निज हेत, कहत सँदेशो श्यामसों ॥

पथिकाहि चलन न देत, होत साँझ ताको तहां ॥  
विरह विकल सब ब्रजकी बाला । हरि वियोग उरपीर विशाला ॥  
हरि दरशन बिनकल नहिपावौज्यहि त्यहि कहि उर व्यथा जनै



जब पपिहा बोलत निशि आई । कहत ताहि कोऊ अनखाई ॥  
 हों तो विरह जरी संतापी । तूकत जारत रेखग पापी ॥  
 पिय पिय कहि अधरात पुकारै । मूढ मृतक अबलन कत मारै ॥  
 तू नहिं सुखित दुखित बिन नीरा । तेउ न समुझत शठ परपीरा ॥  
 करत कहा इतनी कठिनाई । हरिविन बोलत ब्रजपर आई ॥  
 उपजावत विरहिन उर आरत । काहे अगिलो जन्म बिगारत ॥  
 एक कहत चताक सों टेरी । हैं सारंग चेरि हम तेरी ॥  
 पौढे होहि जहां सुखदाई । ऊंचे ढेरि सुनावहु जाई ॥  
 गइ ग्रीषम पावस ऋतु आयो । सब काहु चित चाव बढायो ॥  
 तुम बिन व्रजतिय डोलत ऐसे । नाव बिना करयाकी जैसे ॥  
 दोहा-मनैंगे तेरो कछो, तेरे हित धनश्याम ॥  
 लेहु सुयश चातक बड़ी, लै आवहु सुखधाम ॥  
 सो०-सुनि चातकके बैन, कोऊ सखि ऐसे कहत ॥  
 यह बिहंग सुख दैन, सखि स्वहिं प्यारो पीवते ॥  
 निशिदिन पिय पिय रटत विचारो । पियके विरह भयो जरि कारो  
 स्वाति बूंद लगि रहत दुखारो । तज्यों सिंधुको जल करि खारो ॥  
 आप पीर पर पीरहि पावै । जियको जीवन नाम सुनावै ॥  
 प्रेम बाण लाग्यो जेहि होई । जानै व्यथा प्रेमकी सोई ॥  
 कोऊ कहत कोकिलहिटेरी । सुनरी सखी सीख यक भेरी ॥  
 बसत जहां हित कुँवर कन्हाई । फिरि आवहि वोरक तहँ जाई ॥  
 तू कुलीन कोकिला सयानी । सनहिं सुनावत मीठी बानी ॥  
 तो सम कोउ नहीं उपकारी । जानतहौ विरहिन दुखभारी ॥  
 उपवन बैठि श्यामको टेरी । कहियो अबलन मन्मथे घेरी ॥  
 श्रवण सुनाय मधुर कल बानी । ब्रजलै आव श्याम सुखदानी ॥  
 प्राणहुँ पलट मिलत नहिं एरी । संत सु बिकत सुयशकी टेरी ॥  
 हैं हैं बिन मोलन हम चेरी । गावहिं गोकुल कीरति तेरी ॥



दोहा-कौऊ ऐस कहि उठत, बरजहु बोलत मोर ॥  
 रह्यो परत नहिं टेर सुनि, विन श्रीनन्दकिशोर ॥  
 सो०-बोलत करत विहाल, मोरहु सखि वैरी भये ॥  
 वसेविदेश गोपाल, ये बनते न टरैं मरैं ॥  
 विरह मम यों ब्रजकी नारी । नहीं कृष्णसों पलभर न्यारी ॥  
 रही कृष्ण छवि दृगन समझई । रसना कृष्ण नाम रट लाई ॥  
 मनमें गुणहि सदा गुण हरिके । श्रवण रहे हरिको यश भरिके ॥  
 बसी श्याम मूरति उर माहीं । बिसरतसुरत एक पल नाहीं ॥  
 बैठत उठत चलत घर बाहर । श्याम सनेह गुप्त अरु जाहर ॥  
 सोबत जागत दिन अरु राती । प्रीतिम कृष्ण प्रीति रस माती ॥  
 सब अँग कृष्ण प्रेम रस पागी । भई कृष्णभय सकल सभागी ॥  
 धनिसो प्रीति कृष्णसों लागी । धनिसो सुरतिकृष्ण रस पागी ॥  
 धनिसो सुख हरि संग विहारी । धनिसो दुख हरि छिरह बिचारी ॥  
 धनिसु परेखो हरिसों जोई । धन्य सरेखो हरिको होई ॥  
 धनिसो ज्ञान ध्यान धनिसोई । जप तप धन्य जो हरि हित होई ॥  
 धन्यजन्म जो हरिको दासा । सब विधि धन्य जिन्हें हरि आशा ॥  
 दोहा-नंद यशोमति गोपिकन, निशिवासर हरि ध्यान ॥  
 ब्रजवासी प्रभु दासकी, आश रहे लगि प्रान ॥  
 सो०-विसरे सब व्यवहार, और न दूजी गति कछु ॥  
 अंधलकुटिया धार, एक सुरति नंदनंदकी ॥

अथ श्रीकृष्णजीकी यज्ञोपवीत लीला ॥

रहे जाय मथुरा हरि जबते । नितनव मोद होत तहैं तबते ॥  
 देवकी मन अभिलाष पुरावैं । निरखि निरखि दोउ सुत सुख पावैं ॥  
 परमानंद मगन वसुदेऊ । सुखी सकल यादव गण तेऊ ॥  
 मुदित सकल मथुरा पुरवासी ॥ देत सबन सुख प्रभु सुखरासी ॥  
 एक दिवस वसुदेव सुजाना । बोले जेकुल मध्य प्रधाना ॥  
 करि आदर मानता बड़ाई । तिनसों कहि यह बात सुनाई ॥



राम कृष्ण अबलों दोउ भाई । ग्वालन मध्य रहे ब्रजजाई ॥  
 यदुवंशिन की रीति न जाने । हैं अबहीं कुलधर्म अयाने ॥  
 ताते यह विचार अब कीजै । यज्ञोपवीत बुहुनको दीजै ॥  
 सुनिये वचन खवन मन भाये । गर्ग आदि सब विप्र बुलाये ॥  
 पूंछि सुदिन शुभ लग्न धराई । यज्ञकाज सब सौंज मैगाई ॥  
 सकल तीरथन ते जल आयै । राम कृष्ण तासों अन्हवाये ॥  
 दोहा—सकल वेद विधि मंत्र पाठि, करि अभिषेक पुनीत ॥

दोउ भाइन तब गर्ग मुनि, दियो यज्ञ उपवीत ॥  
 सो०—अन्त न पावैं शेष, वेद श्वास जाको सकल ॥

ताहि दियो उपदेश, गायत्री गुरु गर्ग मुनि ॥  
 दियो दान वसुदेव अनेका । पूजे सब द्विज सहित विवेका ॥  
 सब नर नारी मङ्गलगायो । वन्दी जनन द्रव्य बहु पायो ॥  
 लखि कौतुक सुर गण सुख पावैं । वरषि सुमन दुन्दुभी बजावैं ॥  
 अति आनंद भयो सब काहू । तात मात उर परम उछाहू ॥  
 पुनि एक दिन वसुदेव सज्जानी । यह इच्छा अपने मन जानी ॥  
 पण्डित भलो कहूं जो पैये । तो विद्या सब सुतन पढ़ेये ॥  
 काहू तब यह बात बखानी । संदीपन पण्डित बड़ ज्ञानी ॥  
 रहै अवन्ती पुरके माहीं । तासम जग पण्डित कोउ नाहीं ॥  
 यह मुनि कृष्ण सकल गुणखानी । पितुके मनकी रुचि पहिचानी ॥  
 हैकैनेमसहित दोउ भाई । विद्या पढन गये यदुराई ॥  
 वेद विदित सेवा हरि कीन्ही । अल्प काल विद्या सब लीन्ही ॥  
 लखि प्रभाव गुरु अति सुख पायो । जानि जगत्पति मन हर्षायो ॥  
 दोहा—तब हरि गुरु सों जोरि कर, बोले सहित सनेहु ॥

गुरु दाक्षिणा कछु चाहिये, मांगिसो हमसों लेहु ॥  
 सो०—तब गुरु कह्यो विचारि, तुम प्रभु कर्ता जगतके ॥  
 बूझि लेहुं निज नारि, जो वह कहै सो दीजिये ॥



तब संदीपन तिय पहुँ आये। वचन कृष्ण के ताहि सुनाये ॥  
 देन कहत हरि दक्षिणा हमको। माँगें कहा सो बूझै तुमको ॥  
 भरे हुते ताके सुत दोई। तिन मांगे हरि खाँ पुनि सोई ॥  
 कृष्ण सकल जीवनके स्वामी। जल थल सब जिनके अनुगामी ॥  
 गये बहुरि भक्तन सुखकारी। जग उतपति पालन लयकारी ॥  
 चाहैं कियो होय सब सोई। अनि दिये गुरुके सुत वोई ॥  
 भये सुखी द्विज अरु द्विज नारी। सुत संताप मिथ्यो दुख भारी ॥  
 है प्रसन्न गुरु आशिष दीन्हों। नमस्कार प्रभु गुरुको कीन्हों ॥  
 गुरु आयसुले पुनि दोउ भाई। आये मधुपुरि जन सुखदाई ॥  
 तात मात लखि अति सुख पायो। भयो मनोरथ सब मन भायो ॥  
 राज काज पुनि प्रभु सब करई। उग्रसेन आयसु अनुसरई ॥  
 हित जन परिजन नर अरु नारी। सुखी सकल हरि बदन निहारी ॥  
 दोहा-उद्धव अरु अकूरजे, सखा श्यामके साथ ॥  
 भिलि बैठत खेलत हँसत, इनके संग यदुनाथ ॥  
 सो०-ब्रजवासिनको ध्यान, ब्रजवासी प्रभुके सदा ॥  
 यदापि ब्रह्म सुखखान, तदापि भक्त वश प्रेमरस ॥

अथ उद्धवजीकीविदा लीला ॥

उद्धव यदुपति सखा सज्जानी। एक ब्रह्म सुखसों रति मानी ॥  
 हरिको त्रिगुण रूप करि मानैं। प्रेम कथा कछु उर नहिँ आनैं ॥  
 जब हरि ब्रजकी बात चलावैं। तब उद्धव हँसि कै उचटावैं ॥  
 हरि लखि मनहीं मन पछिताहीं। भली बानि याकी यह नाहीं ॥  
 रूप रेख जाके नहिँ कोई। धरयो नेम उरमें इन सोई ॥  
 निर्गुण कथा योगकी गावै। जासँ कछु रस स्वाद न आवै ॥  
 मानत एक ब्रह्म अविनाशी। ज्ञाग भैरवमें रहत उदासी ॥  
 निधुरन मिलन दुःख सुख जाहीं। नहीं प्रेम उपजत तनु माहीं ॥  
 कनक कलश पानी बिन जैसे। याको रूप बन्योहै तैसे ॥



जोहों कहों कहा यह मानै । निदा और हमारी ठानै ॥  
 कहिये काहि प्रेमकी गाथा । बन्धो हंस बायसको साथ ॥  
 ब्रजको ध्यान सदा उर मेरे । प्रेम भजन याके नाहिं नरे ॥  
 दोहा—कहा यशोदा नंदसे, सुखद तात अरु मात ॥

कहँ वह सुख ब्रज धामको, नहिं विसरत दिन रात ॥  
 सो०—कहां सुखनको संग, कहां केलि वृन्दाविपिन ॥  
 कहँ वह प्रेम तरंग, वंशीवट यमुना निकट ॥

कहां नवल ब्रजगोप कुमारी । कहँ राधा वृषभानु डुलारी ॥  
 कहँ वह प्रीति रीति सुख संग । कहां रासरस हासतरंगा ॥  
 कहँ कुंजन बनकेलि निकाई । कहां मान लीला सुखदाई ॥  
 कहँ लगि ब्रजके सुखन सँभारों । जिहिं लगि पुर वैकुण्ठ बिसारों ॥  
 कहिये यह रस वाके आगे । उद्धव सुनत प्रेमको भागे ॥  
 कैसे प्रेम होय या माहीं । मेरेको मानिहै नाहीं ॥  
 ब्रजको याको देखै पठाई । पैहै प्रेम तहां यह जाई ॥  
 याके मन अभिमान बढ़ाऊँ । कहि युवतिनकी प्रीति सुनाऊँ ॥  
 यहै बात यदुपति उर आनी । पठऊँ ब्रजबहि थापत जानी ॥  
 कहों बोध तिनको करि आवो । प्रेममिठाय ज्ञान समुझावो ॥  
 जैहैं तुरत सुनत यह बात । कहिहैं हरि जानत स्वहिं ज्ञाता ॥  
 करि अभिमान तुरत ब्रज जैहैं । हँति जाय साध है ऐहैं ॥  
 दोहा—ऐसे हरि बैठे करत, अपने उर अनुमान ॥

उद्धवके उरते करों, दूर ज्ञान अभिमान ॥  
 सो०—आय गये तिहि काल, उद्धवजी हरिके निकट ॥

विहांसि मिले नंदलाल, सखा सखा करि अंक भारि ॥  
 अति सुंदर सांवलि छविछायो । जब हरिको प्रतिबिम्ब सुहायो ॥  
 अंश भुजा दैके थदुराई । उद्धवसे ब्रजबात चलाई ॥  
 उद्धव सुनो कहों तुमपाहीं । ब्रजको सुखस्वहिं विसरत नाहीं ॥



Vinay Avasthi Sahib Bhuvan Vani Trust Donations

नेकहु नहीं यहां मन लागत । उठि उठि पुनि उतहीको भागत ॥  
 यह मन होत वहीं पुनि जैये । गोपी ग्वालनमें सुखपैये ॥  
 कहँवह हेत यशोमति मैया । दैदै माखन लेत बलैया ॥  
 नहिं विसरत मनते विसराई । वह राधाकी प्रीति सुहाई ॥  
 गोप सखा वृन्दावन मैयां । नहिं भूलत वंशीबटलैयां ॥  
 त्यागत तिन्हें बहुत दुखपाये । मिटत नहीं मनते पछिताये ॥  
 उद्धव सुनि बोले सुसकाई । कहा कहत हरि यों अकुलाई ॥  
 सदा रहत यह हितथिर नाहीं । जगव्यवहार सकल मिथ्याहीं ॥  
 मोखों सुनो बात यदुराई । एकै ब्रह्म सदा सुखदाई ॥  
 दोहा-जब उद्धव ऐसे कही, विहँसि ज्ञानकी बात ॥  
 तब यदुपति सुख पायकै, पुनि बोले हर्षात ॥  
 सो०-भाई मो मन माहि, उद्धव कहि जो बात तुम ॥  
 तुम समानकोउनाहि, सखा और भरो हित ॥  
 उद्धव तुम ब्रजवेग सिधारे । करि आवहु यह काज हमारे ॥  
 पूरण ब्रह्म अलख अज जोई । मात पिता ताके नहिं कोई ॥  
 रूप न रेख जाति कुलनाहीं । व्यापिरहो सब बट घट माहीं ॥  
 हौताके ज्ञाता तुम ज्ञानी । गोपी सकल प्रीतिरत मानी ॥  
 यह मत तिन्हें बोधकारि आवो । प्रेममेटकै ज्ञान दटावो ॥  
 मेरेप्रेम विवश वे बाला । सहत विरहदुख दुसह विशाला ॥  
 काम अग्नि तनु तूले समाना । शोच श्वास मारत बलवाना ॥  
 भस्म होन पावत सो नाहीं । भीज रहत नयनन जल माहीं ॥  
 इहै आज लोपै इहि भांती । विरह व्यथा व्याकुल दिनराती ॥  
 एतेपै कैसे वे न्यारे । समाधान बिन धीरज धारे ॥  
 ताते सखा वेगि तुम जाहू । मेटी तिनके उरको दाहू ॥  
 पठळ नारिनके ढिग सोई । जो तुमहीं सों लायक होई ॥  
 दोहा-यक प्रवीण गुरु सखामम, तुमते ज्ञानी कौन ॥

१ रुई । २ वायु । ३ रैहँसव ।



सो कीजै ज्यहि ब्रजवधू, साधन सीखे पौन ॥  
 सो०—जिहि सुख पावैं नारि, ज्ञान योग उपदेशत ॥

ढारैं मोहि विसारि, ब्रह्म अलख परचोकरैं ॥  
 उद्धव सुनो कहत मैं तुमको । तुम समहित और नहि हमको ॥  
 कैश्यहु उन गोपिन सो मोहीं । उच्छ्रुण कीजिये बिनवत तोहीं ॥  
 निशिदिन भक्ति मरिये उनको । नाहिआनि रुचि कैसिहु तिनको ॥  
 सर्वस तिन न मोहि सब दीनो । तन मन प्राण समर्पण कीनो ॥  
 मुक्ति तीन तिनको मैं दीनी । सोउनहित एकहु नहि कीनी ॥  
 रही एक सो योजन कहिये । सो वह ज्ञान बिना नहि लहिय ॥  
 सो अव देहु तिनहि तुम ज्ञानू । जिहि पावैं पद पदनिर्वानू ॥  
 जो अंगीकृत करैं न तासू । तो मैं हौं उनको ऋणदासू ॥  
 गाय चरावत उनकी रैहौ । ब्रजतजिनहीं अनत कहूँ जैहौ ॥  
 यहै बात मेरे मन भावै । और न कलु मोपै बनि आवै ॥

उद्धव जाहु विलम्ब करौ जिन । उनको युग बीतत मोबिन छिन ॥  
 समाधान तिनको करि आवो । ब्रजमें जाय विलम्बन न लावो ॥  
 दोहा—उद्धव ब्रजमें जायकै, विलंबि न रहियो जाइ ॥

तुम बिन हम अकुलायहैं, श्याम करत चतुराइ ॥  
 सो०—तुमहौ सखा प्रवीन, बार बार सिखऊँ कहा ॥

जिय ज्यों जल बिन मीन, सोई मतौ विचारिये ॥  
 कही श्याम ऐसे जब बानी । तब उद्धव अपने जिय जानी ॥  
 यदुपतियोग साँच अब जान्यो । ज्ञान गर्व अपने मन आन्यो ॥  
 बोल्यो अति अभिमान बढ़ाई । तुम आयसु शिर पर यदुराई ॥  
 तुम पठवत गोपिनके माहीं । मैं कैसे प्रभु करौं कि नाहीं ॥  
 तुम्हरे कहे गोकुलहि जैहौ । ज्ञान कथा ब्रज लोगन कैहौ ॥  
 जो मानि हैं ब्रह्म उपदेशू । तो कहि हौं ससुझाय सँदेशू ॥  
 दिन द्वै रहि ब्रजमें सुख दैहौ । बहुरो आय चरण पुनि गैहौ ॥



यह सुनि बिहँसि कह्यो हरि तबहीं। जाहु उपंगसुत ब्रजको अवहीं  
ज्ञान दृढाय खबरि तिन दीजे । एक पन्थ द्वेकारजकीजे ॥  
आये भ्रात इतै हम दोऊ । तब ते ब्रज पठयो नहिं कीऊ ॥  
जाय नन्द यशुमति परितोषी । ज्ञान कथा कहि युवतिनपोषी ॥  
सकुचो मतिहि जानि ब्रजनारी । कहियो ज्ञान योग विस्तारी ॥  
दोहा-बचन कहतही समुझिहैं, वैहैं परमप्रवीन ॥

हैं शीतल विरहते, ज्यों जल पायो मीन ॥  
सो०-पठवत थापि महन्त, उद्धव को यहि काज हरि ॥

हैं आवैंगे सन्त, ब्रज भक्तनके दरशते ॥  
अपनोही रथ तुरत भँगायो । दैउपंगसुत को पलनायो ॥  
अपनेइ भूषण बखन सुहाये । निज कर उद्धव को पहिराये ॥  
अपनेइ मुकुट आपनी माला । पहिराई उर विहँति विशाला ॥  
उद्धव तब हरि रूप स्वहाये । एक भृगुपदके निह बराये ॥  
लिख्यो पत्रिका श्री यदुराई । नन्द बबाको विनय बड़ाई ॥  
पालागन कहियो कर जोरी । यशुमतिसे यहि भांति करोरी ॥  
बालक ग्वाल सखा समुदाई । लिख्यो मिलन सबहीं उरलाई ॥  
अरु नर नारि सकल ब्रज जेते । प्रीति जनाय लिखे सब तेते ॥  
लिखि गोपिनको योग पठायो । भाव जानि काहु नहिं पायो ॥  
लेहु दृढाय प्रीति ब्रजवाला । यह आनी उरमें नँदलाला ॥  
नीके रहियो यशुमति मैया । कछु दिनमें अइहैं दोउ भैया ॥  
लिखि पाती उद्धवकर दीन्ही । और सुखागर विनती कीन्ही ॥  
दोहा-कहा कहाँ कछु दिवसते, जननी बिलुरेउँतोहि ॥

तादिनते कोऊ नहीं, कहत कन्हैया मोहि ॥  
सो०-कह्यो संदेश न जात, अति दुख पायो मात तुम ॥

अब मोको निजतात, वसुदेव अरु देवकि कहत ॥  
कहियो नन्द बबासों जाई । कह मन धरी इती निदुराई ॥



जबते दियो इतै पहुँचाई । बहुरो सोध लियो नहि आई ॥  
 बारैक बरसानेलौं जैयो । समाचार तहँके सब लैयो ॥  
 ग्वाल बाल सब सखा हमारे । हैहैं वे मम विरह दुखारे ॥  
 तिन्हैं जाय मम दिशिते भेंटो । कहि सँदेश तिनको दुख मेटो ॥  
 ब्रजवासी जेते नरनारी । गोप वत्स खग भृग बनचारी ॥  
 जोजिहि विधि तासों तिहि भांती । अरस परस कहियो कुशलाती ॥  
 मित्र एक मम दरशन पैहो । देखत ताहि परम सुख लहिहो ॥  
 वृंदावनमें रहत निरंतर । होत नहीं कबहुं उर अन्तर ॥  
 सघन कुंज तरु लता सुहाई । मिलियो ताको शशिनवाई ॥  
 इहि विधि उद्धवसौं यदुनाई । कहि सब मनकी बात सुनाई ॥  
 बल करि ताको प्रेम जनायो । ज्ञान गर्व ताके उर छायो ॥

दोहा-ऐसे उद्धवसों करी, प्रकट श्याम ब्रज प्रीति ॥

उद्धव तिनको ज्ञानलै, चले करन विपरीति ॥

सो०-लखि उद्धवको जात, हलधर लिये बुलाय ढिग ॥

समुझत ब्रजकी बात, आये जल भरि नैन पुनि ॥

कहा कहाँ उद्धवमें तुमसों । यशुमति करत हेतजो हमसों ॥  
 एक दिवस खेलतमो साथ । खेल कियो झगरो यदुनाथा ॥  
 मोको दौरि गोद तब लीन्हो । करसों ठलि श्यामको दीन्हो ॥  
 नन्द बबा तब बनते आये । इन्हें गोदलै मोहि खिझाये ॥  
 लगे कहन नान्हो तेरो भाई । तोको छोह लगत नहि राई ॥  
 वह हित नहि भूलत है हमको । कहत सँदेश बनत नहि तिनको ॥  
 कहियो तुम प्रणाम पुर जाई । अरु दोउ भयनकी कुशलाई ॥  
 कहियो हमहैं तनय तुम्हारे । मात पिता नहि आन हमारे ॥  
 मिलिहैं आय धायकै तुमको । कारज कछुक औरहै हमको ॥  
 नहि विसरत क्षण गोकुल गाई । तुम तजि सुखको हमें देखाई ॥  
 सुनि वसुदेव देवकी पायो । उद्धव ब्रजको जात पठायो ॥



दोहा-नंद यशोमति हित समुझि, लिखिपाती वसुदेव ॥

पालि दिये तुम सुत हमें, नहीं उरुण तुम सेव ॥

सो०-मति सखी जिय माहि, राम कृष्ण तुम्हरे तनय ॥

हम कहियेकी आहिं, मात पिता तुम दुहुनके ॥

बालपने तुम पालनहार । बालकेलिरस तुम्हें डुलारे ॥

हमतो पाये वैस कुमार । सो यह सब उपकार तुम्हारा ॥

मति कल्पो अपने मनमाहीं । हरिसों मिलि किन जात इहांहीं ॥

श्याम राम नहिं तुम्हें भुलावैं । दिवस रैन तुम्हरे यश गावैं ॥

ऐसे लिखि पाती सुखदाई । उद्धव कर वसुदेव पठाई ॥

तब हरि उद्धव बेगि पठायो । तुरत अकेले रथ बैठायो ॥

आयसुलियो विदा हरि कीन्हों । चले उरँगसुत ब्रजपथ लीन्हों ॥

उद्धव चले गर्व मन धारी । कहा ज्ञान समुझैगी ग्वारी ॥

देखौ हों ब्रजलोगन धाई । मानत इतो तिन्हें थुराई ॥

चले उरँगसुत जब हर्षाई । गोपिनमन तब गयो जनाई ॥

पुनि पुनि भ्रमर श्रवण लागिजाई । भयो कलुक दुख कलु हर्षाई ॥

समुझिसो शकुन दरश अनुरागी । जहँ वहँ काग उड़ावन लागी ॥

दोहा-जो गोकुल हरि आवहीं, तो तू उडरे काग ॥

दधि ओदन त्वहिं देहुंगी, अरु अंचलकी पाग ॥

सो०-सुनि गोपिनके बैन, उठि बैठत वायस अनत ॥

लखि पावत सब चैन, कहत परस्पर आपसे ॥

सखी आज गोकुल हरि आवैं । कैधों काहू ब्रजहि पठावैं ॥

नीकी बात सुनावैं कोऊ । फरकत बाम नखन भुज दोऊ ॥

बिन बयारि अम्बर फहराई । टूटि टूटि कंचुकि बँदजाई ॥

उठि उठि बैठत काग कहेले । उरँगत मन आनंद लहेते ॥

भ्रमर एक चहुँ दिशि मडराई । पुनि पुनि कान लगत है आई ॥

होत शकुन सुन्दर शुभ काला । आवन हार भये नँदलाला ॥



जानत भाग्य दशा विधि फेरी । दूर करो अब दुख मन तेरी ॥  
 बहुरि गोपाल मिलैं जो आई । सुख सनेह करिलीजै माई ॥  
 आसन हृदय कमलमें दीजै । नयनन निराखि वदन छबिलीजै ॥  
 देखत रूप मान तजिदीजै । प्रेम भजन अपनो करिलीजै ॥  
 आवैं जो ब्रज कुंजबिहारी । बड़ि भागिनी सबै ब्रजनारी ॥  
 नंद यशोमति सखि सुख पावैं । अति बड़िभागिनि बहुरि कहावैं ॥  
 दोहा-घर घर शकुन विचारहीं, ब्रजकी तिय बड़भाग ॥

ब्रजवासी प्रभु दरशको, सबके मन अनुराग ॥  
 सो०-मथुरातन टक लाय, अनुदिन पंथ निहारहीं ॥  
 कब आवहि ब्रजराय, यहै करत अभिलाष सब ॥  
 अथ उद्धवजीकी ब्रजागमन लीला ॥

उद्धव चले ब्रजहि समुहाये । मथुरातजि गोकुल नियराये ॥  
 रथपर बैठे शोभित कैसे । दूजे नंदनंदन मनु जैसे ॥  
 वहै मुकुट पीतांबर काले । श्याम रूप शोभित अँग आछे ॥  
 दूरहिते रथकी उजियारी । देखत हरषां ब्रजकी नारी ॥  
 जान्यो आवत कुँवर कन्हारै । आतुर जहँ तहँते उठिधारै ॥  
 कहत परस्पर देखहु आली । मधुवनते आवत वनमाली ॥  
 गये श्याम रथपर चढ़ि जाहीं । तैसो रथ आवत भगभाहीं ॥  
 तैस्वइ मुकुट मनोहर राजै । तैस्वइ पट कुंडल छवि छाजै ॥  
 रथ तन सब देखत अनुरागी । स्वप्रेको सुख लूटन लागी ॥  
 ज्यों ज्यों रथ आतुर चलि आवै । त्यों त्यों पीतांबर फहरावै ॥  
 भई सकल सुख व्याकुल नारी । प्रेम विवश आनंद उर भारी ॥  
 जब लगि रथ आवत नियराई । तब लगि मानहु कल्प विहाई ॥  
 दोहा-यहै शोर ब्रज घर घरन, आवत हैं नंदलाल ॥  
 देखनको निकसे हरषि, तरुण वृद्ध अरु बाल ॥  
 सो०-सुनत यशोदा नंद, लेन चले आगे हरषि ॥  
 भये परम आनंद, तिहि क्षण ब्रजके लोग सब ॥



जब कछु रथ आगे नियरायो । तब संदेह सबन मन आयो ॥  
 श्याम अंकले रथके माहीं । हलधर संग देखियत नाहीं ॥  
 कोऊ कहत नहैं ब्रजनाथा । जोपै हलधर नाहिन साथा ॥  
 इतना कहत निकट रथआयो । उद्धव निरखि नयन जल लायो ॥  
 रहीं ठगीसी सब ब्रजवाला । नूतन विरह भई वेहाला ॥  
 मनहुँ गई निधि केहूपाई । बहुरि हाथते तुरत गँवाई ॥  
 द्वैगइ सपने की रजधानी । जागत कछु नहीं पछितानी ॥  
 जबहीं कछो श्यामतो नाहीं । यशुमति सुरछि परी महि माहीं ॥  
 परी विकल यशुमति ज्यहिटाई । ब्रजतिथधाय तहां चलिआई ॥  
 श्यामभिना रथलाखि अकुलानी । जहाँ सो तहां रहीं सुरझानी ॥  
 रुदन करत व्याकुल अति भारी । लई उठाय पोंछि दृगबारी ॥  
 यह कहि बोध करत सब वाला । उद्धवको पठयो गोपाला ॥  
 दोहा-भली भई मारग चलयो, सखा पठायो श्याम ॥

उठहु ब्रक्षिये हरि कुशल, कहति महरिसों वाम ॥  
 सो०-सफल घरीहै आज, करहु जानि यह मन हरष ॥

आवनको ब्रजराज, इनके कर हैहै लिख्यो ॥  
 यह सुनि उठी कलुक सुखपाई । उद्धव निकटहि पहुँची आई ॥  
 हरिके रूप निरखि सुखपायो । श्यामसखा कहि सबन सुनायो ॥  
 उद्धव निरखि कहत ब्रजनारी । सुंदर सलज सुशील महारी ॥  
 ताहीते हरि याहि पठायो । लैसँदेश मोहनको आयो ॥  
 नीके नीके वचन सुनैहै । सुनि सुनि श्रवणनहियो सिरैहै ॥  
 यह जानिये वेगि हरि अइहै । याके मुख अब यह सुनिपैहै ॥  
 चहुँदिशि बेरिलियो रथजाई । नंद गोप ब्रजलोग लुगाई ॥  
 गये लिवाय नंद निजद्वारे । उद्धव रथते हर्षि उतारे ॥  
 अर्घ्यदेय भीतर घरलीन्हो । धनि धनि तिनकाहि आदरकीन्हो ॥  
 चरण धोय आसन बैठाये । बहुप्रकार भोजन करवाये ॥



विविध भांति करिके पहुनाई । नंद श्यामकी बात चलाई ॥  
 उद्धव कह्यो कुशल दोउ भैया । अरु वसुदेव देवकीमैया ॥  
 दोहा--करत हमारी सुधि कबहुँ, कहु उद्धव बलवीर ॥  
 पुलकि गात गद्गद वचन, पूछत नंद अधीर ॥

सो०-चूकपरी अनजान, कह पछिताने आजके ॥

घर आये भगवान, जाने हम निज अहिर करि ॥  
 प्रथम गर्गसुनि कह्यो बखानी । भूल्यो सङ्गदोष हितजानी ॥  
 अब उद्धव विछुरे गिरिधारी । मरियत ससुझि-शूल स्वइभारी ॥  
 कह्यो यशोमति दृग भरिपानी । उद्धव हम ऐसी नहिजानी ॥  
 सुतको हितकरिके हममाने । हरिहैं वासुदेव प्रगटाने ॥  
 ज्यहि विरैश्च शिवध्यान लगावैं । निशिदिन अङ्ग विभूति चढ़ावैं ॥  
 सोबालकहम अतिहि अयान्यो । ऊखल सों बांध्यो गहिपान्यो ॥  
 फाटत नहीं बज्र सम छाती । अब यह ससुझि हृदय पछिताती ॥  
 वैसे भाग कबहुँ अब अइहैं । बहुरि श्यामको गोद खिलैहैं ॥  
 जबतेहरि मधुपुरी सिधारे । तबते उद्धव प्राण दुखारे ॥  
 तलफत मीन नीर बिन जैसे । देख्यो श्याम मनोहर तैसे ॥  
 उठिकै मात जातिहों खरिका । देखत दुहत औरके लरिका ॥  
 उठत शूल उद्धव मनमार्हीं । क्योंये प्राणनिकसि नहिंजार्हीं ॥  
 दोहा-गवाल सखा सँग जोरि अब, को गैया लै जाय ॥

को आवै संध्या समय, बनते गाय चराय ॥

सो०-काहि लेहुँ उर लाय, आंचर सों रेंज झारिकै ॥

काकी लेहुँ बलाय, चूमि मनोहर कमल मुख ॥  
 मैं बलि सांची कहियो ऊधो । कैसे श्याम रहत हां सूधो ॥  
 दही मही माखन नित जाई । खात कौनके धाम कन्हारै ॥  
 कौन ग्वाल बालनके साथी । भोजन करत तहां ब्रजनाथा ॥  
 कौन सखा लीन्हें सँग डोलैं । खेलत हँसत कौनसे बोलैं ॥



काको माखन चोरै जाई । देन उरहनेको अब आई ॥  
 बनमें यमुनातीर कन्हारै । किन गोपिनको रोंकत जाई ॥  
 किनको दूध दही ढरकावै । किनसों दधिको दान चुकावै ॥  
 इतनी वृद्धति यशुमति माई । भई विकल गुण सुमिरि कन्हारै ॥  
 बोले नन्द बिलखि तब बानी । कहियो उद्धव साँच बखानी ॥  
 श्याम कबहुँ बहुरो ब्रज अइहै । ब्रजवासिनकी ताप नशैहै ॥  
 मोहि तात यशुमतिसों माता । सदा कहतहैं हरि सुखदाता ॥  
 कहि गये चलती बार भुरारी । मिलिहौं बहुरि तात एक बारी ॥  
 दोहा-करिहैं सो अपनो वचन, कबहुँ श्याम प्रतिपाल ॥  
 कह उद्धव तुमसों कछू, कह्यो कि नाहि गोपाल ॥  
 सो०-भये सकल कृश गात, श्याम विरह ब्रज नारि नर ॥  
 युग सम दिवस बिहात, उद्धव हमको हरि बिना ॥  
 लखि उद्धव ब्रज रीति सुहाई । रहे कछुक मनमें सकुचाई ॥  
 सुनत नन्द यशुमतिकी बानी । बोल्यो हृदय परम सुखमानी ॥  
 कहि दोउ भाइनकी कुशलाती । दई श्याम दीन्ही सो पाती ॥  
 हरिको कह्यो सँदेश सुनायो । हलधरको सब कह्यो सुहायो ॥  
 पाती बाँचि नन्द उर लाई । भेटे मानहुँ कुँवर कन्हारै ॥  
 लिखी श्यामके करकी पाती । यशुमति लै लै लावति छाती ॥  
 दुसह विरहकी ताप नशावै । हरिसँदेश सुनि सुनि सुख पावै ॥  
 पुनि वसुदेव लिख्यो है जोई । उद्धव दियो नन्दको सोई ॥  
 नाँचत नयन नीरभरि आयै । कहत श्याम अब भये परायै ॥  
 पुनि वसुदेव लिखीका बाता । बोला बिलखि यशोदा माता ॥  
 यद्यपि हरि वसुदेव कुमारा । उदर देवकी के अवतारा ॥  
 तद्यपि भवहिं धायहुकेनाते । एकबार मोहन मिलि जाते ॥  
 दोहा-उद्धव यद्यपि हम सबै, समझावत ब्रज लोग ॥  
 उठत शूल तद्यपि निरखि, माखन हरिसुख योग ॥



सो०-रोटी अह नवनीत, नित मांगत उठि प्रातही ॥

कोदेहै करि प्रीत, तिन्हैं बानि जाने बिना ॥

यदपि देवगृह सब सुख भोगा । है वसुदेव सदन सब योगा ॥

हम पशुपाल गवाल ब्रजवासी । दही मही धन घोषनिवासी ॥

राज सुखन कोउ कोटि लडावै । तो माखन नाहि हरि सुखपावै ॥

निशिदिन रहतयहै जिय शोचू । है हैं हरिहां करत सकाचू ॥

एकवार गोकुल फिरि आवैं । मनकरि माखन भोग लगावैं ॥

सपति रहैं गोकुलमें नाहीं । उलटि बहुरि मधुपुरिको जाहीं ॥

ऐसे कहि यशुमति मिलखाई । उद्धव चरण रही शिरनाई ॥

तब उद्धव बोले सुखपाई । धन्य यशोमति धनि नैदराई ॥

धन्य धन्यहैं भाग्य तुम्हारे । जिनको कृष्ण प्राणते प्यारे ॥

पूरण ब्रह्म कृष्ण सुखराशी । जगत आत्मा सब घट वासी ॥

हैं व्यापक पूरण सब पाहीं । जैसे भग्नि काटके माहीं ॥

मतिजानो हरि हमते न्यारे । वेहैं सब जनके रखवारे ॥

दोहा-मति जानो सुत करि तिन्हैं, वे सबके करतार ॥

तात मात तिनके नहीं, भक्तन हित अवतार ॥

सो०-हम हैं सब अज्ञान, प्रभु महिमा जानैं नहीं ॥

वे प्रभु पुरुष पुरान, जन्म कर्म करिकै रहित ॥

हम सब अपने भ्रमहिं भुलाने । नर समान हरिको करि जाने ॥

ज्यों शिशु आप चक्र सम फिरई । ताको फिरत जानि सब परई ॥

ताते प्रभुहिं जानि हरि ध्यावो । जाते मुक्ति पदारथ पावो ॥

उद्धव जो तुम हमहिं सिखावत । हमहूं बहुत मनहिं समझावत ॥

तद्यपि वह मृदु रूप कन्हाई । देखे बिना रहो नाहि जाई ॥

सब ब्रजके जीवन हरि वारे । उद्धव कैसे जात बिसारे ॥

जादिन मोहन वनहिं न जाते । तादिन वन खग मृग अकुलाते ॥

नाहि अघात देखे वह मूरति । रूपनिधान साँवरी मूरति ॥



सो मृग तृण भरि उदर न खाहीं । भये रहत कुश श्याम बिनाहीं ॥  
 मुरली ध्वनि खग मोहे जोई । सो अब मुख फल खात न कोई ॥  
 ज वन सदा नवल सुखदाता । ते अब सूखे जैरिण पाता ॥  
 कोकिल कीर मोर नाहि बोलैं । व्याकुल भये सकल बन डोलैं ॥  
 दोहा-जिन्हें चरावत श्यामजू, फिरत दुखारी गाय ॥

जहँ जहँ गोदोहन कियो, सुंघत तहँ तहँ जाय ॥  
 सो०-सब ब्रज हिरह अधीर, युग सम बीतत पल हमैं ॥  
 धौं कौन विधि धीर, उद्धव मनमोहन बिना ॥

ऐस्यहि कहत सुनत गुण हरिके। बैठे बीति गई निशि भरिके ॥  
 ठाढे यशुदहि रैनि बिहानी । भरि भरि लोचन ढारत पानी ॥  
 ब्रज घर घर सब होत बधाई । कहत कान्हकी पाती आई ॥  
 निपट समीपी सखा स्वहायो । उद्धवको हरि ब्रजहि पठायो ॥  
 कंचन कलश दूध दधि रोरी । नन्द सदन लै आवत गोरी ॥  
 गोप सखा सब कृष्ण उपासी । आये धाय सकल ब्रजवासी ॥  
 उद्धवको हरि रूप निहारी । भये लुखी सब नर अरु नारी ॥  
 ब्रजयुवती मिलि तिलक बनावैं । करि परदक्षिण तीश नवावैं ॥  
 कहत पायकै दरश तुम्हारो । भयो जन्म अब सफल हमारो ॥  
 बृजत कुशल सकल नर नारी । नन्द अवास भीर भइ भारी ॥  
 उद्धव लखि ब्रज प्रेम जकेसे । बोलि सकत नहि रहे थकेसे ॥  
 हकबकात चहुँ दिशि सब ठाढे । उद्धव रहे मौन गहि गाढे ॥  
 दोहा-उद्धव की लखिकै दशा, ब्रज जन मन अकुलात ॥

क्यों उद्धव तुम कहत नहि, राम कृष्ण कुशलात ॥  
 सो०-इक क्षण युग सम जाहि, हमैं सुने बिन प्रीति हरि ॥  
 आवन कह्योकि नाहि, ब्रजहि कृपा करि सांवरे ॥  
 तब उद्धव बोले धरि धीरा । सदा कुशल हरि हलधर बीरा ॥  
 दियो तुम्हें लिखि पत्र संदेश । अरु श्रीमुख यह कह्यो संदेश ॥



करि समाधि अन्तर स्वहिं ध्यावो। गोप सखा करि मति चितलावो  
 हौं अनादि अविगति अविनाशी । खदा एक रस सब घटवासी ॥  
 निगुण ज्ञान विन मुक्ति न होई । वेद पुराण कहत हैं सोई ॥  
 ताते दृढ़ करि यह मन धारो । सगुण रूप तजि निगुण विचारो ॥  
 तुरत तापत्रय टरि दुखदाई । मिलि हौं ब्रह्म सुखहि सब भाई ॥  
 उद्धव कही जबहि यह बानी । गोपी जन सुनि कै बिलखानी ॥  
 इतनी दूर बसत सुनि आली । अब कछु और भये बनमाली ॥  
 इहीं विरहकी बात विचारी । बूढ़ी सकल मनहुं दिनवारी ॥  
 मिलन आश गई सुनत सँदेशु । उपज्यो उर अति काठिन अँवेषु ॥  
 फैल गई जहँ तहँ यह बानी । करत परस्पर सब अकुलानी ॥  
 दोहा-यह सब दोष लगै हमें, कर्म रेखको जान ॥

प्रेम सुधा रस सानि कै, अब लिखि पठ्यो ज्ञान ॥  
 सो०-इक ऐसे यह देह, रही झरसि विरहा अनल ॥  
 कैलाहूतें खिह, अब आयो उद्धव करन ॥

रूप राशि जो सब सुखदाई । ब्रजके जीवन मृरि कन्हवाई ॥  
 विद्युरे जिमैं इतो दुखपायो । सो अब हिरदय माहि बतायो ॥  
 तिन्हें कहत चितवो मन माहीं । वेहैं पूरण भरि सब ठाहीं ॥  
 जाको यन्न करतहैं योगी । निर्गुण निराकार निर्भांगी ॥  
 सो करि कृपा आइकै ऊधो । बीधिन मांझ बहायो सूधो ॥  
 अबलन कारण श्याम पठायो । व्यापक अगह गहावन आयो ॥  
 भयो आय विरहन सब कोई । गायो निर्गुण निगमन जोई ॥  
 जो सम दृष्टि एक रस मोहन । तो कित चित्त चुरायो मोहन ॥  
 उद्धव यह हित लागै काहै । जोपै इष्ट कृष्ण हिय माहै ॥  
 निशिदिन नयन दर्शहित जागत । कल नहिं परत पलक नहिं लागत ॥  
 चहुं दिशि चितवत विरह अधीरा । बिलखि बिलखि भरि डारत नीरा ॥  
 ऐस्यहु दुख प्रकटत क्यों नाहीं । जोपै श्यामहिं कहत इहाहीं ॥  
 दोहा-रहन देहु ऐस्यहि हमहिं, अबधि आशकी थाह ॥



फिरि चाहै नहिं पाय हैं, डारे अगुण अथाह ॥  
 सो०--ल्याये युवतिन योग, जो योगिनको भोग तुम ॥  
 हम तनुभरेउवियोग, भयो अधिकदुख श्रवणसुनि ॥  
 एक कहत दूषण नहिं याको । यह आयो पठयो कुबिजाको ॥  
 बानेजो कहि याहि पठायो । सोई याने आय सुनायो ॥  
 अब कुबिजा जो जाहि सिखावै । सोई ताको गायो गावै ॥  
 कबहुँ श्याम कैहैं नहिं ऐसी । कही आय ब्रजमें इन जैसी ॥  
 ऐसी बात सुनैको माई । उठै शूल सुनि सहि नहिं जाई ॥  
 कहत भोग तजि योग अराधो । ऐसी कैसे कहिहैं माधो ॥  
 जेप तपें संयम नैम अचारा । यह सब विधानाको व्यवहारा ॥  
 युग युग जिवहु कुँवर कन्हाई । शीश हमारे पर सुखदाई ॥  
 अच्छत पति विभूति किनलाई । कहो कहां की रीति चलाई ॥  
 हमारे योग नैम व्रत एहा । नदनँदन पद सदा सनेहा ॥  
 उद्धव तुम्हें दोषको लावै । यह सब कुबिजा नाच नचावै ॥  
 जब युवतिन यह बात सुनाई । उद्धव रह्यो मौन सकुचाई ॥  
 दोहा--योग कथा युवतिन कही, मनहीं मन पछिताय ॥  
 प्रेम वचन तिनके सुनत, रहि गयो शीश नवाय ॥  
 सो०--तब जान्यो मन माहि, ये गुण हैं सब श्यामके ॥  
 स्वहि पठयो इहि ठाहि, याही कारणके लिये ॥  
 उद्धव सुनि गोपिनकी बानी । गुरु करि तिन्हें प्रथमहीं मानी ॥  
 मन मन करि प्रणाम हर्षाने । उद्धव चले बहुरि बरसाने ॥  
 श्रीवृषभाढ कुँवरि हरि प्र्यारी । और सकल ब्रज गोप कुमारी ॥  
 जिनके मनमोहन नँदलाला । सुनी सबन यह बात रसाला ॥  
 कोऊहै मधुवनतें आयो । हित करि श्रीनँदलाल पठायो ॥  
 यूथ यूथ मिलि अति अतुराई । पिय संदेश सुनतें उठि धाई ॥

१ जे अक्षरका मन्त्रहोय ते हजार नित्यजपे भूतगुद्धि प्राणायामकरके ।

२ येनकेनइन्द्रियकोदमनकरै । ३ गुणवरण ।



मिले उपेंगसुत पंथ मझारी । रथ लखि कहत परस्पर नारी ॥  
 बहुरि सखी सुफलक सुत आयो । वैखोई रथ परत लखायो ॥  
 लैगयो प्रथमहि प्राण हमारो अवधौ कहा काज जिय धारो ॥  
 तिहि क्षण उद्धव द्रश देखायो । तब धीरज सबके मन आयो ॥  
 संगी सखा श्यामको चीन्हों । सबन प्रणाम जोरि कर कीन्हों ॥  
 उद्धव लखि अति भये सुखारी । मनहुँ विकल झख पायो बारी ॥  
 दोहा-तब उद्धव रथते उतरि, बैठे तरुकी छाहि ॥

भई भीर गोपिनकी, अति आनंद मन माहि ॥  
 सो०-अति प्रिय पाहुन जान, सुधि ल्याय ब्रजराजकी ॥

करिकै अति सन्मान, प्रेम सहित पूजे सबनि ॥  
 हाथ जोरि पुनि विनय सुनाई । कहिये उद्धव निज कुशलाई ॥  
 बहुरि कहौ मधुवन कुशलाता । हैं वसुदेव देवकी माता ॥  
 कुशल क्षेम कहिये बलदाऊ । अरु अकूर कुशल कुबिजाऊ ॥  
 बृजत श्याम कुशल अकुलानी । नयन नीर सुख गदगद बानी ॥  
 लखि गोपिनकी प्रीति स्वहाई । प्रेम मगनभे उद्धवराई ॥  
 पुलकि गात अँखियन जल छाई । गयो ज्ञानको गर्व हिराई ॥  
 पुनि पुनि यहै कहत मन माहीं । ऐसी हरिको बूझिय नाहीं ॥  
 ब्रज नारिन को योग पठावैं । चितते ब्रजकी प्रीति मिठावैं ॥  
 पुनि उद्धव उरमें धरि धीरा । बोले शोधि नयनको नीरा ॥  
 सब विधि कहि हरिकी कुशलाती । दीन्हों प्रथम श्यामकी पाती ॥  
 लै लै करन मिलति सब पाती । कोउ नयन कोउ लावति छाती ॥  
 काहू लैकर शीश चढ़ाई । बृजत आपन लिखी कन्हवाई ॥

दोहा-अतिहित पाती श्यामकी, सब मिलि मिलि सुख पाय  
 उद्धव कर दीन्हों बहुरि, दीजै बांछि सुनाय ॥

सो०-उद्धव सबन समोध, बांछि श्यामकी पत्रिका ॥  
 लागे करन प्रबोध, ज्ञान कथा विस्तारिकै ॥

माँको हरि तुम पास पठायो । आत्मज्ञान सिखावन आयो ॥



Vinay Avasthi Sahib Bhuvan Vani Trust Donations

जाते पाप नहीं भियराई । मनते विषय देहु बिसराई ॥  
हरि आपहि नर आपुहि नारी । आपहि गृही आप ब्रह्मचारी ॥  
आपहि पिता आपही माता । आपहि पुत्र आपही भ्राता ॥  
आपहि पंडित आपहि ज्ञानी । आपहि राजा आपहि रानी ॥  
आपहि धरती आप अकाशा । आपहि स्वामी आपहि दासा ॥  
आपहि ग्वाल आपही गाई । आपहि गाय दुहावन जाई ॥  
आपहि भ्रमर आपही फूला । आपहि ज्ञान बिना जग मूला ॥  
राव रई दूजा नहि कोई । आपहि आप निरन्तर होई ॥  
ज्यों बहु दीप ज्योति है एकू । तैस्वइ जानों ब्रह्म विवेकू ॥  
यहि प्रकार जाकी मन लागै । जरा मरण संशय भ्रम भागै ॥  
योग सभाधि ब्रह्म चित लावै । ब्रह्मानन्द सुखहि तब पावै ॥

दोहा-सुनतहि उद्धवके वचन, रहीं सबै शिरनाय ॥

मानहु मांगत सुधारस, दीन्हों गरल पियाय ॥

सो०-रहीं ठगीसी नारि, हरि संदेश दारुण सुनत ॥

बोलीं बहू संभारि, उद्धवसों करजोरिकै ॥

भले मिले तुम उद्धवराई । भली आय कुशलात सुनाई ॥  
कछु यक हती मिलनकी आशा । कियो आय ताको तुम नाशा ॥  
इन बातन कैसे मन दीजै । श्याम विरह तनु पल पल छीजै ॥  
बिन देखे वह मूरति प्यारी । कुंडल झुकुट पीत पट धारी ॥  
उद्धव कहौ कौन विधि जीजै । योग युक्ति लैकै कह कीजै ॥  
छांड़ि अछत नंदनंदन प्यारो । कोलिखि पूजै भीति पगारो ॥  
हम अहीर गोरसके भोगी । योग युक्ति जानै कोउ योगी ॥  
उद्धव तुमसों सांच बखानै । प्रेम भक्ति हमरे मन मानै ॥  
हमको भजनानंद पियारो । ब्रह्मानंद सुख कहा विचारो ॥  
ब्यावारि व्यथा न वंध्यो जानै । ये दृग हरि दरशन सुखमानै ॥  
पुनि पुनि हमें वहै सुधि आवै । कृष्णरूप बिन और न भावै ॥

१ राजा । २ दलद्री । ३ विव । ४ बांझ ।



नय किशोरको नयन निहारैं । कोटि ज्योति ताऊपर बारैं ॥  
दोहा-अधर अरुण मुरली धरे, लोचन कमल विशाल ॥

क्यों विसरत उद्धवहमैं, मोहन मदन गोपाल ॥  
सो०-सजल भेषतनु श्याम, रूप राशि आनंद भन्यो ॥

मोहीं सब ब्रज बाभ, और न जानत ब्रह्म हम ॥  
उद्धव सुनि गोपिनकी वानी । बोले बहुरो खाजि सयानी ॥  
जौ लगि हृदय ज्ञान नहिं नीकैं । तोलों सब पानीकी लीकैं ॥  
बूझे बिन स्वप्नो सब होई । बिन विवेकें सुख पाव न कोई ॥  
रूप रेख जाके कछु नाहीं । नयन मूँदि बितबो मन माहीं ॥  
हृदय कमलमें ज्योति बिराजै । अनहदनाद निरंतर बाजै ॥  
इडा पिंगला सुखमन नारी । सहज शून्यमें बसत मुरारी ॥  
नासा अग्र ब्रह्मको बासा । धरहु ध्यान तहँ ज्योति प्रकासा ॥  
क्रम क्रम योग पथ अनुसरहु । इहि प्रकार भव दुस्तर तरहु ॥  
उद्धव हम गोपाल उपासी । ब्रह्मज्ञान सुनि आवत हाँसी ॥  
जो वै रूप रेख नहिं चीन्हा । हाथ पांव मुख नयन विहीना ॥  
तौ यशुदा करि काको जायो । काको पलना पालि झुलायो ॥  
कैसे ऊखल हाथ बँधायो । चोरि चोरि कैसे दधि खायो ॥  
दोहा-कौन खिलाये गोदकरि, कहे न तुतरे बैन ॥

उद्धवताको न्याय है, जाहि न सूझै नैन ॥  
सो०-नटवर वेष प्रकाश, श्री वृंदावन चंद्र तजि ॥  
को खोजै आकाश, सुन्न समाधि लगायकै ॥

जानि बूझि मति होहु अवानी । मानहु सत्य हमारी वानी ॥  
भजौ ब्रह्म ब्रह्म सब होहु । छाँड़ि देहु ममता अरु मोह ॥  
प्रायानित आँधरी न बूझै । ज्ञान अनन्त नयन सब सूझै ॥  
मैं यह कहत कृष्णकी भाषी । देखहु बूझि वेद सब साखी ॥  
लगे आगि घर घूर जरावै । कौनिज गृह तजि घूर बुझावै ॥

१ नेत्र । २ ज्ञान । ३ माया ।



घरी करौ बलयोग सँवारो । भक्ति विरोधी ज्ञान तुम्हारो ॥  
 योग कहा सब ओढि बिछावैं । दुसह वचन हमको नहि भावैं ॥  
 अबलन आनि सिखावत योगू । हम भूली कैधौं तुम लोगू ॥  
 ऐसे कहि गोपी अनखानी । मनमें श्याम परेखो आनी ॥  
 ताही समय भ्रमर इक आयो । सहज निकट है वचन सुनायो ॥  
 तासों कहि सब बात सुनावैं । उद्धव प्रति बहु व्यंग्य बनावैं ॥  
 वचन स्वभाव विगुण अनुसारी । लागीं कहन सकल ब्रजनारी ॥  
 दोहा-कोऊ उद्धव सों कहत, कोई आली प्रति बात ॥

निज निज मनकी उक्ति करि, अपनी अपनी बात ॥

सो०-उद्धव भूले ज्ञान, उत्तर बोल न आवहीं ॥

रहे मौनसों भान, सुनत वचन नारीनके ॥

बोलि उठी ऐसे इक ग्वारी । आय सुनोरी सब ब्रजनारी ॥  
 आयो मधुप देन पदनीको । लीन्हे शशी सुयश को टाको ॥  
 तजन कहत भूषण पट गेहा । सुतपति बंधू सजन सनेहा ॥  
 शीश जटा अरु भस्म लगावो । सगुण छौंड़ि निर्गुण मनलावो ॥  
 आये करन तियन परछोहा । वस्ती छौंड़ि बतावत खोहा ॥  
 सुनि सखि कहत एक अरुवालायेमधुपुरि दोउ बसत मराला ॥  
 वे अक्रूर और ये ऊधो । निरवारक पानी अरु दूधो ॥  
 जानत भली गांसकी बाता । इनही कंस करायो घाता ॥  
 इनके कुल ऐसी चलि आई । प्रगट उजागर वंश सदाई ॥  
 अबकरि कृपा ब्रजहि उठिधाये । अबलनयोग सिखावन आये ॥  
 ऐसे एक कहत अरु ग्वाली । येदोउ इकमन सुनरी आली ॥  
 तब अक्रूर अबहिं ये ऊधो । ब्रज आखेट कीन इनसूधो ॥  
 दोहा-वचन फांसि फांसि हँसि हरन, उन लियरथवैठाया ॥

हर लीन्हीं इन गोपिका, हती ज्ञान शर आय ॥

सो०-देखहु दीन्हीं लाय, चहुँ दिशि दावा योगको ॥



भई कठिन अति आय, अबयों का चाहत कियो॥

लागी कहत और एक ग्वारी । मधुकर जानी बात तुम्हारी ॥  
 तुम जो हमें योग यह आन्यो । करी भली करनीसो जान्यो ॥  
 एक हरि विरह रही हम जरिकै । सुनतै अधिक उठी अब बरिकै ॥  
 तापर अब जनि लोन लगावो । भतै पराई बात चलावो ॥  
 दई श्याम तुम्हरे करपाती । सुनिकै बहुत सिरानी छाती ॥  
 कीन्हों उलटो न्याय कन्हाई । बहेजात मांगत उतराई ॥  
 एकहम दुसह विरह दुखपावैं । दूजे लिखि लिखि योग पठावैं ॥  
 मधुकर श्याम भेद अब पायो । नेहरतन उनकहूं गँवायो ॥  
 पहिले अधर सुधारसप्यायो । कियो पोष बहु लाड़ लड़ायो ॥  
 बहुरोशिशुको खेल बनायो । गृहरचनारचि चलत मिटायो ॥  
 सौंप कंचुकी ज्यां लपटाई । ऐसी हित की रीति दिखाई ॥  
 बहुरो सुरतिलई नहिं जैसे । तजी श्याम हमको अब ऐसे ॥  
 दोहा—करहु राजजहँजाउतहँ, लेहु अपन शिरभार ॥

दीजत सबै अशीश यह, न्हातहु खसो न बार ॥

सो०—बहुरङ्गी सुखतूल, जितहिंजात तितही सदा ॥

इक रंगी दुख मूल, चातक मीन पतंग गति ॥

मधुप कहा कहि तुम्हैं सुनैये । करिकै प्रीति सबै पछितैये ॥  
 निबहैगी ऐसे हम जानी । उनलैकै कहु औरै ठानी ॥  
 कारे तनुको कहा पत्यारी । मृदु मुसकनि मनहरो हमारो ॥  
 तब काहु मन हरत न जान्यो । हँसि हँसि सब लोगन सुख मान्यो ॥  
 वरवहि कुबिजा कीन्हों नीको । सुनि सुनि मधुप भिटत दुखजीको ॥  
 चंदन तनक श्याम उर धरिकै । श्रीसरवस्यपियो सब भरिकै ॥  
 जैसो छल हमसों हरिकीन्हो । ताको दावैं कूचरी लीन्हों ॥  
 बोली और एक या नारी । भाग दशा उद्धवकिन जारी ॥  
 विलपत रहत सकल ब्रजनारी । कुबिजा भई श्यामकी प्यारी ॥



खात बच्चो असुरनको जोई । अबकुलबधू कहावत सोई ॥  
 राज कुँवरि कोऊ हरि वरते ! तो कछु हम चितमें नहि धरते ॥  
 बच्चो साथ अब अतिही आगर । कागा और मराल उजागर ॥  
 दोहा-अब खेलत दोड लाजतजि, बारहमासी फाग ॥  
 लौंडी की डौंडी बजी, हाँसी अरु अनुराग ॥  
 सो०-हमें देत वैराग, अपना दासी बश भये ॥

चतुर चचोरत आग, उद्धव यह अचरज बड़ो ॥  
 उद्धव हरि ऐसे काजनकार । सुयश रह्यो त्रिभुवन माहींभारि ॥  
 आये असुर जिते ब्रजमाहीं । मारे सकल बच्चो कोऊ नाहीं ॥  
 विषजल साँ सब ग्वाल जियाये । कालीनाग नाथिलै आये ॥  
 इन्द्रमान दलि ब्रजहि बन्धायो । गोवर्द्धन कर वाम उठायो ॥  
 जब विधि बालक वत्स खुराये । करिकै यत्न आप उपजाये ॥  
 धनुष तोरि गजप्रचल लैतारो । मल्लन सहित कंस नृप मारो ॥  
 कीन्हों उग्रसेन को राजा । भये सकल देवनके काजा ॥  
 ऐसी कीरति करि सब नासी । कीन्ही नारि कूबरी दासी ॥  
 कहँ श्रीपति त्रिभुवन सुखदायक । अखिल लोक ब्रह्मांडके नायक ॥  
 ब्रह्मा शिव इन्द्रादिक देवा । करत निरंतर जाकी सेवा ॥  
 उद्धव कहाँ कंसकी दासी । यह सुनि होत सकल ब्रजहाँसी ॥  
 कत मारत यहकुल को लाजन । अब करिकै हरि ऐसे काजन ॥  
 दोहा-गावत जग सब गीत अब, वा चेरीके काज ॥

उद्धव यह अनुचित बड़ो, चेरीपति ब्रजराज ॥  
 सो०-उद्धव कहिये जाय, अबहूँ चेरी परिहरै ॥  
 यह दुख सह्यो न जाय, सवति कहावति कूबरी ॥  
 बोली और वाम यक ऐसे । उद्धव हरि रीझे धौँ कैसे ॥  
 यक चेरी अरु कूबर पाछे । सोवत नहीं उतान आछे ॥  
 कुटिल कुरूप जाति कुरु हीमी । ताको श्याम सुहागिनि कीनी ॥



Vinay Avasthi Sahib Bhuvan Varanasi Trust Donations

कहा सिद्धि धौ कूबर माहा । हमको लिखि पठवत क्यों नाहीं ॥  
 हमहुं कूबर यत्न बनावैं । चलिकै टेढ़ी चाल दिखावैं ॥  
 कहैं श्याम सोई अब कीजै । लोक लाज भामिनि तजि दीजै ॥  
 होहिं आय गोकुलके बासी । तजैं निगोड़ी कुबिजादासी ॥  
 मधुकर जो हरि हमैं बिसारयो । गोपीनाथ नाम क्यों बारचो ॥  
 जो नहिं काज हमारे भावत । तौ कलंक कत हमहिं लगावत ॥  
 जोपै प्रीति करी कुबिजाकी । तौ अब धिरद बुलावहिं ताकी ॥  
 करतहि सुगम सवन करि पाई । प्रीति निवाहन अति कठिनाई ॥  
 अब परतीति कौन विधि माने । क्षणमें होगये श्याम बिराने ॥  
 दोहा—ज्यों गजकोरद त्यों करी, हरि हमसों पहिंचान ॥

दिखरावनको आनही, काज करनको आन ॥

सो—विषकीरा विष खात, छांड़ि लुहारा दाख फल ॥  
 मन मन कीजै बात, उद्धव कहिये काहिसों ॥  
 उद्धव कहि कह तुम्हें सुनावैं । जैसे हरि बिन हम दुख पावैं ॥  
 बरु रहते मथुरा घनश्यामा । कित आवे यशुदाके धामा ॥  
 कत करि गोप वेष सुख दीन्हों । कत गोवर्द्धन कर पर लीन्हों ॥  
 कतहि रासरसरचिबन माहीं । किये विविध सुख वरणि न जाहीं ॥  
 करिकै ऐसी प्रीति कन्हाई । अब मन धरी इती निठुराई ॥  
 जबते ब्रजतजि गये बिहारी । तबते ऐसी दशा हमारी ॥  
 घटे अहार बिहार हर्ष हिय । भोग सँयोग आश आवन जिय ॥  
 वाढ़ी निशा बलय आभूषण । लोचन जल अंचल प्रति अंजन ॥  
 उर चिन्ता कंचुकी उसासा । जीवन रह्यो अवधिकी आसा ॥  
 बीतत निशा गनत नभतारे । दिवस तकत पथ लोचन हारे ॥  
 रही नहीं सुधि बुधि मन माहीं । विरहानलतनु जरत सदाहीं ॥  
 सुमिरि सुमिरि कै हरि गुणग्रामा । दुख अधिकात सुहात न धामा ॥  
 दोहा—कहैं लगि कहिये निज व्यथा, अरु हरिकी निठुराय ॥



कुल स्वभावसों डसि भजिजाहीं । यद्यपि तिन्हें लाभ कछुनाहीं ॥  
जलद सँलिल बर्षत चहुँपाहीं । भरत सकल सरसरिता माहीं ॥  
निशि दिन ताहि पपीहाध्यावै । भौवरि दैदै प्रीतिवधावै ॥  
एक बूंदको त्यहि तरसावैं । भ्रमर मालती सों मन लावै ॥  
जब रसहीन होत वा माहीं । निर्मोही तजिजाहिं पराहीं ॥  
सुनियत कथा काग पिककेरी । अंडनसेव करावत हेरी ॥  
बड़ेहोत निज कुल उड़जाहीं । बैठत निजमाता पितुपाहीं ॥  
ये सब कारे हरि पर वारि । सबहिनमें अतिही अनियारे ॥  
सबकी उपमा अरु गुण योगू । न्यायदेत पटतर कवि लोगू ॥  
अलिकुल अलक कोकिलावानी । भुज भुजंग तनु जलद बखानी ॥  
समझी बात आज यहसारी । खानि कपटकी कुंजबिहारी ॥  
दोहा-मृदु मुसकनिविष डारिकै, गये भुजंग लौं भाग ॥  
नंद यशोदा यों तज्यो, ज्यों कोकिल सुत काग ॥

सो०--गये प्रीति यों तोर, जिमि अलि रस लै सुमन सों ॥

धनले भये कठोर, चातक सों हम रटत सब ॥

उद्धव सुनो एक उपखानो । बाजी तौत राग पहिचानो ॥  
हरि आगे तुमसे अधिकारी । क्योंनहिं दुखपावैं ब्रजनारी ॥  
कहत सुनत लागतहौ ऐसे । मीठो कहत गरलसों जैसे ॥  
पायो छोर लपटको तबहीं । लिखि आयो निर्गुण पद जबहीं ॥  
योगतहां अधिकारहि पाये । क्योंनहिं तूबा यहां बोवाये ॥  
सुनिलीजे उद्धवजी हमसों । राज काज चलिहै नहिं तुमसों ॥  
करिये पोष आपनी काया । आये इतै करी बड़ि माया ॥  
जो तुमहै हमरेहित आन्यो । सोहम शिरचढाय सुखमान्यो ॥  
सुनिकै सब ब्रजलोग अनंघो । नरनारी परच्यो करवंधो ॥  
अब सँभारि अपनो बहलीजै । जिन तुम पठये तिनहां दीजै ॥  
उनहिंनमें यह योग समैहै । इहां न काहूपै निरवैहै ॥



हम ब्रज बसत अहीर गँवारी । योग सोगकी नहिं अधिकारी ॥  
दोहा-अंध आरसी बधिर ध्वनि, रोग ग्रसित तनु भोग ॥

उद्धव तिनको न्यावहै, हमें सिखावत योग ॥  
सो०-हमें योग जो योग, सोई योग मिलाइये ॥  
कहे न जानै रोग, कहा कीजिये वैद्यसों ॥

उद्धव जाउ भले तुम ओझ । अपने स्वारथके सब कोझ ॥  
निर्गुण ज्ञान कहा तुम पायो । कौन याब्रज तुम्हें पठायो ॥  
और कछो संदेशो कोझ । कहि निबारे अब सुनिये सोझ ॥  
तब भक्कर आय वह कीन्हों । सगरे ब्रजको सुख हरि लीन्हों ॥  
तुम आवे उद्धव यहिठाटी । अन्न छुड़ाय खावत माटी ॥  
जोपै हती ज्ञानकी गाथा । तौकत रास नचे ब्रजनाथा ॥  
मन हरिलीन्हों वेणु बजाई । आधी मिशि सबनारि बुलाई ॥  
रसलीला वृन्दावन ठानी । अब मथुरा है बैठे ज्ञानी ॥  
तब ममता क्योंनहि उरधारी । मातुल मान्यो कंस पछारी ॥  
बृद्धि परे नीके सब कोई । हुती कछुक आशा सोउ खोई ॥  
पढे सबै एकै परिपाटी । अधिक एकते एक न बाटी ॥  
हम बावरी चलीनहि त्योंहीं । ज्यों जगचलत आपनी गौहीं ॥  
दोहा-मनकी मनहीं में रही, करिये कहा विचार ॥

हम गुहारि जितते चहत, तितते आई धार ॥  
सो०-जानतहै सब कोय, जैसी तुम हमसों करी ॥

हम सहिलीनी सोय, पावोगे अपनो कियो ॥  
उद्धवजी पूछत हम तुमको । जो हरियोगसिखावत हमको ॥  
तौ करि कृपा आपकिन आवैं । योग ज्ञान कहि प्रगट जनावैं ॥  
जो उपदेशी निकट न आवैं । तौ श्रोताक्याहै विधि मनलावैं ॥  
अबलग सुनी न काहू आनन । मंत्रदेन लागे दिन कानन ॥  
जबलगि युक्ति न सिद्ध बतावैं । तब लगि साधक कैसे पावैं ॥



हम गोकुल वे मथुरा माहीं । खेती होत सँदेशन माहीं ॥  
जोपै करी श्याम यह माया । करैं और तो इतनी दाया ॥  
दर्शन प्रथम दिखावैं आई । करहिं पवित्र चरण पखराई ॥  
योग जानिकै नगर तियागैं । सवन कुंजवन मन अहुरागैं ॥  
आसन मौन नेम आचारा । जप तप संयम व्रत व्यवहारा ॥  
योग अंग कहियतहैं जेतै । बनहींमें बनिआवैं तेतै ॥  
करि प्रबोध कर माथ छुवावैं । होहिं सिद्ध फल तौ सुखपावैं ॥  
दोहा—तबतो खेलत सौंह करि, राख्यो कहु न सुहाय ॥

अब यह योग भिरयो कहां, उद्धव कहियो जाय ॥  
सो०—हमको निर्गुण ज्ञान, जहँ स्वारथ तहँ सगुणहैं ॥

लिख पठयो निर्वान, चाटैं सहत लगायकै ॥  
बोली और एक रिस्त मानी । मझुकर ससुझ कहत किनधानी ॥  
परमधुपिये जात नाहिं दीजै । सुख देखेको न्याय न कीजै ॥  
बीचहि परे सत्यसो भाखै । राव रंककी शंक न राखै ॥  
सूझ न परत दिवस अरु राती । वात कहत हौ ठकुर सुहाती ॥  
ब्रज युवतिनको योग सिखावत । वृषभ जोति सुरभीनगनावत ॥  
रेकृतघ्न लंपट व्यभिचारी । कीरति इहै आनि विस्तारी ॥  
हम जान्यो अलिहै रस भोगी । कतसीख्यो यह योग कुयोगी ॥  
जे भयभीत होहिं लाखि माला । ते क्यों छुवैं भयानक व्याला ॥  
क्यों शठबकत छांडि लजाडरा । कहैं अबला कहैं देश दिगम्बर ॥  
साधु होयतो उत्तर दीजै । कहातोहिं कहि अपयश लीजै ॥  
अई बायसी देखियत तोहीं । इन बातन डर लागत मोहीं ॥  
प्रथमहिं यत्न आपनो कीजै । तापछे औरन शिख दीजै ॥  
दोहा—कत भ्रम करि बकबक करत, कौन सुनत तुव बात ॥  
वन कारो यों होतहै, उठिकिन ह्याते जात ॥  
सो०—देखि मूठ चित चाय, कहैं परमारथ कहैं विरह ॥



राज रोग कफ जाय, ताहि खवावतहौ दही ॥

बोली और एक कोउ नारी । उद्धव सुनिये बात हमारी ॥  
 प्रथमहि ब्रजकी कथा विचारो । पाले योग सिद्ध विस्तारो ॥  
 जाकारण पठये हैं माधो । सोविचार कछु जियमें साधो ॥  
 केतिक बीच विरह परमारथ । देखौ जियमें समुझि यथारथ ॥  
 परम चतुर हरिके निज दासा । रहत सदा संतनके पासा ॥  
 जल बूडत पुनि पुनि अकुलाई । कहा फेन पकरत हौ धाई ॥  
 सुंदर श्याम कमलदललोचना । सब विधि सुखद सकल दुख मोचन ॥  
 ब्रजको जीवन नंद दुलारो । कैसे उरते जात बिसारो ॥  
 योग युक्ति किहिकाज हमारे । बाकी मुरली पर सब बारे ॥  
 तुम निर्गुणकी कीरति गाई । करैं कहा सो बहुत बडाई ॥  
 अति अगाध पैहैं नहिं पारा । मन बुधि कर्म सबनके सारा ॥  
 रूप रेख वपु वर्ण न जासों । कैसे नेह निबाहै तासों ॥

दोहा-बिनहीं तोय तरंग अरु, बिन चेतन चतुराय ॥

अबलों ब्रजमें नहिहुती, मधुप करी तुम आय ॥

सो-कहोविविध विधकोय, नहिसुहातनंदनंदबिन ॥

अन्नधुधारत जोय, सक चंदन क्यों मुखलहे ॥

लांगी कहन और एक ग्वाली । कितबेकाज कहत है आली ॥  
 कहिये त्याहि जो होय विवेकी । यह अलिनिजबातन को देखी ॥  
 बकियासों को मूड पचावै । फटकै भुसी हाथ कह आवै ॥  
 तजि रसगेह नेह हरि पीको । सिखवत नीरस निर्गुण फीको ॥  
 देखत प्रगट नयन कछु नाहीं । ज्योति ज्योति खोजत तनु माहीं ॥  
 श्रवण सुनत जाकी मुरलीधुन । भूलि रहे शिवसे योगी जन ॥  
 सो प्रभु भुज ग्रीवापर डारी । बन बन लाज छुड़ाय बिहारी ॥  
 रास विलास विविध उपजायो । संग हमारे नाच दिखायो ॥  
 लोक लाज कुलकानि नशाई । हम सब तिनके हाथ बिकाई ॥

१ जानी । २ भौंग । ३ हठी ।



काटि सुहाग प्रेम को हेली । बोलत योग जहरकी बेली ॥  
 चौपद होय ताहि समुझये । कौन भांति षटपदाहि सिलये ॥  
 लागै कौन कहे अब याके । छाँछौ दूध बराबर जाके ॥  
 दोहा-हम विराहिनि विरहा जरी, जारी और अनंग ॥

सुखतौ तवहीं पाइहैं जब नाचैं फिर संग ॥  
 सो०-छाँड़ि जगत उपहास, दृढ व्रत कीन्हों श्यामसों ॥  
 सोई हमें सुपास, और युक्ति चाहैं नहीं ॥

सुनरे मधुष कुटिल कुविचारी । ये ब्रज लोग कृष्ण व्रत धारी ॥  
 सुन्दर श्याम रूप रस साने । श्रीगोपाल तजि और न जाने ॥  
 जो तजि श्याम औरको ध्यावैं । व्यभिचारीते भक्त कहावैं ॥  
 विद्यमान तजि सुरसँरि तीरा । चाहत कृप खोदिकै नीरा ॥  
 सुनै कौन यह सीख तुम्हारी । अति अनन्य मण्डली हमारी ॥  
 योग मोट तुम शिर धरि आनी । सो नहि ब्रजवासिन मनमानी ॥  
 इतनी दूर जाहु लै कासी । चाहत मुक्ति तहांके वासी ॥  
 हम कह करैं मुक्तिलै रखी । अबला श्यामसंगकी भूखी ॥  
 ओसन प्यास कौन विधि जाई । जबल गि नीरै न पिबै अवाई ॥  
 ऐसी बात कहौ अलि हमसों । तजहु शोच मिलिहैं हरि तुमसों ॥  
 हेतु हमारे जो पगु धारे । तौ हितकारि दुख हरो हमारे ॥  
 करहु सो यत्न श्याम जिमि आवैं । प्रगट देखि छवि हम सुख पावैं ॥  
 दोहा-सत्य ज्ञान औ ध्यान अलि, सांचो योग उपाय ॥

हमको सांचो नन्दसुत, गर्ग कह्यो समुझाय ॥  
 सो०-वश कीन्ही मृदुहास, हम चेरी नंदनंदकी ॥  
 नख शिख अंग विलास, तिनहीं देखे जीजिये ॥  
 इतमहीं सों काज हमारो । मिलिहि फेरि ब्रजनंददुलारो ॥  
 और अनेक उपाय तिहारो । राज करहु अलि हमहि न प्यारो ॥

१ कामदेव । २ लम्पट । ३ गंगाजी । ४ कुर्वो । ५ श्रीकृष्णउपासनासि-  
 वाय और किसीकी भक्ति उरमें न आनेवाली मण्डली । ६ पानी । ७ कारण ।



तुम तो मधुप प्रीति रस जानो । हम काजै कत होत अयानो ॥  
 सर्व सुमनमें फिरि फिरि आवत । क्यों कमलनमें आप बँधावत ॥  
 ज्यहि बल काठ फोरि घर करहू । क्यों न कमल दल टारत तबहू ॥  
 रँग श्याम रँग जे पहिलेसे । चढत और रँग दिनपर कैसे ॥  
 पारस परसि जो लोह सुहायो । सो किमि बहुरि सुँबक लपटायो ॥  
 सुनी जिनन मुरली ध्वनि कानन । सो किमि सुनत कींगरी तनन ॥  
 बसे जासु उर सगुण कन्हई । कैसे निर्गुण तहां समाई ॥  
 यह मन श्याम स्वरूप लुभानो । कहा करै लै योग विरानो ॥  
 सिंदूर सदा आँभष रुचि मानै । तृण न भखै पुनि तजै परानै ॥  
 हारि तजि हमैं न और सुहाई । कोटि भाँति कोउ कहै बुझाई ॥  
 दोहा-द्वैद्वग रूप विराटके, कहियत एक समान ॥

ताहू में हित चन्द्रमा, नहीं चकोरहि भान ॥

सो-लोचन रूप अधीन, सगुण सलाने श्यामके ॥

क्यों सुख पावै मीन, जल विन डोर दूध में ॥

नहि मानत ये नयन हमारे । सुख न लहत विन कान्हनिहारे ॥  
 \*भये श्याम छवि जलके मीना । मुरली ध्वनिके मृग आधीना ॥  
 अलि लोभी पंकज पद करके । कोकि कोकि नद वृत्ति दिन करके ॥  
 बदन इन्दुके कुसुद चकोरा । तन धन छविके चातक मोरा ॥  
 वही रूप परगट जब देखैं । जीवन सफल तबहि कारि लेखैं ॥  
 बिगारि परे मन मधुप हमारे । ज्ञान वचन नहि सुनत तुम्हारे ॥  
 ललित अनङ्ग रूप रस सने । खरे चकित ताते जग जाने ॥  
 श्वान पूछ लौ समनहि होई । जो कोउ बल करै पचि कोई ॥  
 सो मन गयो श्यामके साथ । सुनै कौन अब निर्गुण गाथा ॥  
 एकै मन एकै वह मुरति । अटकौ ताहि न तजौ महरति ॥  
 जो होतो दूजो मन कोऊ । तो हम लै धरती तहँ सोऊ ॥

\* मांस \* यहाँपर कृष्णछवि अरु गोपियोंके नेत्रोंकी एकता है जैसे कृष्णकी छवि जल गोपियोंके नेत्र मीन ।



उद्धव हरि हैं ईश हमारे । ते अब कैसे जात बिसारे ॥  
दोहा-योग दीजिये लै तिन्हें, जिनके मन दशवीश ॥

कित डारत निर्गुण इतै, उद्धव ब्रजमें खीश ॥  
सो०-गुण कर मोही श्याम, को निर्वाही निर्गुणहि ॥

किये जन्मोंके काम, क्यों तजिये नंदनन्द अब ॥  
कहत मधुप तुम बात सुहाई । कहतहि सुगम करत कठिनाई ॥  
प्रथम अग्नि चन्दन सी जानी । सती होन उम है सुखमानी ॥  
ताकी तपत और सियराई । कहै कौन पाछे पुनि आई ॥  
पैठत सुभट यथा रण जाई । कुसुमलता सम खड्ग सुहाई ॥  
दियो अपनपौ शूर उदारा । को अब करै तासु निरवारा ॥  
ये मनमोहन सां उरझाने । दुख सुख लाभ हानि नाहि जाने ॥  
प्रेम पंथ सूखो अति ऊधो । मति निर्गुण कंटक लै रूंधो ॥  
नेह न होइ पुरानो क्योंहीं । सरित प्रवाह नयोनित ज्योंहीं ॥  
निरखहि आनंद रूप छकी जल । रवि प्रतीति नाहि मान चढै थल ॥  
बूडत उमहि सिन्धुके माहीं । येतउनीर न पियत अवाहीं ॥  
दिन दिन बढ़त कमल दल जैसे । हरि छवि दृगन लालसा तैसे ॥  
बसे गुपाल हृदय अम्बुज अलि । निकसत नाहि सनेह रहे रलि ॥  
दोहा-योग कथा अब मति कहौ, उद्धव बारहिं बार ॥

अजै आन नंदनन्द तजि, ताकी जननी छार ॥  
सो०-यहै हमारे भाव, अब कोऊ कछुवै कहौ ॥

जैबो होय सुजाव, रही प्रीति नंदलालकी ॥  
रहै प्राण तलु प्रेमहि खोई । कौन काज आवै पुनि सोई ॥  
बिना प्रेम शोभा नाहि पावै । निशा गये जिमि शशि न सुहावै ॥  
बिना प्रेम जग खग बहुतेरे । चातक यश गावत सब ठेरे ॥  
प्रेमसहित मीननकी करणी । नयन अछत देखहु जग वरणी ॥  
हमते प्रेम जात नाहि दीन्हो । दुहुं भांति हम तो यश लीन्हो ॥

१ सहज । २ तरवारि । ३ जैसे कमलमें भ्रमर ।



मिलैं थ्याम तो अधिक स्वहायो । नातर सकल जगत यश गायो ॥  
 कहैं हम यह गोकुलकी ग्वारी । वर्णहीन घट जाति हमारी ॥  
 कहैं वे श्रीकमलाके नाथा । बैठे पाँति हमारे साथी ॥  
 निगम ज्ञान सुनि ध्यान अतीता । सो ब्रज भये हमारे भीता ॥  
 तिन्हैं संगलै रास बिलासी । मुक्ति इतै पर काकी दासी ॥  
 यह सुनि बोलि उठी इक आनै । भरो बुरो न कोऊ मानै ॥  
 रसकी बात रसिकही जानै । निरस कहा रसकी पहिचानै ॥  
 दोहा-दादुर कमलन ठिग बसत, जन्म मरण पहिचानि ॥

अलि अनुरागी जानिकै, आप बँधावत आनि ॥  
 सो०-जानै कहा मिठास, गूंगो बात सवादको ॥

मानहुँ काट्यो घास, इनसों कहिबो प्रेम रस ॥  
 धनि धनि उद्धव तुम बड़भागी । हरिसों हित नाहि मन अनुरागी ॥  
 पुरइन बसत यथा जल माहीं । जलको दाग लाग्यो कहूँ नाहीं ॥  
 गागर नेहनरिमैं जैसे । अपरस रहत न भीजत तैसे ॥  
 पैरत नदी बूढ़ नाहिं लागी । नेक रूपसों दृष्टि न पागी ॥  
 हम सब ब्रजकी नारि अयानी । ज्यों गुडसों चींटी लपटानी ॥  
 अब कासों वह लगत वखानैं । लागे बिन उद्धतको जानैं ॥  
 हृदय दहै नित शोचत रहिये । पशु वेदन ज्यों मन मन दहिये ॥  
 सबते पीर लगनकी भारी । यत्र रहित दुख सुखते न्यारी ॥  
 मंत्र यंत्र उपचार न पावैं । वेद कहाँलगि ताहि बतावैं ॥  
 घायल पीर जानिहै सोई । लाग्यो घाव जाहिके होई ॥  
 प्रेम न रुकत हमारे बूते । गज कहूँ बँधत कमलके सूते ॥  
 कैसे विरह समुद्र सुखाई । योग अग्निकी तनकलुकाई ॥  
 दोहा-यद्यपि समुझाये बहुत, हम करि मनहिं कठोर ॥  
 तदपि न कबहूँ भूलई, उद्धव नन्द किशोर ॥

सो०-क्यों सुख पावै प्रान, पलक लगत तब सहतनहिं ॥



लागे वर्ष बिहान, अब चिन देखे श्यामके ॥

तब षटमास रासके माहीं । एक निमिष सम जाने नाहीं ॥  
 अब और गति बिना कन्हाई । एक एक पल कल्प बिहाई ॥  
 तब वन वन हरि संग बिहारी । अब ब्रजमें यह दशा हमारी ॥  
 ज्यों देवी उजारि पुर माहीं । को पूजै कोउ मानत नाहीं ॥  
 कहत और यौवन अब ऐसो । चित्र अंधेरे घरको जैसो ॥  
 नयशशि अति सीरो अब तातौ । भयो सकल मुख करि तनु हातौ ॥  
 कतकरि प्रीति गये मनभावन । जासों हम लागी दुख पावन ॥  
 फिरि फिरि यहै समुझि पछिताहीं । कछो हतो आवन हम पाहीं ॥  
 याही आश प्राण तनु माहैं । बारेक बहुरि मिल्योही चाहैं ॥  
 उद्धव हृदय कठोर हमारे । फटे न बिधुरत नंददुलारे ॥  
 हमते भली जलचरी होई । अपनो नेह निबाहत जोई ॥  
 जो हम प्रीति रीति नहि जानी । तो ब्रजनाथ तजी दुख मानी ॥  
 दोहा-कहँ लगि कहिये आपनी, उद्धव तुमसों चूक ॥  
 हम ब्रजवास बसी मनहुँ, सबै दाहिने शूक ॥

सो०-उद्धव कछो न जाय, मोहन मदन गोपालसों ॥

नयनन देखो आय, एक बार ब्रजकी दशा ॥  
 बोली और एक ब्रजवाला । उद्धव भली करी गोपाला ॥  
 अब ब्रज कबहुँ आवैं नाहीं । मथुरहि रहैं सदा सुखमाहीं ॥  
 इहां चली अब उलटी चाली । देखत दुख अइहैं वनमाली ॥  
 तपत इन्हुँ सूरजकी भांती । चंदन पवन सेज सब ताती ॥  
 भूषण बसन अनेल समदागै । गृहवन कुंज भयावन लागै ॥  
 जिततितमारै ह्रुमनकी डारन । धनुशरलिये करतहै मारन ॥  
 हमतौ न्याय सहैं दुखयेतो । ब्रजवासिनी ग्वाल जड तेतो ॥  
 वेप्रभु भोग सँयोग भुवाला । क्यों सहिहैं कोमल तनु ज्वाला ॥  
 उद्धव कछो सँदेश सिधारो । जान्यो सब परपंच तिहारो ॥

१ चन्द्रमा । २ अग्नि । ३ कामदेव । ४ वृक्ष ।



बातन कहा हमें भरमावत । जलमयि सुन्यो न माखन आवत ॥  
 सगुण निकट दर्शत है जिनको । निर्गुण ओट बतावत तिनको ॥  
 जोपै निज तुम यहै बखानो । प्रभु पूरण सबमें समजानो ॥  
 दोहा-तो तुम कापै करतहौ, उद्धव आवागौन ॥  
 को नेरे को दूरहै, वहां कोन ह्यां कोन ॥  
 सो०-खोजहु पावत नाहिं, योगी योग समुद्रमें ॥

इहां बंधावत बाहिं, सो यशुदाके प्रेम वश ॥  
 हम गुवाल गोकुलके बासी । गोपनाम गोपाल उपासी ॥  
 राजानंद यशोदा रानी । यमुना नदी परम सुखदानी ॥  
 गिरिवर धारी मित्र हमारे । वृन्दावन मिलि संग विहारे ॥  
 अष्ट सिद्धि नवै निधि सब दासी । इहां नयोग विराग उदासी ॥  
 वहै प्रेम रसकी सब भूखी । कीजै कहा मुक्तिलै रूखी ॥  
 निर्गुण कहा प्रेमरस जानै । उपदेशहु जे लोग सयानै ॥  
 हम ऐसैहि अपनी रूचिमाने । रहिहैं विरह वायु बौराने ॥  
 निशिदिन सपने सोवत जागे । वहै श्याम छविसों दृगपागे ॥  
 बालेचरित्र किशोरी लीला । सुधा समुद्रसकल सुखशीला ॥  
 सुमिरि सुमिरि सोई सुखग्रामा । रटिरटि मरिहैं माधव नामा ॥  
 विरहा मधुप प्रेमको करई । ज्योंपट पुटत रंगगहि धरई ॥  
 ज्योंपट प्रथम अतल तनु तावै । बहुरि उमहिरस भरि सुखपावै ॥  
 दोहा-सम्मुख सरसहि सूर जब, रवि रथ वेधत जाय ॥

प्रथम बीज अंकुरनमहि, पुनि फल फरत अघाय ॥  
 सो०-को दुख सुखहि डेराय, कृष्ण प्रेमके पंथ चलि ॥  
 और न करू उपाय, उद्धव मीनन नीर विन ॥  
 बोलीएक सखी सुनि लीजै । अपने काज कहा नाहिं कीजै ॥  
 दिनाचारि यहहू सच करिये । जो हरिमिलैं योगहू धरिये ॥

१ अणिमा, महिमा, लविमा, गरिमा, प्राप्ति, प्राकाम्य, ईशित्व, वशित्व ।

२ महाद्य, पद्म, शंख, मकर, कञ्ज, मुकुन्द, कुन्द, नील, खर्व,



जटा बनाय भस्म तनु साजै । मूंदेरहैं नयन बिन आँजै ॥  
सिंगी दंड लेहि मृगछाला । पहिरै कंथा सेली माला ॥  
धरिधीरज सन्मुख शर सहियो । भाजे आज उवार न लहियै ॥  
धिरह ज्ञान दिख बिनहीं काजै । मरियतहैं यह दुसह दुराजै ॥  
एकसखी ऐसे कहदीन्हों । उद्धव तुम जु कह्यो सब कीन्हों ॥  
नयन मूदिकै ध्यान लगायो । इतउत मनको बहुत चलायो ॥  
उरझि रह्यो नंदलाल प्रेमवश । नेक न चलत गयो गाढे फँस ॥  
जोहार मिलत जानिहू परते । तोले योग शीशपर धरते ॥  
पहिले वेहु तिन्हहि फिरजाई । जिनपठये तुम इतहि सिखाई ॥  
लेहि न वेऊ जान हमारे । देखियत भाये परेउ तुम्हारे ॥

दोहा-भूले योगी योग जिहि, तुमसे कियो बखान ॥

जान्यो गयो नपंच मुख, ब्रह्मरंध्र तजि प्रान ॥

सो०-हम उर जाको ध्यान, हमहि दिखावहु ज्योतिसो ॥

निपटाहि छूछो ज्ञान, उद्धव कहा सुनावहु ॥

उद्धव जवते श्याम निहारे । तवते योगी नयन हमारे ॥  
शिखासीख गुहजनकी टारी । धरेउ जनेऊ लाज उतारी ॥  
पलक बसन बूधुट गृह त्यागे । दिशा दिगम्बर मन अनुरागे ॥  
सजत समाधि रूप टकलाये । भये सिद्ध नाहिं डिगत डिगाये ॥  
ताके बीच विघ्नके कर्ता । पचि पचि रहे मातु पितु भर्ता ॥  
अब ये और योग नाहिं जाने । वही श्याम छवि साधुभुलाने ॥  
भये कृष्ण मय नयन हमारे । नहीं कृष्ण हम ते कहूँ न्यारे ॥  
हम सों कहत कौनकी बातैं । गयो कौन तजि हम को हातैं ॥  
मथुरा जाय रजक किन मारेउ । धनुष तोरि किन द्विरद पछारेउ ॥  
किन मल्लन मथि कंस बहायो । उग्रसेन किन बन्दि छुड़ायो ॥  
कों वसुदेव देवकी जाये । तुम किनके पठ्यै ब्रज आये ॥  
कुंडल मुकुट गुंज उरराजै । गोकुल यशुदा नंद विराजै ॥

१ धोवी । २ गजकुबलिया ।



दोहा-को पूरण को अलख गति, को गुण रहित अपार॥

करत वृथा बकवादकत, यहि ब्रज नन्दकुमार ॥

सो०-जात चरावत धेनु, दिन उठि ग्वालन संग मिलि॥

मधुर बजावत बेनु, आवत संध्याके समय ॥

जिन उद्धव मथुरा तब देख्यो । ब्रजबसि जन्म सफल करि लेख्यो  
लेहौ कहा जाय प्रभु तामें । परिहौ जाय राज्य विपतामें ॥

निरख्यो गोकुल बाल कन्हार्इ । घरघर माखन खात चुरार्इ ॥

जन्म कर्म गुण गावो नीके । परम मधुर सुखदायक जीके ॥

नन्दराय उत्सव किमि कीन्हों । कैसे दान द्विजनको दीन्हो ॥

कैसे गोपी जन सुनि धार्इ । कैसे पट भूषण पहिरार्इ ॥

कैसे गोप ग्वाल सब आये । नृत्यत भेष विविध बनाये ॥

कैसे दधिकी कीच भचार्य । ब्रज सब भई अनन्द बधाइ ॥

बाल विनोद कौन विधि कीन्हो । कैसे गोवर्द्धन कर लीन्हो ॥

कैसे दधिको दान चुकायो । शरद रास सुख किन उपजायो ॥

यह रस प्रेम कथा चित लावो । अपनी नीरस कथा बहावो ॥

निगमनेति निर्गुण को ध्यावै । क्यों नहि प्रगट दरश चितलावै ॥

दोहा-भावतहै जो कृष्णको, योग सो हम सों देखि ॥

उद्धव सब तनु खेहकरि, सुमति होय करि पेशि ॥

सो०-सब अंग करिकै कान, बैठो मनहि बटोरिकै ॥

तजहु ज्ञान अभिमान, तौ यह अर्थ सुनावहीं ॥

नहीं जटा नहि भस्म लगावैं । रुंधैं श्वास न श्रृंग बजावैं ॥

नहीं वेद नहि पढाहीं पुराना । शम दम नेम न संयम ध्याना ॥

हम श्री गोकुल चन्द्र अराध्यो । प्रेम योग तप तिन सों साध्यो ॥

मन वच कर्म और नहि जानैं । लोक वेद दुख सुख भ्रममानैं ॥

मानपमान निंद कुल करसी । अग्नि अंचै गुरु जन बच सरसी ॥

हनाति ताप चाहैं दिशि तनु देखो । पियत धूम उपहास विशेषो ॥

१ बालक्रीडा ।



करि सुप्रेम वंदन जगवंदन । कर्म धर्म कामना निकंदन ॥  
हम जु समाधि प्रीति बानिकहरि । अंग माधुरी हृदय रही धरि ॥  
निरखत रहत निमेष नत्यागत । यह अनुराग योग नित जागत ॥  
सर्गुण रूप रंग रस रागे । भुङ्कुटि नैन नैनन लगि लागे ॥  
हंसनप्रकाश सुमुख कुंडल द्युति शशि अरु सूर देखियेउद्युति ॥  
सुरली अधर मधुर सुर गाजे । शब्द अनाद स्वई ध्वनि बाजे ॥  
दोहा-वर्षत रस रुचि मन अचै, रह्यो परम सचमान ॥

अति अगाध सुख संगको, पद आनन्द समान ॥  
सो०-मंत्र दियो रतिऐन, भजन ज्ञान हरिको हमें ॥  
गुरुकरैं अब कौन, कौन सुनै फीको मतो ॥  
उद्धव ब्रजकी रीति निहारी । भये विवश निज नेम विस्तारी ॥  
लाग्यो कहन धन्य ब्रजवाला । जिनके सर्वसमदन गोपाला ॥  
धन्य धन्य यह प्रेम तुम्हारे । भक्ति सिखाय मोहि निस्तारे ॥  
तुम मम गुरु मैं दास तुम्हारे । धन्य कृष्णपद दृढ व्रत धारे ॥  
मैं जड कीन्हो और उपाई । अब तुम दरश भक्तिनिजपाई ॥  
उद्धव आयो योग सिखावन । सीखे प्रेम भक्ति अति पावन ॥  
भये मग्न रस प्रेम विशाला । लागे गावन गुणगोपाला ॥  
लोहत कबहुँ कुंजमें जाई । कबहुँ विटपन भेंटत धाई ॥  
कबहुँ ब्रज रज शीश चढावैं । कबहुँ गोपिन पद शिर नावैं ॥  
पुनि पुनि कहत धन्य ब्रज नारी । धन्य ग्वाल गैया वनचारी ॥  
धन्य भूमि यह सुखद सुहावन । धन्य धाम वृंदावन पावन ॥  
ऐसे प्रेम मगन मन फूल्यो । कोहौं कित आयो सुधि भूल्यो ॥  
दोहा-उद्धव मन आनन्द अति, लखिकै प्रेम विलास ॥  
आयोहौं दिन दीयको, बीति गये षटमास ॥  
सो०-जब उपज्यो उरशीच, वचन कृष्णके सुरति करि ॥  
मनमें भयो सकौंच, बोल्यो हो प्रभु वेगम्वहिं ॥



तब उपंगसुत रथहि पलान्यो । मथुरा चलबेको अतुरान्यो ॥  
 उद्धव जात गोपिकनजानी । आई धाय सकल अकुलानी ॥  
 तब उद्धव सबको शिरनाई । हाथ जोरि कै विनय सुनाई ॥  
 अब म्वहिं देवि अनुग्रह कीजै । जाउँ कृष्णपै आयसुदीजै ॥  
 मैं सेवक जैसो उन केरो । त्यों जानिये आपनो चैरो ॥  
 कह्यो जुमैं कलु तुमसों आई । कृष्ण कहते करी ठिठाई ॥  
 सो अपराध क्षमा अब कीजै । हँ प्रसन्न यह आशिष दीजै ॥  
 जासों कृष्ण करैं म्वहिं दाया । रहै प्रीति तुम चरण अमाया ॥  
 करों बडाई कहा तुम्हारी । ऐसी विमल न बुद्धि हमारी ॥  
 कृष्ण सदा तुम्हरो यश गावैं । जाको अंत वेद नहिं पावैं ॥  
 कबहुँ कसुरत करत मम रहियो । जानि आपनो जनहित गहियो ॥  
 सुनि उद्धवकी निर्मल बानी । भई विवश ब्रज तिय सुखमानी ॥

दोहा—क्यों नहिं उद्धवजी कहो, ऐसे वचन विचारि ॥  
 अन्त बड़े सब भांति तुम, हम निदान जड़ग्वारि ॥  
 सो०—होय न शील समान, लघु दीरघ तातें भये ॥  
 भृगु कीन्हों अपमान, श्रीपति कर भूषण लियो ॥

कहां गरलसे वचन हमारे । कहैं अति शीतल मृदुल तुम्हारे ॥  
 तुम हित कह्यो हमैं सुखमानी । तरन उपाय वेद विधि बानी ॥  
 हम गँवारि उलटी सब बूझी । कही कहुक तुमसों जो सूझी ॥  
 लोक वेद छोड्यो हम जैसो । ताको फल भुगतैं हैं तैसो ॥  
 कहा करैं मन बहु समझावैं । श्याम दरशबिन सुख नहिं पावैं ॥  
 तुल्लभ दरश तुम्हरो हमको । कहिये जानकौनविधि तुमको ॥  
 करिकै कृपा कीजियो सोई । जैसे दरश श्यामको होई ॥  
 देखतहौ या तनुको दहिबो । समय पाय हरि आगे कहिवो ॥  
 घोष वसतकी चूक हमारी । मन नहिं धरे लाल गिरिधारी ॥  
 जानि हमैं अति दीन दुखारी । करहिं कृपामन गुणाहिं विचारी ॥

१ निर्मल । २ नम्रता । ३ विषसे ।



आवन अवधि कहीही जेई । धरिहैं सुरति वचनकी खोई ॥  
बहुत कहा कहिये ब्रजराजहि । करिहैं बांह गहेकी लाजहि ॥  
दोहा-प्रभु दीननपति दीनहित, यही हमारे आश ॥  
कबहुँक दर्श दिखायके, हरिहैं लोचन प्यास ॥  
सो०-ऐसे कहि ब्रज वाम, भई विरह सागर मगन ॥

उद्धव करि परणाम, आये यशुमति नन्दपै ॥  
मौंगी बिदा जोरि कर दोऊ । तुमसम धन्य और नहिं कोऊ ॥  
रामकृष्ण करिसुत जिनपाये । बाल भावकरि गोद खिलाये ॥  
धनि गोकुल धनि गोकुल वासी । किये प्रेमवश जिन अविनाशी ॥  
कृपाकरी म्वाहिं कृष्ण पढायो । जाते दरश सबनको पायो ॥  
अब तुम मोको देहु निदेशू । जाय कृष्णसों कहाँ सँदेशू ॥  
सुनि सप्रीति उद्धव की वांता । नंद बबा अरु यशुमति माता ॥  
उमग्यो प्रेम नयन जलवाटे । भये जोरि कर भागे ठाटे ॥  
उर बल श्याम विरहकी पीरा । कहत सँदेश बहुत दगनीरा ॥  
उद्धव हरिसों कहियो जाई । यशुदाकी आशीष सुनाई ॥  
कमलनयन सुंदर सुखदाई । कोटि युगन जीवहु दोउ भाई ॥  
कहियो बहुरि इती समुझाई । तुमचिन दुखित यशोमति माई ॥  
इतनी दया मात पै कीजै । एक बार दरशन फिर दीजै ॥  
दोहा-नंद दोहनी भरि दई, कह्यो नयन भरि नीर ॥  
वा धौरीको दूध यह, भावत हो बलबीर ॥  
सो०-दई यशोमति माय, मुरली ललित गोपालकी ॥  
उद्धव दीजो जाय, प्यारीही अति लालकी ॥

अथ उद्धवजीकी मथुरागमन लीला ॥

उद्धव लै माथे धरलीनी । लखि शुभप्रीति दंडवत कीनी ॥  
चल्यो योगकी नाव बुडाई । हैगयो आप गोप ब्रज आई ॥  
जाय कृष्णपद शीशनवायो । प्रभु सादरहै कंठलगायो ॥



कहिये सखा कुशलसों आये । ब्रजमें जाय बहुतादिनलाये ॥  
 नंदबबा अरु यशुमति माई । कहौ कौनविधि देखे जाई ॥  
 वसत प्राण मोहींमें जिनके । कैसे दिन बीततहैं तिनके ॥  
 कहा दशा ब्रजगोपिन केरी । जिनके प्रीति निरंतर मेरी ॥  
 उद्धव समुझत ब्रजकीवाता । भये प्रेमवश पुलकित गाता ॥  
 भूल्यो यदुपति नाम बड़ाई । कछो सुनौ गोपाल गुसाई ॥  
 कहौ कहा प्रभु तुम्हें सुनाई । ब्रजकी रीति कही नहिं जाई ॥  
 कृपाकरी स्वहिं तहां पठायो । ब्रजवासिनको दरश दिखायो ॥  
 जादिन गयो तुम्हें शिरनाई । पहुँच्यो सांझ गोकुलहि जाई ॥

दोहा-दूरहिते लखि रथ ध्वजा, अरु पट पीत रसाल ॥  
 जानि तुम्हें आवत हरषि, धाये गोपी ग्वाल ॥

सो०-रथपर मोहिं निहार, रहे ठगे से थकि सबै ॥  
 चली दृगन भरिधार, रहे मुरछि व्याकुल धरणि ॥

भये बिकल सब आशाटूटे । विरह घात सुरझे फिर फूटे ॥  
 जब तुम्हें पठ्यो स्वहिं जान्यो । लै नैद सदनमाहि सनमान्यो ॥  
 तुमबिन यशुमति परम दुखारी । वृद्धी कुशल सराम तुम्हारी ॥  
 तृषित चातकी ज्यों अकुलानी । कृष्ण कृष्ण लागी जकबानी ॥  
 बारहि बार यहै पछिताहीं । प्रभु प्रभाव हम जान्यो नाही ॥  
 बांधे ऊखल तनक दहीको । अब कसकत कसनी सोहीको ॥  
 ब्रज अब शून्य बिना मनमोहन । परम अभागी गई न गोहन ॥  
 ठाढ़ीरहीं ठगोरी लाई । विरध बर्यस तजिगये कन्हाई ॥  
 दशरथ प्राणतजे सुतलागी । मैं देखतही रही अभागी ॥  
 अब जनु ऐसेही मरि जैहौं । बहुरि न श्यामहिं कनियां लैहौं ॥  
 यों तुम्हरे हित यशुमति माता । अतिहिदीन दुःखित बिलखाता ॥  
 नंदहु छुमिरत तुम गुण ग्रामा । बीती निशौ चारहु यामौ ॥  
 दोहा-यद्यपि मैं बोधे बहुत, तुम बिन कछु न स्वहात ॥

१ आंखोंसे आंशुकीधार । २ वृद्धावस्था । ३ रात्रि । ४ प्रहर ।



तिनकी दशा विलोकि म्वाहिं, युग सम बीती रात ॥  
 सो०-नंद यशोदहि पाय, गयो प्रात वृषभानुपुर ॥  
 सुनि सब आई धाय, धाम काम ताजि बाम तहैं ॥  
 मोहिं तुहारो निज जन जानी । सन्मान्यो सबही सुख मानी ॥  
 लखिषट भूषण चिह्न तुम्हारे । भई प्रेमवश सुरत सम्हारे ॥  
 शिथिल अंग भरि आये नयना । पूंछी कुशल सुगद्गदवयना ॥  
 जब मैं कह्यो सँदेश तुम्हारे । सुनतहि आयो सबन पत्थारो ॥  
 बीती घरिक धीर उर आन्यो । मेरो कह्यो साँच नाहिं मान्यो ॥  
 दूषण सब कुबिजाको दीन्हों । कछुक परेखो तुमसों कीन्हों ॥  
 तिनकी बात न जात बखानी । प्रेम पन्थ वे सकल सयानी ॥  
 बह रसरती देखि उनकेरी । कटक कथा लागी म्वाहिं फेरी ॥  
 यद्यपि मैं बहु विधि समुझाई । ग्रंथ युक्ति सब कथा सुनाई ॥  
 कहिबे मैं न कछू सकराख्यो । भयो पवन ज्यों भुसमें भाण्यो ॥  
 ज्ञान पंथ जो श्री मुख बानी । सोसब तिनको भई कहानी ॥  
 कइइक कही बनाइ अनेका । उनके दृढ व्रत पतिव्रतएका ॥  
 दोहा-गही एकही गहन उन, भेटि वेद विधि नीति ॥  
 गोप भेष भजि सांवरे, रही विश्वभरि जीति ॥  
 सो०-नहिं सीखैं शिख आन, जो विधि जाहि सिखावहीं ॥  
 तुमहूं बड़े सुजान, उहां जाहु तो जानहु ॥  
 क्षमा करो आयसु जो पाऊं । तौ अपनी सब विपति सुनाऊं ॥  
 योग कथा कहि अबलन माहीं । होवैतौ दुःख क्यों नाहीं ॥  
 मैं निर्गुण गुण एक बखानो । सोऊ पूरो कहि नाहिं जानो ॥  
 वे सब उमगे वारिधि ज्योंहीं । जामें थाह न पाऊं क्योंही ॥  
 कहौं एक मैं पहरैक माहीं । वेकोटिक क्षणमें कहि जाहीं ॥  
 कौन कौनको उत्तर आवै । सुनत सबै उनहींको भावै ॥



प्रेम प्रीति उनकी लखि बाँकी । धरी रही सब बात पैहांकी ॥  
 रह्यो चकित जिमि मनकी ऊलैं । जैसे हरिण चौकरी भूलैं ॥  
 वे पारत पटिया मो शीशा । सिखवों काहि योग जगदीशा ॥  
 वे षटवेत्ता सकल स्वभाज । मैं शठ बारह खरी पढाऊ ॥  
 अबलन वचन सुनतही मेरे । भई अग्नि ज्यों घृतके मेरे ॥  
 बहुत भांति करि मैं सब यांची । एकै अंग नकोऊ कांची ॥  
 दोहा-सगुण प्रेम दृढ उन गह्यो, यथा पपीहा पैद ॥  
 जानि लेहु प्रभु तुम यहां, कहा निरोगहि वैद ॥  
 सो०-तिन्हें निरन्तर ध्यान, श्याम राम अंबुज नयन ॥  
 लागत फीकी ज्ञान, अवलोकत उनको भजन ॥  
 मैं देख्यों षटमास खोजकर । एकैरीति सबै ब्रज घरघर ॥  
 ज्यों कुरुखेत दिये वाढत धन । त्यों अधिकात प्रेमनित तुम तन ॥  
 प्रकट तुम्हारे गुणचित दीन्हें । देह गेह अर्पण सब कीन्हें ॥  
 कोऊ कहत गये गोचारन । कोऊ कहगये अघासुर मारन ॥  
 कोऊ कहत इंद्रजल जाई । गोवर्द्धन करलियो कन्हारि ॥  
 कोऊ कहत यमुन सुनिकाली । नाथन गये ताहि वनमाली ॥  
 घरघर दुहत कहतकोउवाला । कोऊ कहै वन खेलत नँदलाला ॥  
 कोऊ कहत कुटिल लंघट हरि । बसे जायरी धौं काके वरि ॥  
 एक कहत वन बेणु बजावैं । चलौ सुनत यों कहि उठि धावैं ॥  
 ऐसी लीला प्रकट बखानैं । मेरो कह्यो न कोऊ मानैं ॥  
 हरि मानी निजमति घटजानी । सुनि लीन्हों उनकी मैं बानी ॥  
 प्रीति रीति लखि तहां डुलान्यो । नाथ तुम्हारी सुरति भुलान्यो ॥  
 दोहा-तुमसों आवन कहिगयो, वेगहि ब्रजते नाथ ॥  
 उन लखि उनसों हैलगयो, गावन उनके साथ ॥  
 सो०-बीत गये षट मास, समुझि परी आयो कहां ॥  
 तब उपज्यो जिय त्रास, भाज चलौ दै आन काहि ॥

१३ द्वयजीके मनमें जो निर्गुण ब्रह्मज्ञानको पक्ष था सो कहते हैं महाराज ब्रह्म-  
 ज्ञान तो मेरेहोमैंरहा परन्तु मैं वहांसे और ज्ञानी होआया ।



बहुरि कहां मोको सुख वैसो । रसलीला विनोद ब्रज कैसो ॥  
कहत न बनै देखतहि भावैं । यह सुख बड़ भागी स्वइपावैं ॥  
बस्यो न पांचो दिन उन माहीं । तासु जन्म जग माहिं वृथाहीं ॥  
नहि श्रुति शेष ब्रह्म सुख पायो । जोरस ब्रज गोपिन मिलि गायो ॥  
निरखत यदपि यहाँ यह सूरत । तदपि जाय उतही मन पूरत ॥  
वरही मुकुट गुंजकी माला । सुख मुरली ध्वनि वेणु विशाला ॥  
आगे धनु रेनु मण्डित तन । तिरछी चितवन चारु हरण मन ॥  
गोपी ग्वालन सों हरि बोलत । खेलत खात हँसत ब्रज डोलत ॥  
तब वह सुख समुझत मन भावैं । इत यह लखि कछु कहत न आवैं ॥  
तुम्हरी अकथ कथा तुम जानो । मैं कह समुझाँ मूढ अयानो ॥  
हिय मैं मोहिं बहुत यह शालै । तुम तौ प्रभु करुणाकै आलै ॥  
होत कठोर कठिन मन काहे । बनत कौन विधि बिनानिबाहे ॥

दोहा--निगम कहत वश अलकके, पूरण सब सुख साज ॥  
करि सु इष्टि ब्रज पेखिये, गहो विरह की लाज ॥  
सो--अतिहि दुखित तनु क्षीन, ब्रजवासी तुम विरह वश ॥  
तुम तन धन मन लीन, रटत चातकी लौं सबै ॥

कहाँ कहा गति प्रभु राधाकी । जैसी विरह व्यथा बाधाकी ॥  
भूषण बिन अति क्षीण शरीरा । बसन मलीन श्रवत दृग नीरा ॥  
सुधि बुधि कछु देहकी नाहीं । रहत वावरी ज्यों घर माहीं ॥  
कबहुँक कृष्ण कृष्ण रट लावैं । कबहुँक नाम आपनो गावैं ॥  
बिबिधिशि अभि काट कृमि जैसे । सहत विरह दुख दुहँदिसि तैसे ॥  
लहत न क्योंहुँ शीतल ताई । कबहुँ रहत मौन शिरनाई ॥  
गृहजन देखि देखि दुख पावैं । नहि कछु सुनति कोटि समुझावैं ॥  
सूखी जिमि नलनी बिनपानी । जुगवत यत्न न सखी सयानी ॥  
तुणके अग्र ओसकण जैसे । आशा अवधि प्राण तनु तैसे ॥



अचरजमोहिं बड़ो यह आवै । प्रभु तुमको कैसे। यह भावै ॥  
 करुणामय प्रभु अन्तर्यामी । भक्तन हित तनुधारी स्वामी ॥  
 वेगि कृपाकरि दर्शन दीजै । ब्रज जन भरत ज्याय सब लीजै ॥

दोहा-यह मुरली दै बिलखिकै, कह्यो यशोमति माय ॥

एक बार हित नंदके, दरश दिखावहिं आय ॥

सो०-जिन गैयनको श्याम, आप चराई हेत करि ॥

बहुरिन आई धाम बिडरी कुंजन में फिरत ॥

सुनिकै प्रभु उद्धवके बेना । उमंगे प्रेम भरे दोउ नैना ॥

ब्रजजनप्रीति आय उरशाली । भये विवश जन प्रणप्रतिपाली ॥

लै उठाय मुरली उर लाई । धरि ब्रजध्यान रहे अरगाई ॥

सहज स्वभाव कृपालुहि ऐसे । होत तुरत जैसनको तैसे ॥

पुनिहा ब्रजकहि छांड़ि उशासू । पोंछ पीत पट जलसां आंसू ॥

उद्धव सां यों वचन सुनाये । भले सखा शिषदै ब्रज आये ॥

मनमें यों प्रभु कियो विचारा । ब्रज भक्तन मम रूप अधारा ॥

मेरे मुक्ति बड़ी निधि सोई । सोबेनहीं आदरत कोई ॥

ताते जो जनके मन भावै । सोई मोहिं करत बनि आवै ॥

भक्ताधीन सो पर्ण हमारे । ब्रजवासी मोको अतिप्यारे ॥

सदा बसत ताते ब्रज माहीं । इन सभ मोहिं और हितु नाहीं ॥

सब समर्थ प्रभु सब गुणनागर । ब्रजवासी जनके सुखसागर ॥

दोहा-मन करि हरि ब्रजमें रहे, मिलि ब्रजजन मनसाथ

तनकहि देवन काज हित, भये द्वारकानाथ ॥

सो०-सदा बसत ब्रज श्याम, नटवर वपु मुरली धरे ॥

ब्रज जन पूरण काम, कोटि काम लावण्य निधि ॥

बसत सदा ब्रज कुँवर कन्हवाई । ब्रजवासी जनके सुखदाई ॥

कृष्ण प्रेम मुराते ब्रजनारी । कबहूँ नहीं कृष्णते न्यारी ॥

नित्य नवल नित वनहिं विहारा । ब्रजविलास नित नवल उदारा ॥

नित्य धाम वृन्दावन पावन । नित्य रास रस परम सुहावन ॥



शिवसनकादि शेष ज्यहि ध्यावैं । सुर नर मुनि सब ध्यान लगावैं  
ब्रज गोपिनकी महत बड़ाई । एक समय ब्रह्मा सब गाई ॥  
भृगु नारद आदिक जे भक्ता । पृथुत भये विनय संयुक्ता ॥  
तिनसों विधि यहि भांति बखानो । वेद ऋचा सब ब्रजतिय जानो ॥  
इन सम सत्य कहों तुम पाहीं । मो शिव शेष लक्ष्मी नाहीं ॥  
नहीं कृष्णते इक क्षण न्यारी । इनते और नकोउ अधिकारी ॥  
इनके भाव कृष्ण जो ध्यावैं । प्रीति रीति दृढ़ करि मन लावैं ॥  
नारि पुरुष कोऊ किन होई । वेद ऋचा पावैं गति सोई ॥

दोहा-परशे इनकी चरण रज, वृन्दावन महि माहि ॥  
सोऊ गति इनकी लहै, यामें संशय नाहि ॥  
सो०-यों विधि कही बुझाय, महिमा ब्रज गोपीनकी ॥  
व्यास कही सो गाय, पावन वृहतपुराणमें ॥

ताते भृगु आदिक नारद मुनि । इन्द्रादिक सुर शिव ब्रह्मा पुनि ॥  
अरु हरि भक्त जगतते अहहीं । वृन्दावन रज बांछित रहहीं ॥  
ब्रजरज अति दुर्लभ श्रुति गावैं । बडभागी जन तेई पावैं ॥  
चित धरि सोई ब्रज रस रासा । ब्रज विलास गायो ब्रजदासा ॥  
कृष्ण चरित ब्रजवन निकुंजको । सार सकल सुख सुकृत पुंजको ॥  
सार ज्ञान विज्ञान ध्यानको । वेद शास्त्र स्मृति पुराणको ॥  
सार बहुरि इतिहास भजनको । योग जाप अरु यज्ञ जननको ॥  
सार अमित मुनि संत मतनको । हरि पद पंकज प्रेम यतनको ॥  
सार जन्म अरु सुगति सुक्तिको । परमानन्द हविमल भक्तिको ॥  
सार सकल रस रसिकाईको । परम मधुर सुन्दरताईको ॥  
सार सारको परम सुहायो । ब्रजविलास भक्तन मन भायो ॥  
सहितस्वभाव प्रीति जो गेहैं । तेजन गति गोपिनकी ॥

छंद-यह ब्रजविलास हुलास सो नर, नारि मुनि जे गाइहैं ॥  
सीखैं सिखावैं पढ़ैं हचिकर, प्रेम मन उपजाइहैं ॥  
नारि भाव भरता कृष्णसों, उर कमल पद चित लाइहैं ॥



हरि राधिकापरसादते ब्रज, गोपिका गति पाइहैं ॥  
 पूरण सकल मन काम सबसुख, धाम यश नंद लालको ॥  
 दलन दारिद दोष दुख भय, भव हरण यम कालको ॥  
 यह जानि गावहिं सुजन गायो, जिनन आनंद पदलख्यो ॥  
 तिनकी कृपा बल पाय कछु, इकदास ब्रजवासी कह्यो ॥  
 दोहा—ब्रजविलास ब्रजराजको, कोकहि पावै पार ॥  
 भक्त भाव गावत भगत, भजन प्रभाव बिचार ॥  
 सिंगरे दोहा आठसौ, और नवासी आहिं ॥  
 हैं इतनेहीं सोरठा, ब्रज विलासके भाहिं ॥  
 दश सहस्र षट् सौ अधिक, चौपाई बिस्तारु ॥  
 छन्द एक शत षट् अधिक, मधुर मनोहर चारु ॥  
 सबको सुष्टु छंद करि, दश सहस्र परिमान ॥  
 खण्डित होन न पावही, लिखियो जान सुजान ॥  
 विधि निबंध जाने नहीं, कछु ब्रजवासी दास ॥  
 ज्यों जाने त्यों राखि हैं, नंदनंदनकी आश ॥  
 नहीं तप तीरथ दान बल, नहीं कर्म व्यवहार ॥  
 ब्रजवासीके दासको, ब्रजवासी आधार ॥  
 ब्रजवासी श्रद्धा सदा, जन्म जन्म करि नेह ॥  
 मेरे जप तप व्रत यहै, फलदीजै पुनि एह ॥  
 इति श्रीब्रजविलासे सबसुखरासे भाक्ति-

प्रकाशे, कृत ब्रजवासी दास

संपूर्णम् ।

प्रकाशक मिलनेका ठिकाना—

द्वाराश्री श्रीगुरुदास “ श्रीविद्मेश्वर ” छापाखाना—बंबई.



॥ श्रीः ॥

# कव्यपुस्तकोंकी-संक्षिप्त-सूची ।

नाम.

की.रु.भा.

## भाषावार्तिक ।

शुकसागर बडा लाला शालिग्रामजी अनुवादित				
शंका समाधानों दृष्टांतों समेत उत्तम-				
ग्लेज ... ..	...	...	...	१२-०
" तथा रफू ... ..	...	...	...	१०-०
शुकसागर मध्यम अक्षर ग्लेज ७ रु. रफू ...	...	...	...	६-०
शुकसागर छोटा अक्षर ग्लेज लाला शालिग्राम				
कृत ... ..	...	...	...	५-०
" तथा रफू ... ..	...	...	...	४-०
वाल्मीकीरामायण केवल भाषा जिल्दबँधी ...	...	...	...	१०-०
रामाश्वमेध केवल भाषा जिल्दबँधी ...	...	...	...	२-०
शिवपुराण केवल भाषा जिल्दबँधी ...	...	...	...	६-०

## भाषा-काव्य ।

रामरसायन रामायन-रसिकविहारीकृत ...	...	...	...	४-०
रसिकप्रिया सटीक ... ..	...	...	...	१-४
रामचंद्रिका सटीक कवि केशवदास प्रणीत ...	...	...	...	२-०
विज्ञानगीता केशवदासकृत ( वेदान्त ) ...	...	...	...	०-१०
काव्यनिर्णयभाषा छन्दबद्ध [ भिखारीदासकृत ]				
मनहरण छन्दोंमें कठिन ( अलंकार ) वर्णन				१-४



नाम	की.रु.आ.
जगद्विनोद [ पद्माकरकृत नायकाभेद ]	... ०-८
रसरज [ मतिरामकृत नायका भेद ]	... ०-६
ब्रजविलास बडा मोटेअक्षरका टिप्पणीसहित ...	४-०
ब्रजविलास मध्यमअक्षर टिप्पणी सहित विला- यती जिल्द ... ..	२-०
तथा रफ कागजका ... ..	१-८
ब्रजचरित्र ( श्रीराधाकृष्णजीकी सर्वलीला सुगम दोहा चौबोलोंमें वर्णितहैं ) ... ..	३-०
प्रेमसागर टाईपका बडा ग्लेज कागजका ...	१-१२
प्रेमसागर टाईपका बडा रफ ... ..	१-४
भक्तमाला रामरसिकावली बड़ी रीवाँबिषति महाराज रघुराजसिंहकृत अत्युत्तम छन्दबद्ध जिसमें चारोंयुगोंके भक्तोंकी भिन्न २ कथा हैं और द्वितीयावृत्ति उत्तर चरित्र समेत अत्युत्तम नई छपी है ... ..	४-०
रामस्वयंवर श्रीमहाराजारघुराजसिंहकृत ( काव्य- देखनेयोग्य ) ... ..	४-८
भक्तमाल नाभाजीकृत सटीक ( छंदबद्ध )	१-४
विमणीपरिणय महाराज श्रीरघुराजसिंह देव ... ..	१-८



नाम	की.र.आ.
महाभारत भाषा सबलसिंहकृत-तुलसीदासजी की रामायणकी रीतिसे दोहा चौपाईमें (१८)	
अठारहोंपर्व ... ..	३-८
तथा प्रथम भाग ( ३-आदि, सभा, वनपर्व )	१-०
तथा द्वितीय भाग ( २-विराट, उद्योगपर्व )	१-०
तथा तृतीय भाग ( ८-भीष्म, द्रोण, कर्ण, शल्य, गदा, सौप्तिक, ऐषिक, स्त्रीपर्व )...	१-०
तथा चतुर्थ भाग ( ५-शान्ति, अश्वमेध, आश्रम वासिक, मुशल, स्वर्गारोहणपर्व ) ...	१-०
विजयमुक्तावली ( महाभारतका सूक्ष्म वृत्तांत छंदबद्ध ) ....	१-०
अर्जुनगीता भाषा ... ..	०-४
गर्जेन्द्रमोक्ष भाषा ....	०-१॥
शनिकथा कायस्थकी ....	०-१॥
शनिकथाराधवदासकृत ... ..	०-३
शनिकथा बडी पं० रामप्रतापजीकृत ...	०-८
रुक्मिणीमंगल बडा ( पद्मभक्तकृत मारवाडी भाषा ) ... ..	१-४
हनुमान्बाहुक पंचमुखी कवच समेत ....	०-१॥
नासिकेतपुराणभाषा ( स्वर्गनरकका वर्णन ) ....	०-६
नरसीमेहताका मामेरा बडा ... ..	०-५
विस्मिलपरिवारका स्वांग ( इश्कचमन ) ...	०-८



नाम	की.ह.आ.
सूर्यपुराणादि १९१ स्तन अतिउत्तमकागज और	
.....	०-८
सुल्हास बडा मोटेअक्षरका टिप्पि.....	०-६
ज्ञानमाला ....	०-२
मंगलदीपिका अर्थात् शाखोच्चार ...	०-१॥
दंपतिवाक्यविलास-जिसमें सबदेशांतरकी यात्रा और धंधेके सुखको पुरुषने मंडन और स्त्रीने खंडन किया है दोहा कवित्तोंमें ( सुभाषित ) ....	०-१२
रसतरंग ज्ञानभक्तिमार्गी अजब रँगिले पद्य कृष्ण गठ महाराज प्रणीत....	०-८
दादूरामोदय संस्कृत-दादूपंथी साधुओंको ...	०-१०
श्यामकामकेलि ....	०-४
परमेश्वरशतक....	०-६
भक्तिप्रबोध ...	२-०
भावपंचाशिका कविवृंदजीकृत ....	०-२

संपूर्णपुस्तकोंका “ बडामूचीपत्र ” ) ॥ आध आनेका

टिकट भेजकर मँगालीजिये.

पुस्तकोंके मिलनेका ठिकाना—

खेमराज श्रीकृष्णदास,

“श्रीवेकेश्वर” छापाखाना खेतवाडी—मुम्बई.



Vinay Avasthi Sahib Bhuvan Vani Trust Donations

